



ଜଗତ୍‌ମୋହନ ସିଂହ
ରଚନାସଂଗ୍ରହ




ସଂକଳନ □ ସମ୍ପାଦନା
କାଞ୍ଚନବରଣ ସିଂହ







জগৎমোহন সিংহ রচনাসংগ্রহ



জগৎমোহন সিংহ
ৰচনাসংগ্ৰহ

সংকলন □ সম্পাদনা
কাঞ্চনবৰণ সিংহ



নিখিল বিষ্ণুপ্ৰিয়া মণিপুৰী সাহিত্য পৰিষদ, অসম

JAGAT MOHAN SINGHA ROCHONA SANGRAHA : A Collection of Literary Works of Late Jagat Mohan Singha (1920-85); An eminent Bishnupriya Manipuri Poet, Playwrite, Writer, Philanthrope & Social Worker, Compiled and Edited by Kanchan Baran Singha and published by Shibendra Sinha, General Secretary, on behalf of Nikhil Bishnupriya Manipuri Sahitya Parishad, Assam, Bhakatpur, Chincoorie Road, Silchar - 788005, Cachar on the 13th December 2022.

জগৎমোহন সিংহ রচনাসংগ্ৰহ

© নিখিল বিষ্ণুপ্ৰিয়া মণিপুৰী সাহিত্য পৰিষদ, অসম

১ম সংস্কৰণ : ১৩ ডিসেম্বৰ ২০২২

জগৎমোহন সিংহ গিৰকৰ ১০২ তম জন্মবাৰ্ষিকীৰ দিনে

সংকলন বাৰ সম্পাদনা : কাঞ্চনবৰণ সিংহ

প্ৰকাশক : শিবেন্দ্ৰ সিংহ

সাধাৰণ সম্পাদক

নিখিল বিষ্ণুপ্ৰিয়া মণিপুৰী সাহিত্য পৰিষদ, অসম

ভকতপুৰ, চেংকুড়ি ৰোড, শিলচৰ-৭৮৮০০৫, কাছাড়, অসম

মুদ্ৰণ : সৱলা ড্ৰয়েভ এণ্ড প্ৰিন্টিং,

গিৰিধন ধাম, ভকতপুৰ, চেংকুড়ি ৰোড

শিলচৰ-৭৮৮০০৫, কাছাড়, অসম

ISBN : 978-81-959418-0-3

তাংখা : ২০০/-

উৎসর্গ
জগৎমোহন সিংহ গিরকরে বানাপাকুরা
বর্তমান বার ভবিষ্যৎ প্রজন্মর আতে



লে ই ত্রে ২

সভাপতির আকৃষ্টি

প্রকাশকর দ্বি-আকৃষ্টি

ভূমিকা

জুনাক পরীর দেশে (শিশু কাব্য; ২০০৫)

রসমঞ্জরী (কাব্য; ২০০৩)

রসমঞ্জরী

রসার্থ

বন্দনা

রসকীর্তন

আদিরস

বীররস

করুণরস

অদ্ভুত রস

হাস্যরস

ভয়ানক রস

বিভৎস রস

রুদ্ররস

শান্তরস

বাৎসল্য রস

কুপিয়া হিয়রে

ইয়ারকা

কাণ্ডারী। ছশিয়ার করৌরি তোরে

মিলন

কলাসরর এলা

লুকা ধর

লয়লাটি

অমৃতর শৌ

মুসাফির

কবিতা ঠইগ ১

কবিতা ঠইগ ২

... ২৯

... ৪২

... ৪২

... ৪৩

... ৪৫

... ৪৬

... ৪৭

... ৪৮

... ৪৮

... ৫০

... ৫০

... ৫১

... ৫২

... ৫২

... ৫৩

... ৫৩

... ৫৫

... ৫৬

... ৫৯

... ৬১

... ৬৫

... ৬৬

... ৬৭

... ৭০

... ৭৩

... ৭৪

কবিতা ঠাইগ ৩	...	৭৮
কবিতা ঠাইগ ৪	...	৮০
পূর্ণিমা রাত্তি	...	৮২
ফাগুয়া	...	৮৩
যমুনা পুলীনে	...	৮৪
পূর্ণিমার নাছা	...	৮৫
বন্দনা	...	৮৬
নিভৃত নিকুঞ্জবন	...	৮৭
মিতা	...	৮৮
মোর খৌরাং	...	৯১
কলঙ্ক লুপ্ত	...	৯১
আত্মজ্ঞানর এলা	...	৯৪
দলান ইপুর করপেখ : ১		
দলানইপুর করপেখ	...	৯৬
কালা বর্ণর গুণ	...	৯৯
আসন-ফিদার গুণ	...	১০২
কিহর কা?	...	১০৫
ঠুনিংখা ভাঁগের বনহানাত	...	১০৮
যেবাকা হপন ভাঁগিল	...	১১০
শয়নে	...	১১৩
মিহল	...	১১৫
৮ম য়্যারিহান	...	১১৬
বাইচান	...	১১৭
বেয়াপার সভা ১	...	১১৮
বেয়াপার সভা ২	...	১২২
অসংকলিত রচনা		
দলান ইপুর করপেখ : ২		
নাঙর মহিমা	...	১২৬
প্রকৃত সমাজসেবী	...	১৩০
বিদুতিতু	...	১৩৩

নিভৃত নিকুঞ্জ	...	১৩৬
পরিভ্রমণ	...	১৪১
লোকসাহিত্যের য়ারি :		
আইডিংডিঙর মালক	...	১৪৪
কলার জিন্	...	১৪৬
হরালী প্রেত্নী	...	১৫০
শয়তান বাবাই	...	১৫২
ছাগি লামচিক	...	১৫৫
য়্যারি :		
ভিসা পাশপোর্ট	...	১৫৮
নির্বন্ধ	...	১৬৫
না-মি-না	...	১৭৪
পানি	...	১৭৬
এলা :		
১. বিষ্ণুপ্রিয়া উই নে অসময়ে ঘুমজিয়া থাইলে	...	১৮০
২. ইমা তোর সালে আমি, অসিতা ডেই ডেই হারা	...	১৮০
৩. জনম জনমে মোরে	...	১৮১
৪. লকতাকে কাঁদের	...	১৮২
৫. কিহান কানায় জরম অইলু	...	১৮৩
৬. কিহান মাততু অ আঠইপা	...	১৮৩
৭. জরম নাইল তোর উরে ইমা	...	১৮৪
৮. হে গুরু! অনুপম ভুবনেশ্বর	...	১৮৫
৯. অ ভারত ইমা	...	১৮৫
কবিতা :		
মেঘদূত	...	১৮৮
কান্তা	...	১৮৯
পাতিয়ালার এলা	...	১৯০
গোধূলী	...	১৯১
প্রবন্ধ :		
সত্যং ক্রয়াৎ ১	...	১৯৩

সত্যং ক্রমাং ২	...	১৯৪
পরম ভাগবত শ্রীশ্রীভুবনেশ্বর সাধুবাবা	...	১৯৭
অর্থ্য	...	১৯৯
রাস্ত্র দশা	...	২০১
সাহিত্য-তীর্থরমা খুঁচিধরা	...	২০৩
বানান-সমস্যা	...	২০৬
সংসার ধর্ম বার গীতাসঙ্গ	...	২০৯
নাম-স্রংশ	...	২১২
মুভামুভি :		
জগৎমোহন সিংহ গিরকর তুল নুয়া এলা পত্রিকার সম্পাদক	...	২১৫
নাটক :		
যমপুরী	...	২২১
চিঠি :		
অভিনন্দন	...	২৩৭
সমাজরাং নিবেদন আকচুটি	...	২৩৮

সভাপতির আকৃষ্টি

নিখিল বিশ্বপ্ৰিয়া মণিপুৰী সাহিত্য পৰিষদ হঙনিৰ খেলতামে সমাজপ্ৰাণ জগৎমোহন সিংহ গিৰকৰ গুৰুত্বপূৰ্ণ ভূমিকাৰ কথা হাবিয়েউ হাৰপাসি। মৰণৰ আগ পেয়া গিৰকে পৰিষদৰ সভাপতিৰ পদফামে থায়া ইমাঠাৰ প্ৰতিষ্ঠাৰ আন্দোলনে নিভীক সিবেই আগৰ সাদে সক্ৰিয়ভাবে কাম কৰিয়া গেলগা। গিৰকৰ সমাজপ্ৰেম, লু চিন্তাধাৰা, বাগ্মিতা বার জিননেই কামৰ সালে সমাজে গিৰকে প্ৰভাব বিস্তাৰ কৰেসিল।

জগৎমোহন সিংহ প্ৰধানত সমাজসেবীগ হিসাবে নাঙ পালইলেউ সাহিত্য সাধনাৰ দিক এহানাত গিৰকে নিজৰ প্ৰতিভাৰ স্বাক্ষৰ থায়া গেসেগা। বহুমুখী প্ৰতিভাৰ অধিকাৰী জগৎমোহন সিংহ গিৰকে রসাল ব্যঙ্গ রচনা ‘দলান ইপুৰ কৰপেখ’-ল পইলা সরস গদ্য রচনাৰ অকরাগ দেসে। গিৰকে কবিতা, এলা, নাটক রচনাৰ, আদৰ্শল, কবি ব্ৰজেন্দ্ৰ কুমাৰ সিংহৰ ভাষাত ‘চুখকৰ সাদে ব্যক্তিত্বল’ সমসময়ৰ সাহিত্য জগতবে প্ৰভাবান্বিত কৰেছিল।

আজি সাহিত্য পৰিষদে গিৰকৰ লেংকরা হাবি পুলকৰিয়া ‘জগৎমোহন সিংহ রচনা সংগ্ৰহ’ ফংকৰানিৰ ঠৌরাঙ কৰে পাৰিয়া আমি নিয়াম হাৰৌ অসি। উতাৰ গজে এবাকৰ সময়ৰ অন্যতম প্ৰভাবশালী তৰুণ লেখক, কবি, গবেষক, পত্ৰিকাৰ সম্পাদক, সাহিত্য পৰিষদৰ একিন সেবাৰি কাৰ্যকৰণ সিংহ গিৰকৰ সাদে, ব্যক্তিত্ব আহানে এ কাম এহান সুকলমে সম্পাদন কৰা নিয়ে আমি লেৰিক এহান হাবিগদে বুজ্জিল ভৰা অইতই বুলিয়া নিংকৰিয়াৰ।

হেৰ এগত অসম সরকারে ‘কৰ্পাস ফান্ডগ হংকৰিয়া লেৰিক এহান ফংকৰানিৰ সুযোগ কৰে দেনাৰকা সরকারে থাকাং নাদিয়া নুবাৰিয়াৰ। লেৰিক এহানৰ ইকরা পুলকৰতে বার’ আনুসংগিক নানান কামে যেতাই স্বেচ্ছাই পাংলাক কৰলা হাবিয়েউ মি পৰিষদৰ বারাদেস্ত থাকাং জানাউরি। আমাৰ পাঠক সমাজে সংকলন এহান বানাল গ্ৰহণ কৰে দিলে আমাৰ উদ্দেশ্যহান সার্থক অইতে। ইমাঠাৰ পুষ্টিপালক।

দিল্‌স লক্ষ্মীন্দ্ৰ সিংহ

সভাপতি,

নিখিল বিশ্বপ্ৰিয়া মণিপুৰী সাহিত্য পৰিষদ, অসম।

PM81
53

THE BISHNUPRIYA MANIPURIS
&
THEIR LANGUAGE

“सत्यम् विवर्धय”

By :

Shri J. M. Singh

B. A., B. Sc., B. T.

&

Prof. Biradra Singh M. A.

B. T.

প্রকাশকৰ দ্বি-আকচুটি

যন্ত্ৰ বিদ্যাল মালেম এহান যতউ মুঙেদে যিতেগা থাক কিন্তু আমাৰতা পাছরানি থকনেই যে যন্ত্ৰ এতা হংকরতারাতা মানুৰে। নিজর আত জগমাথ বুলিল য়ারি আহান আসে— এহান জীবনর পদে পদে কামে লাগিয়া যিতইগাহান। মোবাইল বার লেপটপে লেরিক তামকরিয়া কুনদিনউ ফাংচা নার নাইতই। ফাংচা অয়ারতা আতর দিয় তারাং লেরিকহান থয়া তামকরলে। সৃষ্টির রহস্যহানউ এপেই লুকেয়া আসে এহান উতাই হারপা পারতারা যেতাই সাহিত্যল সমাজে জাগরণর ইথৌ দেনার কামে লামিয়া সাহিত্য সমাজরে মুঙর পারেঙে বহেয়া বিশ্বর দরবারে ফৌকরানির হমাং দিন রাতি কামে লাগিয়া আসি।

হারৌর য়ারিহান— নিখিল বিষ্ণুপ্রিয়া মণিপুরী সাহিত্য পরিষদর তেৎনেই হমাই আমাৰ মহাসভা বার সাহিত্য পরিষদর পিতৃপুরুষর হৌদিন দিনর সাহিত্যর ম্যানিফেস্টহানরে কতদশক পিসে অইলেউ একবিংশ শতাব্দীং সাকার করানির কামে লাগে পারলাং এহান। আরতাউ হারৌর য়ারিহান— অসম সরকারর পুংনিঙর পাংলাকল আজি সাহিত্য পরিষদ, অসমে আহানর পর আহান লেরিক ফংকরানির কামে লামেসে। এবাকা সমাজর নাংজাদা লেখক বার সমাজসেবী বার সাহিত্য পরিষদর পয়লাকার সভাপতি জগৎমোহন সিংহ গিরকর উমর আহানর ইকরা হাবি পুমাপ করে ‘জগৎমোহন সিংহ রচনাসংগ্রহ’ নাঙর এ লেরিক এহান ফংকরাং উবা অ পারিয়া। উতার গজে আরতাউ হারৌহান এহান যে লেখক আগর চল্লিশ পঞ্চাশ বসর আগর ফংকরা, না ফংকরা হাবি খমকরিয়া পুমাপ লেরিকহান সাক্কে নিকালানির মত কঠিন কাম এহানর সম্পাদনা করিয়া লেরিকহানর মঙ-মাজা নিকালানির এ দায়িত্ব নেনারকা বুলিয়া সাহিত্য পরিষদর একনিষ্ঠ কর্মী কনাক কবি লেখক সম্পাদক কাঞ্চনবরণ সিংহ গিরকরে পেয়া। আরাকৌ হারৌর য়ারিহান যে ২০২২-স্তই সাহিত্য পরিষদে তার ফংকরা লেরিকে ISBN বার সাহিত্য পরিষদর Logo-গ লাগেয়া ফংকরানির অনুমতি পানা এহান।

এবাকাতে সাহিত্য সমাজর আসল পালাহান। সৃজনশীল মননল সমাজে জমর কনাক বুজনর আতর তারাং National Book Trust বার সাহিত্য একাডেমীর আদলে লেরিক হংকরিয়া তানুর আতে আতে আকেইহান ফৌকরিয়া দিয় আহির মিল্মেং লেরিকহানাং বেছবেয়া

সাহিত্য চুহিং পুলকরিয়া উঠিয়া আইতারা সমাজে তানুর সাহিত্য রসর কমণ্ডলু সাহিত্য সৃষ্টির বীজ বহিন দিয়াদেনা এহান। একশ চল্লিশ কোটি মানুর ভারতে লাখ আহান ফা-নাসি আমার মানুর ঠার, সাহিত্য, সংস্কৃতি জিহতা করানি ছাড়া আমার আর জাত-কুল জিহতা করানির আর উপায় নেই এহান পাঠক সমাজরে হারপুৰানির এরে সময় এহানরে একিন মনে কামে লাগেয়া আমি জাতে আমার কামল মিমাত্তে কা পারানি এহান ব্রতহান করে নিংকরানি। এ দুনিয়াত আমি আমার সাহিত্য সংস্কৃতি টিকিয়া থা পারানির এরে মূল পথ এগ কঠিন পথগ, সাধনার পথগ যে পথগদে আমারতা আটানি লাকৈত ঘুমজানির আকপেয়া।

নিখিল বিষ্ণুপ্ৰিয়া মণিপুৰী সাহিত্য পরিষদ, অসমর বিশ্বাস এ বিজ্ঞান বার প্রযুক্তির যুগ এহান আমার আতর তারা অয়া মুঙেদে যিতেগা, পৃথিবীর যামপারা দেশে জীবন সংগ্রামে ব্যস্ত আমার মানুর হৃদয়েপা পাংলাক পরামর্শ পেইতাঙাই, সাহিত্য পরিষদর বিশ্বাস, আমার বিষ্ণুপ্ৰিয়া মণিপুৰী সাহিত্যরে তানু আসি দেশে দেশে চিন-পরিচিত করেদেনাং পাংলাক করিয়া সাহিত্য পরিষদর হম্মারে পথ দেখবেয়া নিজেউ নাপাল অয়া থাইতাই বার সমাজরে নাপাল করে থইতে পাংলাক করে যিতাইগা।

ডকতপুৰ, শিলচৰ-৫

৭ ডিসেম্বৰ, ২০২২

নিবেদ্য সিংহ

সাধাৰণ সম্পাদক

নিখিল বিষ্ণুপ্ৰিয়া মণিপুৰী সাহিত্য পরিষদ, অসম।

বার' মেম্বার সেক্ৰেটাৰী, গভাৰ্নিং বডি

ভাষা গৌৰৱ আচনি, অসম।

ভূমিকা

বহুমুখী প্রতিভার অধিকারী, ইমারটার পূজারী, সমাজনিংপা, কবি-সাহিত্যিক, শিক্ষাব্রতী জগৎমোহন সিংহ নানান গুণে গুণী নাংপালপা মানু আগ। গিরক আকমুরেদেত্ত বরাক উপত্যকা তথা উত্তর-মুঙ ভারতর মান্য শিক্ষাবিদ আগ, সমাজসেবী আগ, নাট্যকার আগ, গীতিকার আগ, চিত্রকর আগ, সুবক্তা আগ, সমাজদরদী আগ, ইশেং-শেঙ ব্যক্তিত্বল বুজ্জিল-বরা পুন্নাপ মানু আগ। গিরক বিষ্ণুপ্রিয়া মণিপুরী সাহিত্য পরিষদর প্রতিষ্ঠাতা সাধারণ সম্পাদকগ (১৯৫৬-৫৮) তথা নিখিল বিষ্ণুপ্রিয়া মণিপুরী সাহিত্য পরিষদর প্রাক্তন সভাপতিগ (১৯৫৮-৮৫)। সমাজর অস্তিত্ব জিংতা করানির লালফামর চিয়ৌপা খেলতামে নিজর জীবনহানরে-জনমহানরে বাজি থয়া গিরকে নানান ক্ষেত্রে উল্লেখকরিল অবদান থয়া গেসেগা।

জগৎমোহন সিংহ গিরকর জীবনদর্শন বার সাহিত্য এমনো আকসাদে তিলয়া আসে, খেইকরানি চিল। ১৯৫৬ ইংরেজিৎ 'বিষ্ণুপ্রিয়া' (নুবা বেলি) পত্রিকার প্রথম বর্ষ প্রথম সংখ্যাৎ ফঙসিল গিরকর পইলাকার কবিতাহান 'মোর ধৌরাঙ'। কবিতা এহানাৎ গিরকর মনহানর হাবি য়ারি, অন্তকরণর আশা-আকাংখা-ধৌরাং শাতসিল।

“ঠারলু ঠার কতো ইমা, বুললু কতো মাটি,
না ককইল তেব মোর ধৌরাঙ, ভাখ টাটি।
তোর ঠারহান ঠারলে ইমা, চিকর গারি এগ,
সার্বক অরকো জনমহান, বলী অর ঠইগ;”

এরে কবিতা এহানেই প্রমাণহান গিরকে ইমারটার এহানরে কতি বানানুংশি পাसे উহান। কবি মদনমোহন মুখোপাধ্যায় (১৯৩৪-২০০৪) এইগা গিরকে 'জগৎমোহন' নাঙে ইকরেসিল কবিতা আহানাৎ শাতসিল গিরকর আসল পরিচয়হান;

“কাদেসিলে কাদুবেইলে
নুংশিপা জীবন;
সমাজ নিংকরা-মন
জগৎমোহন।”

বিষয় এহানাৎ ষাটর দশকর বিষ্ণুপ্রিয়া মণিপুরী ভাষা আন্দোলনর প্রবাদপ্রতীম বাগ্মী-নেতা, কবি-লেখক গোপীনাথ সিংহ (১৯৩৯-২০১৭) গিরকর কবিতা আহান নিংশিঙ অনা য়াকরের।

“ইমার নাঙে বিভুলাগ
আমার জগৎ অজ্ঞা।
তার নাংহান সলকরলেহে
নাইতাঙাই আর কজা।”

ইমার নাঙে বিভুলা; গিরকে নিজর হাবি অন্তকরণ কাংকরসে, কাংকরানি পারেসে।
এরে বিশ্লেষণ এহানাৎত জিঙে বিশ্লেষণ আর থা নারের।

বিষ্ণুপ্রিয়া মণিপুরী জাতর অস্তিত্ব জিঙতা করানির লালফামে, ইমারঠারর মর্যাদা আদায়র অভূতপূর্ব গণ-আন্দোলনে, সরকারী চাকুরীজীবীগ অনার পিসেদেউ গিরক সরকারর বিরুদ্ধে হাবির মুখপাতে থায়া নেতৃত্ব দেসিল সমাজদরদী বার দায়িত্বশীল মানু আগ। হিংতুমে মাৎতে গেলেগা গিরক আমার নেতৃস্থানীয় সাহিত্যর সংগঠনহান ‘নিখিল বিষ্ণুপ্রিয়া মণিপুরী সাহিত্য পরিষদ’গরে সাংকা দেসে মানুগ।

জগৎমোহন সিংহ; বিষ্ণুপ্রিয়া মণিপুরী গদ্য সাহিত্যর রূপকারগ। গিরকর লেংকরা ‘দলান ইপূর করপেখ’ বার আর আর য়ারি-প্রবন্ধ, কথা এ-চুটির সাক্ষীগ। গিরকর সাহিত্যকর্ম বিশ্লেষণ করলে আমি পেয়ার; গিরক শিশু-সাহিত্যিক, কবি, য়ারিলেংপা, রম্যরচনার লেংপা, প্রাবন্ধিক, গীতিকার, নাট্যকার বার আঠুমপা সমালোচক আগ। সৌর মনস্তত্ত্ববিদ, কথাশিল্পী বার দক্ষ চিত্রকর আগ। গিরক স্পষ্টবাদী সুবক্তা আগ আসিল। অন্যায়র তুল আপোষ না করেসে লালফামী সত্তা আহান আসিল।

সাহিত্য কর্ম:

কবিতা :

আমার ইমারঠারর পইলাকার পত্রিকাহান ‘বিষ্ণুপ্রিয়া’ (নুৰা বেলি)-র পইলাকার পাতাৎ যে কবিতাহান শাতসে উহান জগৎমোহন সিংহ গিরকর ‘মোর ঠইগ’। বিষ্ণুপ্রিয়া মণিপুরী কাব্যসাহিত্যর ইতিহাসে অমিত্রাক্ষর ছন্দল পরীক্ষা-নিরীক্ষা গিরকেই পইলা অকরাগ দেসিল। ১৯৬২ ইংরেজির জুন মাহাৎ ‘ফাগু’ পত্রিকাৎ শাতসিল অমিত্রাক্ষর ছন্দল ইকরা গিরকর ‘মেঘদূত’ নাঙর ডিগল কবিতাহান, যেহান পিসেকার সংখ্যাস্ত নাংহান পটেয়া ‘কান্তা’ নাঙে শাতসিল। নৌ-রসর হাবি রস পুলকরিয়া ইকরেসে কবিতা আহান ‘রসমঞ্জরী’ বার লগে আরতাউ কবিতা পুন্নাপ খমকরিয়া ফংকরানি অসে ‘রসমঞ্জরী’ (২০০৩) কাব্যগ্রন্থহান। গিরকর সৌর কবিতা-ছড়া সংকলন করিয়া নিকালানি অসে ‘জুনাক পরীর দেশে’ (২০০৫) কাব্যগ্রন্থহান।

দলান ইপুৱ করপেখ :

‘দলান ইপু’র স্রষ্টা জগৎমোহন সিংহ গিরকর পাস্তামনা-নেই কামহান অইলতাই ‘দলান ইপুৱ করপেখ’। নিজর জাতহানরকা, ঠারহানরকা বার সমাজহানরকা গিরক কতিরৌ ‘যন্ত্রণা-দন্ধ’ অসিল, ডহেসিল; উহান তার পইলাকার পর্যায়র ইকরা ‘দলান ইপুৱ করপেখ’ পাকরলে হারপানি যাকরের। দলান ইপু চরিত্রহান রচনার পিসেদেউ গিরকে আরাক চরিত্র আকতারেউ বিষ্ণুপ্রিয়া মণিপুরী সাহিত্যর ইতিহাসে অমর করিয়া থ দিয়া গেসেগা। তানুরমা কটাক্ষ, ফেদুল, কান্দুরা, বিধুতিতু উল্লেখযোগ্য। চরিত্র এহানির প্রতীকী রূপ ইলয়া গিরকে ঔ সময়কার বাস্তব সমাজর রূপ উহানরে চিত্রায়ণ কেরসিল। ব্যঙ্গ-বিদ্রপাত্মক ইকরার হাদিরমা সমাজর নানান কাফামরে তীব্র সমালোচনা করিয়া পাঠকর আদালতে উবা করে দেসিল। রম্যরচনা রসরচনার মাতুঙে সমাজর বাস্তব অংতার রূপহান তুলিগল তুলিয়া দরেসিল। জগৎমোহন সিংহর মনহান যে চিন্তা-ভাবনাহানল জাবুর দিয়া আসিল, যে আদর্শ-লক্ষ্য তার হাদিগরে বেয়েয়া আসিল, উতার প্রতিনিধিগ করিয়া তুলিয়া দরেসিল ‘দলান চাউবা’ গিরকরে। দলান চাউবার পরিচয় দিতেগা গিরকে মাতেসেতাই;

“সংসার এহানাং য়েগোয় নিজর দেশ, নিজর জাতরে হাদির আসনহানাং বহুয়েয়া চেকচিল করে পূজা কেরর, ঔগো মহং জনগো, ঔগোরে হমা দিলে আমার পাখ ককর; আমার দলান ইপুও ঔসাদে মহং জন আগো। এহানর গজে দলান ইপুৱ অন্য পরিচয় আহান দেনা নুওয়ারুরি”।

এলা আহান দিয়া আঁহির পানি বেলতে তাঁরে মি দেহেসু—

“জরম নাইল তর উরে ইমা,
আজি পেয়াও মণি আগো,
সেবার ব্রত লয়া কুংগোয়
ঙালকরতয় তর আধার গরগো।”

এলা এহানাতে জাতহানরকা মনহানর লু ফামে পলেয়া আসে লু যন্ত্রণাহান ফঙসে।
গিরকরে হাবিস্ত হিনকরেসে, অন্তর-দন্ধ কেরেসে, মর্মস্পর্শী কথাহানি অইলতাই—

“...তি মরতেই, মিও মরতৌ, কুংগোর পৌ কুংগোয়ও না থইতায়। এসাদে করে হুদা মহেন্দ্র বাবু নাগৈ, দঙ্গ অজা, বলান্দ অজা, জগৎ সিং পণ্ডিত, ভুবনেশ্বর সাধুবাবা, তনুবাবু, ঝাপিরবনর থাঙ্গৌ অজা পারা উজ্জ্বল নক্ষত্র আকেইগো বিষ্ণুপ্রিয়ার কপালখি হাকহানান্ত: জঙিয়া গেলাগা থাং এ সমাজ এহানর কুংগোয় তাঁনুরে আকদিনকারকাও ভক্তিহানলো নিংশিং অছিতা নাদেখতেই...”।

“যে জাতহানে স্বজাতির বানাহান এ বুজো হারনাপাছি, ঔ জাত ঔহান ভীমপিপ্তিরী অনিয়ে হোভা”।

“যেসাদে শিক্ষার পরাদে নিজর জাতর প্রেম বানা-নুংসি উদয় নার, উসাদে শিক্ষা ঔতা খাটুপির কালি বুলিয়া নিংকরিস কৃষ্ণগোপাল। ঔ কালি ঔতারে বদালা দা'লো খেৎকরিয়া বেলানি লাগতয়”।

‘দলান ইপুর করপেখ’ পইলা শাতয়া নিকুলেসিলতা ‘ফাণ্ড’ পত্রিকাত ১৯৬০ ইংরেজিৎ ১৯৬২ ইংরেজির বিতরে। পুন্নাপ চহান রচনা নিকুলেসিল। উহানির নাঙ; ‘কাল বর্ণর গুণ’, ‘আসন-ফিদার গুণ’, ‘কিহর কা ?’, ‘ঠুনিংস্থা ভাংগের বনহানাত’, ‘যেবাকা হপন ভাংগিল’, ‘শয়নে’, ‘চম য়্যারিহান’, ‘ঠইমামি চয়ইলে’। পিসেদে আশির দশকর অকরাদে যোরহাটেস্ত ফণ্ডসিল ‘নুয়া এলা’ পত্রিকারমা নিকুলেসিল ‘দলান ইপুর করপেখ’র আরাক কতহান রচনা।

মাতানি য়্যাকরের, ‘দলান ইপুর করপেখ’ ষাইটর দশকর অকরাগর ফসলহান। রচনা উতার বিষয়বস্তু পঞ্চাশর দশকর সমাজ বাস্তবতাৎত খমকরাতা। জগৎমোহন সিংহ গিরক দৌর খয়া পানার প্রায় আককুড়ি চারি মারি পিসেদে ‘দলান ইপুর করপেখ’ মুদ্রিত আকারে ফণ্ডসিল ২০০৯ ইংরেজিৎ। মুদ্রিত এহানাত রচনা আসেতাই ১৩ হান। কিন্তু মুদ্রিত লেরিক এহানাত ‘ফাণ্ড’ পত্রিকাৎ সিজিল অসিল লেইত্রেং ইলয়া শাতকরানি নাসে।

বর্তমান সংকলন এহান পুলকরতেগা আমি ‘ফাণ্ড’ পত্রিকাৎ যেসাদে সিজিল অয়া শাতসিল ঔসাদে এপেইত সিজিল করলাং, ইতিহাসর অমোঘ য়্যাথাং উহান অমান্য করে নুৱারিয়া। ইতিহাস যেসাদে আসিল ঔসাদেই অয়া থাক, নিংকরিয়া। পিসেকার রচনা উহানি ‘নুয়া এলা’ পত্রিকা বার মুদ্রিত ‘দলান ইপুর করপেখ’ লেরিকহানাত য়্যৌকরানি অইল। রচনা উহানি অইলতাই; ‘নাঙর মহিমা’, ‘বিধুতিতু’, ‘সমাজসেবী’, ‘নিভূত নিকুঞ্জ’ বার ‘পরিক্রমা’। এরে লেইত্রেং অইল য়্যারি এহানিৎ আসে নানান প্রতীকী চরিত্রর উৎসস্থলগ বিংশ শতাব্দীর ৭০ বার ৮০-র দশকর বাস্তব সমাজর রূপ উহান। ‘দলান ইপুর করপেখ’ রচনাকাল ইলয়া পাকরলে আমার সামাজিক-সাংস্কৃতিক ইতিহাসর য়্যামপারা হারনাপাসি বিষয় রূপক হিসাবে যেতা লেইত্রেং অসে, ঔতাদে হিৎতুমেউ আমি মিল্লেঙ দিয়া পারতাঙাই, উপনি পারতাঙাই।

য়্যারি :

এতা বাদেউ গিরকে য়্যারি ইকরেসিল। য়্যারিরমা পঞ্চাশর দশকে অর্থাৎ ১৯৫৬ ইংরেজিৎ ‘বিষ্ণুপ্রিয়া’ (নুৱা বেলি) পত্রিকাৎ ফণ্ডসে ‘ভিসা-পাশপোর্ট’ য়্যারিহানর রচনাইলীহান গিরকর সাহিত্য প্রতিভার সাক্ষীহান অয়া আসে। য়্যারি এহানর বিষয়বস্তুহান ধর্ম-ব্যবসার অমানবিক দিক উহানর গজে মিল্লেঙ দিয়া। য়্যারিহান এসাদে— সাধু আগ আশ্রম আহান পাতিয়া গাঙহানর হম্বুকগত বহেসে। মানু এহান অন্ধ অয়া হৌপারে য়্যানার ভিসা-পাশপোর্ট নিকালানিরকা গিরকরাং অইতার। অইতার উতারমা য়্যামপারাই সমাজর চরিত-থি, হবানেই

বা অসামাজিক কামেদে হেইনিং, লককরিক গতিনেই মানু। ধন-পইসাল পুণ্য লনারকা তানু আশ্রমে পুলসিগা। য়ারি এহানর আরাক আকবেদে দেহিয়ার আতুর নিরুপায় লেইরা গরর সৌ আগ; য়েগ মনকামনা পুরা নায়া পেইরাক করে মরণ ফাঙসে। তারকা লেখক গিরকে পূজার ফিজেত-ফুতি লয়া নিয়া দেসেগা। ঔতা আতেয়া চেয়া সৌ উগই ডিগল করে ঠুনিংশা আহান বেলাসে। লেখক গিরকে সৌ এগরে জিংতা করানিরকা পাংলাক বিসারেয়া, ঔরে আশ্রমে ধর্ম-কামানিরকা-পুলসি ‘ধার্মিক’ দাপার মানু ঔতারে ডাহাং গেলেগা, তানু আকগয়ৌ পাংলাক করানিৎ নাহেসি; বরং নানান অজুহাত দেহ্বাসি। য়ারি এহানাং আমার মানবিক দিক উহানরে অমানবিক দিক আহানে কিসাদে জিঙিয়া গেসেগা, উহান লেখক গিরকে তুলিয়া দরেসে। সৌ উগ মরানির মাতাম উহানাত লেখক গিরকরে আহিগ বিধেয়া চেয়া আসিল। উহানর অর্থহান লেখক গিরকে এসাদে নিংকরেসে; ‘প্রেম বার সেবা’ এহানেই স্বর্গর ভিসা-পাশপোট পানার একমাত্র আতিয়ারহান, আরতা নাগই। এসাদে চহা তীর্থক শ্লেষ আহানল সমাজ আহানর তথাকথিত চিন্তা-চেতনারে ইম্পানি প্রতিবাদ বার সমালোচনা করিয়া গিরকে য়ারিহান লমকরেসে। ‘নির্বন্ধ’ নাঙে আরাক রচনা আহান পানা অইল ‘পাঞ্চজন্য আজুনি’ পত্রিকার ৫ম সংকলনেৎত।

য়্যারি বা রম্যরচনা ইকরতেগা বিবেকবান সমালোচক আগ গিরকর বিতরে হামেসা হজাক অয়া থাইতে আমি দেহিয়ার। এসাদে বাস্তব সমাজর রূপ এহানরে সমালোচনা করিয়া ইকরেসে আরাক য়ারি আহানর নাং ‘না-মি-না’। ১৯৮১ ইংরেজিৎ হাফলঙেঙ্ত ফঙসিল ‘টেঙারা চিংখেই’ পত্রিকাৎ শাতসে য়ারি এহানাং আমার চিরাচরিত আর্থ-সামাজিক কাঠামোহানর সালে ডেইডেইহারা দেনাং লেপসে বেয়াপা আগর লাংলার জনম আহানর চিত্রগ নিপুন কলমগল আকেসে। আমার অপে-পরিয়া-আসি বেয়াপা এতাই মালেম এহানাং টেইপাঙে হিংতুমকার পালনির চিন্তা নাকরিয়া, আদ্যৎত চলিয়া আহেসে গতানুগতিক জিনার ধর্মহান ইলয়া চললে, কতিহান দুর্বিপাকে পরানি লাগের, উহান তুলিয়া দরেসে। গিরকে য়ারি এহান লমকরেসেতা এসাদে; “চুমসে, রাস কর, কীর্তন কর, উদুখল কর, লংকাকাও কর, কিন্তুমান ঘরর ধানগি বেছিয়া নাগয়; বেপার-সিংপাল করিয়া মুনাফা বা ঐজা ঔহানিল এতাহাবি করতে কারতাও আপত্তি নেই”। য়ারি এহানরে কবি সেনারূপ সিংহর ‘কুমেই কমেই’ কবিতাহানর ভাবহানে বা গোকুলানন্দ গীতিস্বামীর সমাজ-সংস্কারধর্মী চিন্তাই প্রভাবিত করেসে মাতানি য়াকরের।

গিরকর আরাক য়ারি আহানর নাং ‘পানি’। ১৯৮৭ ইংরেজিৎ ‘নুমিউস’ পত্রিকাৎ ফঙসিল। য়ারি এহান বিজ্ঞান ভিত্তিক য়ারিহান। কল্প-য়্যারি যেসাদে ইকরেসে, ঔসাদে বিজ্ঞানর য়ারিও গিরকর কলমগন্ত নিকুলেসে। বিজ্ঞান বার সাহিত্যরে কল্পকল্পি করিয়া লেংকরেসে

য়ারিহান। নিখিল বিষ্ণুপ্রিয়া মণিপুরী সাহিত্য পরিষদের রজত জয়ন্তী কুমেইএ ১৯৮৮ মারিৎ প্রধান অতিথি বরাক উপত্যকার নাংপালপা ইতিহাসবিদ তথা সাহিত্য অকাডেমির পুরস্কার প্রাপ্ত লেখক ড. সুজিৎ চৌধুরী গিরকে তার বক্তব্যৎ ফঙকরেসিল যে গিরকর সাহিত্যর মালেমে কাকেই কারানির অনুপ্রেরণাহান জগৎমোহন সিংহ। গিরকে মাতেসিল, “আমি বাংলা শিখেছি দু’জন বিষ্ণুপ্রিয়া মণিপুরীর কাছ থেকে; একজন জগৎমোহন সিংহ, আরেকজন ধ্বজরাজ সিংহ সাহিত্যশাস্ত্রী”।

ড. সুজিৎ চৌধুরী জগৎমোহন সিংহ গিরকর ছাত্রগ। করিমগঞ্জ গভর্নেন্ট হাইস্কুলে জগৎমোহন সিংহ গিরকরে বিজ্ঞান শিক্ষকগ হিসাবে পাসিল। বিজ্ঞানর বিষয় উতারে সাহিত্য রস বরেয়া বাগাদেনার আঠৈপা ক্ষমতা আহান আসিল জগৎমোহন সিংহ গিরকরতা। (য়ারি এহান ঔ সময়কার সাহিত্য পরিষদের আসাম রাজ্যিক সাধারণ সম্পাদক (১৯৮৫-৯৬) কালাসেনা সিংহ বার সাহিত্য পরিষদের কেন্দ্রীয় সভাপতি (১৯৮৫-২০০১) তথা কবি-সমালোচক বরুণকুমার সিংহ গিরক দ্বিগিরাংত খমকরাহান)।

লোকসাহিত্য :

সৌর মনস্তত্ত্ব গিরকে নিয়াম হারপা পারেসিল। সৌরকা লেংকরেসে য়ারি উতা পাকরলে উহান দইরাপ করানি য়াকরের। ‘আই ডিং ডিঙর মালক’, ‘কলার জিন’, ‘হরালী প্রেত্নী’, ‘ছাগি লামচিক’, ‘শয়তান বাবাই’ এসাদে সৌর য়ারি আমার সৌর সাহিত্যহানরে বুজ্জিল-বরা করেসে। সৌর য়ারি এহানি কনাকসৌর উপযোগী করিয়া কমিকস্ আকারে ‘পঞ্চশ্রী’ পত্রিকাৎ প্রকাশ অসিল আশি-নব্বইর দশকে। ঔ দিক দিয়া খালকরলে আমার সাহিত্যর পইলাকার কমিকস্ লেংপাগৌ গিরক। কমিকস্ উতা আকেসিল জেঠা পুতক সাহিত্যিক জ্যোতিপ্রকাশ সিংহ গিরকে।

এলা :

গিরকর এলার য়ারি আঠইপা উল্লেখ করানি লাগের। গিরকে তার সময়ৎ যে এলা কতহান লেংকরেসে ঔতা অমরত্বর দাবি থর। উতারমা ১৯৪০র উবেদে ছাত্রাবস্থাত থাইতে সমাজর চেতনাহীন অংতাহান দেহিয়া ইকরেসিল হুদি-সকয়া গেসেগা এলাহান—

বিষ্ণুপ্রিয়া উঠ-নে অসময়ে ঘুমজিয়া থাইলে
জাগরণর শাচাকগতে উদয় অইল মুঙর পটে...

এলা এহানাৎ গিরকর ঔ কনাক বয়সর সমাজচেতনার পরিচয় পেয়ার।

হে পথিক!
নিঃশিৎ কয় অইতেই
বেলেয়া গেলেগা পথগ।

বা

১৯৬৮-৬৯ ইংরেজির আমার ইমারঠার আন্দোলনৰ আবেগঘন চিয়ৌপা লালফামৰ
দিন উতাং ইকরা কতহান এলা । যেমন;

১.

জনমে জনমে মোরে
দিয়া পেঠেইস হ্ণার মণিপুৰে
জনম না লইলু মানুৰ উৰে
খুলিগ করেদিস মোরে
তি লকতাকৰ পারে।...

২.

লকতাকে কাদেৰ,কাদেৰ আকখুলা
আহিৰ পানি বেলা বেলা।

৩.

কিহান কানায় জরম অইলু
মানুগ অয়া হ্ণার জাতে
মানুৰ হাদিত দুনিয়াতে
আজি পেয়াউ থানা নুয়ারলু।

নষ্টালজিক জগৎমোহন জনম এহান বিষ্ণুপ্ৰিয়া মণিপুৰীৰ অতীতহানৰে চেৎকরে
দরিয়া জিংতা অনা মনাসিল। আমাৰেউ জিংতানি হিকুৰাসিল। ইমারলাম বেলেয়া আয়া
শতাব্দী আকেইহান লিতনিৰ পিসেদেউ, সমাজৰ অন্তিত্ব সংকটৰ চিয়ৌপা খেলতামে, ঔ
বেলেয়া আহেসি ইমারলামৰ নিংশিঙ, অনুপ্ৰেৰণাহান অয়া কাম কৰেসিল; ইমারঠাৰ বার
ইমারলামৰ বন্দনা কৰেসিল।

এলা এতাং সুরারোপ কৰেসিল পণ্ডিত মতিলাল সিংহ গিৰকে। এলা দেসিল
জগৎমোহন গিৰকৰ খুন্না বেয়ক সুরনাথ সিংহ গিৰকে। জগৎমোহন,মতিলাল অজাৰ সংযোগ
উহান ‘মণিকাঞ্চন যুগ’ আহান বুলিয়া স্বয়ং মতিলাল অজা গিৰকে মাতেসিল ‘নুয়া এলা’
পত্ৰিকাং ফঙসে স্মৃতিচাৰণা আহানাং।

প্ৰবন্ধ:

স্কুলে ইমারঠাৰ লেৰিক চলানি অকরতই বুলিয়া সরকারী আদেশ জাৰি অনাৰ
পিসেদেউই বিষ্ণুপ্ৰিয়া মণিপুৰী ঠাৰ বার বানানৰ চিন্তা-ভাবনাই গিৰকৰে হামেশা কালিয়া
থসিল। ‘ইমারঠাৰ’; বাহি এগৰে সময় আহান শিক্ষিত দাপা আহানে সমালোচনা কৰেসিলা।
আজি পেয়াও কৰতারা। শব্দ এগ উনি মেইতেইৰ ‘ইমা’ বার বাংলার ‘ঠাৰ’ তিলয়া হঙসেগ।
‘দলান ইপুৰ কৰপেখ’এ গিৰকে উহানৰ জবাব দেসে। আৰাক আকপেইত আমার ঠাৰহানৰ
প্ৰাচীনত্বৰ গজে প্ৰশ্নচিহ্ন আইলে গিৰকে ইকরেসে;

“ফেদুলর তুল’ কটাক্ষগাসির পেটে পেটে চুক্তি আসে। এ বেবুল এগ’রে কটাক্ষগাসিএ বুবাদেনা থক্ যে, আমার ঠার এহানাত মেইতেই, কুকী, নাগা কয় ঠার যে হাচুরেয়া একদম কলিজাগ পেয়া হোমেয়া আসে, এহানেই প্রমাণ করেদের আমার ঠার এহান মেইতেইর ঈল আগেও কুকী-নাগার হাচুরণ খেয়া আহেসগ’; অত: আমার ঠার এহান মণিপুরর প্রাচীন ঠারহান, আয়ার তুল’ অন্যায়র কলাকন্নির মধুর ঠারহান”।

১৯৫৬ ইংরেজিৎ বানান-শব্দ সৃষ্টি বার ব্যাকরণ হংকরানির উদ্দেশ্যল ‘বিষ্ণুপ্রিয়া মণিপুরী সাহিত্য পরিষদ’ গঠন অনার পিসেদেত্ত গিরকে স্কুলে সৌর উপযোগী প্রথম বার দ্বিতীয় শ্রেণির লেরিক লেংকরানির কামে আত দেসিল। ১৯৭৭ ইংরেজিৎ আসামর প্রাথমিক শিক্ষাক্ষেত্রে ইমারঠার চালু অইতই বুলিয়া সরকারী আদেশ আহান জারি অইলে, স্কুলে তামকরানিরকা নিখিল বিষ্ণুপ্রিয়া মণিপুরী সাহিত্য পরিষদর সভাপতিগ হিসাবে গিরকে ইমারঠারর বানান লেপকরানিরকা সাহিত্য পরিষদর বানানর অধিবেশন হাঞ্জাসিল মাছুঘাট গাঙে। ঔহানাতেই পইলা সাহিত্য পরিষদর বানান লেপসিল। গিরকর বানান চিন্তার সুচিন্তিত মতহান ফঙসিল ‘বানান-সমস্যা’ নাঙর প্রবন্ধহানাত।

বিষ্ণুপ্রিয়া মণিপুরী সমাজে গিরকেই সম্ভবত: পইলাকার লেখকগ যেগই ভুবনেশ্বর সাধুঠাকুরর গজে মিলেঙ দিয়া ইকরেসিল। আধুনিক মনন এহানর হাদিরমা আমার সমাজর অস্তিত্ব জিংতা করানির কাফামে ভুবনেশ্বর সাধুঠাকুর ডাঙর সেয়া আগ; এহান প্রতিষ্ঠা করেদেসিল। গিরকে ইকরেসিল ‘বিষ্ণুপ্রিয়া’ পত্রিকার (১৯৫৬) ১ম বর্ষ ৩য় বার ৪র্থ সংখ্যাত ‘পরম ভাগবত শ্রীশ্রীভুবনেশ্বর সাধুবাবা’ নাঙে প্রবন্ধগ। ‘বিষ্ণুপ্রিয়া’ পত্রিকাৎ গিরকে ধারাবাহিক ইকরেসিল ‘সত্যং ক্রয়াৎ’। নিঙে অর, এহান ‘দলান ইপুর করপেখ’র পরিপূরক রচনাহান। দলান ইপুর করপেখ এ যে কথাহানি রম্যরচনার টেংঠাল মাতেসে, ঔ কথা উহানি এপেইত ইজ্জু ইশেং-শেঙকরে মাতেসিল। শিলচরেত্ত ফঙসিল ‘গোধূলি’ পূজা সংখ্যা (১৯৭৩) পত্রিকাৎ ফঙসিল গিরকর আরাক প্রবন্ধ আগ ‘রাহুর গ্রাস’। প্রবন্ধ উগর পইলাকার অংশ উহানেই হুদা পেইলাং, বাকি উহানি বিসারেয়া নাপেইলাং। ঔসাদেই আরাক প্রবন্ধ দুগর নাং ‘বাহনা’ বার ‘নাম-ভ্রংশ’।

নাটক :

নাটকর ক্ষেত্রেউ মাতানি যাকরব, গিরকর ‘যমপুরী’ নাটকহান সময় আহান বিষ্ণুপ্রিয়া মণিপুরী সমাজে জবর চর্চিত অসিল। ১৯৬১ ইংরেজির লোকলেহাৎ বিষ্ণুপ্রিয়া মণিপুরী মানুর সংখ্যাহান কমসি অজুহাত দেখুবেয়া, সরকারে বিষ্ণুপ্রিয়া মণিপুরী ঠারহান স্কুলে চালু নাকরল। সরকারে ইমারঠারহান চালানির প্রতিশ্রুতি দিয়াউ প্রতিশ্রুতি না থইল। সরকারে আমারে বেড়াগাঠুনিত বরেয়া থনা অকরল। আমারতারমাউ সমাজর বিতরে খেইপা-খেইচক আহান দেহা দেনা অকরল। গিরকে ঔ কালসীমা উহানাৎ রূপক নাটকহান ‘যমপুরী’

লেখকরেন্সিল। ঔহান বীরেশ রঞ্জন সিংহ গিরকর পরিচালনাত ১৯৬৫ ইংরেজি মহাসভার হিংগারী অধিবেশনে মঞ্চস্থ অসিল। যেহানর মূল বিষয়বস্তুহান আসিলতাই; আমার জাতর শহিদ রাজাবাবু, লেইখমসেনা, তনুবাবু, কৃষ্ণকুমার সাধু, মহেন্দ্রবাবু, গীতিস্বামী প্রমুখ সমাজসেবীয়ে ‘জাতর সেবা কিয়া করতাইতা’ বুলিয়া যমপুরীং যমরাজা গিরকে আচানক শাস্তি দেনা অকরল। ঔদিনর অভিনয় ঔহান দেহিয়া দর্শকাসনে আসিলা কামিনী উকিল, সমরজিত বাবু, হরিদাস সিংহ, বার মানিকবাবু প্রমুখ গুণীজনে কাদিয়া স্টেইজগত কায়া প্রেম কেরেসিলা। সভার ফামে পুলসিলা মানু আকতা অয়া চলানির বাশাক কেরেসিলা। যমরাজার ভূমিকাত অভিনয় কেরেসিল হুনা সিংহ (হঙাচরা)। (তথ্য এহান পানা অসেতাই বীরেশরঞ্জন সিংহ গিরকর স্মৃতিচারণান্ত। গিরকে ‘নুয়া এলা’ পত্রিকার জগৎমোহন স্মৃতি সংখ্যাত বিষয় এহান ইকরেসিল)। জগৎমোহন গিরকে ছাত্রাবস্থাত ইকরেসিল নাটকহান ‘নল-দময়ন্তী’। নাটক এহানর এলা ঔহানি ঔ সময় মানুর হুদিগ সকসিল।

গিরকর ইকরা রচনা বিষ্ণুপ্রিয়া (নুয়া বেলি), ফাগু, পাঞ্চজন্য অর্জুনী, গোখুলী, আমার পৌ, নুয়া এলা, টেঙারা চিংখেই, নুমিউস, চিত্রাঙ্গদা, সারথি, মিল্লোঙ প্রমুখ পত্র-পত্রিকাং ফঙসিল। গিরকে নবখেল পণ্ডিতর ‘খুমল পুরাণ’ লেরিকহান আমার ঠারে অনুবাদ কেরেসিল যেহান ‘নুয়া এলা’ পত্রিকাং মাথাঙে-মাথাঙে শাতনি অকরেসিল।

গিরকর জীবনর উল্লেখ-করিল ঘটনা কতহান :

নিখিল বিষ্ণুপ্রিয়া মণিপুরী স্টুডেন্টস ইউনিয়ন, আসাম রাজ্যিক কমিটির পইলাকার অধিবেশনে ১৯৮৪র ৪-৫ ফেব্রুয়ারিং বিক্রমপুরর টিকর বুরুঙ্গাং যেহান অয়া গেসেগা ঔ সভাং জগৎমোহন সিংহ গিরক য়রসিল। গিরকে মাতেসিল; “ইমারকা কৌলি করতে, জেলে যিতেগাও আপত্তি নেই। ইমার ঠারর উদ্ধাররকা মরে গেলেগাউ চিন্তা নেই”। বুজন বয়সে ঔ ছাত্র সভাং লৌদে লৌদে মিকুপহানাং সভাহানরে তপ্তা কেরেসিল। গিরকর ঔ চিয়ৌপা বক্তৃতাং পুলসিলা ছাত্রছাত্রীর গারির রম উবা অসিল। ঔসাদেই, ১৯৮৪ ইংরেজি শিলচর গান্ধী মেলার উদ্বোধনী ভাষণহান গিরকে সংস্কৃত শোলক ল অকরেসিল ঔবাকা পুলসিলা হাবিয়ে স্তব্ধ অয়া হুনেসিলা। ঔ সভাং জগৎমোহন গিরকে সভাপতিত্ব কেরেসিল। শিলচর বেতার কেন্দ্রস্ত ঔ ভাষণ ঔহান সম্প্রচার অসিল। (তথ্য: শিবেন্দ্র সিংহ গিরকর স্মৃতিচারণা; নুয়া এলা, জগৎমোহন সংখ্যা, ১৯৮৫)

আরাক আকদিনকার য়ারিহান, ষাইটর দশকর অকরাদে আমার ইমারঠারর বিষয় আহানল ঔবাকার আসামর রাজধানী শিলঙে মুখ্যমন্ত্রীগর তুল দেহা করানির য়ারিহান। দেহা করানিত যিতেগা লগে আসিলতাই ঔবাকার শিক্ষামন্ত্রী হাফলঙ নিবাসী জয়ভদ্র হাগজার গিরক। গিরকে মাতেসিল— “তোমার ঠার এহান হাবিহান বাংলাহান অসে। হারপানিয়ৌ য়াকরের। কিয়াতে ডিমাণ্ড করায়?” ঔবাকা জগৎমোহন গিরকে মিকুপ আহানাং এলা আহান

লেংকরিয়া শিক্ষামন্ত্রী গিরকরে অর্থহান আংকরেসিল। এলা উহান এসাদে—

“সুপ করৌ ডিল না, অই মিচাং মামা

চেতই অয়া চামা, অ, গাভুৱা পুৱীজেলেই মৌ

বাধেয়া লেংকাটি চুমকরো মুঙ-পিঠি

থক থকেয়া হাগ-মাটি সালইনে হুংহুঙেয়া বৌ...”

এলা উহান ইতিহাসহান। শিক্ষামন্ত্রী গিরকেউ লাজপাসিল। বিষয়হান উপ পारेसिल। এ ঘটনা এহানাত জগৎমোহন গিরকে হুদা শিক্ষামন্ত্রী গিরকরেই শিক্ষাহান দেসিলতা নাগই, আমাৰেউ শিক্ষা আহান দেসিল; আমাৰ ইমাৰঠাৰ এহানৰে আমাৰ ইমাৰঠাৰহানৰ ঠুনা পালকরানি। নাইলেতে বা লেইথক অইলে আমাৰ পুন্নাপ অস্তিত্বহানেই লেপয়া লেইমাঙ অইতই।

ঠিক এসাদেই গিরকে ইকরেসিল ‘কুপিয়া হিয়ৰে’ কবিতাহান। মহাসভাহানৰে গিরকে অন্তৰগ দিয়া য়াকরেসিল, নিংকরেসিল। এহানৰে তীৰ্থহান নিঙে ৱিদির লু ফামে ফাম দেসিল। ঔবাকা, আমাৰমা নুৱা ‘উচ্চশিক্ষিত’ দাপা আহানে আমাৰ ইমাৰলাম-সাকপা মহাসভাৰ বিৰোধিতা চরেদে-ফঙেদে কৰিয়া মহাসভাৰ মৰ্যাদা হানি কৰানি উহানৰেই তানুৰ জীবনৰ ব্রতহান বা উদ্দেশ্যহান নিংকরেসিলা। আজিপেয়াও ঔ প্রতিক্রিয়াশীল চক্ৰ উগৰ লৌনাম লই নাসে। ঔবাকা ‘আমাৰ পৌ’ পত্ৰিকাং (১৯৭৬) ইকরেসিল এৰে গজে উল্লেখ কৰা কবিতা এহান। ঠিক ঔসাদেই ইকরেসিল ‘পাতিয়ালাৰ এলা’ নাঙে এলা আহান। মহাসভাৰ ৩২ তম পাতিয়ালা অধিবেশন ইলয়া। এলা উহানৌ ‘আমাৰ পৌ’ পত্ৰিকাং শাতসিল ১৯৭৯ ইংৰেজিৰ ২১ নভেম্বৰ। পুন্নাপ জনম এহান ইমে ‘প্ৰয়োজনবোধ’ আহানাৎতই গিরকে ইকরা-ইকরি কৰল। ঔ ‘প্ৰয়োজন’ উহান আমাৰ অস্তিত্ব ৰক্ষা কৰানিৰকাই। আমাৰ ইমাৰঠাৰ-ৰুহিবৃন্তিৰ আত্মমৰ্যাদা হানি অইলে উহানৰ প্ৰতিবাদ কৰতে বা উতাৰ বিপৰীতে উবা অইতে গিরকে দ্বি-কথা না খালকরেসে। ঔসাদেই ১৯৮১ মাৰিৎ ‘টেঙাৱা চিংখৈ’ পত্ৰিকাং ইকরেসিল ‘মিলন’ নাঙে কবিতা আহান।

নিখিল বিষ্ণুপ্ৰিয়া মণিপুৰী সাহিত্য পৰিষদেস্ত ফংকরা The Mahasabha Review (1970), Let history and facts speak about Manipuris (১৯৮৭) লেৱিক এহানি ফঙইতে গিরকৰ অবদান মাতিলমাহি লম নাইতই। The Bishnupriya Manipuris and their language (১৯৭৬) লেৱিক এহানাৎ যৌৰসে Comments on “A Note on the term Bishnupriya Manipuri” ইকরা উহান সমালোচনা সাহিত্যৰমা নাং পালসে ইকরাহান। নিখিল বিষ্ণুপ্ৰিয়া মণিপুৰী সাহিত্য পৰিষদৰ শাখা কমিটি আহানাত্ত ফঙসে ড. কালীপ্ৰসাদ সিংহ গিরকৰ লেৱিক আহানৰ গজে ঔ সময়কাৰ সাহিত্য পৰিষদৰ কেন্দ্ৰীয় সভাপতি আগৰ পুন্নাপুন্না কৰিয়া ইকরা বিশ্লেষণাত্মক আলোচনাহান, যেহান ১-৪৩ পৃষ্ঠা হাবি হাপদেসিল।

শিলচৰ শ্ৰীশ্ৰীভুবনেশ্বৰ সাধুঠাকুৰ সেবাশ্ৰম :

গিৰকৰ আৰাক ইঙাল ঙাল অধ্যায় আহান শিলচৰ চানমাৰি ৰোডৰ শ্ৰীশ্ৰীভুবনেশ্বৰ সাধুঠাকুৰ সেবাশ্ৰমগ। আশ্ৰম এহান প্ৰতিষ্ঠা অসেতাই ১৯৭০ ইংৰেজিৎ। এহান প্ৰতিষ্ঠা কৰানিৰ পিঠিৎ গিৰকৰ অবদান হাবিত্ত নিয়াম অয়া আসিল। গিৰক সেবাশ্ৰমগৰ প্ৰতিষ্ঠাতা সভাপতিগ। ১৯৭৬ ইংৰেজিৎ অসম সরকারৰ ৰাজ্যপাল গিৰকে সেবাশ্ৰমগৰকা মাটি আহান দান কৰেসিল বার পৰিচালনা কমিটিৰাং মাটিহান হস্তান্তৰৰ নিৰ্দেশ দিয়াসিল। আগৰতলাত নিকুলেসে ‘আমাৰ পৌ’ পত্ৰিকাৰ ৪ৰ্থ বৰ্ষ ৪১ সংখ্যাত হাৰপানি অৱ যে, বি হান দেনাৰ তিন বসৰৰ বিতৰে যদিহে আশ্ৰমগ না হঙৰ ঔতাইলে সরকারৰাং ঔ বি উহান বার আলথক কৰানি লাগতই। ঔহানে আশ্ৰমগৰ মূৰ্তিগ পালকৰানিৰকা গিৰকে দিনৰাতি কাম অকৰেসিল। আশ্ৰমৰ কু পৰেসে বি উহানাত মাটি থলকৰানিৰকা গিৰকে বুজন বয়সে গৰে গৰে মাধুকৰী কৰিয়া আটেসিল, তাংখা পুলকৰেসিল। ঔ আশ্ৰম উহানাত আমাৰ সৌৰকা ছাত্ৰাবাস আগ হংকৰানিৰ হপনৌ গিৰকেই পইলা দেহেসিল। গিৰকৰ পুন্নাপ জীবন এহানেই সমাজ সেবাৰকাই কাংকৰেসিল, নিয়োজিত অসিল। গিৰক সমাজৰ বৰপুত্ৰ আগ। সমাজৰ আঠৈপা সেবা কৰানিৰ সালে আমাৰমা জৰম অসিল।

যোৱহাটেস্ত নিকুলিল ‘নুয়া এলা’ পত্ৰিকাৰ সম্পাদকীয়ত গিৰকৰ দৌৰ খয়া পানার পিসেদে গিৰকৰ সময়সীমা এহানৰে ‘জগৎমোহন যুগ’ বুলিয়া উল্লেখ কৰেসি। সম্পাদকীয়ত মাতেসি—

“সমাজৰ কামৰ কাৰ্যপন্থা সম্পৰ্কে জগৎমোহন গিৰকৰ লগে মতানৈক্যৰ ফাম আছে, কিন্তু গিৰকৰ লক্ষ্যৰ নিৰ্ভুলতা সম্বন্ধে দ্বিমত অনাৰ ফাম নাই। যেবাকাই আমাৰ সমাজৰ গজে, ঠাৱৰ গজে, ভিতৰেস্ত, পালপাকেস্ত আক্ৰমণ আহেছে উবাকাই গিৰকে তাৰ চহা কলমগল প্ৰতিবাদ কৰেছে। সাহিত্যৰ কাম, সমাজৰ কামেস্ত অকৰিয়া আমাৰ ঠাৱৰ দাবীৰকা স্মাৰকলিপি দেনা, ডেপুটেশনে যানা, আন্দোলনৰ গুড়িগ ধৰানি আদি চিনকৰিয়া হাবিবেদে গিৰকৰ চিনত থয়া গেছেগা। উহানল গিৰকৰ দৌ অনিৰ দিন অৰ্থাৎ ১৯৮৫ ইংৰেজিৰ জুন মাহাৰ ৭ তাৰিখ পেয়া আমি সময় এহানৰে জগৎমোহন যুগহান বুলিয়া মাতে আমাৰাং দ্বিধা নাই”।

জনমৰ সামকৰা য়াৰি:

১৩ ডিসেম্বৰ ১৯২০ ইংৰেজিৎ ব্ৰিটিশ ভাৰতৰ কাছাড় জিলাৰ মেহেৰপুৰ পৰগণাৰ ভগতপুৰ গাঙে লেইৰাপা পৰিবাৰ আহানাৎ জগৎমোহন গিৰক জৰম অসিল। গিৰকৰ পিতৃদেবৰ নাঙ পণ্ডিত বাবু সিংহ; ইমা গিথানকৰ নাঙ শ্ৰীমতী তিলোত্তমা দেবী। তিনগ মুনি বেইবুনি বার চাৰিগ নিঙল বেইবুনিৰমা গিৰক হাবিৰ জেঠাগ। বেইবুনিহান সিজিলে; জগৎমোহন, ভানুমতি (লেইমাগো), প্ৰতিভা (পাটৈ), পদ্মা, সহদেব (সোণামণি), উত্তৰা

(মাগো) বার সুরনাথ। গিরকে শিক্ষাজীবন অকরেসিল গাঙৰ কাদাৰ বোয়ালজুৰ এল,পি স্কুলগং। গিরক কনাকতই বুদ্ধি-লৌশিঙে চৌহাং অসিল। মেধাবী ছাত্রগ হিসাবে আরতারাংত তঙাল অসিল। ১৯৪০ ইংরেজিৎ শিলচর সরকারী স্কুলেত্ত প্রথম বিভাগে অংক বিষয়ে লেটার মার্কস্ থয়া প্রবেশিকা পাশ করেসিল। ১৯৪২ ইংরেজিৎ কলকাতার সিটি কলেজেত্ত আই, এস, সি পরীক্ষাত প্রথম বিভাগে পাশ করেসিল। পিসেদে ১৯৪৫ ইংরেজিৎ কলকাতার বিদ্যাসাগর কলেজেত্ত কেমেস্ট্রি বিষয়ে অনার্স থয়া প্রথম শ্রেণিত বিএসসি পাশ করেসিল। ১৯৬১ ইংরেজিৎ যোরহাটর বিটি কলেজেত্ত বিটি পরীক্ষাহান আসাম রাজ্যরমা প্রথম শ্রেণিত প্রথম অয়া পাশ করেসিল। পিসেদে বারৌ ১৯৬৫ ইংরেজিৎ কলা বিভাগে ডিস্টিংসন থয়া বিএ পাশ করেসিল।

১৯৪৪ ইংরেজিৎ কলকাতা বিশ্ববিদ্যালয়ে তামকরল সময় উহানাং পাথারকান্দির ইতিহাসকার মহেন্দ্রকুমার সিংহ গিরকর যেইমাপি জিলক শ্রীমতী চন্দনা দেবী গিথানকর তুল লুহং অসিল। গিরকরতা মুনি জিপুত পাচগ বার নিঙল দুগ। মুনিরমা সাহিত্যিক জ্যোতিপ্রকাশ সিংহ হাবির জেঠাগ, পিসেদে সিজিলে; কান্তিকমল সিংহ, সংগীতশিল্পী গৌতম সিংহ, রাজেশ সিংহ, কার্টুনিষ্ট-চিত্রকর স্বপনকুমার সিংহ। নিঙলরমা কৃষ্ণা সিংহ বার দেবযানী সিংহ।

১৯৪৫ ইংরেজিৎ বিএসসি পাশ করানির পিসেদেই গিরকে কর্মজীবনর অকরাগ দেসিল। শিলচর পাবলিক স্কুলে সহকারী শিক্ষক হিসাবে যোগদান করেসিল। এপেইরমা তিন বসর শিক্ষকতা করানির পিসেদে ১৯৪৮ ইংরেজিৎ ইমারলাম মণিপুরর চুড়াচান্দ হাইস্কুলে গিয়া যৌবসিল। মণিপুরে শিক্ষকতা করানির কতবসর পিসেদে শিলচরে বারো আলসিল। বার করিমগঞ্জ সরকারী হাইস্কুলে বিজ্ঞান শিক্ষকগ হিসাবে য়বসিল। পিসেদে করিমগঞ্জ এরে দিয়া ১৯৫৪-৫৫ ইংরেজিৎ শিলচর নর্মাল স্কুলে শিক্ষকতাং য়বসিল। ১৯৫৭ ইংরেজিৎ শিলচর সরকারী বালক বিদ্যালয়ে শিক্ষকতাং য়বসিল। ১৯৭২ ইংরেজিৎ গিরকে স্কুল এগর অধ্যক্ষর দায়িত্বহান লসিল। ১৯৮৩ ইংরেজির ২৮ ফেব্রুয়ারি গিরক স্কুল এগৎত অবসর লসিল।

১৯৮০ ইংরেজিৎ গিরকরে ‘রাজ্যিক শিক্ষক পুরস্কার’ দিয়া সম্মানিত করেসিলা। এতার আগে ১৯৭৪ ইংরেজিৎ ১৯৭৬ ইংরেজি পেয়া গিরকে কাছাড় ডিসট্রিক্ট একাডেমিক কাউন্সিলর সভাপতিগ হিসাবে দায়িত্ব ভার পালন করেসিল। এতা ছাড়াউ ১৯৭৪ ইংরেজিৎ ১৯৮০ ইংরেজি পেয়া আসাম মাধ্যমিক শিক্ষা বোর্ড (SEBA)র সদস্যগ হিসাবে মনোনীত অসিল।

চারি দশকর গজে বিষ্ণুপ্রিয়া মণিপুরী ভাষা-সাহিত্য বার সমাজর সেবা করানির পিসেদে, সাংসারিক বার সামাজিক নানান সমস্যার কথাল চিন্তামগ্ন অয়া থাইতে, খাংতা

হাদির নুৱাৰাত ভোগিয়া গিরক শিলচৰ মেডিকেল কলেজে চিকিৎসাধীন অয়া, ১৯৮৫ ইংৰেজিৰ ৭ জুন, হুদা ৬৫ বসৰ বয়সে, হাবিৰে বেলেয়া অকালে দৌৱ খয়া পাসিল। গিরকে মালেম এহানাৎত চিৰবিদায় লনাৰ আগে 'দলান ইপুৱৰ কৰপেখ'এ ইকৰে দিয়া গেসিলগা;

“জাত এহানৰ সালে নানান চিন্তা-দুঃখল মি দেশান্তৰী আইলু। যানার সময়ত তোৰে কিহান দিয়া যিতুগা খালকৰিয়া নাপেয়া মোৰ ঠাইগ পাৱা কৰপেখ এহান থ দিয়া গেলুগা। মোৰ বানানুশি আশীৰ্বাদ লইছ। ইতি

তোৰ লেইৱা ইপু
দলান চাউবা”

গিরকে কৰপেখ এতা হুদা তাৰ বানান পৰুৱাগ কৃষ্ণগোপালৰকা থ দিয়া না গেসেগা; আমাৰ সাদে গিরকৰ গুণমুখ, বৰ্তমান বাৰ ভবিষ্যৎ প্ৰজন্মৰ সমাজজিজ্ঞাসু মানুৰকাও থ দিয়া গেসিলগা। ঔ কৰপেখ ঔতা পুন্নাপ ফংকৰানিৰ সুযোগ আহান পেয়া আজি আমি কৃতার্থ অইলাং। লমইতেগা, আমাৰাঙৌ আত্মজিজ্ঞাসাহান জৰম অক; এহানেই কামনাহান।

ঋণ স্বীকাৰ বাৰ কৃতজ্ঞতা জানানি:

লেৱিক এহান সংকলন কৰতেগা যামপাৱা গিৰিগিথানিৰাং মি ঋণী। তানুৰ পাংলাক নাইলে এ কাম এহান কৰানি সম্ভব নাইলইস। পইলাই, আন্তৰিক কৃতজ্ঞতা বাৰ ধন্যবাদ জানাউৰি নিখিল বিষ্ণুপ্ৰিয়া মণিপুৰী সাহিত্য পৰিষদ, আসাম ৰাজ্যিক কমিটিৰ কৰ্মকৰ্তা গিৰিগিথানিৰে, মোৰ সাদে অকনেই আগৰাং এসাদে লেৱিক আহান সম্পাদনাৰ দায়িত্ব দেনাৰকা। তানুৰ পৰাদেই এসাদে মহৎ কাম আহানাৎ যৱনিৰ সুযোগ পেইলু। জগৎমোহন সিংহ গিরকৰ দল আগ ইকৰা নানান পত্ৰ-পত্ৰিকাং সিতাৰেয়া আসিল ঔতা বিসাৰেয়া খমকৰতে যে যে গিৰিগিথানিয়ে পাংকৰলা তানুৰেও পুন্নিঙেত্ত নিঙ বাৰ কৃতজ্ঞতা জানাউৰি। বিশেষ কৰে, জগৎমোহন সিংহ গিরকৰ পুতক সংগীতশিল্পী গৌতম সিংহ (গুৱাহাটী) গিরকে জগৎমোহন সিংহৰ 'এলা' উহানি সংগ্ৰহ কৰিয়া দিল। কবি-চিত্ৰশিল্পী শ্ৰীকান্ত সিংহ (গুৱাহাটী) গিরকে তাৰ ব্যক্তিগত সংগ্ৰহৎত বিসাৰেয়া দিল 'সাহিত্য-তীৰ্থৰমা খুঁচিধৰা', 'ৰাহুৰ দশা' বাৰ 'নিৰ্বন্ধ' ৰচনাহানি। কবি-সম্পাদক সুধন্য সিংহ (কালিঞ্জৰ) গিরকে তাৰ ব্যক্তিগত সংগ্ৰহৎত বিসাৰেয়া দিল 'যমপুৰী' নাটক হানৰ ৩ নং, ৬নং বাৰ ৭নং অংশহানি বাৰ 'আই ডিং ডিঙৰ মালক' নাঙৰ সৌৱ যাৱি উহান। ডাঙৰিয়া শিমু সিংহ (যোৱহাট), স্বপনকুমাৰ সিংহ (শিলচৰ) বাৰ শ্ৰীমতী বিন্দুবাসিনী সিংহ (কৃষ্ণা) গিথানকৰে ধন্যবাদ জানাউৰি তানুৰ মূল্যবান পাংলাকৰকা। তানু হাবিৰ পাংলাক নাপেইলে এসাদে কাম আহান মূৰ্তি পালকৰানি চিলইলইস। কাম এহান কৰতেগা নানান সময় কবি-সমালোচক বৰুণকুমাৰ সিংহ (হাইলাকান্দি), লেখক ৰসময় সিংহ (মুঙৰ ধৰম) বাৰ কবি প্ৰভাত সিংহ (কৈলাশহৰ) গিরকগাসিৰ তুল আলোচনা কৰেসিলু। তানুৰ পাংলাকৰ আতহানিয়ে মোৰে পাংকাল জুগেইল। ঔতা ঋণ হুজানি নাইতই।

বাকি, লেৱিক এহানৰ যামপাৱা ৰচনা খমকৱানি অসেতাই কালাসেনা সিংহ মেমোৱিয়াল লাইব্ৰেৰি বাৰ সংগ্ৰহশালাত (পাতিয়ালা)।

সংকলন এহানাত জগৎমোহন গিৰকৰ ৰচনাৱমা 'বানান'ৰ ক্ষেত্ৰে কুনো পৰিবৰ্তন বা সংস্কাৰ আমি না কৱেসি। যেসাদে পত্ৰ-পত্ৰিকাত শাতসিল ঔসাদেই বানান পৰিবৰ্তন না কৱিয়া থইলাং। আমাৰ বানান বিবৰ্তনৰ ধাৱাবাহিকতাৰ ইতিহাস উহান সংৰক্ষণ অয়া থাইবতা নিংকৱিয়া। মুদ্ৰণৰ কাম এহান তেল্লাম কৱে দেনাৱকা সৱলা ড্ৰুয়েবৰ স্বত্বাধিকাৰী অজিত সিংহ (ধনে) দাদাৱে পুন্নিঙেত্ত থাকাং জানাউৱি। প্ৰকাশনাৰ গুৰুদায়িত্ব পালন কৱেৰ নিখিল বিষ্ণুপ্ৰিয়া মণিপুৰী সাহিত্য পৰিষদ, অসম ৰাজ্যিক কমিটিৱে থাকাং দিল ভাষা মোৱাং নেই। তানু অকৱাগ দেসি কৰ্মযজ্ঞ এগ ইমে চলতেই থাক; এহানেই প্ৰাৰ্থনাহান।

লমইতেগা, লেৱিক এহান প্ৰকাশনাৰ ক্ষেত্ৰে যেতা প্ৰসংশা পানাত আসে ঔতা হাবি আসলেতে সাহিত্য পৰিষদৰ কৰ্মকৰ্তাৰ সালেই অসেতা; ঔহানে, ঔহান তানুৰ প্ৰাপ্যহান। বাৰ, লেইলেক যেতা আসে ঔতা অকনেই সম্পাদক এগৰ সালে অসেতা। অকনেই এগই অজান্তেই লেইলেক কৱে বেলাসেতা বুলিয়া পাঠক গিৰিগিথানিয়ে ক্ষমাৰ মিল্লেঙ দিয়া দিবাং। বাৰ, লেইলেক ঔতা তুলিয়া দৱে দিয়া দেনাৱকা নলয়া হেইচা কাংকৱিয়াৰ। তুলিয়া দৱে দিলে পিসেকাৰ সংস্কৰণে চুম কৱানিৰ সুযোগ পেইতাঙাই। পাঠকে লেৱিক এহান বানাপেইলে আমাৰ শ্ৰম এহান স্বাৰ্থক নিংকৱতাঙাই।

কাঞ্চনবৰণ সিংহ
ডিসেম্বৰ ২০২২

তথ্যসূত্ৰ:

- পঞ্চমী ১ম সংখ্যা ১৮ বসৰ ১৯৯৩
- পঞ্চমী ৩০ বসৰ ২য় সংখ্যা ২০০৬
- নুয়া এলা জগৎমোহন সংখ্যা আগষ্ট ১৯৮৫
- সমাজপুজাৰী জগৎমোহন সিংহ; সুধন্য সিংহ ১৯৯১
- মলয়া ৫ম সংখ্যা ১৯৮৬
- আমাৰ পৌ, ১৯৭৩
- বিষ্ণুপ্ৰিয়া (নুৱা বেলি) ১৯৫৬
- ফাগু ১৯৬০-৬২
- টেজৱা চিংখেই ১৯৮১, ১৯৯০
- গোধূলী পূজা সংখ্যা ১৯৭৩
- নুমিউস ১৯৮৭
- পাঞ্চজন্য মণিপুৰী ৫ম সংকলন ১৯৭৪
- মেগশেল জগৎমোহন সংখ্যা ১৯৯২
- মিল্লেঙ ১লা বছৰ ১লা সংখ্যা ১৯৯৯ □

জুনাক পরীর দেশে

(১)

আমার গাঙ, কতি নাঙ
নেই বিসারেয়া
আমারে তেই কঙালা আতল
থসে মাঠিয়েয়া ।
বুজন কনাক আমার গাঙে
নুঙেইর অন্ত নেই
আমার নীতি - বুজনরাং
আদপল টটরেই ।
আমার গাঙে কাপকপালি
ফাংনা জাতে জাতে
খানার সময় মুং পিঠিহান
বুজের পাতে পাতে
কাঙর পালি খেচুরীল
গৈগ নাছা এলা
জগন্নাথর প্রসাদ খানা
হরি হরি বোলা ॥

(২)

বাবাশৌগ আয়,
গোরার পিঠিত চড়িয়া
ফরদে ফরদে আয় ।
ছনার লুপ লাগেয়া
রুপার ফুতি পিদিয়া
রাজার পুতক জিঙিয়া
আয় নে ঘরে আয় ।
তোরকা বোলিয়া
ব'সু চেয়া
কাদতউ তোরে
উরে থয়া
আয় নে বাবা আয় ।

(৩)

মোহর আগ দিয়া রাজায়
মাদৈ আগ আনল,
ঘোরগ অয়া মনোহরে
ঢোলগ বারেইল ।

(৪)

পিট্‌পিটেয়া আসি হাকে
চাপহান পারা,
মরা মানুর ঠই তানু
নাঙতে তানুর তেরা ।
নিষ্করিয়া ডাকলে মানু
শৌ পানার কাজে,
ফুরফুরেয়া লামতারাগা
তানুর বারীর গজে ।

(৫)

আক্‌ দি লেহা
জবর অসি মহা ।
তিন চারি লেহা
মহার হং চহা ।
পাচ ছয়-হেই
তেনা পুড়ে দেই ।
সাত আট নৌ
দেই দেই বৌ ॥
সুৰইলে দশ
মার ঠস্‌ ঠস্‌ ।

(৬)

পিট-পিটেইয়ে অকরেসি
বেকীরপারে রাস
রাস বাগাদের অজাগতে
আমার কৃষ্ণদাস।
হৈ হৈ হৈ করতারাতি
বেইনং জারির তলে
চিন্টি-মিন্টি গিদেই গাসি
এইলা পালে পালে।
এলা নাছার টেংঠা ঔতার
উপমাহান নেই
খলকা খলকা আহিতারা
হাবি পিটপিটেই।
বসন্তহান অসে হান্তে
রাস তামকরানি
বাবা সোনায় কৃষ্ণ অসে
পুতুলে রাধারাণী।

(৭)

গর্বয় আকয়া ধবংস
রাবণর লঙ্কা
দুর্জয় বপাইলে বংশে
নিবের ফুংকা।

(৮)

ইজ্জু পথে টৌ কাপিয়া
সালইক নৌগল
তরেই ডঙর ভৌ নেই
মিচ্চাং আহানল।

(৯)

অর্থ নেই তর্ক

নুন নেই হৌ

ধর্ম নেই কর্ম

এতা মুখর পৌ ।

(১০)

পালিরমা বুজাসি

কাপক তাপু তাপু

খানারকা পুলসি

বুজন ইপু আপু ।

(১১)

ধূপ দশি দিয়া পূজা

দিরি রূপবতী

ময়ুরায় হারৌ অয়া

চারতা কতি ।

(১২)

তারৌ তারৌ খৈর হৌ

খেয়া গৌরাচান

ইহৌ ইহৌ বঙিয়া

লসে হেজীহান ।

(১৩)

রইদ পড়েসে চেঞ্চেনি

বরন দের পিনপিनि

লাগেসে হিয়ালর বিয়া

গংগঙেয়া বনউনি ।

ছাগল রামু আপা

দিঘল দাঁড়ি সপা
আতা আতা এলা দেরতা
সা-রে-গা-মা-পা-ধা।
ভেড়া গিরক মোজারে
রহার বাঁশী টেট্টেরে
বনমেকুরে তবলা বাজার
তেরে কেট্টে - তেরে।
ধস্তাই হিয়ালে বরগ
কুন্টি হিয়ালী কইনাগ
কুণ্ঠি অসে রাজযোটক
পাক্কা বিধির কলমগ।
জস্ত জেলেই-মুনী
লমনার আনা-যানি
হারৌহানে সিকাডেইনী
ধান বানিরী দশকুনি।
রেগা মাপা ধানি
রহা রহা হার্মনি
বাঘমামা নাছের চেয়া
হিয়ালে দিলা জয়ধ্বনি।

(১৪)

বন পাহিয়া
কাদাং আয়া
মোরে এলা হনুৰা
কলা দিতউ
চিনি দিতউ
দিতউ পানা গুৰা।
পলাং আগৌ
তোরে দিতৌ
দিতৌ হয়ম তোরে।
দিতৌ পিঠা

মদুর গটা
খানি খানি করে।
যেগর এলা
ছনলে ডলা
অইতারা সংসার।
ডাহিস তারে
পেইমতা তারে
হাদিত তোর এলার।

(১৫)

গাছবিরুকে পাহিয়ায়
দিলা দ্বি-তিন পালা
ভাতউ উলা, হৌও উলা
হাবি আলা-সালা।

(১৬)

আগ দুগ তিনগ এরে
চারিগয় আলীহান।
পাচগর লেহা সুৰইলে
আঙুলীর সুৰিহান।।
ছয় সাত আট নৌ
রাধিয়া থই ভাত হৌ।
দশগর লেহা সুৰইলে
খেয়া পীয়া ঘুমজেই শৌ।

(১৭)

বুজা সেনাপুলগ— তার নেই খস্কাখস্কি,
অল্প স্বল্প বিদ্যা— তার ডাট এক্কা এক্কি।

(১৮)

বিদ্যা তালকর শৌগ
বিদ্যা তালকর,
বিদ্যা নেই মানুগর
মান্যতা নেয়র।

(১৯)

শাল পাতিয়া ছাগি দুগয়
দিল্য আস্থালন,
বনর বনস্পতিয়ে চেয়া
দিল্য নিকরন।

(২০)

বাঙ্করামে পেইল জিপুত
বাঙ্ক না পুড়িল
লাঙ্কনাল দন্ধ অয়া
বিদেশ নিকুলিল।

(২১)

হউ নাসেতা, চিন্তা নেই
খেই পানীর পাস্থা
জার অসেতা, চিন্তা নেই
হেজীং আসে কাস্থ্য।

(২২)

জামিরালার গিরিধন
জিলক রাধিকা,
রাধিকার হমাজকগ
গাঙর মালিকা।

(২৩)

নলী পীর ঘরতে
সিলট মাটিত,
যিরীগা হারৌ অয়া
দিঘল গাড়িত।

(২৪)

টেক্‌টেকি কাদিরী
রকম রকম
ঠিক ঠিক মাতেরতা
মানা পরম।

(২৫)

জুনাক পরী আমার ঘরে
রাতি নঙেই অইলে,
আইরী মোর হেজীহানাত
চুমা দিরী গালে।
মাতিরী তেঈ ‘পরাণ সোনা’
যিকগা জুনাক দেশে,
পাহিয়া-গোরার পিঠি কায়া
রাজার পুতক বেশে।
টুং-টাং-টুং পাহিয়া গোরা
লামের মাটির গজে,
চড়ৌরিগা শাপদ হানাত
চং আহানর মাজে।
থাইরী পরী লগে লগে
নুংশি এলা দিরী,
ফরউরিগা জুনাক দেশে
যেপেই আসি পরী।
টিং-টুং-টাং রহিতারা
পরীর নুপুর খারৌ,

রাতি তে নেই তানুর দেশে
কতির কতিও হারৌ
এলা দিয়া নাছে নাছে
মাস্তারাতা 'সোনা!'
আমার তুল তি থাকনে
খেয়া খানা-পীনা।
মাতুরি মি 'না-না-না-না
ইমা আসে ঘরে,
সোনা বোলিয়া ডাকতৈ মোরে
না পেইলে উরে।

(২৬)

হরু পেরু পোক জক
নিকুলিয়া কক্ কক্
উরা উরি অসি,
মনুপীতে পিৎ পিৎ
বিংভূলা চিৎ চিৎ
খঙ্কা খঙ্কি অসি।
মৌরা গিরি মাজারায়
সিকাডেইনী গঙ্গারায়
দিলা উলফালি,
গোবরী কালা পোক
জিঞ্জিরী টক টক
অকরেসি পালি।
জ্বি রাজা উঠেসে
চুমা দেনা থকসে
এলা গেইতারা,
পিং মহায় পিঁ পিঁ
চেঞ্চুরায় টি টি
বেনা বেইতার।

(২৭)

ছাগিয়ে রকলা মেঁ হেঁ হেঁ
কুকুরে ঘাউক ঘাউ,
গোয়ায় রকলা টি হিঁ হিঁ
মেকুরে মিয়াঁড়ি য়াউ।
ভেড়ায় রকলা ভেঁ ভেঁ এঁ
মইষে ওরট ভেঁ এঁ;
গুরুয়ে রকলা হাম্বা হাম্বা
হিয়ালেতে টে টে ছয়ে।
নংশারতা হুম হুম
দিন গুজুরন পারা,
বাঘরতা হালুম হাউ
লরের বন-টেঙারা।
উল্লুকবাল্লুকে ছটেছ
বাদরেতে খিক্ খুক্,
তকপায় রকলা রাক রাক
আংকর সুখ, না দুখ।

(২৮)

মি তে ইমা নাগই উঙা
ডাঙর অসুগ,
চাতা কতি আঙি ফুতি
মুরে লুহপগ।
ফরদেকুরা বৌর গোরা
মি থৌকরতউ,
জুনাক বেলি আলী আলী
মি লালইতউ
মাতেই ইমা মোর সোনাতে
রাজার পুতকগ,

দশর দেশর সেবা করিয়া
বরহে পেইতৈগ।

(২৯)

আধাররমা ঘুমর হেজীত আমি আসিলাং ।
গোকুল করার কা কা ছনিয়া হজাগ অইলাং ॥
গাঙে গাঙে এলা দেসিল জাগরণর এলা ।
মহাসভায় হারউ অয়া গীতিস্বামী নাঙ দিলা ॥

(৩০)

মোর গারিগ এরে চেই
লগে আত জাং,
মুরগ এরে গারগ এরে
মানুগ মোর নাং ।
মুরর গজে উঠেসে চুল
কনাকে রং কালা,
এরে চেই চাম এহান
কালা নাইলে ধলা
মুরগত এরে মেইথংহান
পিঠিত খকচাহান,
আঁহি দুগ পিচুম দুগ
গজে নিরালহান ।
এরে নাক এরে কান
এরে থতাহান,
থতারমা চেই দাতগি
রাঙা জু আহান ।
গারিগরমা এগ বুকগ
তলে এগ পেটগ,
কাঁকালিহান এরে পিঠিত
লারিকটা দুগ ।

উরত দুগ এরে চেই
তলে আঠু দুগ,
আত-জাঙর তারার তুল
আঙুলী আক্ কুড়িগ
পাম্পল এগি গাল দিয়গি
করের তুল তুল,
দুনিয়ারমা আমি এতা
ভগবানর ফুল।

(৩১)

গঁধ-নেই ফুলগরে নেই লদেকুরা
বিদ্যা-নেই মানুরেউ নেই মনাকুরা।
রাজারে দিতারা পূজা প্রজায় স্বদেশে
বিদ্বানরে দিতারা পূজা স্বদেশ বিদেশে।
তা আর মন দেই বিদ্যা উপার্জনে
মানুরমা মানু অনা পণ মনে মনে।
সাধু গুরুজন বাক্য মান্যতা করানি
নিজ-পর বাছ নেয়া হাবি বানাপানি।
নীচ অক ক্ষতি নেই অইলে মহৎগ
নম্র অয়া হমা দিয়া লই তার সঙ্গ।

(৩২)

সুচিন্তা কুচিন্তা কতি আহের পুলয়া
সুচিন্তা লক্কর শৌগ কুচিন্তা বেলেয়া।
লাজ-লজ্জায় বেয়াপার রাশি রতন
লিচেতে বেভারে উচ্চ বংশর গঠন।
সেবাত যেগয় দের হাবি মন প্রাণ
কৃষ্ণকৃপা দের তারে বিষ্ণু ভগবান।

□

রসমঞ্জরী

জগৎ মোহন সিংহ



রসমঞ্জরী

হরি হে! কিহান আসে বাকী দুরাশার।
রসহীন গারীগত রসর সঞ্চার।
তিনকাল গত, থাইলতা আক্কাল,
এবাকা রসিক অনি মাতোতা নামাল ?
বুড়িরাং বুড়াগর কেথক করানি।
দেখলে শয়না মানু আত সপা দেনি ?
তবো হে কনাকলেং তোমার হেইচা
লউরি ঙ্গকরে পারা ছনা আক মোচা
পারুরি কি নুরারুরি ভগবানে জানে
মাতে নিঙ্গা মাতের যেহান মনহানে।
রসিক নায়া রসর বোলী অসম্ভব
রসরাজ কুপা নায়া রসও দুর্লভ।
রসর রাসর রাজা ছনাদে হরিরে
অকরিং রসর কথা বিষ্ণুপ্রিয়া ঠারে।

□

রসার্থ

দেহিয়া ছনিয়া ভাবে বু পড়িয়া
হৃদিগয় যেতাল বিভোর
ঔ ভাবহান রস বোলিল নাঙ
পেয়া জগতে অমর অর।
ভাবল ভাবক রসল রসিক
ভাব রস তঙাল দ্বিয়তা
ভাব ক্ষণে থার ভাবক বানেয়া
রসপ্রিয় জনমরতা।
ভাবতে অপার চঞ্চল অসার

পাতাত শিশির বিন্দু পারা
বেলির মিঙালে পরলে পরলে
ঝিলিক ঝিলিক খেলতারা;
রসতে পানী তলর লুখনি
বর্ণ পটানি নেইকো নেই
টটরানি চেই চলনও চেই
রসিকে তঙাল ইমেই।

□

বন্দনা

নমো নমো সিদ্ধিদাতা
হে গণেশ প্রভো, আজি মি
নিংশিং অউরি তোর বেদে চেয়া;
সিদ্ধি মনেয়া কামে শরণ
লইতারা তোরে মুনিঋষি পেয়া।
মি তে সামান্য অতি; কিহান
শক্তি আসে মোরতা!
অধমগরে লাল করেদেনে
সিদ্ধি-নৌল আশার সমুদ্রত।
মুকরে যৌকাল-থতা
হংকরের প্রভু, টেঙারা
লালরহা লেঙারাগ পেয়া
যেগর কৃপারেণু থাইলে; হমাদুরি
জাং টিংদে ঔ মাধব হরিরে।
হমাদুরি পুনঃ পুনঃ
ভজনে বহিয়া আজি বাগ্‌দেবী
বীণাপাণি সরস্বতী— তোরে;
তোর কৃপার বিন্দু আগ

পেয়া কতি মুখ
জগতে অসিতা কবি,
মহাকবি, বিদ্যার সাগর;
ঔ আশা অধম এগরাং
দুরাশাকো ইমা, হৃদা
মাগৌরি তোর দৃষ্টি আহান
মি পারা শিক্ষা-দীক্ষাহীন
অধম এগর গজে।
আরাকো হমাদুরি বাল্মীকি মুনিরে,
ধ্যানমগ্ন ঋষি যোগ তমসার পারে;
হায় প্রভো! কাব্যর গঙ্গাল
ভাছরেইলে জগৎ-ব্রহ্মাণ্ড;
ঔসাদে ধারার লিক্লাহান
মাগৌরি তোরাং হে মহাকবি।
কিহান গুণহান আসে!
অসার জনম তোর কৃপা নায়া,
কনাক শৌগয় থায়া
মালকর উরে আতহানি টিংদের
জুনাক লাক করানি সাদে;
মিও মুনি, উবা অইলু
তোর গঙ্গাধারা শকইং বোলিয়া।
প্রভো, দয়া না এরেদিস মোরে,
তোর জগতর কোঞ্চেল আগত
জিরানির চুটি আগ মাগৌরি চরণে।

□

রসকীর্তন

রসর পরল নৌহান
হারপার অধম নানান
শাস্ত্রর পাতা হেইরাপ বুলেয়া,
আদিরস, বীররস,
করুণ, অদ্ভুত রস,
হাস্য রসও মাতৌরি লেহেয়া।
আরাকৌ ভয়ানক
লেহেইং নৌগ অক
মি বোলিল অধম এগয়,
বীভৎস, রৌদ্ররস,
শান্তল নৌহান রস
কাব্য ব্যাকরণে শাস্ত্র জয় জয়।
মালাডাল এহানিরে
গিথিয়া যতন করে
মহাজনে আরাকও নিংকরিয়া,
বাৎসল্য বোলিল রস
গিথিয়া করেসি দশ
রসর পরল সমাপ্ত মাতিয়া।

□

আদিরস

যেপেইত থাইলে তি
জানু মি ঔপেই যানা
আসে কতি মাহিমানা
তবো তে মন এ মোর
পানারকা কাদা তোর
অলাংপা দিনরাতি ।
ঔরে দিনে বানাদিয়া
মাঙইলেগা পাছরিয়া
আজিতে কীহরকা তি
কাদাকাদি এয়া কতি
মোর তুল হুদা বধনা ।
বানা পানা নুংসি পানা
হাদিত হাদিগ থনা—
নাইলে মোর নেই গতি
গোপনে থদিস তি
মোর দুরন্ত বাসনা ।
মনেইলে আজিও তি
মানার বাঁধগ ভাগে
বানা দিয়া হাদি-হাকে
আচুলনে তোর কামে
ছলনা বেলেয়া ফামে
ভিন্ন নায় মোর তুলো তি ।

□

বীররস

সুপ্করৌ ডিল না
অই মিচাং মান্না
চেতয় অয়া চান্না
ও গাবুরা পুরীজেলেই মৌ।
বাঁধেয়া লেংকাটি
চুম করে মুংপিঠি
থক্‌থকেয়া হাকমাটি
খুরূপ দেই ছংছঙেয়া বৌ।
সুনু কর টেঙারা
আষাঢ়েই বনউরা
জদজতেয়া যতো বেরা
কাপতে থাই নিক্করুয়া দৌ।
সালৈ ক্কার ধনুকল
ঠেলেই মুঙ পাম্পল্ল
ঐরাবতর পাক্কাল্ল
নম্‌করো চৌদ্দ মাটির খৌ।
তল তলাতল অতল বিতল
খল্‌কেয়া তল রসাতল
নিকালেই মণিমুত্তার খৌ।
তোমারো - কাপা আমারো কাপা
তাহৌ আম্পা
হৌতে হৌ গিরিগরো হৌ।
অৰ্জুনর জিপুত আমি
মারুপগ চক্রপানি
নেই ডর নেই আঞ্চিল অনি
অ আতাংপা ভারতভূমর শৌ।

□

করুণরস

মামইল ভারতভূমি

লালবাহাদুর তি নায়া,

জহর যেইতেগা হাহাকার,

দুঃখ কতি ভারত-ইমার;

আহির পানী না ছকে থাইতে

তিও নেই আমারে বেলেয়া ।

লেইরা দুঃখত তি ডাঙর

উহানল অসিলে হাবিগর

লেইরার অন্ন খেইলে ডাঙর অয়া,

কোটি কোটি লেইরাপার

হারপাসিলে হাহাকার

আমারতা নেয়ইল তি আজি নায়া ।

□

অদ্ভুত রস

বেলিহান রাং দিল

পিঠির সরার পারে

গল্লার উশক উরে

থায়া থায়া বারে বারে

মৌকাগয় বুঁকো রহিল ।

নিশার বার্তন—

জানেইতে পাহিয়া

বুড়ি আগ নিকুলিয়া

দ্যৌর বতী দিয়া

অকরলী ভজন ।

নিভিল বতী—

কুরাংকার বৌ লিরি !

কিহানতে এহান ?

উঠলী পাশ্বে বুড়ী
'কিহান লালইলু মি'
খালকিরী সতী।

নিশার হপনে—

তেইরে মাতল আগয়
ছনতা পাশ্বে
থক্ক পুরতয় (তোর)
যে নিংহান মনে।

অন্নপূর্ণা ঘাটে—

পেইতেই খাটল জার
ঔজারে শয়নে আসে
জগবন্ধু মায়াত থার
বিসারেইস পটে।

বিয়ান ফুরইল—

সরার পটে পটে
বিসারেয়া আটে আটে
হোপন - নিশানল
পেইলীগা খাটল।

ডাকনির কথা—

বেলতে ছেদ বাণুকর
চিরি চিরি রকতর
নিকুলিল ধারা,
ভিতরেতঃ দেহাদিল
প্রভুর চিহ্ন হাবিতা।

কাত্করলী সতী—

হঙকরিয়া গিরকরে
সেবা দিলী বামন বৈষ্ণবরে
তিনদিনও না সুবইল
অইলী তেইর বৃন্দাবন প্রাপ্তি।

□

হাস্যরস

মণি শৌগয় মাতের মালকরে
‘ইমা, মি এবাকা বুজনগ,
সৈন্যর মাঝে অইতৌ জেনারেলগ
তি আরতা না লইস মোরে উরে,’
ফাক ফাকেয়া আহিরী মালক দিলী গড়াগড়ি।
‘চানে ইমা, মারতৌ দুষমণ কতো
ডু-ডু-ডু ডরম্-ডরম্, এক দো-এক দো
না আহিস ইমা, আরাকৌ আসে এহানাত পুরী।’
নঙিল শৌগ, চোঙ আগল কামান হংকরল,
বুকগ ফুলা খুরূপ দিয়া মাতল ‘সাবধান’,
ঠিক ঔবাকায় উঠিল পিঠিত ‘কে ছয়ে’ রৌহান
ছনানিয়ে জেনারেলগয় রণে ভঙ্গ দিল।

□

ভয়ানক রস

রাতির দ্বিপর— কুংগ আগয় আটানি অকরল
দারিগর পটেত্ত : হৌ পটে ভরী কদমল।
কিহান অইল, না জানু, আকখুলাগ ঘরর ভিতরে
দিল বারী রম কাঁটা, ঠইগি হাবি থুকথুকেইল।
হুম্— বজ্রর রৌহান পারা নিকাল্ল নিশাচর
বেড়র কাণেদে চেইলু বুড়ী আগ ভয়ঙ্কর।
ইমাম মামহানাত ঝলকার হোভা লাইট দুগ
উতার পহরে লকলকার রাঙা তেল্কা আগ;
থাপারার ‘হুম্ হাম্’ রহে বজ্রর মুণ্ডিল,
ঘরগর তুল মাটি পেয়া নিকরা অকরল।

□

বিভৎস রস

দিন অইলে রূপবতী
স্বর্গর অঙ্গরা থাকা !
তুলনার ফাম নেই
যৌবনর ভারে বেঁকা ।
রাতি অইলে নিকুলিরী
বিবস্ত্র দিঘল নখ
চুলমূর এরেদিয়া
হৃদা মাউ রকতর ভথ ।
'আ' করলে লকলকার
জু লামর বিকট
দাঁত দুগ নিকুলের
উপমাত সান্ধাৎ উকট ।
থতাদে বেলেইরী তেই
কাচা শৌর রকতর ঝল,
সাত পরল দেহগত
নাপ্করেসে দুনিয়ার মল ।
শৌ বিসারেয়া এইতে
আকদিন দেহিরী বনে,
দ্বি-টুমার শৌ আগ
নাইএ বেড়া বিজ্বালা নৌফামে ।
শিঙলেই কাড়িং বোলতে
দ্বিটুমারে পেইরাক তিলকরল,
তিলয়াই উঙা উঙা
শৌগয় কাঁদানি অকরল ।
য়করলী হিঞ্চাপী জরা
নাঙ শৌগর জরাসন্ধ অইলতা,
জগৎ অধমে চেয়া
শৌর কাজে ইকরল এ কবিতা ।

□

রুদ্ররস

কৈলাশ শিংচৌএ আজি রহের ডম্বর
রু রু, রু রু, রহের পিনাক পিনিপিনি;
নন্দী ভৃঙ্গির তুলো পাউরি ভূতনাথ—
বিভোল আজি কি রসল বিভোর অয়া;
ঝরম্ ঝরম্ রহেরতা করতাল
নিক্করুয়া শিংচৌবর বনলতা হাবি,
আজি কি বারয়া? বিষুর গৈগ গেলগা;
ভাঙ খার ভূতনাথে আজি হে অকরল
বিষুর হারৌপা ভূতপ্রেত লগে করে।
নিকুল্লাতা দিক লেহে বৌ-বুলুনি
উড়েয়া বিরুক গাছ মুজুরিয়া পাতা;
ঝিল্কার দৌ হাকে চিড়া ফারে ফারে
হাঃ হাঃ হিঃ হিঃ আহিতারা ডাকিনী যোগিনী,
ফুলিল সমুদ্র-টো আছাড়া পাছাড়া।

□

শান্তরস

যিক্কা হাট মন নিত্য বৃন্দাবনে।
জঞ্জাল কতিল আরাকো কয়দিন
বেরী দিয়া থানা মনেইলে
আহিগি জিমেইলে নেই কুঙ্গও নেই কো
কিহরকা মন আঞ্চিল অয়া থাইলে।
যেগিরকা খালকরর ঔগিতে সুচতুর—
নেয়ইবেতায় তি পাছুরিয়া তোরে,
কুঙ্গয় কতি পানা বাটলে তোর জিনা
এতাল মন্ত কতি পাপাচার।
ভাছরানে নৌগ হরি কাণ্ডরীগ
খালকরিয়া নিত্য গুণধাম,
মাগের বারে বারে অস্তিমকালে হরি
চরণ ধূলিত দিস আকচুটি ফাম।

বাৎসল্য রস

বলরাম, কানহিতে মোর জনমর মণি ।
গোষ্ঠত নেনারকা তারে নিক্কা নিক্কা মাগানি,
হার না পারাই ইমার দুঃখ নেয়ইলে নীলমণি ।
নিলাইগাকোপুরি কাহুই গোষ্ঠত বুলে বুলে থারাই
ভকে টাটিয়ে হিনপেইলেতে কুঙ্গু না চানি
ক্ষীর ননী হংকরিয়া থাউরী পথগ চেয়া চেয়া
ইমার বুকগ অর উদালা না দেখলে পরাণমণি ।
লয়ইল গিরিগিথানী রসর কথা,
এহানিতঃ অধম মি নাজানু আরতা ।
এলা দিলু যতিহান রসর কীৰ্ত্তন
ভাবক বৈষ্ণবে মাতেদেকা দোষগুণ
ইমাঠার অর্থ হেজিতঃ হিকেসি ঠার
জয়তু শ্রীবিষ্ণু জয়তু বিষ্ণুপ্রিয়ার ।

□

কৃপিয়া হিয়রে

মহাসভা ।

যুগ যুগ থাইস জিংতা ।
পৃথিবীত জরম হান্তে
যিতৌগা আকদিন
তোর নুংসি উরহান
বেলেয়া সরার পারে;
তিতে কিন্তু থাইস ঙাল
যেসাদে জোনাক বেলি;
জন লেহে তোর ঙালে
মাতকা ঙালয়া—
'ভাল হে বিরাট সভা,
ভাল-ভাল-ভাল ।

মোরাং তি ইন্দ্রপ্রস্থ,
দ্বারকা, হস্তিনা;
মোরাং তি মণিপুর,
বিষ্ণুপুর লোকতাকর পারে;
মোরাং তি কুরুক্ষেত্র,
মহাতীর্থ গয়া,
গঙ্গা-যমুনা।’
তোরে লেংকরেসি তানো
দৌ অসি ইচুদিনে—
তানো মোর গুরু পরিজন,
ব্রহ্মর্ষি, রাজর্ষি, তানো।

বিরাট সভা।

মোর তি নিঙর দৌলোক,
যুগ লেহে তোর মা
লেম্ করিয়া চারি ফালু
বহকা কুরুকুল, বলী
পাণ্ডব বংশ হাবি;
বহকা দ্রৌপদী, কুন্তী,
গান্ধারী মহাসতী,
যদুবংশ বহকলকেই
চিত্রাঙ্গদার তুল
পারেঙে পারেঙে শায়া।
নঙা নঙা চরণে তানোর
লইতউ চরণধূলি
শিরোধার্য করে।
তোর মণ্ডলীগ চেয়া
হোমেইলুক পুরি
ঘষতউ গারির মা
তোর নুংসি রজ
আহিয়া কাঁদিয়া।
তোরে না ঠরেয়া

আঙুলী দেহার যেগয়,
পাপতাপ তাহে জানে;
দিয়র আসন যেগরে তি
তারতা ধন্য জনম ইহ:,
কিস্ত করের আনীকা
পেয়া আসনরে
মনেয়া মনেয়া যেগ,
সীমা পার নেই পাপ তারতা
নেই ইহ - পরলোক।
মিতে কিস্তমান
করতউ আর্তি দিনরাতি—
যিতউগা অস্তিমকালে
নিংসিং সরার পারে
তুলসী-জার সাদে তোরে
কুপিয়া হিয়রে।

□

ইমারকা

এলা দিয়ার তানুর এলা
যেগিএ দিলা
আহে আহে মুক্তা পারা জান;
খাটি হুনা ইমার মাটি
তেঈর টাটি
তানুর নিঙে জিঙে স্বর্গহান।

সুমকরিয়া তিলে তিলে
ইমার সালে
কলিজাগত থাসে তেজহান;
লমকরিয়া ইমার জাঙে
ইমার নাঙে

গেইলা তানু মঙ্গলারতিহান ।

ভয়ানকর মুঙে তানু

হিলরমানু

মুর নঙানি মহাপাতকহান;

নরপশু যদতি অসুর

নঙেইলা মুর—

চেয়া তানুর আত্মবলিদান ।

□

কাণ্ডারী ! হুশিয়ার করৌরি তোরে

কাণ্ডারী ! না টিপেই ঘুম

হুশিয়ার করৌরি তোরে

হুশিয়ার ! কিসাদে নৌগ এগ,

কিসাদে সমুদ্রর পারাবার এগ,

কিসাদে উল্ফালি টো, তরেই এগ,

চা-বেলা গজতল নয়ন ঔগিল

কিসাদে সঙ্কটগ এরে;

কাণ্ডারী ! নৌ বাহ চেৎকরে,

হুশিয়ার করৌরি তোরে ।

কাণ্ডারী ! না মনেইস তি ইমে

কারালীগ দিলাং তোরে—

যাত্রীক হাবিগ আমি

দেসি তালুত ঠইমামি,

তোরাং পটাসি জানগি

সিলকরেসি বক্চাগি

দুখসুখ জনমর

হাবিগ তেং করে;

কাণ্ডারী ! বাহ লেইলেক নায়া,

হুশিয়ার করৌরি তোরে ।

কাণ্ডারী ! কতি অরাহিন পাসি

বুলন দিয়া চাতা আমারে—

বেলেয়া ইমার উম্

মূরে লসি দুঃখলুম

মৈনাক শিংচৌর ডেকি,

দুঃখীর মা মাম্মা দুঃখী

আমারে জিঙিয়া নেই

ইহ জগত সংসারে—

কাণ্ডারী ! সাবধান এতারেল,

হুশিয়ার করৌরি তোরে ।

কাণ্ডারী ! ঔরে শাচাকগ ঔরে

নিকুলিল হাকর দোবারে—

নাই দ্বিবারা-দ্বিশাং বারী

চীকারিল দোয়াই দিউরি

টেকাগ য়ওনা প্রায়—

বিস্তা অসে ডিল্ নাই

শক্তির লুমগল বলী অয়া;

কাণ্ডারী ! ডিলনিত্তে নাক্,

হুশিয়ার করৌরি তোরে ।

কাণ্ডারী ! অন্তিম পরীক্ষা এহান

মাতৌরিতা তোরে—

বুরতাঙাই পাতালীর উরে;

নাতে কাইতাঙাই পারে

এ ফিরতে নিশ্চয় নিশ্চয়

দুহানর আহান অইতয়

কাণ্ডারী ! না থাই গারিগ বেলা,

হুশিয়ার করৌরি তোরে ।

নৌউলীগ ! দিনরাতি কতি

থাইলাং দিঘল তিমিরে

লংলেইগমাহি না জিরেয়া
এ মুর হৌমুর পেয়া
গাদিতারা বেইরী হাবিএ;
কাগুরী! না বুলন্দী,
হুশিয়ার করৌরি তোরে।

কাগুরী! জরম যেবাকা কৃষ্ণ
কংস কারাগারে
কুম পারা থাচির আধারগ
নেই ফাম বিধেইল ছচিগ
টরাট্ অইলী আসুটা পৃথিবী
হুংকারেয়া চরাচর হাবি
ঔসাদে কতিও রাতি
এলইলাং প্রহরে প্রহরে;
কাগুরী! ঔ আংশা লমকর আমার,
হুশিয়ার করৌরি তোরে।

কাগুরী! কুরুক্ষেত্র লালফামর
রাতি নিক্কা নঙেই দ্বিপরে—
কতি হনলু রৌ-মেলা
স্বর্গ মন্ত্য চিলা চিলা
ইশার জিপুত জিয়েই;
কাগুরী! পড়িক্ মরিক্ আমি
পণ লসু যাত্রীক্ হাবিরে;
ল বেলা তিও পণ
জিয়ন নাইলে মরণ
ধূজটির জটাগ কেলক্
লইলে পণ লরক্ খরক্
করিক্ ছুণুগ আজি
বিধাতার হাবি শাপান্তরে;
কাগুরী! আহিল অন্তিমকাল,
হুশিয়ার করৌরি তোরে।

□

মিলন

মিলন মিলন মিলন
দিক্‌চীকারি কনাক বুজন
করিক মিলন সভা;
মিলন নাইলে গতি নেই
কর্ম জর্ম পরলেই
নেই সুপক' হোভা।
মিলনদারীএ আটে আটে
মাতার মানু পথে ঘাটে
সদজন হাবি চেয়া;
হাবিএ চুম বুলেদিলা
দাপাহাবি পুলদিলা
এইলা মূর খাজুরাদিয়া।
মীমাংসতা মীমাংমানু
মেৎকরিয়া তুণ্ডা ছুন্
দাঁতর হাদিত খুবেইলা;
মাত্‌লা এফুর বইতাঙাই
দ্বিয় দাপার ছন্‌তাঙাই
মধ্যস্থতে গীতা ভক্তমালা।
সত্যতও নেই মিথ্যাও
ধর্মতও নেই অধর্মতও
নোরা কালর এতা বেদবিধি;
পক্ষ দুহান কালাধলা
নিরপেক্ষর ব্রজলীলা
সমাজরকা ছনিক এতা নীতি।
মীমাং মানুর উপাধি
মীমাংসা রত্ননিধি
তীর্থশাস্ত্রী পঞ্চানন;
মীমাংসা বাচস্পতি

জ্ঞানীশুণী যত ইতি
ছন্ডেই পাপ অর বিনাশন।
মিলন বিশারদ অজা
লেমহানায় লেম্পা রাজা
তানোরমা বুদ্ধি মহাবল;
খেইপা নিং নেইকো
দশে এতা হারপেইকো
সন্দয় অইলে ধর্মরসাতল।
নিরাল বুজে চরণছাপা
নেম্পাল বুজে নিকুনজপা
বদন বুজে হরি হরি বোল;
দুগয় দুগয় ধর্মকথা
লীলা, ভাগবত গীতা
ধ্যানে পেইলা নবদুর্বাদল।
দশর কামে রূপা
চান্দা দেনা থকুপা
নাগয় মিলন নাসি পেয়া;
মান্তি অইলা হাবিহান
এতাই অসি জাতর প্রাণ
তানোর আতে বৈতরণী খেয়া।
মস্ত্র পড়িল অটা অটা
কিন্তু মহাদেবর জটা
না জঙিল মাটির গজেতলে;
চেতইলা দাপা-দলর কৌলী
হারৌ অইলী ইমাকালী
সারেই ঙারেই এইলা পালে পালে।

□

কলাসরর এলা

কলাসরে জগর জাগর
এফুরতে গিদেই
বিরাটসভা বহিতয়হা
ভাণ্ডারগ বুজেই ।
চান্দারুপা, চান্দাচউল
পারিল মাহি দেই,
হোভা হোভা মুনিঝষি
য়মোদিতাই চেই ।
বিরাটসভার বিরাট মানু
তানুর দেহা পানা,
হাত জনমর পুণ্যফলে—
কীহর তীর্থ যানা ।
বার্তন উলী দিয়াপেঠাসি
দিঙ্ দ্বিবারা হাবি,
রটেইতারা হুরহুরেয়া
নৌদন জাতসেবী ।
কলাসরর পুরিজেলেই
যত সিজা, লেইমা,
হারওহানে ধারেইতারা
কাঁঠী আংঠী ছনা ।
এইগা পুরেল দিল ধুমেল
মাতল হিন্ নেই,
কলাসরর ইজ্জত্ চেয়া
ছনর দেখয়েই ।
কিহান অসে কর্মধারীর
ফউনে গুণাগুণি ।
এইলে অজা নাইব কজা,
অইলা জানাজানি ।

সভার দিনে এইলা হাজার
 লেহেইতেতে নেই,
 পিণ্ডিরীএ বলেইলা সাং
 চারি বারাদে চেই।
 হাত আটগয় অর কিতা
 এতা বিরাট সভা?
 অজায় গজায় টটরতারা
 স্বরফাম তে হোভা।
 হেক অজায় মুন্সি দিয়া
 হেইকরল কর্তান,
 তাহাং দিলা ঢাকুলায়ও
 সেরেরেং পালাহান।
 জাতর জ্বালা, কাঁদের অজা
 ঘুম বেলাসে হান্তে,
 খোলামনে খোলাভাবে
 মাতল হাতে হাতে।
 লক্ষ্যধরর লক্ষ্য কারগ
 নাগয় হেতেমেতে,
 হষ্টক্ দের চের টুমাল
 বোলীর জাতে জাতে।
 ভাবক-ফালু হারাং হারাং
 সিঙও পাঙও বসি,
 সিঙসিতায় জুম্ মারেসি
 পাঙতায় সিঙসি।
 অজায় মাতের মারুপ মাশাং
 যত্ ত মন্ত্রী মাস্ত্রী
 তানু হাদিত তা চানাপা
 লালভাদুর শাস্ত্রী।
 'ইমাঠারহান লিড়িং দেসু
 চেই মন্ত্রীর সই',

মাতানিয়ে সাবাস বুললা
ভাবক হাবিগয়।
অজা এগর কহি কারবার
জেবগি বুজে থার,
হায়তা কিতা, নাগয় কিতা
বেজান গুজুরার।
হারপা বেললা ভাবকগিএ
হায়গ অজা এগ,
জাতহান জিংতা করানিরকা
অসে অবতারগ।
ধন্য ধন্য ডাঙর অজা
ধন্য দোহার পালা,
ধন্য আরতা নোরা পুরানা
তার জোড়া-ঢাকুলা।
ফঙে নাগয়, লোতে লোতে
অরেইতার পালা,
কাফাম চেয়া মন মজেয়া
দিতারা সিঙ এলা।
বিধির লেখার কটাকটি
ঘটে বহিল অজা,
চিংগ অয়া টপ্প পড়লা
জাতর যত প্রজা।
মাতের অজায় 'মহাসভা
থায় কিহান কানা?
মোর পুণ্য জাতর পুণ্য
নাইলে ক্ষতি অনা।
সরকাররাং যানা-আনা
বন্ধ থসু চেইতা,
মি যানাই হাবির যানা
মাতো আরতা কিতা?

সভারমা ছনতে ছনতে
অজাগিরির এলা,
ছকার মেইল কেজাগিরি
অইলা আলাসালা ।
মেইথং কালা অজাগিরির
অলঙ বলঙ চেলা,
এফির ইমার লেইকালে
হাবি অইলা ডলা ।
বার্তন নেয়া করম্ ভাগা
করলা মহাসভা,
হেলার বুদ্ধি কর্মধারীর ?
খেই মণ্ডর ছাবা
থই অজারে ঘটর গজে
বারো আকফুরুংতে,
কলাসরে মাতের কিহান
ছনিক কথাহানতে ।

□

লুকা ধর

ইমা ইন্দল গিদেই ॥
এইল সময়হান দেনা বলিদান
বাশাক লইলা তোমার জিপুত জিয়েই ॥
ইমার শিকলগাস না জঙিল
দুষ্মণে বেরেয়া আসি তুমীল;
বজ্র আতে কাঙ্ছিকালাকে
নিকুলিয়া শৌহাবি দিকে দিকে
হুংকারেইলা বৌ বুলেয়া
বেইরী দাপারে মুৎকরে দেই ॥
তুমি শক্তি, তুমি দুর্গা, তুমি মহামায়া,
বিষ্ণুর নিঙে অস বিষ্ণুপ্রিয়া;
তোমাং লাংনা দিতেগা
তোমাং বেইরী টুমসিগা যুগে যুগে;
শেলগি ধর তানোর বুক
ইমার জাঙে তানো হাবিরে লুটদেই ॥
আকদিন লুকা তুলিয়া গজে
গেসিলাইগা কুরুক্ষেত্রর মাঝে,
ঔদিন বারো এইল্হা
তোমার বুক থাপারেয়া কাঁদারোহা
সংগ্রামী জিপুতর তাজা রকতে
লুকা লাগেয়া অসুরর লঙ্কা আকসাটে
পুড়েয়া ডহেয়া বেলাদেই ॥

□

লয়লাট

কলিজা আকইল তিতা ভানুগাছ মি,
রৌ মেলা আসুহাং জঙিল ঠইমামি।
অসুর হিষ্কাপার আতে পড়েসু লৌটাকে,
দিকদিশাং হাবিবারা খল্কার লয়লাটে,
ধাবদিতারা ফালদিতারা শৌ জিপুত কতি,
য়াং করে পড়িল গজে প্রলয়র ঘোর রাত্তি।
কলির অসুরে গাদ্দিয়া কামান মটার
ফংপাতে ফঙে মারলা লিশিং অপার;
ঠাই নেই বাংলামাটি হাজারে বিজার
বিভোলায় সাভোলায় এপার হৌপার
এরেদিয়া আপাবপার হুনা ভিটামাটি
কতি হীন হাবিবেদে, কতি ভক্ টাটি!!
পথ সরা জিংতা মরা রকতে রাঙিরা
ডঙর বুজিল চারাপ ছদ্বা লাশ মরা;
বেয়াপার সতীত্ব মাংকরলা অসুরে
লপুকে উঠানে ভূতপ্রেত আসি টেক্ টেকেয়া
চিরি বিরি করতারাতা কুকুর লাংটিয়া
কিহানে কিহান এহান অইলা দুগতি
পেল্নার ইয়াহিয়া অসুর দুমতি।

□

অমৃতর শৌ

অমৃতর শৌ আমি
হিকেসি অমৃত মাহী,
ঘাটে ঘাটে মরণর কু
ফং পাতে পাতে কতি !

থং বাধে বাধে লালসিহা আমি ।
এবাকাও জিংতা দুরারে
দ্বিজাঙর গজে দিয়া পারা
উবা অসি জিং- ধরে
চুমকরিয়া হাবি ঠইমামি ।

মরণ নেই হুনা বাঈগাসি,
পণ থসি জিংতা অনার,
নীজরার বলাগর মুঙে
কতি শতি বিঘিনির হিল !

অম্ অম্ ঝম্ ঝম্
আলনিতে নেই, নেইক নলনি,
মাঙনিতে নেই, নেইক মূতনা
যতি য়াম বাধা, ততি য়াম
পৌরুষর বলী,
গুজুরে গুজুরে ইমে
লালনিযে চরিত আমারতা ।

জমা না খরচ, কুংহান আগে ?
আয় ব্যয় স্থিতি, এরোহে টেইপাং,
হিসাব নেয়সে আমার ।

বসর লমইতে খন্ম
কিহান আমার কাতে ?
জমার ঘরগত্ থক

বহাদিয়া শূন্য আগ
দিতে নেই হটন আমারতা।

তবুও পালপাক দুরাত্
ছংকারগ দিয়ার আমি—
আমারে জিঙেতা আসি ?
নিদানর ঘরে বয়া
থেং করিয়া কাঙাবেরী সাদে
আগর কাকেই আগয়,
থাসি আমি ইমে তিমে
ধুজটির আলাবল
জটাগরে জিঙে।

থৌপানি অসিতা পতিকে,
নারগি ডাঙর জবর,
গাঙতে ছরুরকা,
জিঙাজিঙি, ঠেলা ইকি
অইলে মুঙামুঙি।

সংকামে কামনাতে গাঢ়
মাগুপে কাদানি পারা;
দেহিয়া হষ্টক অজার
কানে লয়া ব্রজধাম লীলা।

ঘরমুং আলয়াতে ?
গিরাগিরি আগরে আগয়,
দলে দলে সাল পাতাপাতি।
কিমেতে মাধু ?

জলে নালে অয়া
আলীরমা উছলিয়া মাটি
হিং ধারাদিয়া, দিয়া থেংনা
দিতারাতা কতি কটাকটি।

দিনলেহে মাঙো য়াৰগা
দেহাৰ পহৰহানি,
লেইয়াৰ আহাৰ বারী,
লিচেতৰ কানাহা মাহি
খেয়া খেয়া জনম এহান ।

টেকায়েয়া নিৰালৰ গজে
অৰাহীন লেহা লেহা
থাইলাং নেমত্ৰিক দুৱাৰে ।

তেবো আমি বন্ধবংশ,
মণিপুৰ মাতৃভূমি—
বিষ্ণু অংশে অসি
খ্যাতি ত্ৰিভুবনে ।

□

মুসাফির

ইবনে বাতুতা
মনে মনে ঈশা
ঔবাকা বহেসে
যেবাকা যেহান
লালইল দিল্লী
যততা দেহের
থঙ পথঘাট
তেবও আটুরা
লাহোর মথুরা
মোকাম তীর্থত
পৌ পেইল' পথে
যেগ'রে যেহান
দেহানি মনেয়া
পথর ভরমে
টেঙারা জঙ্গল
উবাকা এইলা
আংকরলা তাঁরে
টটরা নারের
মাত্তারা তাঁনো
বাদশা' জালাল
মেহমানগরে
আহিলাং তা আর
বিভোলা দ্যোগয়
পথর নিশাল'
দেহানিয়ে পীরে
হদেয়া ভুপেয়া
হিকাদিল' কত
নাঙমালা জপ

আফ্রিকা বেলেয়া
ভারত বোলিয়া
মসনদে বীন
মনার ফরমান
লেম্পালে ঝুলি
করপেখে তত
অসে লয়লাট
আটের না জিরা
গয়া গঙ্গাধারা
চেপয়া চলের
থার শিরিহটে
মাতেদের পীরে
ইবনে বাতুতা
কামরূপ ধামে
পরল পরল
দর্বেশ চারিগ
হায়কো আটুরা
তুপিঙে নাপিঙে
ছনিয়া থাইবে
পরম দয়াল
আন ত্বরা করে
দেসে নিশানাল'
পেইলহা পারা
যিতেগা যিতেগা
সাদরে বহার
কুশল মঙ্গল
জ্ঞানর লু-তত্ত্ব
হিকাদিল' তাঁরে

সালইল হিন্দুস্তান।
পেইতয় আত্মজ্ঞান ॥
মহম্মদ তুঘলক।
জারের থক নাথক ॥
যারগা ঘরার রোষে।
ইকরের পাতা বুজে ॥
আনা যানা মেহেনত।
লালর দিঘল পথ ॥
বুলের বিহার বঙ্গ।
যোগী পীর সাধু সঙ্গ ॥
সুফীয়া সাধক আগ।
ফলের ঔসা ফলগ ॥
সালইল শিরিহটে।
মুঙবারা দিল হান্তে ॥
সংকটর বেরা অতি।
ফেরিয়া বনর হাদি ॥
ইবনে বাতুতা নাঙ।
লাগিল ভিতরে খাঙ ॥
শিরিহট পীর নামী।
আমি তাঁর সামিলামি ॥
গিরকে ফরমান দিল।
সাল'নে আমার তুল ॥
পিঠি পিঠি তাঁ আটের।
ভখ টাটি পাছরের ॥
মেহমান গিরকরে।
সেবাসেবি দিল তাঁরে ॥
সারাসারি কতি কাতা।
গেলগা বসর বিভা ॥

দৈবে আকদিন
 আস্‌মান চেয়া
 যোজনর পথে
 দিল' জোব্বাহান
 লাজে অয়া রাঙা
 জ্বানে হীনগ' মি
 এসাদে মাতিয়া
 মাতের কতিও
 থাইতে ঠইগ'
 বদর গণিএ
 বাতুতারে গণি
 তোর গারিগও
 হান্তে থার চীনে
 তাঁরকা বোলিয়া
 তাঁরে না দাদিয়া
 প্রভুর জবান
 এবাকা আটুরা
 পিদিস্‌ যতনে
 আদপে সালাম্
 লালর টেঙারা
 হিংসা নেইগ'রে
 তেই বাঘে পেয়া
 বরফর পেঈ
 দুর্জয় পণর
 থানে থানে দাপা
 দেহের ইবনে
 হমা দিয়া দিয়া
 পথর নিশাল'
 বিধির বিধান
 ডাকাটি পড়লা

হমাদিয়া পদে
 আল্লাহ বোলিয়া
 লালর পিসেদে
 মুসাফির তারে
 দ্বিআত হঙেয়া
 তিতে অন্তর্যামী
 হারউ খুস্তল
 হরু বান্দাগরে
 সংকল্প মোরতা
 ছনিয়া এহান
 মাতের নোলয়া
 তোরগ' নাগয়
 বুরহান পীর
 হীয়াসে এহান
 তোরে দিয়াদিল'
 ডুলানি এহান
 জয় অক যাত্রা
 তেব সাবধানে
 জানেয়া বাতুতা
 সরা বনউরা
 হিংসাল' জিঙানি
 হিংসা এরেদিয়া
 সেচলা বারাদে
 হিমালয় লাল'
 মন্দির গুম্‌ফা
 বহেসি ভজনে
 তিব্বত লালয়া
 আটের আটের
 মাত্তে কিহান
 জোব্বা মুকেইলা

বিদায় চেইল' ঘোরে।
 দোবা দিয়াদিল তাঁরে ॥
 পিঠিস্ত ডাহের গণি।
 পীর বাদশাহ্‌ গুণী ॥
 যাকরল' নুংসি দান।
 ক্ষমা কর ক্ষমাবান ॥
 উরল' গারিত খানি।
 থসত মেহেরবানি ॥
 আতছাড়া অনি নেই।
 আতার দাঁড়ির পেঈ ॥
 ছন্ মুসাফির ভায়া।
 হান্তে কিয়াকা এ মায়া ॥
 পীরশার উদা আগ'।
 সাক্কী এ দরগা এগ ॥
 কিহান মনেয়া আজি।
 কদাচন নাছনেসি ॥
 দোবা দিউরি এফির।
 জোব্বাহান মুসাফির ॥
 আটেইল নাঙমালা।
 ভরসা আল্লাহ্‌ তালা ॥
 জগতে এবুজ' নাসে।
 পথে তাঁরে হমাদেসে ॥
 হংকরেদিলা পথগ।
 যারগা মুসাফিরগ ॥
 হোভার অন্তও নেই।
 সাধু সম্যাসীর পেঈ।
 ফওইল চীনদেশে।
 কতি কিতা নেই হুসে ॥
 রাতিকা' ঘুমর ঘোরে।
 বেলাদিলা পথে তাঁরে ॥

দুঃখয় এসাদে
 আজান হুনল'
 ঘুমর আনিঙে
 নিলাগা উঠেয়া
 আসন এরেদে
 পিসে জেবগন্ত
 পাকরে পাকরে
 মাঙসে আঙেই
 ইকরা জবানে
 বাতুতার আতে
 পেয়াই পুমিঙে
 থইল গোপন
 মোর মোর মোর
 তোর তোর তোর
 ত্যাগে না মজিয়া
 ছিনাল উদুরে
 পাকরের মাহি
 হুত্গর সাদে
 মাতের সালাম
 হুদি এগ' থাক
 নম সাধু সন্ত
 যুগ যুগ লেহে

□

বুলতে বুলতে
 প্রমাণ পেইল'
 শানিঙে দেহের
 মোকাম হম্বুকে
 বুরহান পীরে
 নিকালেয়া চিঠি
 ঙাকয়া বাতুতা
 দেহের লামসে
 মাতের গুণিনে
 দোবাদিল জোকা
 আল্লাহর নাঙে
 সাক্ষা আচরণ
 বুলের যেগয়
 বুলের যেগয়
 ভোগে নিঙ থয়া
 কাপেদিয়া তারে
 ভাহের আঁহিগি
 নীজের গালেদে
 পীরশা সালাম
 মোরতা রাশাক
 পীর গুণবন্ত
 জগতর মাহে

ফুকিল গারির জতা।
 মোকাম মজিদ বিত্তা ॥
 কতগি বেড়লা তাঁরে।
 যেপেই বহেসে পীরে ॥
 আদর সম্ভাযা দিল।
 তাঁর মুঙে পাতেদিল ॥
 চেইল' পীরর বেদে।
 গিরকর গারিগদে ॥
 হেদা দোস্তু বুরহান।
 তোরকা হীয়াসুহান ॥
 নোলসে খুন্তলহান।
 তাঁরাংত হে বুরহান ॥
 মরতে কুঙ্গও নেই।
 তরের ইলেই লেই ॥
 যেগয় পুঞ্জি থথার।
 করতারা শূণ্যকার ॥
 আঁহির পানীয়ে তাঁর।
 যেসাদে মুক্তার হার ॥
 বিপদ ভঞ্জনকারী।
 তোর জাঙে নাঙজারী ॥
 নম নম হিন্দুস্তান।
 হিকাদেসে আত্মজ্ঞান ॥

কবিতা ঠাইগ ১

কবিতা তি মোর ঠাইগ'
যুগ যুগ লেহে কতি নিঙে
ডাহেসিলু তোরে হোপন-টেইপাঙে.
হাবিরাংত তোর সাদ হোভা,
মওং মাজা থমক কাকেই
নারগও কঙালা কতি
হে সখি! উপমা দিল্ ফাম নেই।

মনহাকহানাত্ বরোণর চাকা
বেলির মিঙালে ধরের রাঙিরা,
ধলগারা হাদিত্, হাদিরমা আন্দুকা,
যারগা ভাহে ভাহে এপারেস্ত
হৌপার অসীমে, কিহান না জানু
হোমা যারগা পহর না আঁধারে।

তিতে কিস্তমান ঠাইগ'! জুরাগ' মুকেয়া
এরেদিয়া দিঘল চুলসপা
বরোণর হাদিরমা কেরুক খেলাউরী
মোর তুল' ক্ষণে মুন্নি, ক্ষণে ক্ষণে
কাঁদিয়া রোহিয়া কিহান মাতউরী,
মি আপাঙে হারপা নারুরি।

সুপ্ না টটরেয়া অসে তোর জয়
তোরাং মি টটরেয়া অসু পরাজয়
আজিপেয়া, বানানুংসির এহান রীতি?
তোরকা হাদিগত্ পাতেসু আসন,
ডাছুরি হমাজি বহেদিআ আয়—
বুলতে কাদাত্ থায়াও দুরেই অউরী তি,
চিনে নারলু ছন্তুমেও বিদ্যাধরী তোরে।

তোরকা করলু হুমা পারিল মাহি,
 কিন্তুমান নাহিলে মোরগ' অয়া
 আজি পেয়া, লিরি লিরি দিয়া
 হৃদির নিঝরাগন্ত নিকুলিল কতি
 মাতিলু কথাগ' মাহি, এলাদিলু এলা।
 কিন্তুমান পাজালেয়া ইমার ঠারে
 নারলু মাতানি তোরে দুঃখ এহান।
 মুকাদিআ আয় মোর গাঁঠি হাবি
 নিকুলিং তেজ বীর্য্য বৈভব হাবিল'
 ইমার সেবাত্ থাক্ তি মোর তুল'
 মাতিং লৌদে তি মোর কবিতার ঠইগ।

□

কবিতা ঠইগ ২

যেপ'রে যেহান কথা
 মাতানি মনাউরি তোরে,
 মুঙহানাত উবা অইলে তি
 পানীকাঁটা অ'য়ারগা ঞার;
 আলর হৃদির তলে
 আলা বলে বলে
 ও কথা হে মোর কবিতা।
 দুরেই যিবেগামাহি
 আলা মুকা মুকা
 মীরি মীরি করে ইরাইরি
 ধাবদের বিসারেয়া তোরে
 নিংশিঙর পথর গজেদে
 কবিতা ঠইগ'। মোর কথা জপা।
 লাজও পেয়া কা'না নেই,
 তোরাং লুকেয়া মোর যত যারি।

অকনেই আজন্না মি
 ধিক্ তল এর আজন্না জনম।
 জনম আহান হে কবিতে!
 অসিলু নারদ ঋষি,
 থাসিলু মি ব্রহ্মাণ্ড বোলিয়া
 তেং নায়া নিরবধি জপলু নাম
 'হা কৃষ্ণ! হা নারা'ণ
 হা হরি গোবিন্দ' বোলিয়া।
 বিসারেইলু এলা দিয়া দিয়া
 'তি প্রভো! জগত ঈশ্বর
 অধম হারপেয়া বা'না কর।
 তি মালক, তি বাপক
 উদাক তি, হে প্রাণবল্লভ!
 তি জোনাক বেলি, আঁধার পহর
 তি মোর গিরি, মি তোর কিঙ্কর।।
 বিধির বিধাতা তি বিষ্ণু মহেশ্বর
 তোরাংত প্রকাশ পালন লয় হাবি অর,
 তোরাং হাবিগ' বার হাবিগত্ তি
 মায়া' জগত' গ বুনেসত্ তি
 কৃপাল তরাদে মোরে ভবর সাগর,
 যুগল চরণে নিক্কা ভিন্কা অধম'র।।
 নারদ! অ নারদ! ধ্বনি
 সিতারেইল বনে বনে,
 টেঙারা শিংচৌ জুরুং সুরুঙে;
 ঙাকইল্ নারদ ঋষি
 কুংগ এগ' ডাহের লৌদিয়া?
 ঋনিক্ক' বাশা ঋষি
 ঋনিক্ক' বাশা তি—
 মনোহর মুরতিগ দেখিলু নয়নে
 উপমারমা অসে অনুপম।

শঙ্খ চক্র গদা পদ্মধারী
 রুণু ঝুণু রহের নুপুরে
 চরণ থাম্পাল জুড়ে
 নাপয়া লাময়া কতি হোভা করে।
 আহের চংদিয়া ধাবদিয়া
 ভকত বৎসল প্রভু।
 “নারদ! পানীর টাটিয়ে মরলু
 মাগৌরি তোরাং মি পীনারকা পানী
 কতিল’ নুংসিপা ঝারগ
 আহাহা! মধুর ঢালের পারা।
 জগত ব্রহ্মাণ্ডর গিরক,
 তারতাও পানীর টাটি—?
 মুক্‌সি দের মনে মনে
 ভক্ত শিরোমণি দেবর্ষি নারদে।
 মাতলু নারদ মি
 শ্রীচরণে সাদারাংগ অয়া—
 “হে প্রভো লীলাময় হরি!
 তি মোর নিঙর গিরক,
 মি তোর চরণদাসীগ।
 খানিক্ক’ থাদে এপিত্,
 বুজেয়া কমণ্ডলু আছরি মি
 লোকর পানীল’ ইরাইরি।
 কৃষ্ণ প্রেম কিতা বুলতু,
 জুরের দ্বিয়গি আঁহি।
 জন্ম জন্মান্তর নিংকরিয়া
 নাপাউরি যেগরে মি,
 আজি ঔ প্রভু চাংচা—
 আকফুটা পানীর সালে।
 কতি ভাগ্য, ধন্য নারদ মি।
 ধাবদিলু পারিল মাহি
 বুদ্ধিগত থয়া টুকানাগ’,

আতল' রহেয়া বীণাগ'
 মোরাংত মুকিয়া মি
 হমাসু আনন্দপুরে,
 কৃষ্ণময় দেখরি ব্রহ্মাণ্ড।
 নিকুলিল আঁহির মুণ্ডে
 সরোবর আগ' লকলকা পানীল'
 রম্য বনর হাদিত—
 আঃ! বুনেদেসে পারা এগ'
 বিদাতায় নিঙল মনেয়া।
 শাতসি থাম্পাল মাহি
 ডিক্ ডিকা শৌরর সাদে;
 ভ্রমরার চুমা খেয়া তানো
 নাচতারাতা তালে তালে
 মলয়ার লিরিলিরি তালে।
 পাররমা মালতী চাম্পা
 উরুলেই সিঙারেই মাহি;
 কাপক্লেই চারাপ অয়া
 মদলেইর তুল' অসি আকজপা।
 ঘাসর হাদিরমা
 জিরিক্ জিরিক্ করে
 নিকুলতারা বাক্বাকম্ জোড়া;
 পারৌএ পারৌবীরে থেংক'
 এবেদে হেবেদে বুলের হারৌহানে—
 আকয়াতে পারৌবীর
 মুরগ' বুলার পারা।
 কিতা বুলতু কবিতা ঠইগ'!
 ফুকারিয়া যারগা হুদিগ'
 দেহিয়া দেহিয়া এনোর
 কতি চুমাচুমি
 যুগলে যুগলে আজি।

□

কবিতা ঠাইগ ৩

বনর চিঙ্চিঙা হম্বুকে
বিধির এ লীলা এতা কতি চমৎকার।
হরালী গিদেই মাহি খাংচেং আটেয়া
পানির মা বুৰে বুৰে হাকরা খেলেয়া
উরুজুরু থাপারতারা পাখ সুরি সুরি
ত্রিবেণীর ঘাট লেহে পুণ্যার্থী যেসাদে।
অথবা মাতিং বুললে, ছনেন্সি পুরাণে
তপতী মেনকা রন্তা স্বর্গর অঙ্গরী
টেঙারার বিদ্যাধরী, গন্ধর্বা, কিম্বরী
পারাদেসি মর্ত্যধামে কেথক ডেকীল'
বুলাদেসি তপে আসি কতি মুনি ঋষি;
অমাটিক মহিমার মোহিতকারিণী।

মানস হেলয়া কৈলাসরও গজে
গন্ধমাদনে বার সোমেশ্বরপুরে
পুলসিহা এতাহাবি তানো
সিতারেয়া গঙালেয়া নিজর গঁধল।
রূপগুণ কিতার উপমা,
হাবিবেদে অনুপমা তানো।
গিথানক এতা কিস্ত গিরি না পালসি,
নিজেই নিজর গিরি সীজা মহারাণী।
অস্ত্র কার ধনুক টিংদেসি
চরণে নুপুর বার নুংসিপা খঞ্জনী;
সহন্দ বুলতারা তানো জুরা এরেদিয়া।
স্বর্গ বিত্তা অইতে যুধিষ্টির রাজা
ঙাকইল দেহিয়া এপেই না দেহিল লামে
টেঙারার পথে পথে
ফুলপারা বেয়াপার জপুল-জট্গ।
'আমার সোবামীগ অদেনে'

মাত্তারাতা তানো “হে টেইপাং!
কাম বা ইশার গিরক মূর্তিমানগ’ তি,
নিক্কা দিক্ চরণসেবা আজিস্ত অকরে
অবলার ভিক্ষাহান যুংকর গিরকে।
আমার গিরিগ অ তি, আমি অইক্ দাসী,
ভুঞ্জে যাগা অন্ত নে’য়া ভোগর সংসারে”—
মাতিয়া মিনতি বেল্লা ধর্মর চরণে।
অস্থক্‌পাহান অসে আজি মি এগর
ঔসাদে আচুলে মজিল মনপ্রাণ হাবি।
কিস্তমান কতির চুবা পাঙ্ অসে ঠইগ!
যুধিষ্ঠির রাজা সংসারর সার এরেদিয়া।
মিতে না এরেদিম কবিতা সুন্দরী!

প্রকৃতির ডেঙপালে অঁহিল’ বিধেয়া
নারদ মোরতা আজি উছলের প্রাণ।
চক্রবাক্ চেলাকচকী ডাউক্ ডাউকী
হেইমাকর দ্বি-দ্বিগয় কতি লাজ নেয়া
মুঙে এয়া নাছতারাহা জুড়ায় জুড়ায়।
হুতুমে মাত্তে ঠইগ!! কিহান এহান
মায়ার দড়িএ মি আরাঙে হোমেইলু।
ব্রহ্মাণ্ডর এমুর হৌমুর বুলানি বেলেয়া
কিয়রকা হোমেইলুহা বনর উশকে
পাঙ্করুরি মোরে মি নিজরে।
আনন্দী মোহর গঁধে লরিল ইন্দ্রিগি,
পাতালেঙ নিকুলের সংসার লালসা।
এবাকা নিংশিঙ অউরি— কতিও তলসু মি,
মোর প্রভু ইচুমানে পানীর টাটিল’
ডাহে থাইব চীকারিগ দিয়া
‘নারদ! অ নারদ।’ কিস্ত না হুন্লু আর
পাঙ্করলু চানাপা ঠইগ কৃষ্ণর লেইশিরে।

□

কবিতা ঠাইগ ৪

পাছরতেগা কৃষ্ণনিঙ পড়লু এ বিপাকে
অমাটিক তরেইগল বুলের সংসার
এতার আগে হার না পাসু মি।
কবিতা। মায়ার রজ্জুগাছে বেরাদিল
মোরে পেটিনাটি, যেসাদে অরিঙগরে
ডাঙর অজাগরে— অমাটিক দশা।
সাংলেলা বনর গজে অন্তগামী বেলি
কাঁচুলীন্ত ছিটা দিল রাঙামু আবীর।
আহা হে নারদ! জটামুর কমণ্ডলুধারি!
এফুরতে হুশিয়ার বলন্তী বয়সে।
চারিবারা চেয়া চেয়া লাগিল বিভোলা—
ভাবে রসে টো অয়া অমুক' আহিল
হৃদির পহরী গাটে হিলর ইথলে
আছাড়েয়া পড়তারা থেংনা মাহি দিয়া।

মাতের নারদ ঋষি— “ধন্য হে নারদ মি,
ধন্য হে জনম এহান মনুষ্যগ অয়;
সার্থক জরম অনা তি এগর উরে
হে স্বর্গন্ত জিঙেসত পৃথিবী সুন্দরী।
তোর কঙালা বুকগ বুজিয়া
কতি রস কতি মৌর চুহিংমধুর
পীল মাহি তেঙ নার অমৃতসাগর।
যদিচয় এবাকা মাতের আগয়
সংসার এহান মিছা—মিছা মায়াজাল,
মি তারে গুজুরতউ মুখ আপাংগ;
মাতানি মনাউরি মি হাচ্চুলে হাবিরে,
মরানি না মনাউরি মি দুর্লভ জনমে,
অথবা এরেদিয়া ভোগহাবি
বৈরাগ্যল না মনাউরি আক্খুলা ভজন।

ভুবন এহান বুজে যত দেশ-মাটি,
টেঙারা বনসরা জুরুং সুরুং

জাত জাত জীবজন্তু পাহিয়া পলেই
জাত জাত ফলফুল বিয়ান চিংখেই।
জোনাক বেলি বারো তেরা কোটি কোটি
এতাহাবিরমা থাইং জিংতা অয়া,
না মনাউরি কিস্তমান অনন্তশয়ন।
কিস্তমান জনম এহান আজি
রক্তলেহে দেখরিতা অসে শূণ্যকার,
কুংগ আসতা মোর শূন্য বুজাদেনার?”
“আসু মি এপেই তোর জনম-সঙ্গিনী,
কতি যুগ গেলগা মোরতা তোরকা বোলিয়া
বেদবতী মোর নাঙ বসতি এ বনে,
তোর নিঙে থসু মোর জনম যৌবন।”

বেয়াপা কুংগর ঝারগ উশক এ বনে
কতিতে নুংসি অয়া হোমেইলহা কানে।
দৈববাণী অইলতা না হুতুমে এলাহান?
আচানক বিভোলাল চেইলু চারিবারা।
দেখরি আঁহির মুঙে অনুপমা আগ
আহিরী থমক দিয়া গজেন্দ্রগমনী।
তেইর রাশি, তেইর রূপ মওং মাজা
না দেহেসু আরতা আর এ মোর জন্মত্।
উত্তমাগ হাবিবেদে তিলোত্তমা তেই
অবতীর্ণ অসে তেই শ্বৈনেই মোরকা।
মোরকা? মাত্তে লাজহে পাউরি
জটা বারছিড়া ফুতি কমণ্ডলুধারী,
মি এগ; অসু গজে বিগত যৌবন;
আলয়া এইতয় আর জনমে বসন্ত?

আবীরে সাংকরা বন হেইরাপ আঁধারে
হাতে হাতে বুরে যারগা গোধুলী সেক্কাত্।
দল্গ লেহে বর্তি দিয়া হমাদিরী দ্যৌ
বেদর মন্ত্র বারো আর্তির এলাদিয়া
হমাদিরী মোর বেদে (?) লাজে রাঙা অয়া
কাদাত ফবইলী তাম্র মূরগ নঙেয়া। □

পূর্ণিমা রাত্তি

শারদ পূর্ণিমা রাত্তি

চারিবারা ঙাল অসেতা কতি ।।

হাক্‌হানরমা রাস মণ্ডলীগ

বরণর ফুলে হাজাসি কুঞ্জগ

তেরার গোপীএ এলা দিয়া দিয়া

নাহতারা পারেঙে মুঙপিঠি ।।

জনম এহান তি এসাদে পূর্ণিমা

নিঙল থসিলে কঙালা হাদিরমা

লেহাউ মদলেইর জুরাগ হাজেয়া

বাসেয়া থাসিলে নিক্কা রাত্তি ।।

কুরাঙও লুকেইলে ইমা

গোপীগ হাজিয়া রাসমণ্ডলীরমা

বৃন্দার নাছাল আয় নিকুলিয়া

কুপাঙে লাগেয়া ধূপবর্তি ।।

□

ফাগুৱা

জয়সে জয় রাধে

জয়সে জয় বৃন্দে

জয়সে বৃন্দাবন ধাম।

যমুনা পুলীনে

গোপিনী হাবিহানে

বিসারতারা কুয়াং ঘণশ্যাম ॥

ফাগুৱাৰ এলা

অস্থকও কঙালা

কু-উ রহিলা কোকিল কোকিলা।

গোৱালা শৌগ

ননী-চরাগ

গোপীমন চরাগ নন্দর কালা ॥

অগুরু চন্দন

আবীর কুম কুম

মুঠি মুঠি লুকেয়া থাসে যত রঙ।

গোপীএ আক্খুলা

কালারে পা বেলা

আবীৰে হাবিয়ে অইলা রাংরঙ ॥

□

যমুনা পুলীনে

বৃন্দে তি বৃন্দাবনীগ ।
কৃষ্ণ এইতয় বোলিয়া
বৃন্দাবনহান ছরিয়া
ফুলে ফুলে হাজেইলে পথ হাবিগ ॥
কালিন্দ্রী যমুনার
এপারেস্তু হৌপার
বেয়া থাইলে নৌগ বৃন্দামাই ।
কুস্মাকা আহিতয় কালা
থাইলে চেয়া বিভোলা
রাধারে ডাক্— গোপিনীল আয় ॥
কালিয়ার চরণে নুপুর
রোহের মধুর মধুর
আঙেয়া থাই কুঞ্জে লুকেয়া ।
আবীর মাহি ধরিয়া
পরল পরল ঘবেদিয়া
রঙল বুজেই হীনপাক কালিয়া ॥
সালৈ সালৈ হাবিহানে
চেইক্কা তে চেইক্কা
সখীর হাদিত হোমেইক্কা
হরি হরি বোলা— যিক্কা
যমুনা পুলীন বনে ॥

□

পূর্ণিমার নাছা

পূর্ণিমার জোনাকহান উঠিল ইমা
নাছে নাছে সালো এবাকা ॥
নুকুলে উঠানে
তুলসীর পুণ্ডে
ঔরে চা এবাকা ।
থাইলেতা পড়িয়া
দিঘলগ অয়া
ডাক্তে না হনুরী কiyাকা !
ইমা চা উঠানে
সিঙারেইর বনে
শাতইল সিঙারেই জাকা ।
সেঙ্কার মলয়া
লিরি লিরি এয়া
কিহানও মাতে যারগা;
মন্দিরে ইমা
আকফুরুং হমা
দিয়া বৃন্দার নাছা দেগা ।
চেইং মি তোরে
ঠইগ পেলকরে
তোর জাঙে কাদিংনাকা ;
মোরে যত বা'না
দেসত্ তি জনমে
দৌগরাং সিলকরে যাগা ॥

□

বন্দনা

হে গুরু অনুপম ভুবনেশ্বর ।
ভক্ত শিরোমণি প্রভু করুণা সাগর ॥
অজ্ঞান আঁধারে আমি
জগতবাসী
মিঙালেদে আচুলিয়া
নিয়াদেগা আজি ।
তোর কৃপাল কৃপা পেয়া
অকা ভবপার
মরণরে জিঙিয়া
অদেকা অমর ॥
তিতে প্রভু প্রেমময়
শুদ্ধ জ্ঞান দাতা
দেহাদিলে ব্রহ্মময়
জীবমান হাবিতা ।
তোর নাঙে পাপীতাপী
অইতারা উদ্ধার
অমঙ্গলে মঙ্গল অর
হে শুভঙ্কর ॥
অস্তরে পাংকাল দেনে
ভক্তি দিয়াদে
জ্ঞানর বর্তিগ দিয়া
হৃদিগ লাগাদে ।
তোর প্রেমরসে তিঙক
জগত সংসার
ফুটক্ থাম্পাল প্রভু
জনমে আমার ॥

□

নিভৃত নিকুঞ্জবন

নিংকরিয়া মন গোবিন্দ চরণ

সাল তি বৃন্দাবন ॥

মধুর নিকুঞ্জ নিধুবন

মধুর কুঞ্জ কাম্যবন

মধুর তাল তমাল বন

মধুর যমুনা পুলীন ॥

অরাহীন চিন্তা কিতারকা কররতা

(তানো) বিভোলা দ্যৌল তোরে বাধেসিতা,

ঔতা হাবিরে লাগেয়া বিভোলা

নিকুল সাঙয়া চিত্ত আক্খুলা

হাচুলে লৌকর— ধন্য জনম

নিভৃত নিকুঞ্জবন ॥

কয়ো কয়ো শ্রীরাসমণ্ডলী

লক্করিং গোপীর পদরজ ধূলি

লেপিয়া অঙ্গে ঔ ধূলি চন্দন

করিংগা কুঞ্জে হরি সংকীর্তন ॥

নঙেই রাতিত্ রহে থাইব বাঁশী

নিকুলে থাইবা ব্রজগোপী গাসি

বিজুরী কঙ্কন খংচি নুপুরে

রহে থাইবা কতি নুংসি স্বারে

অয়া থাইব পারিজাতর বরণ

লিরি লিরি সেবার মলয়া পবন ॥

□

মিতা

হে গৌর, ইতাও কবিবর !
তি মোর লদিস হমা ।
সরার এপারে আসু,
থাসত তি হৌপারে;
নিংশিং - হুতার নাল
টিংদিয়া মনহানল
দ্বিয়গী বিরাজিত অসি
ইমার রাতুল চরণে
নিত্য সেবাহানল ।
হাকহানর উদারতা
করিয়া উদারী হাদিত্
চাউরি আকগ তেরাগ হাকে;
তাও চার মোরে
পিটপিটেয়া বাহনা নুংশিল ।
মিতা ! তিষ্ঠ মিকুপ আহান;
তিও চা তেরাগরে
পারনেই পারাবার
নীলরা হাকহানাত্ ।
কিতা মাত্তু !
জরম অনার তুলো
মরণ নিরালে ইকরা;
তা আর, শয়নায়া
দেহা অইক - পিছে
তেরার গাঙ্ঘরে
কিস্তমান উদা ! লমনাইল,
নিংশিং - সরার পারে
ইমারে নিংশিং অয়া
কাঁদতাঙাই জুড়ে জুড়ে

দ্বিয়গয় শয়নেই মিতা !
 কিয়াকা আঙ্কর ?
 ইমারকা দ্বিয়গয় বর্তিগির সাদে
 ডহেসি নিক্কা নিরবধি ।
 কৌরব সভার মাহা
 জুরাত্ ধরিয়া ইমারে
 বেল্লা হিঞ্চাপা দানবে,
 কাঁদিরী— হা কৃষ্ণ ! হা গোবিন্দ !
 কুরাং থাইলেতা আজি !
 আয় চেয়া জগত্ কাণ্ডারী !
 নিরুপায় জিপুত জিয়েইএ
 লাঙটা পৃথিবী চেয়া
 বেলতারা আঁহির পানী;
 কুংগয় কালকরতয় ?
 আয় কবিবর উদা !
 নিকুলিক দ্বিয়গিয়ে
 রোহেয়া মেইপুং ঘন্টা
 বর্তি বারো পূজার নাতীল;
 আমার পাপর সালে
 ইমার আনাংশা যেতা
 কক্করিক্ ডহেয়া নিজরে—
 ডহেইক দানব হাবিরেও
 লগে সঙ্গে পিষিয়া দুঁজন,
 দুঁজয় সংকল্প থয়া ।

□

জগৎমোহন সিংহ গিরকর অন্তরঙ্গ মারুপ গৌরনিতাই সিংহ গিরক দৌ অনার পিসেদে গিরকর নিঙে ইকরেসেহান ।

মোর খোঁরাড্

ঠারলু ঠার কতো ইমা, বুললু কতো মাটী,
না ককইলু ভেব মোর খোঁরাড্, ভাট্ টাটী ।
তোর ঠারহান ঠারলে ইমা, চিকর গারি এপ,
সার্থক অরকো জনমহান, বলী অর ঠইগ ;
সুদির মল্ ককর ইমা, তোরে মিঃমিঃ অইলে,
লোকোর কথা, বলর কথা ভাহের সুদির তলে ।
না মরেছে ক্ষেত্রি রকত, লেইরা অইলেতে কিতা !
তোর দয়াতে থদিচ্ ইমা, সুদিন অইল বিস্তা ।
বিষ্ণুর ঠইগ অছত্ বোলিয়া নাড, তোর বিষ্ণুপ্রিয়া,
সাজেরকো তোর জিপুত থানি পরয়াং তলয়া ?
বর দিয়াদে ইমা তোরে হাবির মান্না করে,
থ পারিককো লাংকরিয়া ভারতভূমর উরে ।

শ্রীজগৎমোহন সিংহ

শিলচর ।

নূরা বেলি ১ম বর্ষ ১ম সংখ্যা; আশ্বিন ১৩৩৬ বাংলা (১৯৫৬)

মোর খৌরাঙ

ঠারলু ঠার কতো ইমা, বুললু কতো মাটি,
না ককইল্ তেবো মোর খৌরাঙ, ভখ টাটি।
তোর ঠারহান ঠারেলে ইমা, চিকর গারি এগ,
সার্থক অরকো জনমহান, বলী অর ঠইগ;
হাদির মল্ ককর ইমা, তোরে নিংশিং অইলে,
লোকর কথা, বঙ্গর কথা ভাহের হাদির তলে।
না মরেছে ক্ষেত্রি রকত, লেইরা অইলেতে কিতা।
তোর দয়াহে থদিছ ইমা, সুদিন অইল বিত্তা।
বিষ্ণুর ঠইগ অছত্ বোলিয়া নাঙ তোর বিষ্ণুপ্রিয়া,
সাজেরকো তোর জিপুত থানি পাররাং তলয়া?
বর দিয়াদে ইমা তোরে হাবির মান্না করে,
থ পারিককো লাংকরিয়া ভারতভূমর উরে।

□

কলঙ্ক লুত্‌প

ত্রৈতারমাঁ লঙ্কামাটির রাজাগ রাবণ
হুগাল হঙ্করা পুরী জিঙে ত্রিভুবন।
তাঁর ডেকি বলী রাজা কুম্পেতও নেই
চরাচরে লৌদিতারা পলেই পলেই।
রাবণর খুলা বেয়ক নাঙ বিভীষণ
ধর্ম নায়া অন্যবেদে সুপ্ নেই মন।
কুমতি রাবণ রাজায় চরকরল সীতারে
দণ্ডক বনেত্ত রথে আনল লঙ্কাপুরে।
সীতাতে জনক সুতা সতী - শিরোমণি,
হেয়ক জগত প্রভু রাম গুণমণি।
বিভীষণে কতির চুওয়া দিল উপদেশ
পরনারী চরকরানি পাতকর শেষ।

রাবণে লৌদিয়া জিগ দিল আকফাল,
 সভার মাঁ দিল তারে কত জাংদাল।
 ‘নিজর বনক শূঁপের কাপলা নাক কাণ,
 ঔহানতে চুমইল বারো লালইল এহান।
 নিকুল লঙ্কাস্ত আজি পাষণ্ড চণ্ডাল,
 না দেহিং লঙ্কাপুরে থাইতে জীবমান।’
 রাবণর বাক্যবাণে ঠইগ শকইল
 মাতল বিভীষণে ‘দাদা, লঙ্কা মুতইল।
 শূঁপয় দোষীগ দাদা, খালকরিয়া চানে।
 নাক কাণ কাপেদেসি তেঙ্গের আচরণে।’
 ‘কিতা বুললে বারো মুখ’ মাতল দশানন
 জাংদাল খেয়া নিকুলিল খুলা বিভীষণ।
 সরমা সতীরে থয়া সীতার কাদাত
 সালইল কিঙ্কিঙ্কামাটীত শ্রীরাম যেহাত।
 কাঁদিরী অশোকবনে জানকী এপারে
 কাঁদের রাম রঘুমণি সমুদ্রর হৌপারে।
 বিভীষণে রামপ্রভুর উদাক বাধেইল
 সমুদ্রবন্ধন কিমে তাঁরে হিকা দিল।
 বাদর ফওইলা লঙ্কা অকরলাগা লাল,
 নিক্করল স্বর্গপুরী, মর্ত্য আর পাতাল।
 টুমইলা লালফামে কতি হিঙ্গাপা কঙ্কেই
 কুঙ্গই কিমে জিংতা করব সাকেই সিঙেই।
 ছয়মা-নিদ্রা লমনাসে কুন্তকর্ণরতা
 পাঁচ-মা লালইল হুদা আক্কা থাইলতা।
 তারে জিঙে বলী নেই ত্রিভুবনর মাঁ,
 ঘুমজিলে পেলকরে তা পুরা ছয়মা।
 অকালে হজাক করলা হিঙ্গাপায় তারে,
 উঠিয়া প্রলয় দেহের হুণার লঙ্কাপুরে।
 কুন্তকর্ণ মহাবলী নিকুলিল রণে,
 টরাট্গ বাদর সৈন্য কাঁদের লক্ষ্মণে।


ডর নেই ডর নেই— মাতল বিভীষণ,
 তত্ত্বখানি বুঝাদিল কুস্তর মরণ।
 লালফামে কিহান অইল আচানক যারী,
 কুস্তকর্ণ লমইতেগা পেইল যমপুরী।
 জ্বি হৌকরল মেঘনাদ যজ্ঞ নিকুস্তিলা
 লমইলা শ্রীরাম-লক্ষ্মণ, বাদর আকুবালা।
 লক্ষ্মণরে বিভীষণে পথগ বাগাদিল,
 জিংতা জিংতা মেঘনাদ ঠইগ এরাডিল।
 বংশরমা বর্তি দিল বংশগ নেয়ইলা,
 নিকুলিল লালফামে রাবণ আকখুলা।
 রাবণে কাঁকেই বেলতেই নিকরল মেদিনী,
 আনিং শানিং অইলা সুগ্রীব-বাহিনী।
 যেসাদে ডহের বন দাবানাল জ্বিএ,
 লমইলা বাদর তেঙ্কল, কঙ্কেয়ে কঙ্কেয়ে।
 জাম্বুবান, নল, নীল, সুষেণ, অঙ্গদ,
 হাবিএ রকতে রকত পেয়া হনুমন্ত।
 দেহিয়া সুময়া রামে ফুকারল বচন—
 ‘এরেদিলু সীতার আশা উদা বিভীষণ।’
 ‘কিয়াকা কাতর প্রভু থাইতেতে মি—
 ডিল নেই রাবণর জিংতা মরণ
 মৃত্যুবান খাম্বা আগত করেসিতা ইতু
 মন্দোদরী নায়া কুংগও নাজানি ঔ বস্ত্র।
 ঔগ নায়া সুপ্ নেই রাবণর মরণ,’
 হিকাদিল বিভীষণে পথি নিরুপণ।
 বামনর রূপ ধরল বলী হনুমন্ত
 সান্তা হাবি লঙ্করলগা মন্দোদরীরাংত।
 আক্ জাংদালে হনুয় ভাগল খাম্বাগ,
 শ্রীরামর মুঙে বেঙ্গ মৃত্যুর কারগ।
 হারপেয়া চকুরি হাবি মাতল দশানন,
 সাকেইর কলঙ্ক তি দুষ্ট বিভীষণ।

লমইলু মি, হাবি লমইল শ্রীলঙ্কারতা
 জাতর বৈরীগ নাং থাইল তোরকা ।
 রাবণ মরিল রণে বিভীষণে হাংকা
 কলঙ্ক লুহপ্ পিধল জনমহানরকা ।
 রামায়ণ য়ারি এতা অমৃতর ধারা,
 ভাবকে ভ্রমর অয়া নিক্কা পীতারা ।
 □

আত্মজ্ঞানর এলা

কুরুক্ষেত্র পুণ্যধাম জগতে বিখ্যাত নাঙ
 কুরুক্ষেত্র দ্বাপর যুগ'র ।
 মনুষ্যর দেহা এগ' কুরুক্ষেত্র অলসেগ
 অপরূপ বিচার এগ'র ॥
 কৌরব-পাণ্ডব পক্ষ পাপধর্ম দ্বিয় পক্ষ
 দেহারমা অসি মুণ্ডামুণ্ডি ।
 পাপপক্ষ অসি বলী ধর্মপক্ষ সলিমলী
 লেপনাসি কুংগ' জিঙাজিঙি ॥
 ঈশ্বর গোবিন্দ কৃষ্ণ পাপীনাশ তার কর্ম
 শিরে থর ভকত্ কাঙ্গাল ।
 অর্জুনে জীবর আত্মা নিজে অসে পরমাত্মা
 গীতাজ্ঞান জীবর পাঙ্গাল ॥
 জনমে নিক্কাম কর্ম তারে জিঙে নেই ধর্ম
 হাবিভাবে চরণে আশ্রয় ।
 মন অসে অঙ্করাজা বিবেকে অলসে অজা
 মূর্তিমান মন্তিরী সঞ্জয় ॥
 □

দলানইপুৰ ৰূপেখ



জগৎ মোহন সিংহ

দলানইপুর করপেখ

আজিকার বসন্ত কোকিলগোর কু-উ রৌ এহান মানুর ভিতর-পালপাক হাবি কiyাকা উলটপালট করেরতা? এহান হুদা কোকিলগোর নুংসিপা নারগোর পরাদে নাগৈ, এ ঝতু এহানাং মানুর ইন্দ্রিয়র দুয়ারহাবি ভাবরসর খৌরাংল আঙছি বোলিয়া। এসাদে শুভলগ্ন এগং কপালখি বিষ্ণুপ্রিয়া জাত এহানরে ঠইগো যৌকরে বানাপেইতার। গিরিগিথানীরে মি নিংশিং অউরি, কৃতাজলি অয়া হমাদিউরি। বসন্তর এসাদে পুণ্য চিংখেইং পুণ্যবান গিরক আগরে মি নিংশিং অউরি; ঔ গিরক ঔগর নাং দলান চাউবা, আজি নিরুদ্দিষ্ট; বিছারেয়া তাঁর উদ্দেশ্যে আহান এ বুজো পানা নুয়ারেছ। সংসার এহানাং যোগোয় নিজর দেশ, নিজর জাতরে হাদির আসনহানাং বহুবেয়া চেকচিল করে পূজা করের, ঔগো মহং জনগো, ঔগোরে হমা দিলে আমার পাপ ককর; আমার দলানইপুও ঔসাদে মহং জন আগো। এহানর গজে দলানইপুর অন্য পরিচয় আহান দেনা নুওয়ারুরি। ঔ আত্মবিস্মৃত, সদাচারী গিরক ঔগোর কাদাং গেলেগা মি পেয়াও নিজরে পাহরুরি, একীন অয়া প্রেমভক্তির কথা তাঁরাংত হুনি। আজি তাঁর বিরহজ্বালা এহানাং মনাউরি, এ বসন্ত কোকিলর কু-উ রৌ এহানরে দূতগো হংকরিয়া অন্তরর নিগুট পৌ হাবি তাঁরাং দিয়া পেঠেইং।

ঔ দলানইপুর ডাঙর অভ্যাস আহান অছিলতাই চেরটুমাং আথারে-পাথারে ইকরাণি, বারো ইকরা লয়ইলে টুমা উতাহাবি তেনালো যমকরা করপেখআহানাং ইতু করাণি। ঔ চেরটুমা ঔতার কতোহানিয়ে আমার জাতর নিংশ্বাবাট্টি পত্রিকা আহানাং মানুরে টেইপাং দেহওয়াছিল। দলান ইপুর সম্পত্তির হাদিং ঔ করপেখ ঔহানাই মানুর আঁহিত পরের, আরবেদে খালকরলে ইহসংসারে তাঁরতা কুংগও নেই। ইক্ষিক ফাম পেইলে আকখুলাগোয় আসন পাতলকোপুরী এলা আহান দিয়া আঁহির পানি বেলতে তাঁরে মি দেহেছ : এলাহানতে—

জরম নাইল তর উরে ইমা,

আজি পেয়াও মণি আগো,

সেবার ব্রত লয়া কুংগোয়

ঙালকরতয় তর আধার গরগো ।

জিপুং বোললে নেইতা নাগে ।
 আছি জিপুং কঙ্কেই আগো,
 ঔ জিপুংতে অছি পাৱা
 কওয়ার উরে কোকিল শৌগো ।
 মানুর সরলো সর পটেয়া
 যম ঠকেয়া বুলতারাগো,
 ঠকেইল দিনও আরতা নেয়ইল
 চলইল ফামহান না থইলাগো ।
 তর নাংহানর নৌগোং কায়া ।
 সালৈতৌ ছন বিষ্ণুর ঠইগো,
 ঘাটহানলেহে এলা দিয়া
 বুলতৌ ইমা দুনিয়াগো ।

দলানইপু এবাকা কুৱাং আছে না জানু, তেবো তাঁর ঠইশঙ্করা এলা এহান নিংশিং
 অইলে মোর আহির পটগি অশ্রুসিক্ত অর । সংসারে উদাসী দলানইপুৱ অন্তর ঔগো বানানুংসির
 খনিগো বোললে চপ্প খেইব । ঔ বানানুংসির রেণু আগো মি পা' পারেছিলু বোলিয়া নিজরে
 ধন্য মনাউরি, আজি পেয়া তাঁরকা জ্বালা বহৌরী ।

আকদিন মরে খাং লাগেয়া আংকরল— ‘বাবা কৃষ্ণগোপাল, মহেন্দ্র বাবু মরিলতা
 ছনলে?’

মি মাতলু “ছনেছি ইপু।”

দলান—“আহির পানি বেললাতা সমাজ এহানায় ?”

মি— “দ্বি-আকফামে শোকসভা অইল পাউরি, ঔতার গজেতে আর না ছনেছু ইপু।”

দলান— “আর না ছনতেই কৃষ্ণগোপাল । এ জাত এহানাং মহৎজন এইলেও কুকুৰ
 মেকুরর মরণ দিতারা । তি মরতেই, মিও মরতৌ, কুংগোর পৌ কুংগোও না থইতায় । এসাদে
 করে ছদা মহেন্দ্র বাবু নাগে, দঙ্গ অজা, বলান্দ অজা, জগৎ সিং পণ্ডিত, ভুবনেশ্বর সাধু বাবা,
 তনু বাবু, ঝাপিরবনর থান্শৌ অজা পাৱা উজ্জ্বল নক্ষত্র আকেইগো বিষ্ণুপ্রিয়াৰ কপালখি
 হাকহানান্ত জঙিয়া গেলাগা থাং এ সমাজ এহানর কুংগোয় তাঁনুৱে আকদিনকারকাও
 ভক্তিহানলো নিংশিং অছিতা নাদেখতেই, নাছনতেই কৃষ্ণগোপাল ।

মি— “ইপু, জাত এহান ঠই বলী জাতহান পাউরি?”

দলান— “কৃষ্ণগোপাল, ঠই বলী জাতহানর লক্ষণহান নাগে; হায় কথাহানতে এ
 জাত এহানর আত্মচেতনা এ বুজো পেয়া নাছে । মহৎ জন আগো দৌগো অয়া হদেইলে অৰ্থাৎ

মরলে হুদা ঔগোরকা আহির পানি বেলানি থকরহান নাগৈ, ঔগর গুণকীর্তন খানিপারা করলেও জাতর অন্তরগোত 'স্বজাতি' বোলিল চেতনা আহান আহের। কিন্তুমান আমার বিষ্ণুপ্রিয়াৰমা এসাদে দিন এ বুজো নাহেছে। খেইতায়, পিতায়, গুমজিতায়, আহিতায়, রুহিতায়, মরতায়, শ্মশানে ছালিগো অইতায় লয়ইল এহানাই বিষ্ণুপ্রিয়া নীতিহান।”

মাততে মাততে দলান ইপুৰ আহির পটেদে লিশিং আহির পানি নিকুলিল। বারো মাতানি অকরল— “যে জাতহানে স্বজাতিৰ বানাহান এ বুজো হার নাপাছি, ঔ জাত ঔহান ভীমপিণ্ডিৰি অনিয়ে হোভা।”

মি— “কিহান করলেতে বিষ্ণুপ্রিয়াৰ মঙ্গল অইতয়তা ইপু?”

দালান— “ছনাশৌগ, শিক্ষাদীক্ষার অভাব জবর আছে।

কথাহান খেং করিয়া মি মাতলু— “কিয়াকা ইপু? আমার জাতে শিক্ষিত মানু আজিকালি নিয়াম নিকুললা এতাতে?”

স্নিগ্ধ মেইথঙে মুকসি আহান লাগেয়া দলানইপুএ মাতলো— “হুঃ কৃষ্ণগোপাল, তানুরেল জাতহান উদ্ধার অইতয় নাগৈতা? যেসাদে শিক্ষার পরাদে নিজর জাতর প্রতি প্রেম বানা-নুংসি উদয় নার, ঔসাদে শিক্ষা ঔতা খাংটুপিৰ কালি বোলিয়া নিংকরিস কৃষ্ণগোপাল। ঔ কালি ঔতারে বদালা দালো খেং করিয়া বেলানি লাগতয়।”

শ্রদ্ধা বিগলিত হাদিগলো মুরগো নঙেয়া দলানইপুৰ জরাজীর্ণ জাঙ দ্বিয়হানিং হমাদিলু। আকদিন বিয়ানে গুমেস্ত হজাগ অয়া পেইরাক মলগো তুলতে দেহৌরি, দলানইপুৰ করপেখ ঔহানে বারো চে টুমা আহানে। শশব্যস্ত ভাবলো চে টুমা ঔহান আংকরিয়া পাকরলু—
ছনাশৌগো,

জাত এহানর সালে নানান চিন্তাদুঃখলো মি দেশান্তরী অইলু। যানার সময়ৎ তরে কিহান দিয়া যিতুগা খালকরতে বিছারতে না পেয়া মোর ঠইগো পারা করপেখ এহান থদিয়া গেলুগা। মোর বানা-নুংসি আশীৰ্বাদ লইস। ইতি—

তর লেইরা ইপু

শ্রীদলানচাউবা

দলানইপুৰ কাদুওয়াকুরা স্মৃতি ঔহান বুকগোত থয়া মি তার করপেখ ঔহান প্রকাশ করানির থকনেই আশা আহান করলু। ইতি—

শ্রীকৃষ্ণগোপাল

□

ফাগু ১ম বর্ষ ৩য় সংখ্যা; জুন, ১৯৬০ ইংরেজি
(বানান পটানি নাসে)

কাল বর্ণন

হে কাল বর্ণন, তরে মি বানাপাউরি। তি থারতাই কদম পুষ্পর সাদে ফুটিং ফুটিং
বোলিরী লাস্যময়ী যুবতী জেলাগোর টৌ খেলার ফেনধনুকনিন্দিত দীঘল পিচুম দ্বিয়গির
গজে। ঔহানল তরে মি বানাপাউরি। তি যৌবনর ভরিং ভরেই কাকেই বেলেইরী তুল তুল
করিরী পুরী জেলাগোর কুন্তল বল্লিকার শোভা করিং বোলিয়া বজ্রর সঙ্কল্লল ঠেকগো লেহে
ষাপয়া থার। ঔহানল তরে মি বানাপাউরি। তি থারতাই মনোলোভা রূপহানল থাম্পীগো
পারা কঙালা উরর শৌগোর মল্ নেই, পাপ নেই ফটিক নয়নগিৎ কালামণিগো অয়া। ঔহানল
তরে জবর বানাপাউরি। যৌবন হৃদগোৎ বিকশিত অছে পদ্মানেত্র দ্বিয়গিৎ জিল্লিকিয়া জিল্লিকিয়া
তি রমণী জাতিহানর পাহাৎ করে কুরা বিমোহন কটাক্ষর বিধিবিধান করে দিয়র। ঔহানল তরে
মি বান-নুংসি কাংকরৌরি।

হে কাল বর্ণন, তরে মি সম্ভাষা জানাউরি। যে কোকিলগোয় নুঙেইপা বসন্তর
ইংকরেকুরা মলয়াবৌর তুলো দুরেই গোরে কাদাৎ করেপারেকুরা কু-উ ধ্বনিহান তিলকরিয়া
মনুষ্যজাতির হৃদিং আনন্দর জোয়ার ইহৌ কাকোরের ঔ কোকিলগোর বর্ণহানও কাল।
ঔহানল হে কাল বর্ণন, তরে মি মধুরগো পারা বাক্যল সম্ভাষা জানাউরি। যে ভস্মনাগোর
গুঞ্জরং ধ্বনিহান ছনানিমাত্র হারৌল হাকাৎ অয়া মালতী, সিঙ্গারেই, চাম্পা, চিকংলেই, মদলেই
হাবিহানে পুষ্পরেণু বেলেয়া খাংকরতার, ঔ ভস্মনার বর্ণহানও কাল। ঔহানল হে কাল
বর্ণন, তরে মি গুরাপানার সেলপাকহান আক আতল ধরিয়া অন্য আতল কহনিগো ছকয়া
বিনম্র ভঙ্গীহানল সম্ভাষা জানাউরি। আরাকও কিহান বোলিয়া পেলইতু! যে সেংকমকদলীপুষ্য
ময়নাগো ছনার পলাঙে জিঞ্জুরর গাঁঠিৎ আবদ্ধ থায়াও পাপল আতুর-বেতুর অছি মনুষ্যরে
নিশিদিন 'রাধাকৃষ্ণ' এ মধুর নাং দ্বিয়হান ছনুওয়ার, যে নুংসিপা ময়নাগোর পলাংগো ভাঁগিয়া
ফরদিয়া পলেইলেগা কিংবা পলাংগোর ভিতরে দৈব দুর্বিপাকে কিতাপারা লয়ইল, নিংস্বাহান
কারিয়া দেহপিঞ্জুরাগো উদালা করিয়া বেলেয়া গেলেগা য়করেকুরা গিরক ঔগোরে ভবসংসার

এরেদিয়া উদাসী অয়া মাপইতেগা দেহেছি, ও ময়নাগোর বর্ণহানও কালা। ওহানল হে মহিমার কালাবর্ণহান, তি মোর সম্ভাষার সেলপাকহানাত্ত নুংশি নুংশি ফুলচন্দন পেলকরে ল।

তরে কালা বোলিয়া মানুওয়ে আহকা, ছালি-টিকি, অমাবস্যা, কালামাণ্ডরা বোলিয়া বদনাম করকা, নামছা-কনক পিধলে পুরীর জগন্নাথগৌ বোলকা; ধলাশৌ তর উরে বহিলে খাং লাগকা, মানুওয়ে বোলকা— কওয়ার উরে বগাগো, তেবো তি গণ্যতা না করে দিস্। কালা বোলিয়া তরে নিঙল নাদেকা মানুওয়ে, নিঙলর মেইথঙে তরে দেহিয়া দুরন্ত মানুওয়ে বর হাজানি নাও মনাকা, তি তানু হাবিরে বৃদ্ধাপুষ্ঠগো হোভা করে দেহাদিয়া পানির কাঁটাগ অয়া বহিয়া থাইস্। তর গুণকীর্তন চৌদ্দ মাদল্ল হাজেরা অকরতো।

হে কালাবর্ণহান, তরে মি ভক্তি করৌরি। মর লালচুম হোভা হোভানেই হাবি তর গজে দিলু। যে ছেয়াগো মর দেহ এগোর পিঠিপিঠি অয়া চিরলগ্গ অয়া আছে, যোগায় মর লালচুম, সত্যমিথ্যা, পাপপুণ্য, সুকর্ম-কুকর্ম হাবিতার সাক্ষীগো অয়া মর মরণর পিছে যমরাজার পেস্কার চিত্রগুপ্তরাং “এতা ইকর, ওতা ইকর” বোলিয়া নিহেরগ করে মাতে যিতয়গা ও ছেয়া ওগোর বর্ণহানও কালা। ওহানল হে কালাবর্ণহান, তরে মি সম্ভাষা লয়করিয়া ফারাংচির ফিটাং বহুওয়াউরি। এহান হারপেয়া জগতর কালানিঙল হাবিয়ে গরর কোণগন্ত নিকুলিয়া মাতো— তুমি জগতর তাম্ফা আকেইগী। কালা নিঙল পেয়া চিস্তার ঘোরগৎ টেইপাঙে আঁধার দেহেছ হে মালক-বাপক, তুমি এবাকা পাম্পল টিংদিয়া মাতো— তুমি তাম্ফা আকেইগী পেয়া জনম সার্থক করেছ।

হে কালাবর্ণহান, তর মহিমামুখ মি দলানচাউবায় তরে ভক্তিল হমাদিউরি। কিয়াকা বোল্লে, ওরে চা, আকফুরুং মেঘালা হাকহানার বেদে। যে বরোণে পৃথিবীর অওয়াহীন, ভখটাটি সমূহ কক্করেদিয়া মানুরে মম্বন্তর মড়কির আতেন্ত জিংতা করিয়া থদেছে, ঐ বরোণর বর্ণহানও কালা। ওহানল হে কালাবর্ণহান, তরে মি সভারমাঁ বুজনর ফালুং বহুওয়েইলু।

হে কালাবর্ণহান, খালকরতে খালকরতে তরে মি ধূপথংমেইল পূজা করিং বোলিয়া মনাউরি। তরে কাদাং পেইলে মি অচিরাং ভগবান পেইতো বোলিয়াও নিংকরৌরি। বৃন্দাবনর নিহের কুঞ্জবনহানাং শালবন, তালবন, খেজুরবন এতাহাবি বেলেয়া যে তমালবনে শ্রীমতি রাধিকায় “দুরন্ত” আগোর সালে কুলমান এরেদিয়া নিক্কাকাল অভিসার কঁরেসিলী, ও তমাল বৃক্ষ ওতাও কালা। মাতলু “দুরন্ত” এগ কুংগো? ওগো অছেতাই বৃন্দাবনর ঠইগো যোগোরে পানারকা স্বয়ং মহাদেবে বিভূতি ঘষিয়া আড়র মালা গারগোত্ পিধিয়া শ্মশানে শ্মশানে পাগালাগোর সাদে বুলের, যেগর বংশীধ্বনি ছনলে ব্রজগোপী হাবিয়ে কুলধর্ম এরেদিয়া রাতি নঙেইং পাহাং অয়া ধাবদিলা, মুনিঋষিয়ে উহি আহি খেয়া বনজঙ্গলে লেইসু অয়া

খাংকরলা, ও “দূরন্ত” ঔগর বর্ণহানও কালা; ঔহানল তার নাং “কৃষ্ণ”, যে নাংহান ধ্যান
করলে আনন্দর ধারা আহিগিস্ত নিকুলের, আঃ কিহান বোলিয়া পেলইতু।

বর্হাপীড়াভিরামং মৃগমদ তিলকং কুণ্ডলাক্রাগণ্ডং।

কঙ্কাক্ষং কঙ্ককণ্ঠং স্মিতসুভগমুখং স্বাধরে নাস্তবেণুং॥

শ্যামং শান্তং ত্রিভঙ্গং রবিকরবসনং ভূষিতং বৈজয়ন্ত্যা।

বন্দে বৃন্দাবনস্থং যুবতীশতবৃত্তং ব্রহ্মগোপাবেশং ॥

ও কালা কৃষ্ণর বিরহল আজি কাঁদে কাঁদে শ্রীযমুনাও কালা অয়া কালিন্দ্রী নাংহান
পাছে। ঔহানল হে কালাবর্ণহান তরে হমাদিয়া “হা কৃষ্ণ! কুরাং থাইলেতা” বোলিয়া কাঁদিং।

অধিকন্তু কিহানও মাততু। মর জনমর বেলিহান অন্তাচলর পটগৎ লামে যারগা হাতে
হাতে। আহিগি জিমেইলে কিস্তা আহান নাদেছরি, হাবিতাও কুম্গো পারা কালা, হারপা
নুওয়ারুরি কুংহান কিহান। যেবাকা ভবলীলা লয়করিয়া জনমকারকা আঁহিগি জিপেয়া মরণর
উরহানাং কাইতৌগা, কিসাদে কুংবেদে কিহান অইতৌ নাজানু। যোগোরে জ্ঞান-বুদ্ধিল ধরে
নুওয়ারুরি, হারপা নুওয়ারুরি, ঔগো মাত্রই কালা। এমাটিক আশা, এমাটিক প্রেম, এমাটিক
যত্নল যে জনম এহান হংকরে যিয়ারগা, মরণর উরে, মরণর পিছে কিহান অইতই, নাজানু।
ঔহানল’ মরণও কালা। কিসাদে শাপান্তর পরাদে এ ব্রহ্মবাহনর বংশাবতংস বিষ্ণুপ্রিয়া জাতি
এহান এমাটিক রসাতলে হোমেইল, কিসাদে করে এ জাতি এহান ভূত-ভবিষ্যৎ- বর্তমান
হাবিতা জাংল দলন করিয়া জাতির স্নেহ-মায়া হাবি পাছরিয়া থাইলা, ও রহস্য ঔতা হাবিও
মি কপালখিপা দলানচাউবার জ্ঞান বুদ্ধির কতিতে অতীত আছে বোললে মি ছন্দা আঁধার
দেছরি। ঘোর অমানিশার ছচিল বিধা নুওয়ারিল বিশ্বগ্রাসী কালাবর্ণহান দেছরিএ আঁধারর
হাদিৎ আশার স্ফুলিঙ্গকণা আগও দেহে যানা নুওয়ারতৌ বোলিয়া অহরহ আঁহির পানি বেলাউরি
মি। ঔহানল হে অজ্ঞেয় কালাবর্ণহান, তর অন্ত নেই মহিমার পদরেণু আগো তি দে; ও রেণু
সম্বল হংকরিয়া বিষ্ণুপ্রিয়ার মহাগৌরবর আঁধার সমুদ্রহান হাতুরিয়া লালো যিংগা, মরে
নিয়াম দিন এ আঁধাররমাঁ নাথদি। তর নাংহানর জয়ধ্বনি উঠক্ দিগদিগন্তরমাঁ।

□

ফাগু ১ম বর্ষ ৪র্থ সংখ্যা; আগস্ট, ১৯৬০ ইংরেজি

আসন-ফিদার গুণ

হে আসন! তর আরাক নাও আহান অইলতাই ‘মহাশয়’। তর পরাদে দুর্লভ জনম আকেইহান পাছি মনুষ্য জীব এতা গাও, দেশ, সমাজ হাবিতারমী শ্রেণীর মানু, ফালুর মানু অয়া ‘মহাশয়’ উপাধি পাছি। মি অশিক্ষিত এগয় এবাকা হিম্মৎ নেয়য়া ‘দশর’ মানুগ অলনি নুওয়ারেছু, কিন্তুমান যেবাকারগাই তর প্রেরণা বার মুহিমন্তর গুণে দশগয় মরে তর স্নেহপরিপূক্ত উরহানাৎ বহুওয়েইতাই, মি ঔবাকা ‘কিন্তু মানু আগ’ নায়া ‘মহাশয়’ বা ‘মাশয়’ আগ অইতৌ। অতঃ অক্নেই মানুও তর পরাদে ‘মাশয়’ অলনি পারতারা। রাজ্যর কামেও তর কৃপাদৃষ্টি আহান (কপালং মূলং) পাছে জন ঔগ শক্তিমানগ অয়া দশগর মুণ্ডে হিম্মৎ আকচুটি দেহুওয়ানি পারের। মেরগ পারা মানুগও হোভার কেজা আকেইহান দেনা পারের, তর ঐন্দ্রজালিক মুহিমন্তর গুণে হাবি সময় পলায়নক্রিয়াপারঙ্গম গিরক আগও দশগর মুণ্ডে বুকগ তিনাত ফুলকরাগি পারের। ঔহানল হে আসন, তর আরাক নাও আহান দিলুতাই ‘মহাশয়’। সামকরে মাতলে— যেগয় আসন পাছে, ফিদা ফ্রাংচি পাছে, ঔগ মাত্রই ‘মহাশয়’। আজি বার্ধক্যয় ফুটা গালগিল পাঞ্চজন্য মইবংগ রহেয়া বৌর সমুদ্র এহানাৎ টৌ নিকালেয়া দিগ-দিগন্ত খল্কেয়া মি তর মহিমা হাবি জারি করিং।

যে যুগহানাৎ মানুওয়ে পৈলা দৌ নিংকরানি অকরলা, ঔবাকা তানু দৌরকা বহিল আসন আকেইহান হংকরলা। দৌরে মানুওয়ে ডরেইতারা, এ ডরানিস্ত রতিভক্তি পূজা আহেছে। দৌওয়ে টিকপেইলে মানুর গজে নানান প্রকার বিকারর বিপদ আপদ পড়ের; দৌর ইঙ্গিতে মড়কির শারেই-ঙারেই গরর বারাদে, লপুকর বুকগদে মানুর অবোধ্য ঠার ঠারেয়া আটতারা; দৌদুকে করিক বোল্লে পানিএ পানিএ পৃথিবীরে জলাকারগ হংকরে পারতারা, লপুকর লক্ষ্মীরে খরার রৈদল দহেয়া ছালিগ করে পারতারা। দৌএ করিক বোল্লে বরোণ নেই লিকলিকা হাকহানান্ত বজ্র বেলেয়া মানুরে ফামে ফামে দহা রুক্গ হংকরতারা। দৌ তুষ্ট অইলে জগৎহানও তুষ্ট। দৌরে ডাহিয়া হারৌ করিয়া ভক্তিল আসন পাতিয়া ধূপথংমেইল

পূজা করানিই আমার কর্তব্য কর্মহান। এ ভক্তিতত্ত্ব এহানর তাৎপর্য এহান যেগয় হারনাপার কিংবা হারপানি না মনার ঔগর মূরর গজে ইন্দ্র সরারেলর বজ্রগ পড়ের। ততঃ মানুরমাঁ যেগিএ দৌর তুলো মামা অছি, রাজা মহারাজা, দিকপাল আকেইগি অলছি, তাঁনুর কাজেও আসন হংকরেছি— ছনার আসন, রূপার আসন, হীরা মণিমুক্তামণ্ডিত আসন তানুর সাধারণ নাং সিংহাসন; নংসাগ য়েকরেসি বোলিয়াও অক বা নাক মূল্যবান জবর ডাঙর আসনহানর নাঙ সিংহাসন। আমি লেইরা মানু এতাই ঔসাদে আসনর অনুকৃতিল ফ্রাংচির ফিদা, লুরি-হিশর লেইত্রেং মণ্ডিত ফিদা, আরাকও নয়ানমুনার ফিদা হংকরিয়ার।

মূলগ খালকরলেতে— আসন এহানল গজতল, লঘুগুরুর বিচার অর; যোগ্য পাত্রগর যোগ্য সমাদর অর। মহারাজ বিক্রমাদিত্য বহেছিল সিংহাসন ঔহানাং তাঁপারা গুণবস্ত, জ্ঞানবস্ত, ধর্মবস্ত গিরক আগয় বহানি পারিলইছ, কিন্তুমান নেয়ছিল। বোলিয়া ঔ সিংহাসন ঔহানও দৌগ অয়া মাঙঅ গেলগা। আরাকও নংসাং দিনর য়ারিহান নাগই— শাহজাহান বোলিয়া মুঘল বাদশাহ আগয় ময়ুরয়েকরা হীরামণিমুক্তারমণ্ডিত সিংহাসন আহান হংকরেছিল লেইত্রেং ঔহানও কুরাং মাঙঅ গেলগা। এতার গজেও সংসার এহানাং কতি আসন, কতি সিংহাসন আছিল। ঔতান্ত কতি দরবার, কতি যুদ্ধ, কতি মহাযুদ্ধ, যুগ যুগ অগেছেগা, কুরাঙৌ কিন্তু রাজা মারিয়া রাজ্য না মিলেছে, রাজ্য মিলেছেতাই রাজ্য জয় করিয়া। তি তর কাদাবারার হাকিম আগ বা সাহেব আগ মারিয়া হাকিমগর বা সাহেবর আসনহানাং বনা পারবে? হাকিম, সাহেবর আসনে বহানি মনেইলে ঔসাদে গুণবস্ত অয়া, ততঃ ঔসাদে কপালর মালিকগ অনা পারলেহে ফল ধরের নাই। আরাকও কিসাদে আসনহানাং বহিলে কুঙ্গ কতিহান গুণবস্ত, ঔহানরকাও বিচার আছে। ঔসাদে বিচার নল রাজার আমলেও আছিল, আজিও আছে। বিচার করতেগা শনি গিরকর কোপে নল রাজায় আনাংশা খেইতে খেইতে ঠইগ থাক্ আছিল। কুংগ কারাংতঃ ডাঙর, এহানল কতি তামা, কতি শিংনা— হুদা ভারতে নাগয় পৃথিবীর সর্বত্র এগৎ। মনুষ্য এতারমাঁ কুংগয়ও নিজর গুণে আসন পাছি, কুনগই বংশাবলীর অধিকারল’; কুন’গই বা শক্তিমান গিরক আগর পরাদে আসন পাছি। যেন প্রকারেণ অয়াও থাক, আসন পাছে জনঔগ আচাম্পাগ নাগৈ। ঔগ গিরক নাঙর যোগ্য আগ যেগর নাঙ ‘মহাশয়’ বোলিয়া ‘ভাল’ করিয়া থছি। দশগয় মূর নঙাছি আসন ঔহানরমাঁ দৌ আছি, ভগবানও থা’ থাইব। ঔহানল আসনহানরতাও আরাক নাঙ আহান ‘মহাশয়’ অনি য়াকরের।

মহাসমুদ্রর তারপার নেই বুকগৎ জম্বুদ্বীপ বোলিয়া রম্য দেশ আহান আছিল। কতিকালর উটনপাটন, অওয়াহীন তামাশিংনার য়ারিল ঔ ছনার দেশ ঔহানর ইতিহাসর পাতাহাবি রাঙবারী দিয়া আছে। ঔ ইতিহাস ঔহানর অমূল্য কথা মাহি মানুর অন্তরে আজি পেয়াও গিথিয়া আছে, কিন্তুমান অনেক পাতা জির মাঝে ছালিগ অয়া গেছেগা, যেহানি আছে, ঔহানির মাঝে তেব’

আগেকার কথাবার্তার চুটি আকেই গ হাদিহাদিৎ ছোয়ামেয়াগ অয়া বুলের। এ দেশ এহানর নংসাং নাছে যারি আহান দিৎ। দেশ এহানাৎ কতি বংশয় রাজা পালয়া হনার সিংহাসনহান ঙালকরিয়া গেছিগা। যে বংশহানায় যেবাকা রাজা পালইতারা, ঔবাকা আর আর বংশ হাবিয়ে রাজচক্রবর্তী ঔগর তলে তাঙয়াও ভাল, নাপ্পাল করিয়াও ভালা থানি লাগের। রাজার জিপুত জিপুতে দেশহান ছোয়া আসি। রাজা না পালইলেও তাঁনুর সম্মান মর্যাদা হাবিহানে রক্ষা করিয়া থছি ভক্তিল আসন ফিদা পাতেদিয়া। কালর ক্রকুটিৎ ঔ মান মর্যাদাও দিন দিন ভাটিওল দিল। ঔবাকা আত্মচেতনাল সচেতন অছি রাজার জিপুৎ বারো সিজালেইমায় স্বয়ং আসন ফিদাফ্রাংচি বহেয়া সভা তালকরিয়া যারযির ফালু ঙাককরলাগা, ডরহানতে — এ কলি যুগ এহানাৎ বেদখল অইতে সময় না লাগের বোলিয়া। আরাকও সচেতন অয়া তাঁনু জম্বুদ্বীপর আটে-ঘাটে, গ্যাঙে গরে দল হংকরিয়া ‘আনী’ পাতলা। এ দলে ঔ দলে শ্রাঙ্ক সাক্ষাৎ, দিবস-কীর্তনে হোমাহোমি নেই। আকদিন ডাঙর কীর্তন আহান অছে। বার্তনে বার্তনে গাঙ পরগণা উজ্জার করিয়া নিমন্ত্রণ লাগিল। কীর্তনর দিনে দেশহান হাবি চারাপহান অয়া বুজলা। অধিবাস লয়নির পিছে এবেদে আসল কীর্তনর অকরাগ অইল; চারিবারার ভাবহান চেয়া কীর্তন গিরিগর ত্রাসর সীমা নেয়ইল। রাঙা, ধলা, নীলুওয়া আসন ফ্রাংচি ফিদা চারুপ অয়া নিকুলিল, হিরিঘামনিষিক্ত দেহ আকেইগি ঠেলাঠেলির হাদিৎ ভুলুণ্ঠিত অনি অকরল, ফিদামাহি চর চর শব্দল আপ্পানে আপ্পানে ছিন্নভিন্ন অনি অকরল। নিরুপায় কীর্তনধারী ঔগ দশগর জাঙে লুটিয়া কাদানি অকরল। মাপা ঔহানাৎ দৈববাণী অইল, “হে সাধুসন্ত”। মণ্ডপগ থানি নিংস্বা মাঙইল। দৈববাণী অইল বারো— ‘তুমার’ জম্বুদ্বীপর রাজচক্রবর্তীগর আর দিন নেয়ইল— সিংহাসনহান উঠতয় তেল্লাম, রাজাও সিংহাসন বেলেয়া দশগর তুলো মাটিৎ বহিতয়। তা’ আরো, ক্ষণভঙ্গুর এ আসনল দরবার দলাদলি বাজেয়া মানুর চোদ্দচিরির কীর্তন এহান নাশ নাকরে দিয়; আসন পেইক বোললে বিদ্যাবান, গুণবান, জ্ঞানবান অই, ইমে জবরদস্তির আসন পানার দিন নেয়ইল।’ দৈব বাণী মাঙইল। বারো কাস্থিকালাক্ল মানুওয়ে লৌদানি অকরলা— “মহারাজায় সিংহাসন না পেয়াও থাক, আমার আসন, ফালুতে এরেদেনা গার (গ্রীবা) কাপলেও নাইব।” এতা বোলিয়া মণ্ডপগ উটন পাটন অকরলা। পিছহান কিহান অইল মি নিংশিং নাউরি। লয়ইতেগা মি আসনহানরে হমাদেউরি কিয়াকা বোল্লে তার আরাক নাঙ আহান অইলতায় “মহাশয়”।

□

ফাগু ১ম বর্ষ ৫ম সংখ্যা; অক্টোবর, ১৯৬০ ইংরেজি

‘কিহর কা?’

সংসার এহানাত্ তিয়ে মিয়ে তিলইলে হারৌপা ভাব আহান মনহানাত উদয় অর—
কিহরকা? তায় মিয়ে তিলইলে হুদা কৌলি লাগানি আহের— এহানও বা কিহরকা? মেরাকগি
আছি— হারৌ নায়া থানি নুওয়ারতারা, মেরাকগি আছি দিনহানাত্ কৌলি আহান না ধারেইলে
পেটগত হোভায় অন্ন দুগ হোমানি নাকরের। হারৌপাল যেগয় গারিগ, মনহান সাধন করেছে
হারৌতিয়াম ঔগয় হোভা পার, বারো কৌলিল যেগয় গারিমন চেৎকরে সাধন করেছে ঔগয়
কৌলি নায়া থানি নুওয়ারের। মেরাকগর মতহানে এহান বংশর দোষহান বা গুণহান, আপাবপার
রকতে বহিয়া আহেছেহান। বারো মেরাক গর মতে হারৌতিয়ামর হাদিত ডাঙর অর জন ঔগ
সদাই হারৌ অয়া থানি মনার, কৌলির হাদিত ডাঙর অর জন ঔগ হুদা কৌলি লাগানি মনার।
কুংহানে সত্যহান, লেপকরাণি খানি চীল বোলিয়া মি অভাজনগ অছু দলানচাউবায় দশ
গিরিগিথানীর গজে ভারহান দিয়া যারি আহান সামকরে দিঙ।

কাহ্নইন্ত হুৰু সড়ক আগ হরপর সাদে কয়ো কয়ো টেঙারা আগর হাদিগ চির্ দিয়া
গেছেগা। ঔ সড়ক ঔগদে এবাকা মটরগাড়ী ধাবদের, মানুওয়ে গোরু মইষল এপার-ঔপার
লালইতারা। কিন্তুমান আজিস্ত অকরে আহৌ বছর আগে ঔ ফাম ঔহান বাঘ, ভান্নুক, বন
আস্তীর লীলাভূমিহান অছিল। দ্যৌদুক, লামচিক, খাঙ, ভূতপ্রেত বনর সপাহানলেহে পুলো
পুলো সভা, মহাসভা করেছিল। অধিবেশনহান লেহে পংথার গাছ, খৌনাঙর গাছ, তীরার
গাছ, বরুওয়া সপা আকেইহান মরুমেরেয়া তুললা, বেললা, ভাঁগলা। আজিকার যে সড়কগ
দেহিয়ার, আগে তার পাথারিহান আলিগরাংতঃ জবর নাছিল। ফামে ফামে শনর সপা আকেইহান
রাতিহান অনি ফাংনেই, চেইতে চেইতে দীঘল অইলাকোপুরি খাঙ লাগেয়া ঠইমামি অলাং
করেদিয়া কতি মানুরে ফামে ফামে নিপাত করেদিলা সীমাসংখ্যা নেই। আজি পেয়াও হুনিয়ারতা
ঔসাদে ঘটনা আকেইহান হাদি হাদিৎ অর। আমার মানুওয়ে ঔ ফাম উহানরে থলরগাঙ
বোলতারা, পুকবুলর খানি এবেদে। মিয়াঙে পুকবুলরে পূব্গোল বোলতারা ঔহান হাবিয়ে
জানি। ঔ থলর গাঙ ঔহান আমার বপাবপিয়ে মণিপুৰেস্তঃ এইলা পিছে দা-হাকেই- বন্ম-জাঠা
জাঠিল বনর ভয়ঙ্কর জন্তুর তুলো যুদ্ধ করিয়া মুহিমস্ত্রল গারি বাঁন্ধেয়া খৌল গারি নালকরিয়া

ভূত-প্রেতের তুলো লাকাটি বাঁধেয়া তানুরে খেদিয়া পাতেছি গাঙহান। ঔসাদে গাঙ ঔহানাত্
পুতক আকগ স্পর্শমণিগ করে পাছি হেইমাক আহান আছিল। হেয়কর নাঙ মানু, নাঙজাদা
বলী পাংকালপা মানুগ, বারো মইলকর নাঙ ইমানু, সাদে-বাদে নিরুপমাগ। মানু-ইমানুর
হাদিত হুদা 'ই' গর ফারাক থাইলেরগাইও বেভার-আচরণে দ্বিগির নিয়াম ব্যবধান আছিল।
পুতকগর নাঙ গোলোক, আকগ পুতকগ বোলিয়া মালক-বাপকে বানাহানে তাম্ফাগ করে
থছি।

পৌষ মাহর তিল-সংক্রান্তির দিনহান। থলর গাঙে হারৌর মেল পরেছে। কালা
চিংখেইন্তঃ হিনানি, নামছা কনক পিধানি, হোভা হোভা ফুতিফালি উরানি, কনাকেত্তঃ বুজন
পেয়া অকরেছি। রাতি ফুওনির আগেই ইমাইন্দলে পিঠা, লাড়ো, তিলর আহৌআটতা হংকরিয়া
থছি; পারিল্ মানুওয়ে বাজারেত্তঃ বাতাসা নুকুনদানা লয়া আনিয়া ছনার গজে তাম্ফা
খিলকরেছি। রৈদহান পরিল পিছে দৌরাং এই কাং করিয়া মানুওয়ে এই পজা গরে গরে
বিলানি অকরলা। মানু ইমানুর গরগ বরাভালা। ইমানু স্বয়ং এইর কুপাং আহানল নিকুলিয়া
হাবির আগে গরে গরে বিলেয়া আহিলীগা। গোলাপ ফুলগয় লাজপেই ব পারা মেইথংহানর
গজেদে কুন্তল-বল্লিকা লালয়া হেইরাপকরে আসাংপা মণিপুরর ইনাফি আহান বেলেয়া হাবির
আনন্দ বর্ধন করিয়া আহিলীগা ইমানুয়ে। আলইতে তেইর কুপাংহানাত যেগয় যেহানি
পারিলহানি ভরা দিলা— পিঠা, তিলকাঞ্চুপী, বিরণর লাড়ো, আরাকও কতিকিতা। কাদাবারার
মৌরর গরে হমেয়া তেই জবর মনহানাং হিনপেইলী। মৌর জবর লেইরা বোলিয়া জিলক
কুঞ্জবতীরে ঔসাদে সাজেল করিয়া থনি নুওয়ারের। ইমৎ মতসে আঙালুরী আহানল লাজহান
নিভেয়া আজিকার সংক্রান্তি দিন এহানাত কুঞ্জবতীয়ে তেইর কাপকগপারা কঙালা গারিওগ
মংকরিয়া থছে। সাজেল্ করেদিল্ মানুও নেই। কনাক থাইতে কুঞ্জবতীর মালক তেইরে
বাপকর উরহানাত বেলাদিয়া দৌগ অইলী। আজি ঔ কনাক কুঞ্জবতী পুরিজেলাগ ফাইলী।
দেহগর পাব্হান লেহে যৌবনর মৌতুপ পারা সৌন্দর্যহান টো খেলেয়া যারগা তেইর প্রতিহান
অঙ্গভঙ্গীর তুলো। নারীজাতির হোভাহান আরাকও শতগুণে জিঙের লাজর লেপা আহান
পেইলে। কুঞ্জবতীর ঔ গুণওহানও আছিল। গুণমুখ ইমানুর কুপাংহানাত গেলগা রাতিকার
জানক-নাজানক হংকরেছে মুড়ির গটা আগ ভরেয়া কুঞ্জবতীয়ে লাজহানে মেইথংহান রাঙা
করিয়া মাতলী— 'ডাঙর ইমা, লাজপাউরী, এগ দিতে', কথাহান লয় না থাইতে 'এতাও ইমা,
আকছে' বোলিয়া ইমানু কুঞ্জবতীরে মাঠিয়েয়া দিয়া গেলীগা।

ফাস্তুন আহানির লগে লগে শুভক্ষণ আহান চেয়া মানুয়ে-ইমানুয়ে গোলোকর তুলো
কুঞ্জবতীর আতহান বাঁধেদিলা। ঠইগ করে বানাপেইরী আকগ পুতক গোলোকরে চুমাদিয়া
ইমানুয়ে কুঞ্জবতীর রূপগুণ চেয়া থাইল পথহান নাপেইরী। গোলোকে কুঞ্জবতী পারা রূপবতী
জেলা আগরে মৈলকগ করে পেয়া মানুর মুঙে নাইলের গাইও আঁধারর কোণগুঙতে হেইরাপ

চেইলকো পুরি হারৌহানে ছেপসিটা গিলের। দিন যারগা। যে গোলোকে ইমানুওয়ে আকগ পুতকগ বোলিয়া ডাঙর অইলতা পেয়া ‘শৌগ’ ‘ছনাগ’ ‘তাম্ফাগ’ বোলিল নানান সম্বোধনল ডাহিরী, বারো যে গোলোকে ইমা বোললে খৌরাংহানল পাহাৎ অর, আজি ঔ গোলোকে ইমানুরাংত স্নেহ বানানুংসির খনিগর আখাআখিস্তঃ জিঙে কাড়লয়া কুঞ্জবতীর হৃদিগরে প্রেমসিক্ত করাণি অকরল এহান দেহিয়া তদবৎ জগতর ইমাইন্দলে বহকলকেইর গজে খাল্পালর ভাব আহান পোষণ করতে বিচিত্র আছেতা? ইমানুয়ে যেবাকা দেহিরী তেইর পুতকর স্নেহ বন্ধন ঔহান দিন দিন হচরৎ ‘অ’ যারগা, খানাপিনা লয় করিয়া মালকর কাদাৎ না গিয়া গোলোকে যেবাকা কুঞ্জবতীর লাবণ্যময় মেইথং উহানর দর্শন লালসাল সুলেইত্রেং মণ্ডিত খাটালগ তালকরিয়া গিয়া হেইরাপ খাটালর ফুতিহান তোলের, ঔবাকা ইমানুর অন্তরগর নিভৃত কোঞ্চেল আগন্তঃ হিংসার হরপ আগ ফণাহান সালকরিয়া নিকুলে আহের। বহকরাং যে বাহনহান তেই কাৎকরেছিলী, হাতে হাতে ঔ বাহনা ঔহান হিংসার জিগর প্রতাপে অন্তরগর মাঝেই পুড়িয়া ছালিগ অইল। বহকরে দেহানিয়ে ইমানু আগ্নানে সওইরী, পারাহান লেহে ছিদ্র বিসারেইরী। গোলোকে খালকরিয়া না পার— জনমকার অমাটিক হোভা সুভাষিণী ইমার দিলগ কিহরকা অমাটিক তিস্ত অইলতা।

অবুঝ গোলোক, মি দলানচাউবায় তরে কিহানল বুঝ দিতু; তি হুদা খালকরিয়া মর, সংসারর রীতিহানই এহান।

মানুর তাতে কিহান অইল বোললে— নিক্কা নিক্কা সংসারর কামদুম লয় করিয়া যেবাকা গরে হৈ হৈ করিয়া হোমার ঔবাকা ‘কুঞ্জ, ত্বরা করে আয় ইমা, হজক আককারীল’ এহান বোলিয়া বাসকর এলা আহান অকরের। জনম এহান নিঙলশৌ আগ পানার কাজে বাপকগর কতি ডাঙর টাটি আহান আছিল, আজি পরর জিলক কুঞ্জবতীরে কাদাত পেয়া ঔ বাপকে ‘নিঙলগ পেইলু’ ভাব এহানল হারৌ অয়া বাসকর এলা না দিয়াতে কিহর এলাতে দিত? জনম এহান কৌলীর মাঝে যেসাদে বলী, বল পাঙ্কালেও ঔসাদে বলী মানুগ এ মানু গিরকু এগ। নিঙলর খৌরাংল হাহাকার অয়া আছে মানুর অন্তরগ আজি কুঞ্জবতীর স্নেহচুটিল খুমিৎ ক্বায়া ইমানুর অলাং সালাং অইল অন্তরগরে পাছরল। অভিমানে শওনিয়ে আকখুলীগয় বিমর্ষ অয়া ‘তাও মরে অনাদর করাণি অকরলতাকো’ এতা বোলিয়া ইমানু ঠুনিংশা ভাঁগিরী। যে কৌলিরা স্বভাবহান আলিপেয়া ইমানুওয়ে হেয়করে হাদি হাদিৎ উঁচ থক্করে নিন্দা করল, আজি আঁহিরপানী বেলেয়া মনে মনে মাতিরী— ‘এসাদে পানিগ অয়া না থায়া আগেকার সাদে তাঁ মর তুলো দিনরাতি কৌলি করিল্ অইসতাও ভালা অছিল অইস’। ইমানুর নুংসিপাল যম্‌করা অন্তর ঔগ এবাকা উদালাগ অইল, মানুওয়ে তেইরে কৌলিরীগত্ বেললা। কিহর কা?

□

ফাও; জানুয়ারি, ১৯৬১ ইংরেজি

ঠুনিংস্থা ভাঁগের বনহানাত

অমাবশ্যার আঁধারহানে হাতে হাতে পৃথিবীর কঙালা গারিগ আঁধারর নাগপাশল বেরাদিল। দুরেইর গাঙ গরর উঠানে তুলসীপুঙে বস্তির চূড়াগ সেন্ধাকার বৌহানে বাঙ্গেদে বাতেদে লরাগি অকরল। মি গাঙর দুরেই থাউরি। কিয়াকা বোললে লোকালয়ে দশগয় মোরে পাগালাগ বোলতারা। বজ্রবাহনর কপালখিপা শৌশুমারা এতায় কিসাদে করে ভবিষ্যতে দশগর তুলো মাম্মা অয়া থানি পারতায়তা ঔহান যেগয় খালকরের, আমার লেইরিক তামকরতারা, রাজনীতির লাকুটি খেলতারা এতারাং ঔগ আসল পাগালাগ। যেগয় মিয়াঙর ঠার হোভা করে দেনা পারব, ঔগ সেন্ধাং শিক্ষিতগ। ঔহানল মি মিয়াঙঠার না দিউরি এগ অশিক্ষিতগ। কপালং মূলম্। ইমাবাবায় মোরে লেইরিক না তামকরুওয়াছি।

সুতরাং— কিহানতে আছে? শিক্ষিতয় বার নীতিলাকুটি খেলাকুরায় মোরে আলি পেইতারা বোলিয়া মি লপুকে, গোবাটে, সরার পারে কৃষ্ণনাঙ সল করিয়া বুলৌরি।

বুলতে বুলতে কাহুই বোলতারা ফাম আহানাত ফওইলু। আঁধার রাতিহান। এবাকা যে পথগ ধলাগ অয়া অজাগর হরপগর সাদে কাদাবারার জঙ্গলহানাদে হোমা গেছেগা, মি ঔ পথগল ইজ্জুম করে সালইলু। হরুহারকাং বনর সপার গজে তলে জিম্মিপিত্তিরী, হাকহানাত সীমা সংখ্যা নেই তেরামাহি। মাটির তলেত্ত গঙ্গারায় চি চি রহিয়া মোরে পৈলাকার আদর অভ্যর্থনা জানেইলা। কাদাবারার গল্পাসপা আহানাত্ত— মৌকা আগয় বুঁ বুঁ করে রহিল— কিহান জানেইল, হারপা নুওয়ারলু। মি বহিতু না ইমে আটতু! আরাক খানি গেলুগা। দ্বিযবারার গাছবিরাক, উশক বনলতায় মোরে বেরি দিলা। কোং কালর বুড়া খৌনাং আকজারে বহিয়া সেকপি আগয় ‘কেঁ কেঁ’ বোলিয়া রহিল। মি খালকরলু খৌনাং এজারে মোর নাংহান আংকরের পাউরি। বার রহিল ‘কেঁ কেঁ’, গজেদে চেয়া করজোড় অয়া প্রবীণ প্রাচীন অশ্বখ গাছ ঔজাররে মাতলু মোর নাং দলানচাউবা। তৎক্ষণাৎ খানি দুরেইর বনসপা আহানাত্তঃ শব্দ অইল— থেক্ থেক্ থেক্।

ঔ অসংযত ধ্বনি ঔহানর লগে লগে দেহগর রক্ত হাবি কালুওয়া অইল, গারিগত রমকাটা বারী দিল। গারিগর কন্মলহান চেৎকরে গারিগত বেরি দিয়া ত্বরাকরে কাকেইহান কারলু। অন্তরর আত্মাগয় ডাহিয়া মাতল মোরে ‘কৃষ্ণ সলকর, ডর নেই’। ঔ কৃষ্ণয় আমার

বপাবপিরে বিপদে এ ওয়াহিনে রক্ষা করেছিল। মুণ্ডে দেখলু ডাঙর পংখা আকজার, ঔজারর পাতার হাদিস্তঃ কুঙ্গ আগয় না দুগয় 'উদু-তিতু' বোলিয়া রহানি অকরল। কুপ করে হনলু - দুগয় মোরে মাতানি অকরেছি— বুদুঁ তুঁতু। অর্থহান মিয়াম দুরেই নেই— হে বুদ্ধ, তি হারপেইতেই। অশিক্ষিত দলানইপুর হারপেইলতা বহুত আছে। সুতরাং কানহান হিঙারেয়া ছনে ছনে যাউরিগা। হঠাৎ অরিঙ আগনেই না কিগনেই ধাবদিয়া মোর পথগ লালয়া ঔরে বাতোবারার জঙ্গলেদে হোমেইলগা। হাদিগ জিরিং করল। পোকবুল না কিহান? আমার মানুর সাড়া শব্দ নেই হাবির ইক্ষামে দুগগাছ উঠেসে। ঘোর আধারহানাত, কুরাংতঃ ঠুনিংস্বা আহানি অকরল। এবেদে ঠুনিংস্বা, ঔবেদে ঠুনিংস্বা, চারিওবারাদে ঠুনিংস্বা। কিহর ঠুনিংস্বা? না জানু। কতিকালর অওয়াহিন দুঃখল মূর তুলে নুওয়ারিয়া আছি বিষ্ণুপ্রিয়ার চিন্তাচানক এতা হাবিয়ে ইমৌ না জুলিয়া আছে মোর হাদি এগত কিহর ঠুনিংস্বায় বারো মোরে বিচলিত করতয়তা? সংসার এহান হুদা ঠুনিংস্বার ফামহান,— অন্ততঃ বিষ্ণুপ্রিয়ারকা। দুরেইন্ত কোং জুরুংগর বুকগত থায়া আগয় কাঁদানি অকরল। এ নিশা রাতি এহানাত বনহানায় কাঁদের, ঠুনিংস্বা ভাঁগের, আহির পানি বেলার। কতি মানু জীবর জন্ম-মরণ, জয়-পরাজয়, উত্থান-পতন এতা হাবির সাক্ষীগ অয়া থায়া এ বন এহানায় আজি মি পারা দুঃখীজন আগর মুণ্ডে ঠুনিংস্বা ভাগেরতা। কৃষ্ণ কৃষ্ণ কৃষ্ণ। ঠইগ যৌকরে কৃষ্ণ নাংহান সলকর হে বনহান। তোর দুঃখদশা হাবি ককয়তয়। পুকবুলর দঙ্গঅজা, তাও আকদিন এ নগরগাঙ এতা এরেদিয়া মরণর হৌপার যওইলগা। তার জন্মভূমিহান জঙ্গলে বনে উশকগ আছে। বিষ্ণুপ্রিয়ায় তারে নিংশিং নাইতারা, ঠুনিংস্বা না ভাগতারা। হে বনহান! তিতে কিয়াকা ঠুনিংস্বা ভাঁগরতা? ডাঙর গাত আগর পারে রুকর মারা আগত মি মূরগ থায়া খালকরানি অকরলু। খালকরতে খালকরতে কোংবেদে নিদ্রাদেবীয়ে 'ঘুমযা দলান' বোলিয়া ঘুমহান ঠেমকরে দিয়া গেছেগা, হারনাপাছু। হপনহান নেই না জানু মি, কিন্তুমান টেইপাংহান বোলিয়াই মোরতা ধারণা অর। ধলা মূর্তি আগ হাতে হাতে এয়া কাদাত বহিল। মূরগ কেজেয়া চেইতে হারৌহানে দেহগ পুলকিত অইল।

আংকরলু 'মহেন্দ্রবাবু, কিমে আছত?' স্বাভাবিক এলার সুরগল মহেন্দ্রবাবুয়ে উত্তর দিল— দলানগিরি! মোরতাতে আর যাম দিন নেয়ইল, তোরে মি আশ্ফুলাগ করে বেলেয়া এ জনমর হৌপারে যানাত পড়েছু।' হঠাৎ হকগল মহেন্দ্রবাবুর আতহানি ধরিয়া চেইলু— তাঁর আহিগিস্তঃ অশ্রুধারা পড়ে যারগা।

মি মাতলু তেমজেয়া— 'তোর মরণ নেই মহেন্দ্রবাবু, তর মরণ নেই, মি আপ্পানেহে পাগালাগোর সাদানে বনে জঙ্গলে বুলৌরিতা— তি মরলে মোর কন্ম এগ হাবিগ নিফল অইতই। তি মোরে না এরেদি মহেন্দ্রবাবু, বিষ্ণুপ্রিয়ারকা কাঁদেকুরাতা নেই আর।'

□

ফাগু; মার্চ, ১৯৬১ ইংরেজি

যেবাকা হপন ভাঁগিল

‘বিষ্ণুপ্রিয়ায়কা কাঁদেকুরাতা নেই আর’ এ কথা চারিহান অন্তরগর কোণে কোণেলে
খস্কেয়া হপনর ঘোরগন্তঃ টেইপাং পেয়া নিকুলিল। আঃ— কি হপনহান দেখলু তাতে! গোবিন্দ
গোবিন্দ গোবিন্দ— তিনখুরুম্ সল করিয়া গারিগ মাঠিয়েইলু। শাস্ত্রে মাতেছি— ‘দুঃস্বপ্নে
স্মরণ গোবিন্দ।’ ভাতর আতর পাতাহান এবাকাও তপ্তা আহির পানি তিন চারি ফোটাল
তিঙেছে বোলিয়া প্রতীতি অইল। কার আহির পানি? এ ঘোর নঙেই রাতিকার হপনে বিদায়
লনারকা আঁহেছিল মহেন্দ্র বাবুর জ্যোতিষ্মান আহির পানি? মিছা! মিছা!! তরে বিদায় দেনার
সময়হান নাহেছে মহেন্দ্রবাবু। ভগবানরাং মাগৌরি— আহৌ আট বসর জিংতা অয়া থাক।

এহান মাতিয়া গোবিন্দ নাঙহান বারো তিনখুরুম্ সলকরলু। গারিগর কস্মলহান
আটেয়া মারার মলগন্তঃ মূরগ তুলতে জ্ঞানহান অইল— পোকবুলর ঘোর বনহানাং মি
আক্ষুলাগ। অমাবশ্যার ঘন ফিজাহানাং পহরর রেণু আগও লিতনি নুওয়ারেছে। হুঙ্কা এরে
ওরে বনর সপাং জ্যোতিষ্মান জিল্পিপিত্তিরির দেহনিঃসৃত জ্যোতিখানি থায়া থায়া নিকুলের
বয়ঃবৃদ্ধ দলান চাউবারে পথগ দেহাদেনারকা। সহসা আঁধারহান চিলা চিলা করিয়া আর্তনাদ
আহান নিকুলিল লগে লগে গারগ মেৎকরিয়া রকত পিয়া পিয়া বিজয়ধ্বনি হানল জম্বু আগয়
খেঙ্ খেঙ্ করিয়া অটুহাস্য নিকাল্ল। রাতি নঙেই অইলে সংসারর মানু গুরুয়ে নিদ্রার নুঙেইপা
উরহানাং অচেতন অইতে চর ডাকইত, ভূতপ্রেত, সারেই গারেই, হিংস্র জম্বু হাবিয়ে পানাখানার
কাজে লুমকরে লুমকরে বুলতারা। বিচিত্র জগৎহান।

এতার হাদিৎ মিতে কিয়াকা হোমাছুতা এ ঘোর অমঙ্গলর ক্ষেল এহানাং আক্ষুলাগয়?
মর অন্তর্যামীয়ে জানে। পোকবুলহান দেহিং বোলিয়া হোমাছিলুতা। থাং-রাতিহান অ’ পরিলগা।
কিমে করতু! লোকতাকর পারগ বেলেয়া ক্ষুমলর মাটি এরে দিয়া বনে জঙ্গলে উদাসী—
অপরী অয়া আহেছিল আৰ্য্য সন্তান বিষ্ণুপ্রিয়া— আজি আছি, কালি নেই। সহায় সম্বল নেয়া
এপেইং আকফুরুং ওপেইং আকফুরুং বনসেকরিয়া গাঙ পাতিয়া থায়া বারো কুরাং নির্মূল
অইতারা! এ পোকবুলরতাও দশা এহান। আকদিন এপেইং আমার বিষ্ণুপ্রিয়ার ‘শ্রী’ হানল
গাঙগর পাতেছিল থাং আজিতে ও ফামে উশক জঙ্গলহান বারো ইক্ষামে ইক্ষামে দুব্ গাছর

জঙ্গল নিকুলেছে। কালস্য কুটিলা গতিঃ। সহসা কাদার পংখা আকজারিভঃ ‘কু-কু’ বোলিয়া
 মাকু আগয় রহে রহে লয়ইতেগা ‘কেচুর কেচুর’ বোলিয়া উৎকট নারগল বিজয়হান দিল।
 বারো ঔরে মাতেছিলু ঠুনিংশা ঔহান বনহানায় ভাঁগানি অকরল সেকরে থায়া থায়া। কারকা
 ঠুনিংশা ভাঁগেরতা বনহানয়? এ পোকবুলর থলে থলে বিষ্ণুপ্রিয়ার সমাজ পরেছিল। দিক্
 বিজয়ী দঙ্গ অজার গর এ পোকবুলে আছিল। আজিতে বিষ্ণুপ্রিয়ার শূন্যতার গজে ঘোর
 জঙ্গলহানে গর পাতেছে। ঔ শূন্যতার ঠুনিংশাহান আজিপেয়াও আছে। দিক্ বিজয়ী দঙ্গ
 অজার বিরহল’ পোকবুলর টেঙারাগয় হাদি হাদিৎ কাদের, বনর দ্যৌজেলাগয় রাতি অইলে
 আহির পানি বেলেইরী, ঠুনিংশা ভাঁগিরী। খাল করতে খাল করতে হাক্ হানাদে চেয়া হমা
 আহান দিলু অজাণুরু দঙ্গর উদ্দেশ্যে। তেরা আগয় চেয়া আছে মরে। এলা আহান অকরলু,
 হকগয়ও হাদি হাদি থেৎকরের—

(১)

কুরাং থাইলে অজা দঙ্গ
 বিষ্ণুপ্রিয়ার আঠৈপাগ।
 তর দেশহানর কিহান রঙ্গ
 জিফুৎ জিয়েই দেছি ভঙ্গ।

(২)

তোর কীর্তিতে তরে জিঙে
 আছে অমর ত্রিভুবনে,
 তথাপি তর জনম ভূমে
 ঠইমামি নেই কি পাপহানে॥

(৩)

(যেবাকা) হিমালয়র চূড়ার সাদে
 উবা অছিলে কোয়েৎ বাঁধে,
 (ঔবাকা) নংসার মুঙে কুং হিয়ালগয়
 মরাণিরকা উবা অইতয়॥

(৪)

মণিপুরহান জঁয় করিয়া
 বুললে মটী তাখনে পেয়া-
 জয়ফিরালল আল’ এইলে
 ইক্ষিক গরগৎ এ পোক বুলে॥

(৫)

ব্রজখামর গাছবিরূকে
না ধরের ফুল হিনে দুঃখে,
তমাল জারি এরেদিয়া
বনলতায় আছে কেলয়া ॥

(৬)

রঙ্গভূমি বৃন্দাবনে
রতিযুদ্ধ নেই তি বিহনে ;
খামইল শ্যামর বংশীধ্বনি,
কুম্ভালি যমুনার পানি ॥

(৭)

ললিতা বিশাখা আদি
আরতা কুরাং বৃন্দা দূতী;
কুরাং থাইলা শুকসারী,
তি বিহনে শূন্য পুরী।

(৮)

বসন্তহান আরতা নাইল
না রহের আর কালা কোকিল,
কুরাং থায়া দেহর এ দশা,
তি বিহনে হাবি মিছা ॥

(৯)

জ্যোতিক, আয়লে মহাকীৰ্ত্তন,
বিমুগ্ধপ্রিয়ার গেইক জাগরণ,
এলাদিয়ানে আয় কৃষ্ণরঙ্গ,
রস পিয়ক মর মনঃভৃঙ্গ ॥

এলাহান দিয়া ঔরে হাক হানর নিশ্চল তেরা ঔগরে হমা আহান দিলু, করযোড়
অয়া। পেইরাক করে অমাবস্যার আঁধারহানে অট্টহাস্য অকরল দুরেইর বনসপা ঔহানাৎ। লগে
লগে চারিবারা নিক্করুয়া, ইঙাল ঙাল করিয়া হাকহানান্ত অপরূপ তেরা আগ পৃথিবী ইমার
উরহানাৎ পরিল। কক্ষচ্যুত তেরা এগয় মাটিত কতোহান গড়াগড়ি দিয়া নিস্তেজ অয়া পানির
কাঁটাগ অইল।

□

ফাগু; জুন, ১৯৬১ ইংরেজি

জগৎমোহন সিংহ রচনাসংগ্রহ ॥ ১১২

শয়নে

বিষ্ণুপ্রিয়ার গাঙে গাঙে ধ্বনি উঠিল, বিষ্ণুপ্রিয়া ! তুমি উঠ হেজীমরণ না দিয়' তুমার দাবী তুমি কাড়েলই । গরে দোয়ারে শৌসুমারায় এলা দিতারা—

“সুপকরৌ ডিল না
অই মিচ্চাং মাম্মা
চেতই অয়া চান্না
অ গাভুরা পুরীজেলৈই মৌ ।

বাঁধেয়া লেঙ্কাটা
চুম করো মুংপিঠি
থকথকেয়া হাক্‌মটি
সালইনে হুংহুঙেয়া বৌ ।

ছুনুকরো টেঙারা
আছাড়েই বনউরা
জাৎজতেয়া যতো বেরা
কাপতে থাই, নিকরুয়া দ্যৌ ।

অর্জুনর জিপুং আমি
মারুপগ চক্রপাণি
নেই ডর নেই আঞ্চিলনি
অ আতাংপা ভারতভূমর শৌ ।

জাগরণর লয়হাবি নুংসী সুরর কনক চন্দন লেপিয়া চিত্তাশীল কবির হৃদিগন্তঃ
আহের দিনর পরিপূর্ণতার জ্যোতিহানিল নিকুলিয়া তরে, মরে, হাবিহানরে পথগ দেহাদেছিল ।
শৌসুমারার আশাহাবি পূর্ণ অনির দিন নিয়াম বাকী নেই । শৌর সর্দারগয় শৌরে মইবঙর

ধ্বনিল মাতের—“ইতাওগাছি, উদাকগাছি, হুনো, আমার ঠারল তেল্লাম লেইরিক তামকরাণি
অকরতাঙাই...” কথার পারেংহানি না সুওইতে শৌহাবিয়ে আনন্দর সমুদ্রহানর ডাঙর দিঘল
চৌর গজে গারিগি ভাঙুয়েয়া বারো এলাদেনা অকরলা—

“অজ্জুর্নর জিপুং আমি

মারুপগ চক্রপাণি

নেই ডর নেই আঞ্চিলনি...”

“পদ্ম” অজায় মইলক গিথানকরে ফুঙ্কার কাদাহানাং ডাহিয়া নুঙেই নুংসি য়ারির
হাদিৎ আমার ঠারল লেইরিক তামকরাণির শুভদিন আহান আহিল, এহানর তাৎপর্যহান ও
হোভা করে বুঝা দিল। খাম্মিরা হজ্জকর ধুমার বলুনী নিকালেয়া কতোহান পিছে ‘পদ্ম’ অজায়
আজিতে হারৌহানে হেজীহান লনার লগে লগে “শয়নে পদ্মনাভঞ্চ” মন্ত্ৰ এহান হোভাকরে
সলকরিয়া শয্যাগত অইল। নিজর নাংহান সলকরিয়া ঘুমযিলে দৌদুকে না শকইতারা পাউরি
নিংকরিয়া পদ্ম অজার মইলক কালিন্দ্রী গিদেইয়ে “শয়নে কালিন্দ্রী” বোলিয়া তিনফুরুং
সলকরিয়া শয্যাগতা অইলী। পদ্ম অজায়। আহিগ খেৎকরিয়া চেয়া আকফুরুং মূরগ তুলিয়া
বারো হেজীহানাত্ নিমজ্জিত অইল।

□

ফাগু; অক্টোবর, ১৯৬১ ইংরেজি

মিছল

ঠইমামি চয়ইলে ডাহিয়া ভরাদেনারকা আমার জাতে মেইপারল করেকুরা অজারেল আছি। হোভা তিথি-ফেল চেয়া ঠইগ লালক বোলিয়া মরে যারগা বৈষ্টবগর খেতৌ বাদদেকুরা জ্ঞানীজন হাজারে বিজারে আগ দুগ আছি। মৃত্যুদশা, ফারাদশা এতান্তঃপুরী জিংতা করানিরকা তীরার গাছে, তিনজুরা পথগত উছিল শিলকরেকুরা গুণী মানুর দর্শনও পেয়ার। জবর আট নোয়ারাপেয়া আক্ঠাক্ খুলেইল ডাট্ঠা করেকুরা কবিরাজ থংমেইল বিছারলে গাঙ কি পরগণা লেহে নিচ্চকে আগ দুগও পানা যাকরের। আকফুরুং তুমার দলানইপুরতাও ঠইমামি কোনো কারণ আহানাত চয়ছিল। হেক উমকরিয়া চেইলে জরাজীর্ণ দেহা এগত মিছল আগ সূনাছে বোলিয়াও অজারেলে দরিয়াপ করানি অকরলা। কিন্তু এবাকার সমস্যাহান মিছলর যারী মিয়াম। ঔ যারী পিছে দিং। সমস্যাহান অইলতাই ধাবদিয়া নিকুলেছে মিছল এগরে ডাহিয়া গারিগত ভরানি এহান। মোর নাতিয়ক পত্ররাজয় মাতল— “বুড়াবা, ভাংগা ইঞ্জিনগত থৌ দিয়া কিতা করতে; মিছল দুগ তিনগ সু নাইলৌ বুড়াবারতা কিত্তাও ক্ষতি নেই। আমি জোয়ান এতারতাহে মিছলর কাম।”

মি মনে মনে খালকরলু— ঔসাদে মিছল থাইলইছতে তিও বাবা কেজাগিরিরে কেজা আহানাত বেলা পারলেঅইছ।

হু! কেজাগিরিয়ে মস্ত্র জানে। কিহান জানে বোললে ডুমর ঠার কতহান ঠারেয়া লয়ইতেগা মাতের—

“এই সত্যে লড়িব, মহাদেবের জটা ছিড়িয়া ভূমিতে পড়িব।”

এসাদে কেজাগিরিরে মেকুরর লৌ আহানল বেলা পারেছিলতা তুমার দলানইপু আকখুলাগয়। থাং, আজি মিছল আগ নেয়নিয়ৈ মোর দেহাএগ মিয়ৌ সুওনি না করের। কেছরগাঙর কিঞ্চঙে মিছল ডাহানি জানে বোলিয়া খ্যাতি অছে বোলিয়া হুনিয়া তারাং গেলুগা। মিছল সু-নেই মানু এগরে দেহিয়ায় কিঞ্চং গিরকর রমকাটা বারী দিল। কাদাত বহুয়েয়া মিছলর মঙ্গলাচরণ আহান অরেয়া কিঞ্চং গিরকে প্রবল ফু আহান দিয়া মাতল— “হাম্ম! ছুঃ ছুঃ! সিদাবা গুরুগী যাথাংনে।” ভাবরসে হারপেইলুতাই এগ মিছল উমকরেরতা। দেহগত আছি মিছল এগিয়ে মিকুঁপে পুলয়া মোরে বেজানি অকরলা— “দেখলে দলানইপু, তোমার বিষ্ণুপ্রিয়া এতায় আদিম যুগেস্তঃ মস্ত্র আহান না লেংকরেছি এহান। ঔতার গজে, বিষ্ণুপ্রিয়া ঠারল মস্ত্র হংকরানিয়ে দৌ হাবি তুষ্ট নায়া বরঞ্চ সওইতায়। ধমকহান দিয়া মাতলু— “হেই লওয়েইগি ঔসাদে দৌ আমারতা না লাগের।” □

৮ম য়ারীহান

[শিক্ষিত অয়লাকোপুরী যে জাতর গিরিগিথানীয়ে জাতর মায়া, ইমাঠার ; জাতর বস্ত্রফিজেং এরে দিয়া কিছুৎ কিমাকার আকেইগী অলইতার, ঔ জাতর দুরন্ত স্বভাবহান জাগরণর এলায় না যারগা। এগ হাবিগ দেখিয়া প্রাভঃস্মরণীয় শ্রীদলানইপুর দুঃখর জিআগত ডহিয়া কোরাং অন্তর্দান অ গেলগা— বিছারেয়া না পাছু এবাকা পেয়াও । তার ফারাচিরা করপেখ ঔহানাত্ত্ব দ্বি আক কথা তলে দিঙ]

রাখোয়াল রাস দুহান। আহান খাইর গাঙ বেরাবাকে আরাক আহান অছেতাই বিষ্ণুপ্রিয়া গাঙ খুনৌত্; কাদা কাদি গাঙ দ্বিয়হান। হেক্ কৃষ্ণয় ননীমাখন ব্রজগোপীর ঘরে ঘরে চরকরিয়া টুপীমাকুম ভাগেদিয়া মালকর ডরে তমাল জাড়র আগাগত ক্বায়া উপবিষ্ট অছে সময়হান। মালক নন্দরাণীয়ে যোগত করে অন্তঃবস্ত্র যৌনায়া সারী পিথিয়া আতহানি গজেদে টিংদিল। অকরলী— খাই নন্দরানীয়ে স্নেহাপ্লুত হেইচার সুরগল। হাঁই হাঁই বাচাচন, ল্লামো ল্লামো— গাচের চুরা হইটে ল্লামো। আঃ! দুগ্ঢের চিচু; মায়ের চুচু খায়া যাও। টুমি গাচের মাঝে পেকৈ পত্র খায়া কেমনি রহিবাই— ল্লামো ল্লামো।

এবেদে খুনৌর বিষ্ণুপ্রিয়া নন্দরাণীয়ে হেক্ ‘স’ গল খুমিৎ ক্বায়া অকরলী ‘লাম লাম বাসাধন, লাম লাম— গাঁচের চুরা হইতে লাম—

নাম বাসা নীলমণি

মায়ের পরাণ যাদুমণি।”

এলা এহানাত পড়লীগা তুপ ঔহানাত, মাণ্ডেপগর চারি ফালু ফুকইলা।

এ নন্দরাণী দ্বিয়গির বৈশিষ্ট হান কিহান বোললে দ্বিয়গিয়ে মিয়াংঠার টটরেয়া অন্ততঃ বাঙ্গালী শ্রোতা ঔতার খইতৌ ফুকরে পারতায়। পরর ঠারে তাঙইতেগা এসাদে লাঞ্ছনা পানা এহানাত্ত্ব নিজর ঠারল সাহসল অন্তরগ ফুকরানিয়ে না জিঙে? জিঙে এহান ভৌপেয়া আমার খাই ভেইবুনিয়ে তানুর ঠারহানরে মণিপূরী ঠারহান বোলিয়া পথে ঘাটে, রেডিওত্ বারো সরকারর ঘরে কীর্ কীর্ ঠেলা আনতারা। পেল নায়া এবাকাতে আমার নাছা এতারে তানু ‘মৈতেই জগৈ’ বোলিয়া মহাপ্রলয় আহান দিল্লীত কলিকাতাত অকরেছি। মণিপুর্ মৈতেইয়ে আমারে ‘মিয়াং’ বোলেছি। হায় হায়— হে বিষ্ণুপ্রিয়া নন্দরাণী! তোর জাঙে ধরিয়া মাতুরী আমার বিষ্ণুপ্রিয়ারতা শুভবুদ্ধি, শুভদিন নাহিতয়তা? তোর গোকুলর শৌ ঔগ আমার জাত এহানাত আকফুরুং করে লামিয়া পাঞ্চজন্য রহাদেকেনে ইমা!

□

ফাগু; জুন, ১৯৬২ ইংরেজি

জগৎমোহন সিংহ রচনাসংগ্রহ II ১১৬

বাইচান

আজি ‘বিষ্ণুপ্রিয়া’ পত্রিকার দ্বিবসরী ব্যাস আসনহানাত বয়া সত্যদ্রষ্টা দলানইপুৰে
কিহান মাতের ছানানিরকা সমাজর ফালু চারিয়হান খৌরাংল বাসেয়া আসি ছনলু। বুড়াকালর
গোধুলী লগ্নগত বয়া শক্তি নেই গারি এগল কিহানউ ইকরতু! এতাপারা সমাজ এহানাত তিন
পাতার পত্রিকা এ চিলার দুর্দশা এগ হাবিগ খালকরলুকো পুরি কাস্থিকালাকল দাতগি কেড়
কেড় কামারেইং বুলৌরি, কিন্তুমান আসন্না দাতগিয়ৌ বুড়াকালর জরা-জীর্ণ দেহ এগরে গণ্যতা
নাকরিয়া বেলাদিয়া ববেইর গরগ ফওইলাগা। এবাকা গোবাটে গিয়া মইষর পারাত লিশিংহান
দিয়া আহিলেউ কানা অইতইহান নাগে। নিজর সাজেৎ বেভারর দোষে জাত এহানায় মূর
তুলিয়া মানুর তুলো মামা অনি নুৱারলা জ্বালা এহানায় সেক্কাহান লেহে দ্যৌ হমা দিয়া কাঁদে
কাঁদে এলা দেউরি—

জরম নাইল তর উরে ইমা

আজি পেয়াউ মণি আগ,

সেবার ব্রত লয়া কুংগই

ঙালকরতই তর আধার গরগ।

“আজিকালি ‘বাইচান’ আমার বিষ্ণুপ্রিয়া ‘লেঙ্গিস’ এহানল ‘ফাইটিং’ করানি থক
নেই। বিষয় এহানর ‘সাজেকশন’ আহান লইংগা বোলিয়া মি ‘বাইচান’ মহেন্দ্রবাবুৱাং সালইলু।
পাত্রাকান্দি ‘ইসটিশনে’ লামতেউ ‘বাইচান’ বুজন ঔগর দেহা পেইলু। ফামে ফামে তার তুলো
বয়া বিষয় এহান হোভাকরে ‘কনসাল্ট’ করলু বার ‘সাজেকশন’ আহানউ চেইলু। লয়ইতেগা
কুৱাং ‘সাজেকশন’ দিতো, মোরে দশগর মুঙে কুলাঙ্গারগ বোলিয়া দিল ‘ইনসাল্ট’ এহান
‘বাইচান’ মূরগ তুপইল পাৱা। মহেন্দ্রবাবুয়ে ইচ্ছিল ‘হিট্টি’ জানেতা, আমিতে নাজানি? চেইতে,
চেইতে মিয়ৌ মোর ‘হিট্টি’ ঔহান নিকালতৌথাং তা কুংবেদে ‘ডিপিট’ অয়া ‘বাইচান’ মেইথঙে
সুনুকালি ঘষব।

বারে বারে ‘বাইচান’ বোলিয়া গুজুরের এগ কুংগথাং চেইতেতে মাকারা মাষ্টর ঔগ
অসেহান থকসে। উদীয়মান পাটাদার মাকারারে আংকরলু, মাষ্টর বাইচানর গরতে কুৱাংথাঙে?
“হি বুড়া, এংরাজীর ‘এসপার্ট’ নাইলে ‘বাইচান’র অর্থ হার নাপেইতেই”। মাকারা মাষ্টরে
এহান মাতিয়া বেলেয়া গেলগা।

মি অশিক্ষিতগই কিহানউ মাতু! শিক্ষিতর জয়। শিক্ষিতর জয়!! শিক্ষিতর জয়!!!

□

বিষ্ণুপ্রিয়া; ১৯৫৮ ইংরেজি

বেয়াপার সভা ১

এবাকা কাম্যবনে হোমেইলুহা। হাশ্তে কৃষ্ণগোপাল! আঠৈপা শিষ্যগ বোলিয়া সময়াসময় পারিচেৎ কথা থাথাইলেও মি তরাং গুপ্ত না থউরি তাহে। মাতে যাউরিগা প্রসঙ্গ এহানাত্ আজি পারিচেৎ কথা আকচুটি মাতানি মনেইলু— ছনে যাগা।

বেয়াপার দাপায় সমাজসেবা করিক বোলিয়া লেপইতে আমার মুনীদাপায় টটরিলতা কিস্তাও নেই। বরঞ্চ তানোর পিঠিত থায়া সমাজর কামে, তানোরে খৌতাল দেনায় হোভা। দশগয় মাততারা, বেয়াপা হজাক নাইলে সমাজ হজাক নার; ছন্দা মুনীদাপায় বয়া সভাসমিতি করিয়ার বুললেই নার। আমার মুনী-জেলেই দ্বিয়দাপায় যেদিন চমজোড় অয়া কাম করে যিতায়গা, ঔদিনহে আমার সমাজ এহানর গতি আহান অইতয়তা। দেশ মাটি বুলে বুলে মোরতাও এসাদে খিয়াল আহান উদয় অসে। আজি তরাং এহান ফুকারেইং করে।

আমার জাতে নারীজাগরণ বুলতে আকফুর ইমাইন্দল দাপা আহান নিকুলেসিলা। দ্বিকুড়ি নৌ বছর আগেকার য়ারিহান। য়েবাকার কথা, উবাকা অন্য জাতর ইমাইন্দলে আঁধারে থায়া উছনী তুকেইলা সময়হান। আমার ইমাইন্দলতে চিরকাল এহান নিজর ইজ্জৎল স্বাধীন অয়া ঙালয়া পালয়া আসি জাত আহান। তা আর' আমার সমাজে আমার ইমাইন্দল কমতা নাগয়। এবাকাতে মাতলু নারীজাগরণ বিষয় এহানর পক্ষে নিকুলেসিলা বুললু ইমাইন্দল দাপা উহানর পৈলাকার নিংপা মেঠেলহান অসিলতাই ফিজেৎ সাজেলর সংস্কার বার মুষ্টিভাণ্ডার মেঠেলহানর ওজনহান য়ে কতিহান ঘোরতর অসে, আমার দশ বেয়াপায় পাং হার না পাসি। কালা মেয়েকগ না দেহেসি বোলিয়ায় য়ে তানোরতা এসাদে হালৎহান অসে এহান হাবিএ নাইলেও ইমে পাঁচ দশগয় চুম বোলিয়া স্বীকার পাসি। এবাকাতে মূলাধার কারণ এহানর অর্থাৎ কালা মেয়েকগ দেহুয়ানির ঠৌরাং আগে না করিয়া কিয়াকা নিকুললা দাপা এহানে আরাফ মেঠেল আহান ধরলা, হারপা নোবারলু। স্থূলভাবল মি এহান মাতলেই লম নার। কিয়াকা বুললে, দশগয় দাবী করতায়, “দলান ইপু! তি তর সুশ্চ ভাবল বিচার করলেকো পুরি ছতুমকার উত্তর দেনা লাগতয়।” তথাস্তু, মি উত্তর দিতউ। হাশ্তে এবাকা নাগয়। অকরেসু য়ারিহান আগে লমকরিং।

সমাজ সেবার মেঠেলতে আহৌ আটতা। মেঠেল এতা হংকরতে হৌকরতে হোভা
 রাঙ্কুনীর কাম, মেয়েক দেহেসি হমাজি গাসির কাম। এসাদে মেয়েক দেহেকুরী শিক্ষিত বেয়াপা
 দুগ তিনগ আহান খাংচেৎ বাধিয়া নিকুললা। নিকুললাতাই সেনাচাউবী, রাধাসেনা বার
 কৃষ্ণকুমারী গাসি। এঁতা আমার ডাঙর ডাঙরীয়াতার মোরেই লোকেই, আচাম্পাতা নাগয়।
 মামবারী, কচুবারী, নালীবারী, কাটাবারী ইত্যাদি যন্ত বারীআলা গাঙমাহি ঘরগ লেহে তাঁনো
 বুললাগা, বেয়াপারে বুঝেইলাগা, লেপকরলা যে বিরাটসভার ডেকি সভা আহান বহেয়া
 পরগণার বেয়াপা হাবিএ আকদিন জয়ধ্বনি লৌকরানি। দিন ধার্য অইল, ফামহানও ধার্য
 অইল— ১৯৩৪ ইং ১৫ সেপ্টেম্বর, মামবাড়ীর মাণ্ডপগ।

নির্দিষ্ট দিনক্ষেল উহানাত আমার ইমাইন্দলে, মৌ-পুরিজেলেই হাবিহানে মাণ্ডপগ
 জল্প বুজলাহা। কিতা বুলবেহে কৃষ্ণগোপাল। অসি হোভা হান, শিক্ষাদীক্ষা নেই মি দলানচাউবায়
 কতি বর্ণানি পারিম তা? সংক্ষেপে মাতলে, বিরাটসভাহানে লাজপেইব। শাদেবাদে আকেইগি
 অঙ্গরা পারা, ফিজেৎ চেইতে নাপু, সাংলেলা, ধনগারা, রাঙা, চিতারা, কতি কিতা। উতারমা
 পুরিজেলেইর গালগি চুমাদিয়া লামসে লেইশা, থমথম করের গারিগিত নাপসে চমকির
 য়েকরা খেলমাচির আঙী— এতাহাবিয়ে মাণ্ডপগর চারিফালু ঝরক ঝরক করেরতা। বিভোলা
 লাগলু— মি কুরাঙ আহিলুতা। এহান প্রমীলা রাজ্যহান না হিমালয় টেঙারার গজে পুলসি
 গন্ধবী সভাহান?

আমার জাতর নিয়মহান— মাণ্ডপগর চারিফালুরমা কোণর বৈষ্ণব চারিগ বহিতারা;
 এতার গজে থাইতারা আরাংপা, সম্ভাষা। আজিকার সভা এহানাতও নিয়মহানর খেতক
 নাসে। কোণর বৈষ্ণবগি অসিতাই সিজা চারিগ, আরাংপা—সম্ভাষা এতা লেইমাগি। সভার
 মাপু গিথানক গ অসেতাই সেনাচাউবী গিদেই বার সম্পাদিকাগ অসেতাই রাধাসেনা গিথানক—
 রাজার জিলকগ। কৃষ্ণকুমারী গিথানকে এতাপারা সভা এহানর খবরদারিত লাগেসে। মালিনীএ
 মইবংগ রহানি ফাৎনেই পুলসি ইমাইন্দলর সমাজহানে য়েবাকা “জয় জয় রাধামাধব কি
 জয়” বোলিয়া লৌকরলা, সময় উহানাত মাণ্ডপ এগ মেউগ শুদ্ধা নিকরানি অকরল। মাধবীএ
 হামনিয়মগ ধরিয়া পর্দার গজে আচুল হান দিল। মাণ্ডপগর শৌর হাদিরমা খৌহিজেয়া বহেসুথাং
 মোরে হাংটাকুরা আকগও নেই। বুকএগ চং চং চং ফালদেরতা, আকয়া বুক গত আতর
 তারাহান জাতেয়া বাট্টি বাট্টি নিংস্বা কারুরি সময়হান। ইমাইন্দলর সভারমা মি বার্তন না পাসু
 হায়হান, তথাপি মোর বেদে মিল্লেং আহান বেলানি থক। মুনীদাপার সভারমা বেয়াপা আকগও
 হোমাক, হাবিবর মিল্লেং তেইর গজে পড়ের, আদর সম্ভাষা পড়ের, মুনীহাবির মুঙে তেইরে
 বহুরানি লাগের। কিন্তুমান জেলেই দাপার সভাত, ইমেও কি চারি পাচগ জেলেইর হাদিত

মুনী আগ হোমেয়া চেই, আদর সম্ভাষাতে থাক, লমইতেগা 'জেলাফেইটা' উপাধি এহান পেয়া
আলইতে ঠিকানা নেই। আজি মোরতা দশা এহান অসে, তথাপি ফালুস্ত উঠানি নেই। মি
লেপসু আজিকার ঘোরতর মেঠেল এহান কুংপাত লমরতা চেইং।

মাধবীএ পর্দাগ আচুলিয়া এলাহান অকরল—

ইমা তর সালে আমি

অসিতা ডেই ডেই হারা।

ঘুমে গঙ অয়া

আজি দিন পেয়া

উঠানি নারলে কিয়া?

চুমতা তি থায়া

(আমি) যতন না পেয়া

ধুলিছালিত অসি পরাদরা ॥

মুঙ পটরমা

নিকুলিয়া ইমা

শাচাকে ডাহেরা পারা,

মলয়া পবনে

বুলে বুলে বনে

নিকা লাছলে কাঁদেৱা ॥

নুংসিল' আমারে

তাকরে তাকরে

হিনাদেনে ইমা সিজা।

তর উমে উমী—

অয়া মানু আমি

তর জাঙে দিক পূজা,

তর নাঙে মাতোয়ারা ॥

এলাহান ছনতে ছনতে কনাক বুজন হাবিহান কুম মারলা, কাঁদিলতাই কাঁদলা হকগয়
আকয়া মি উরেসু আচালা ঔহানল ফুক উঠিয়া মাধবীর গারগ লাকরিয়া ডম্ব পড়লুগা। রূপা
আহান তেঙ্গর আতে দিয়া আঁহিগি পুসে পুসে আলইলু। এহানর নাঙ প্রেম। বেয়াপা গুট
এহানান্ত আকগয় প্রেম না করেসি। এহানান্ত প্রমাণ অইল, মুনীএ প্রেম করানি জানি, জেলেই

দাপায় না জানি। প্রেম বস্তু আলথক পানা-নাপানি এহান হুদা কথাহান। কিন্তুমান আজিকার ইমাইন্দলর মহতী সভা এহানাত কাৎকরলু প্রেমবস্তু দ্বিয়হানাত আচালাহান আলথক পেইতউ, কিন্তুমান তাছা উহানতে নাগয়। হান্তে ডিলকরলা।

এবেদে সভানেত্রী অর্থাৎ সভার মাপুনী গিথানক শ্রীমতী সেনাচাউবী দেবী ক্ষত্রিয়ানী (ওরফে মণিপুরিণী) গিদেই উঠলী; নারগ সেংকরিয়া মাতিরী— “এফুরুং মুষ্টির বিষয় এহান”...। আমার কাটাবারীর তাম্ফানু গিথানক উগ ফুঙ্ক উঠিয়ায় ‘হেইলাংপীগাসি’ বোলিয়া দিলতা চীকারি আগ, ইমে আকচীকারিত লেলেইতারা বেয়াপাহাবি তুমীল অইলা।

মামবারীর নিঙলপাচা বহেসি কাদা উগদে চেয়া চেয়া মাতিরীহান থকসে। তাম্ফানুএ মাতে যিরীগা— “সলেসতা? গিথানক আগয় কিহান মাতিরীতা না ছনলাং, যা যা যা কররাইতাতে, উশিৎ নেইতা?” তুমীল অইলা, মাণ্ডপগর ফালুত কথা এহানি যেমন ইং গারিত হিন্দীর বিধাহান পড়িল পারা। মামবারীর গিদেইনু ডাট জেলাগ— খাংচেত্হান হেঙ্ক আটেয়া উঠলী— “কিতা বুল্লে হেই লোরেই জেলাগ”। “আচ্চা” বোলিয়া বাকী বেয়াপাও চংদিল। চারিফালুত্ত খামকরানি অকরলা। কাটাবারীএ মামবারীএ থেংনা অইলা। আজিকার প্রলয়খণ্ড এহানাত দলানচাউবায় কি তুমীল অয়া থানা পারের? ফুঙ্ক উঠিয়ায় মহেন্দ্রবাবুর হেবানীয়া এলা ঔহান অকরলু—

“এহান কিহান অইলাংতা
কিসাদে শিরাপহান পেইলাংতা।
বিষুগপ্রিয়ার হাকহান হাবি
আধার অয়া থাইল নাইয়ে।”

এলাহানর জালিমে খুরুপ দেসিলা গুটহান ইঙ্গবারী দিলা। মি মাতলু— “মাপু গিথানক! সভার কাম অকরিক। বহেদেস ইমাইন্দল! হাবির চরণে শৌ এগয় হেইচা কররি— তুমীল অয়া আজিকার ঘোরতর বিষয় এহান ছনেদিক”। ভক্তিয়ে মুক্তি। কাটাবারী বার মামবারীর বেয়াপা হাবিএ যারযির কাঙ্ক্ষিকালক উতা সেঙ্গাউরমা ইতু করলা। কুমেইহান হোভা অয়া জমেসে এ তুপিত কনাক মৌ পুরিজেলেই কতগিএ বার কোণে কোণেদে খুক খুক খুক আহিতারা। এহান দেহিয়া কোণর বৈষ্টপগী খানি রেং রেং চেয়া কেজানি অকরলা। আগয়তে থা নোরারিয়া মাতে বেললী, “হেই হমললকুরীগাসি! মুনীহা”। বাকী কিহান বুলতয় উহান হারপেয়া ‘গম নেই, গম নেই’ বোলিয়া হাবিহানে খামকরলা। ওঁ শান্তি! ওঁ শান্তি!! ওঁ শান্তি!!!

□

দলান ইপূর করপেখ; ২০০৯ ইংরেজি

বেয়াপার সভা ২

কৃষ্ণগোপাল ! মামবারী বনাম কাটাবারীর খাংচেৎ-আটা খণ্ড পরলেই এহান বণেইলু নাইকো, কিন্তু আঁহিগল না দেখলে নয়ন সার্থক নাইব। কাটাবারীর তাম্বানু বার মামবারীর গিদেইনু দ্বিয় বেয়াপায় কৌলিল সাল পাতিয়া আহিয়ে মুহিয়ে কায়দায়-কানোনে সভারমা উঠলা টেংঠা ঔহান নিংশিং অইলে এবাকাও খইতু ফুকয়া আহৌরি। কাম্যবনে হোমাসিলু ঔবাকা গোবালিনী দুগয় দিলা কৌলি ঔহান চেয়া অকস্মাৎ পুণ্যল্লোকা তাম্বানু - গিদেইনুরে নিংশিং অয়া দিলু আহানি এহান উপায় নেই। হুকানা ফামর মানু এতার সাদ-মিল্লেং দ্বিয়তাও হুকানা। চেইলা খা ঔহান কিতা বুলতু, কাম্যবনরমা জেলেইর আতে নেই বেইজ্জৎ অউরি। যেতাও অক, আমার বেয়াপা এতারে থাকাৎ না দিয়া নোরারুরি। সাদবাদ যেসাদে কঙালা, আঁহির মিল্লেঙও ঔসাদে মনোহরা। জয়' জয়'— তানোরে পেলকরে হমা দেউরি।

সভার মাপুনী গিথানকে বার অকরলী— “হাস্তে ইচেগাসি! আমার জাত এহান লেইরা জাতহান। মুনীএ আলর কটাগ ধরিয়া খেতীহান করলা, বারোণগত ধান কত মণ বুজেইলা, কীর্তন-সেঙ্কানাম-দিবস করলা, বেয়াপায় রাস করলা। ধানগির গজে বারহান দিয়া এতাহাবি কর্মকাশা লমকরতে বারোণগ উদালা অইল, খেইলতা নেয়ইল, চারা লেপনা অইল। আমার মুনী দাপারতা বেপার - সিংপালেদে মন নেই। ঘরগ লেহে লেইরা দৌগয় ফুঙ্কহান কাড়লয়া থসে। হাস্তে ইচেগাসি! নিক্কা চারাহান লেহে মাটির টুপী আগত তিনমুষ্টি করে খেইকরিয়া থইক, চেইবাং, হাপ্তা আহানাত কতিগি চউল জমতয়তা! এসাদে করে মাহা - আহানরমা জমতয় চউল ঔতা বেছিক, কতি পয়সা আতে আহেরতা চাদিক”। মি এগ হারৌহানে আকয়া লৌ আহান দিলু— ভালো! ভালো!!

হঠাৎ নালীবারীর বেয়াপা আগয়— “আমার জেলেইর কথাত মুনী না যওদিয়ো” বোলিয়া দিল খস্তাহান যেমন আন্তিগর কঙালা কর্ণরমা অঙ্কুশর বিধাহান পড়িল পারা! শৌসুমারা বহেসি ঔতায় মোরে চেইলা, মউ-পুরিজেলেইএও মিল্লেঙ করলা। আকগয় প্রতিবাদ আহান না করলা এহানাত মি লাজ পেইলু, মনে মনে মাতলু— বেয়াপার জাত এহান জবর স্বার্থপর।

না গুজুরলু। হজম করলু। “হোবা অইল, ঘরে ঘরে মুষ্টিভিক্ষা থইতাঙাই” বোলিয়া ইমাইন্দল হাবিহানে য়াকরলা। সভানেত্রী গিথানকে মাতল— “য়াকরেদিলাং বুললেতে জয়ধ্বনি আহান দিক”। মাতানি ফাৎ নেই, হাবিহানে লৌদিলা— “জয় জয় রাধা মাধব কি জয়”! এহানর অর্থহান— প্রস্তাবহান পাশ অইল। ইকরা ইকরি নেই কোণর বৈষ্ণবীগিরে দেখরিতা, খুটাগিত ভায়া শ শ ঘুমজিয়া আসি। আমার মুনীদাপার সভাতও চেইস কৃষ্ণগোপাল। মাণ্ডপর কিংবা ঘরর খুটি বার বেড় বিসারেয়া বহিতারা ভাবক জাত আহান আসিতাহে। মর্মহান অসেতাই, সুযোগহান পানাই ঘুম টিপানী। বেয়াপার সভাতও ইমে হৌ আকহান। সুতরাং কোণর বৈষ্ণবীগির ঘুম টিপানী এহান মাজনীয়।

এবাকার টটরেইল বিষয়হান অসেতাই ফিজেৎ-সাজেলর সংস্কার। কৃষ্ণকুমারী গিথানকে হাবিরাং থাংনাকার মেঠেল এহানরকা খবরদারি দিয়া বেলল। মি দিব্যচক্ষুল দেখলু, কুমেইহানতে এবাকা জমতয়গ। ফুতিফালি আঁটেয়া বহিলু। মাধবীএ হারমুণিয়ামগত আচুল আহান দিল। এলাহান কুংহান বুললে—

“কার কাজে কাঁদউরিতা

আকগয়ও হার নাপেইলা

হোভার কাজে মাততে গাতে

আরাক আহান নিংকইলা”।

(গীতিস্বামী)

ধন্যহে মাধবী! সাদে হোবাতাই, নারগয় নুংসিতাই, উপমা নেই। মূল কথা— আগেকার নীতি এবাকা না চলতয়, কালর কথাত মানতী অনা লাগতয়। কৃষ্ণকুমারী গিথানকে মেঠেল এহান ব্যাখ্যা দেনা অকরল। মাতল, “চেই চেই ইচে ইমা-ইন্দলগাসি। আমি মউ অনার লগে লগে কাকালীর আঙালুরীহানরে য়াহানাত অর্থাৎ বুকগত কাকরিয়ার এহান চুম নেই; কিয়াকা বুললে— কুকীর সাজেল তামকরিয়া আমি তলফুতি (মেখলা) অর্থাৎ কাঁকালির ফুতিহান, য়াহানাত তুলেসিতা। পুরাণা নিয়ম এহান বেলেয়া আমারতা বার কাঁকালিরমা ফুতি পিধানি লাগতয়”। কৃষ্ণকুমারী গিথানকে লগে লগে য়াহানাত কাঁকালিরমা ফুতিহান লামেয়া আঁটেইল, মাতল— “চেইতা কতি হোভা অইলতা”। থতাবী আগর ফুক উঠিয়া মাতল— “গিথানকতে এবাকার চাপক-উলীগ মালইলে”। চারিয়ফালু চিড়া ফারলা। কৃষ্ণকুমারী গিথানক এগ ডাঙর দিঘল মউগ, সাদে বাদে অঙ্গরাগ, পুলিশ ইলপেক্টার পঞ্চম দারোগার পঞ্চপ্রাণগ; আজি সভার মুণ্ডে লাজহানে মুরগ কীৎক নঙেইল।

যে সময়কার কথাহান, ঔবাকা ব্লাউজ বুলিল সাজেল এহান আমার সমাজে চল নাসিল। মউগ অনার লগে লগে বেয়াপায় বুকগত ফুতি কাকরলা, তুল তুল করের খুমা খুমা

বুকগ বুজেয়া লিকশয়, পদ্ম, কাঠি আকেইসুরী পিঁদলা, ঔতার গজে নানান বর্ণর পাতলা ইনাফি বা জয়পুর পিঁদলা। কৃষ্ণকুমারী গিথানকর গারীগত য়েকরা াউজ আহান আসিল, তলে বুক-আটুনী আহান।

অমাটিক হোভা অসে অবয়ব এহানরে হাস্য করলা এহান দেহিয়া দলানচাউবায় সুস্থির অয়া থানা পারব? সভার মাপুনী সেনাচাউবী গিথানকতে ইমাইন্দল এতার খস্তালাকতা দেহিয়া তাড়াং-তাড়াং অয়া চেয়া থাইলী। ফুক উঠিয়া মাতলু— “ইচে গিথানক গাসি! খানি তাপথা অয়া কথাহানি হুনেদেই; গিথানক এগ আচামপীগ নাগয়; তেই লমকরক, পিছে হোভা-হোভানেই হাবিতাও আলোচনার পারেঙে আদ্বানেও লমইতয়”। দ্যৌএ দিয়া মাণ্ডপগ তুমীল অইলা। “গিথানক! লমকরে বেলা” বোলিয়া মি হাতেক বহিলু। কৃষ্ণকুমারী গিথানক মুরগ তুলল, ফালুঙ পুরীজেলা আগরে ডাহিয়া ফালুর বুকগত উবা করল, নিজে আত লাগেয়া আঙুলীল ফেরিয়া ফেরিয়া জেলাশৌ ঔগর লেইশাগাছিরে মুরগর দিঘল চুলর তুল তীল করে দিয়া জুরাগ বাধদে দিল, মাতল— “চেইকতা ইচেগাসি! আমিতে আৰ্য রকতর মানু, কুকীর সাদানে আমার জেলেই শৌ এতায় কিয়াকা লেইশা জপা থইতইতা”? কাটাবারীর তাম্বানু গিথানক ঔতা থানা নোবারিয়া ইরাইরি উঠলী, কথার চহা কারগ বিধেয়া মাতল— “গিথানক অইলগা এর, হুনা নি নাকরল। আমার পুরীজেলেই এতার ডকডকা যৌবনহান তিংতাম মাংকরেদিক বোলিয়া তুমি সভা ডাহেসতা? চেইতা চেই পুরীজেলা এগরে করেদিল টেংঠা এহান, ইমে সেক্ষাৎ মউগ অলইলীতা চেই; তোমার এতাত থানা নাকরল” বোলিয়াই ‘উঠ উঠ’ বোলিয়া গেলীগা। লগে লগে ‘পছন্দ নাইল’ বোলিয়া চারিয় ফালুর ইমাইন্দল বেয়াপা হাবি উঠিয়া গেলাগা। হো জল্ম। থতাবীগাসির যে থতা— ডরেয়া না টটরলু।

ইমাইন্দলর সমাজ সেবার আশা-ঈশা হাবি এসাদে যুগে যুগে ধূলিসাৎ অসে। সমাজর সেবা এহান হেলার কামহান নাগয়। ওঁ শান্তি! ওঁ শান্তি।। ওঁ শান্তি।।

□

দলান ইপুর করপেখ; ২০০৯ ইংরেজি

দলান ইপুৰ ৰৱপেখ ২

নাঙর মহিমা

দশ মূলুকেরাং অধম এগ'য় দলানইপু বোলিয়া জারী অসু। মোরে দলানইপুও বুল বা দলানচাউবাও বুল, মি খুশী। ইমাবাবায় ষষ্ঠীর দিন উহানাত থলকরেসি নাঙহানতে কিন্তু দলানচাউবা।

আজি আক কুড়ি বছর সুরইলতা মি পুনরপি দর্শন দিউরিতা। মি কিন্তুমান ঋতুর পাহিয়াগ নাগয়। কিয়াকা ইচুমান মি দশগরাংত দূরেই অয়া আসিলু, সময় আহক, মি বাগেইতউ। দলানইপু কুরাঙ মাঙইলতা, মরিলতা না থাইলতা, এ চিন্তাল হাবিহান গৈগ' অসি, এহান মি জনে-পানে মাত্তে হনেসু।

আকতায় হুতুমেও আহির পানী বেলেয়া আংকরতারা, “দলানইপু। তি কুরাং মাঙইলেতা? আয় নে বার আমার হাদিত। তর সালে হদি ডহের।” আরাক আকতায় মুঙে অইলে “অঃ দলানইপু। তি জিংতা অয়া থাক।” পিঠি অইলে “বুড়া এগ মাঙইল উবেদে মরকক”।

আকতা উতার মনহানি দোরা, বার আরাক আকতা বুললু উতারতা মনহানি দোরা নেই। দোরা অসি উতা কাদুরাগাসি বার দোরানেই উতা অসিতাই কটাক্সগাসি। কিসাদে কারণ থায়া মি কাদুরাগাসিরাংত জিঙে কটাক্সগাসিরে জবর নিংকরুরি, উহান মি জানু বার ভগবানে জানে। আকফুরতে কটাক্সরে লেম্পালে বহেয়া নাছলু নাছা উতা এক চন্দ্রজিনিএ হারপেইতয়— কিসাদে চাংখল নাছা জাতহান। এহান দেহিয়া কাদুরাগাসিএ নিরাল সুপকরলা, সভারমা বহেসিলা উতায় হঠাতরমা ‘বাক আট’ বোলিয়া এংরেজিল কিহান আহান মাতিয়া নিকুলে গেলাগা। যানার সময়ত মাতলা— “বুড়া এগ বেংতাল বারী দেসেগ”। মিতে কিন্তুমান নাছতে থাইলু, পেটে পেটে মাতলু, “যাকাগা”।

এলা দিলু—

উদুল বাদুলগ’

কটা মটা শৌগ’।

পাঙ মানুরে কেতুকা,
 খল্কা খল্কা আঁহকা।
 মনগ' খেয়া আঠি,
 বেলাদিস্ পিঠি
 লককরিয়া আঠি খেয়া
 (তানু) পেটগি বুজাকা,
 পাঙ মানুরেই কেতুকা।

কটা আকগয় পাঙ মানু হাবিরে খইতু চেয়া কেতুকারতা, এহান কাদুরা গাসিএ হার নাপাসি আর হে বেলেয়া গেলাগাতা নাই। কিন্তুমান যানার তুপ উহানাত 'বাক আট' বুললা এহান ছনিয়া মোরতা ইমাঠারর তত্ত্ব চুটি আগ হারপেইলু। বাক শব্দ এগ আমার মাজীরা শব্দগ, অর্থ হানতে মাজীর কুলর (মেকুরা লকেইর) শিরোমণিগ। দ্বিফুর মাতলে শব্দ এগ লমনিয়ে 'দুখ না সুখ' বুলানি থকর— এহান আমার শাস্ত্রর য়ারিহান। বার এংরেজিল 'আট' বুললা লগে লগে কাদুরাগাসিএ ইমে আটিয়া গেলাগা উহান দেহিয়া মি মনে মনে খালকরলু, এংরেজির তুল আমার ঠার এহানর মিল আসে। এহান মাতলু বোলিয়া মোরে হাস্য করেকুরাও থা থাইবা। ফেদুল বোলিয়া লু লাকাং অয়া চলের শৌ আগয় মোরে পেয়া মাতেরতা—

“ইপু! মিয়াঙর ঠারর তুল বার তেইছর ঠারর তুল আমার ঠার এহান মিল থার হান্তে মি ফাফর আগত পড়েসু।”

তারে মাতলু— “তি আকখুলাগয় কিয়াকাও বাবা ফাফরে পড়তেইতা? আমারেও সরিক কর।”

অর্থাৎ ফেদুলে পেটে পেটে আমার ঠার এহানর জাতপাত বিছারানিত গৈ আগ লাগাসে, মিও লাগেসু পারা। থাক, যেগয় যেহান মনার উহান মনাক। দলান চাউবায় রসিকগ হান্তে রসরাজর ঘরে নিজর ঠার এহানরে সংস্কৃতর দাগ পাটাত নামজারী করেসে, এহান রসরাজ শ্রীকৃষ্ণ হারপেয়া থসে, ফেদুলর নাকগ টিপেইলে এবাকাও মালক গিথানক উগর বুনী নিকুলতয়। তা দেহেসে পথি উগ বেলাইনর পথিগ। কুল নেয়া তা বেকুল অসেগ।

আসল কথাত বুলন দিঙ। ফেদুলর তুল কটাঙ্কগাসির পেটে পেটে চুক্তি আসে। এ বেকুল এগ'রে কটাঙ্কগাসিএ বুঝাদেনা থক যে, আমার ঠার এহানাত মেইতেই, কুকী, নাগা কয় ঠার যে হাচুরেয়া একদম কলিজাগ পেয়া হমেয়া আসে, এহানেই প্রমাণ করেদের আমার ঠার এহান মেইতেইর ঈল আগেও কুকী-নাগার হাচুরণ খেয়া আহেসেগ; অতঃ আমার ঠার এহান মণিপুরর প্রাচীন ঠারহান, আখ্যর তুল অনাখ্যর কন্মাকমির মধুর ঠারহান। দলানচাউবারতা সেংগা উগত তাঙখা হলকরানির সাধন নেই, কারতারও এনিতেনিত নেই।

ফেদুলে আমারে মিয়াঙ বার তেইছর জাতপাতে বেলেইং বোলিয়া লাগেসে এহানরে কটাক্সগাসিএ খামকরানিতে নেই, বরঞ্চ খৌতাল দেনাত লাগেসি। “কটাক্স বাবা! তিতে বুজনগও অইলে পারা থাং, এরে নিকুলেসে ফেদেদ্রা এগরে সমালেইনে খানি” মি মাতুরিতা।

হাংতে আদং কথাহান অকরিং। কাদুরা গাসিরাং মি ভবিষ্যৎ বাণী করেসিলু; “কটাক্স এগয় ইসালপাগ, মেলেটারী বার সাইকেলে ঢাকুলা জোড়াহান অয়া তানু যেবাকা খলপাংপা, দোহার পালাল অধিবাস-সেঙ্কানাম অকরতায়, উবাকা তুমার জাত এহানে ‘ভালো ভালো’ বুলতায়; তুমি বার ফালুত হেকজল বেলেয়া ‘কিহান অইলাংতা’ বোলিয়া লেবাডেঙার কান্দন দিতারাই। কিয়া বুললে, কটাক্সগাসির কুমেই নিয়ামপারা নুঙেই, কিঙ্কমান তুমার কুমেই সুপও নুঙেই নেই। উহানল সমাজসেবী বুললে কটাক্সগাসি, তুমি নাগয়। না হারপেয়া মোরে কাদুরাগাসিয়ে ‘স্বাক আট’ বোলিয়া গালেয়া গেলাগাতা। যাকাগা, তানো কনাকশৌ।

বিধি-ব্রহ্মায় মনুষ্য বুলিল জীব এতার চরিত এতা অস্থক্ক লেংকরেসে। হুতুমে মাততে, কাদুরাগাসিরে কাদাত না চেপকরেসিলু বোলিয়া তানো মোরকা ঠইয়ৌপা হিন পাসি, বার কটাক্সগাসিরে লেম্পালে থয়া নাছেসিলু বোলিয়া তানো পেটে পেটে মি মরলু সাং বোলিয়া হারউ অসি। বিধিরে সাব্বাস বুলানি থক।

কাল মেয়েকগ হোভায় না চিনলেও চতুর দলানচাউবায় বিধাতারাংত যেহানি তামকরেসিল, উহানর মাপাল’ মি আজিকার করপেখ তুপ এহান অকরিং। কৃষ্ণগোপাল! তি ছন। আত্মতত্ত্বর যারি এতা।

মি এগ’ মি নাগয়, তিও তি নাগয়। তিও ভালো, মিও ভালো তরতা মোরতা অইলাং অইসতে আজি আমি হায়গি অয়া থা পারলাং অইস। চাহরে, ইমায় বাবায় মোর নাঙ এহান শাস্ত্র হংকরিয়া দলানচাউবা থসি ঠিক, কিঙ্কমান জনম এহান হোভার ভাত আকচারা বা হোভার ঘর আগত থানা মোর কপালে নেয়সে; কিয়াকা বুললে লেইরায় আকয়া। থাউরিতাও টেপ আগরমা। হুতুমেতে মোর নাঙহান টেপচাউবা অনা থক। দলানচাউবা বোলিয়া মোর নাঙহান মুলুকজারী আসে এহান চুম নাসে।

বিধির কারবার বিধিএ হারপাসে। যষ্টীর দিন এহান জবর লুরসে দিনহান। এ দিন এহানাত হুয়া করে করে থসি নাঙ এতা অপরূপ, যেমন আতুর শৌগর নাঙ সব্যসাচী, কানকালুরা শৌগর নাঙ কণসিং, কালাদরা শৌগর নাঙ গৌরাচান, কানা শৌগর নাঙ পদ্মলোচন ইতি এতা হাবি। হাংতে, নগদানগদি যারি আহান মনহানাত পড়িল।

নাঙর আদি আখরগ ‘চ’ কিংবা দ’ অইলে ঔ নাঙর মানু উগ মীনরাশিগ বা মাছর রাশিগ। এহান বাবনর কথাহান নাগয়, স্বয়ং পাঞ্জির কথাহান। হাংতে বিধির কলম এগ কতিও বেংতাল অসেতা চাহ, দলানচাউবায় মীনরাশিগ অয়াও আজিপেয়া মাছ আকচারা জোগাড়

করে নুৱাৰে। বড়িগ আচুললু বুললে ছিকহানৰ লগে উঠেৰতাই হয় কাগঠু আগ নাহয় কাকাড়া আগ; পহৰী আগ হিচিয়াও চাউরি হাং, লমইতেগা নিকুলতাই ঙাপুৰুং (কুচিয়া) বার কেরবং বাইস আহান। মাছৰ মাংটা আগও নেই। হান্তে মীনরাশিগ অয়া কিহান কানা অইলু ? চন্দ্রজিনিএ খইতুগ ফুককৰে আহিৰী। তেইও মীনরাশিগ। রাজযোটকে তেইএ মিএ বিয়া অসিতা। হান্তে মোৰ কপালে নেইলেও তেইৰ কপালেতে মাছ পেইম নাই। না সুপও নেই। এতা এতায় মি মোৰে সন্দয় কৰুৱিতা আর তিও তৰে সন্দয় কৰতেই। ‘সমাজ কাহাকে বলে’ (সমাজ কাৰে মাত্তাৱাতা) এ প্রশ্ন এহানৰ উত্তৰ দেনাৰ ক্ষমতা সুপ নেইতায় আজি সমাজসেবী বোলিয়া অন্ততঃ আমাৰ জাত এহানাতে নাংজাৰী অসি। যে আপাংপাগয় নিজৰ স্বার্থ চুটি আগ না থয়া সমাজৰকা হাবিতা এৱেদেসে উগ আমাৰ জাত এহানাত ঠকগ বার যে লৌশিংপাগয় নিজৰ স্বার্থৰকা জনম এহান সমাজৰে নিলামে বেছে বেছে খাসে, উগ অসেতাই আমাৰাং সজ্জনগ, সমাজসেবীগ। এসাদে সমাজসেবী সজ্জনৰ য়াৰি খানি অকরিং। হান্তে কৃষ্ণগোপাল ! মি চন্দ্রজিনিৰে ডরপাউরি। কিয়াকা বুললে— মোৰ চন্দ্রজিনি গিথানক এগও মোৰ সাদানে কালা মেয়েকগ না দেহিৰীগ নাই। লেইরিক তামকরলে জেলেই শৌ এতা চরিত শাক্তি অইতাৱা বোলিয়া মালক-বাপকে লেইরিক না তামককৰেইলা কালহান। অতঃ, চন্দ্রজিনিএ মোৰ করপেখৰ টুমা এতা সামান্য চের টুমা বোলিয়া হরনীল ছরে ছরে ফুংকাত বেলাদিৰী, মাংকল ঘর তারু তারু করে থইৰী। এহান আপদহান। তেইৰ কৃপাল ইকরুৱি করপেখৰ টুমা এতা জিংতা অয়া থাইলেতে অবশ্য তি য়াৰি এহানি পেইতেই। ওঁ শান্তি ! ওঁ শান্তি ! ওঁ শান্তি !!!

□

রচনা কাল; ১০-১১-১৯৮২ ইংরেজি; হরিদ্বার

নুৱা এলা ১লা বৰ্ষ ৩য় সংখ্যা, নভেম্বৰ-ডিসেম্বৰ; ১১ ডিসেম্বৰ, ১৯৮২

প্রকৃত সমাজসেবী

সুপ্ক' নিজর গাঠির ধন না টুম্‌করিয়া সমাজ সেবার নাঙে পরর ধন টিংকরের জন উগয় প্রকৃত সমাজসেবীগ, অন্ততঃ আমার সমাজরমা। এসাদে কামে-কাজে যেগই ঐজা ধন তেংকরের, ঔগ পারা আপাং মানু নেই। কিয়া বুন্নে, তারাং ঐজা ধন লমইল, সমাজসেবাও লমইল। তুলনা দিং কৃষ্ণগোপাল। বিলগ হুকেলে বগাও নেই, দশীগ হুকেলে জিগও নেই। কিন্তুমান কটাক্ষগাসির বিলগ না হুকের, দশীগও না হুকের। তা আর সমাজসেবা বুলিল অমূল্য ধন এহান তানুর ভাগুরগত মেল কার। তাই মাতে পারতারা “সমাজসেবা, অমর রহেঁ।” চিপা থউ চুলে বার গারিত মর্দিয়া তানু তারু তারু অয়া আটতারা; দরকার অইলে ডাক নাসা বার হবার ফুতিফালি পিথিয়া গীতা, ভাগবত আকেইহান আহাতুলীত চিপেয়া তানু পণ্ডিত, অজা, লেরিকউলি অল' পারতারা অর্থাৎ যেমন সমাজসেবী, হেমন ধর্মচেলপা। কিন্তুমান ঔরে কাঁদুরাগাসি? হেঃ, সমাজরকা হাবিতা টিংকরতেগা তানু মাকারা দেসি। তানুর ‘উপুরমা থউ নেই, বিলরমাও পানী নেই’। তানু সমাজসেবীও অনা নুয়ারলা, ধর্মচেলপাও অনা নুয়ারলা। আরাকও হুন কৃষ্ণগোপাল। শিং মানুএ নিজর ধনল, বেপার না করতারা; করের ঔগ পাঙগ। মূলহারা অনির অর্থহানতে লেইরা অনি। কটাক্ষগাসি ঔ অর্থে ‘আলী’ বেপারী বার কাঁদুরাগাসী ‘নকলী’ বেপারী। আলী বেপারীএ মানু চিনি, মানুর মন চিনি, টেক্ক বাজেয়া সেংসেং, পীতারেই, হীরা, মণি, মুক্তা চিনি; তানু বেপারী বুদ্ধির চৌখাল লেনদেনরকা কি কি নিজ্জিফাল্লা ধরানি থকর ঔতাও চিনি। কটাক্ষগাসিরে বানাপাউরিতা এ কারণে। তানু চালু মানু। কিয়াকা? ইহকালে ইহসংসারে অর্থাৎ আজিকার মূলুক বার আজিকার দিনকালে তানু অকসি, বপসি, পালসি। কাঁদুরাগাসিরে কিন্তুমান মোরতা পছন্ নার। হুন্ডুমেও মাতুরি— জনমহান কাঁদিয়া থানার আগেতে মরেহে যেইগা; নাইল সমাজসেবা, নাইল সংসারসেবা, নাইল বেপার-সিংপাল। কাঁদুরা! খুতি থিয়ইলে তরকা সমাজ এহানে মিচি আঁহিলও না চেইতায়, চেইতায়তাই ঔরে কটাক্ষগাসিরে। হারপেইলে?

এবাকাতে “নুয়া এলা”র মুখ্য কর্মধারী গিরকে মোরে “সমাজসেবী দলানচাউবা” বোলিয়া ইকরেদেসে। পৈলা পৈলা হারৌহানে থাইল পথ না পেইলু। তাপ্থা অইলু হান্তে হারপেইলু যে, মোরাংতে সমাজসেবী পদবী এহান পাক্চা নার। কারণহান যে মানুর গজে বন্দুকগ থয়া না গাদেসু, মানুর ইনা আগাছ না টিংকরেসু, মানুর সেঙ্গাউল মোর বেপার-সিংপাল না করেসু। তা আর’ মি সমাজসেবী নাঙধারী অনা নুয়ারউরি। ধানর কহন আগও নেয়নিয়ে মোর ঘরর উদুর ঔতা সলহানে কাকালি পেয়া তুলে নুয়ারতারা। তা আর কাদুরাগাসির পদফাম ঔহান পানাই মোরতা যোগ্যতাহান। যেদিন কটাক্সগাসির দাপা এহানে আন্দুরগাঙ মহাসভার গজে যেনাম করলা, ঔদিনেও মি ঝাকারানির তাপ আহানল আনাংশা খাউরিতা। মহাসভার চিন্তাশীল গিরিগিথানীএ পরিষদ্ মাহি হংকরিয়া কামর সিজিল করলা। আমার মহাসভারমা নিখিল বিষ্ণুপ্রিয়া মণিপুরী সাহিত্য পরিষদ, ভাষা পরিষদ, সংস্কৃতি পরিষদ, অর্থনৈতিক পরিষদ আদি এতা হঙইল। মি হারউ অইলু। চন্দ্রজিনিরে মাতলু— হনুরীগ! এফুরতে বিরাটসভায় ডাঙর কাম আহান করলা।

চন্দ্রজিনিয়ে মাতিরী— বিরাটসভায় হরু কাম কুনদিনতে করেসিল? মহাসভাহান অইবতাই লয়ারমা আকুড়ি মণ চউল উঠিল, লপুকে ডাঙর মাণ্ডপ উঠিল, ডাইল-খৈ মণ মণ আহিল, হৌপাত, লাতল ঢেরী ঢেরী পুলইল, গাঙ পরগণা, দেশ-বিদেশ ফুকইলা। আমার বাই-বেয়াপা হাবিহানও বিরাটসভা চেইক্গা বোলিয়া গুরার কক্ পানার কক্ বুজেয়া ধাবদিলাং। বান্দারা খেইলাং, ‘রাধামাধব কি জয়’ লৌদিলাং। পুলইতারা দেশবিদেশর ডাঙর ডাঙরীয়া ঔতারে দেহানিয়ে জনমকার পাপ হাবি ককরপারা।

চন্দ্রজিনি অবলা জেলাগ। যেহান হারপেইরী, ইমে ঔহানহে হারপেইরী। যেমন— নাকর সিধা। সিধা আঙুলিত ঘি নাও উঠের। তা আর তেইরে মাতলু— “আকদাপায় মাততারা গিথানক! মহাসভায় কিতা করেসে থাং? বান্দারা খানার সভাহান না।” চন্দ্রজিনিএ হুনিয়া মাতল— “বান্দারার অভাব আমার জাতে নেয়সে, বলেদিস।” মিতে কিস্তমান জানু, কটাক্সগাসির দাপা এহানে ইমাঠার নাঙহান হুনানিয়ে বেংতাল বারী দিতারা। আন্দুরগাঙ মহাসভারমা ভাষার দাবী নিকুলানির লগে লগে তানু মাতলা, “ঠারল কিহান কানা? আমারতা জরুর অসেতা অর্থনৈতিক উন্নতি।” ফেদুলে লগেবগে চের মচা আহানল নিকুলিল তার দাপার কতগিল। ফেদুলদাপায় (মানুএ না হনকা) মাততারা— “আমার ঠার এহান মণিপুররহান নাগয়, ব্যাকরণে এহান মাতের।” কটাক্সদাপায় মাততারা “বেশ বেশ! ফেদুল বাবা! ঠার এহানতে দাপা আহানে নেম্পালে বয়া মিয়াঙমাটিস্ত আনেসিতা না।” হম্মা করতে করতে ফেদুলদাপায় মাতলা— “চেই চেই, আমার ঠার এহানাত আমার শব্দ এতা যৎসামান্য, মেইতেই শব্দতে আরাকও কম; বপসেতাই বাঙ্গালা, অসমীয়া, উড়িয়া, হিন্দী,

নেপালী, আরবী, ফার্সি এতা।” অর্থাৎ ইঙ্গিতল ঔতারে বুঝাদের আমার ঠারর জড়গ মিয়াঙমাটিত থাইল, তা আর ‘বিষ্ণুপ্রিয়া মণিপুরী’ নাঙ এহান আমার ঠারর নাঙহান অনা থক নেই, ‘বিষ্ণুপ্রিয়া’ বুলানিই থক। ফেদুলগাসিএ আরাক আহানও লেপকরলা যে— ‘ইমা’ শব্দ এগ আমি মেইতেইরাংত আনেসিগ বার ‘ঠার’ শব্দ এগ বাঙ্গালান্ত, অতঃএব মাতৃভাষা শব্দ এগর বিকল্প শব্দ আগ বোলিয়া ‘ইমাঠার’ শব্দ এগ মাতেকুরায় মাতারা ঔহান উনি জবর ভুলহান। ফেদুলবাবা! তর এ বেংতাল ব্যাকরণ এহানে পানী না ধরতয়, তর হীরামূল তি থাক, সমাজর এবেদে না বুলনদিস্। হৈঃ, জরমদেসে মালক গরে ডাহানিরকা আমি খাই রাং তাঙইলাংগাকো? বার ইমার উরে থায়া হিকেসি শব্দজপা ঔতারে কিহান মাতাং বোলিয়া ইল’ মিয়াঙরাং চাংচা অইলাংগাকো?

ছতুমে মাত্তে— কটাক্ষদাপায় ফেদুলদাপায় নৌ আকগত্ যমসি মানু। তানু সংসারর হেরৌ দাপারে বুঝানি মনাসিতাই আমার মানু এতা মূলেই মণিপুরর মানু নাগয়; আমি আগে মণিপুর্বে রিফুজি অয়া হোমাসিলাং, এবাকা মণিপুর্বে ‘রিফুজি অয়া’ নিকুল্লাংতা। মেইতেই এতায় ‘মণিপুরী’ অনা মনেয়া দিনকাল দাবীল, ঝাঙা উচ করলা মাপা এহানাত তানুর ভাড়াটিয়া হাজিয়া কটাক্ষ-ফেদুল দাপা দ্বিয়হান নিকুল্লাতা— এহানে আরুপী যারিহান। হান্তে কৃষ্ণগোপাল! বিদুতিতুর যারি আহান দেনার আগে মোর লেংকরা কবিতা আহান হু—

কটাক্ষরে মাতের ফেদুল

দাদা কটাই বাবু!

মোর ইকরা করপেখে

জাতহান অসি কাবু।

ফেদুলরে মাতের কটায়

ফেদাই, জড়গ’ মার;

দলাদলিরতা অভাব নেই

জনম করিক্ সার।

ওঁ শান্তি! ওঁ শান্তি!! ওঁ শান্তি!!! □

বিদুতিতু

কৃষ্ণগোপাল ! বিদুতিতুরে মিয়াঙে ‘হতুম’ বুলতারা । জুম্ মারিয়া মেইথং ভরী করিয়া
থার মানুগরে হতুম বোলিয়া তানু লাংকরতারা । মাকুরমা বিদুতিতু এতা ডাঙর জাত, নিশাচর
পাহিয়ার তানু জবর মানী অসি, রাঙা ফিটাও পাসি উনি । হাইহান নেই ভৌ নেই । বিচারে
হোভা বোলিয়া বিদুতিতুরে নিশাচর পাহিয়ার জজগ বরেসি পৌ এহানও অতীতে রাষ্ট্র অসিল ।
ভূত ভবিষ্যৎ হাবি বিদুতিতুর আঁহির মুঙে ডাক্‌ডাক্‌ করেও বুলতারা । এসাদে বিদুতিতু
মহাশয় সত্যযুগে হিরণ্যকশিপুৰ, ত্রেতাযুগে রাবণর, দ্বাপরে ধৃতরাষ্ট্রর কন্মুঙর টুন্নীগত বহেসিল
উনি; কলিযুগেতে লেহাজুহা নেই । অমঙ্গলর সান্তা পানাই বিদুতিতুএ মানুর ঘরর টুন্নী আগে
তালকরতারা, রক্তারা— বিদুতিতু ! কারে খেইতু !! বিদুতিতুনীএ নুংসি পেয়া কুণ্ডলগী
লরেয়া মুক্শি দিৰী । বিদুতিতুগয় বহের লেম ঔহান যেমন কান্হাৰ ঝাপুনিহান পাৰা । নিশাচর
পাহিয়ার লেম্পারাজাগ বিদুতিতু এগ ।

দিনপহরর পাহিয়ায় বেলিহান থাইতে মাচাক বিসারেয়া রাতিহান লামলে জমহানরমা
আলইতারা, শৌরে আকবেদে চেপকরিয়া মরিল ভাতর ঘুমে পড়তারা । মাপা উহানাত হিনেয়া
উরপারেয়া বিদুতিতু মহাশয় নামসা কনক পিধিয়া নিরামিষ (?) ভোজনরকা নিকুলের । সেপ্
চেয়া হাতে হাতে নিঃশব্দে পাহিয়ার জমে দিঘল নখগি টিংদের, টিংহান লেহে পাহিয়াশৌ
আকেইগ আসুলিয়া কুং কুং গিলিয়া আচমন করের । বৈষ্টপর মহিমা এহান । তারে পাহিয়ার
সমাজে উদাসী ধর্মচেলপাগ বোলিয়া লেপ্করেসি । বিদুতিতুর ওজনহান কতি হারপা । এসাদে
মহৎ গুরুজন আগর বিরুদ্ধে শৌর মালক বাপকে ইমে হজম করানি ছাড়া করিলতা কিত্তাও
নেই । কিয়া বুললে বিচার দিল ফামর নিদানহান এইলে নালিশ দিয়া কানা নেই, রক্ষকে ভক্ষক
হানতে । কিন্তুমান কৃষ্ণগোপাল ! বিচার, বিচার, বিচার আগ্নানেও গজেত্ত লামতয়; কৃষ্ণকৃপা
জিন্দাবাদ । পৌ পেইলেই দিনপহরর পাহিয়ার বাঘে, ফেকুনায পহরেকাণা উদাসী বাবা এগর
ডাঙি আহান করতারা বোলিয়াও মি দেহেসু— “পরিজ্ঞাণায় সাধুনাং বিনাশায় চ দুষ্কৃতাম্ ।
ধর্মসংস্থাপনার্থায় সত্ত্বামি যুগে যুগে ॥”

কুরুক্ষেত্ররমা দ্রোণাচার্য্য গুরুর পুতক অশ্বখামা গিরকে বিদুতিতুরাং শিক্ষা পাসিল
অর্থাৎ সামক মাতলে, অশ্বখামা গিরক এগ বিদুতিতুর পডুবাগ । এ য়ারি এহান এবাকারকা হাং
দিব্ । আগে বুবেইং, কটাক্ষ-ফেদুল দ্বিয়দাপায় আকতারে আকতায় থাকাং দিতে দিতে আমার

সমাজৰ মুণ্ডে দ্যৌ অলইলা, কাদুৱাগাসিৰ দাপায় ঔসাদে কৌশল নাজানি বোলিয়া শূদ্ৰাংতও ফাঙ নাসি। সমাজৰ নীৰেট আপাঙে খালকৰলা “কটাক্ষ-ফেদুল গাসি এতা সমাজৰ রতন আকেইগি, নামছা-কনক কাঠি ইনাফি-ভূষণ উদাসী দাপা এতা প্রকৃত ধৰ্মচেলপাতা, সমাজৰ সবক বার বিবেকী বিচাৰী মানু; বার ঔরে কাঁদুৱা দাপা ঔহানে কানা নায়া রতন ঔতাকে হিংসা করতারা তা।” “হুতুমেহে, পরহিংসাল, জাত এহান নষ্ট অসিতারগাই। কটাক্ষয় ফেদুলে গজে কাসি এহান কাঁদুৱায় দেহে নারিয়া পেরিপেচালগ মাহি নিকালারতা”— এহান আমার ভাবক বৈষ্ণব চাৰি সম্প্রদায়ৰ মতহান। সমাজৰ কাছাড়ী আদালতৰ হালহান এসাদে অইতে কাঁদুৱাৰ নালিশহান কোংগয় হনব? কাঁদুৱায় ইমে পাহিয়াশৌৰ মালক বাপকর সাদে দুঃখ হাবি হজম করক। নিশাচর পাহিয়াৰ বিদুতিতুগি কটাক্ষ বার ফেদুল দ্বিয়গি।

মানুৱাংত পৌ পেইলুতা, ঠাৱৰ গজে লোকলেহা অকরেসি। আমার মানুএ আমার ঠাৱ ‘বিষ্ণুপ্রিয়া মণিপুরী’ বোলিয়া লোকলেহাৰ মিশিঙে হোমানিৰ কা জবরদস্ত হম্মাত লাগেসি। মাপাহান চেয়া চেয়া কটাক্ষয় নিশাকালৰ সভা আহান ডাহেসিল। লেপইল, আমার ঠাৱহান ‘বিষ্ণুপ্রিয়া’ নাগয় ‘বিষ্ণুপুৰিয়া’ বোলিয়া মিশিঙে হোমানি। আৱাকও লেপইল, মিতেই বেই বুনীএ মিশিং এহানাত ‘মণিপুরী’ বোলিয়া হোমেইতে সহায় করানি; পণ্ডিত ডাহিয়া লেইৱিকও নিকালানি। পণ্ডিতগও হুতুমে করে নিকুলিল। করপেখে নিকুলিল, আৰ্য্য দ্বিজাত। যথা, নোৱা আৰ্য্য বার পুৱানা আৰ্য্য; পুৱানা আৰ্য্য উতায় খাঁটি মণিপুরী, ঠাৱহানও খাঁটি মণিপুরী; খাঁটি আৰ্য্যৰ খাঁটি ঠাৱহান মিতেই ঠাৱহান; অতএব মিতেই ঠাৱহানেই মণিপুরী ঠাৱহান, গন্ধৰ্বৰ ঠাৱহান। নোৱা আৰ্য্য উতাৱ ঠাৱহান ‘বিষ্ণুপ্রিয়া’ ঠাৱহান; এহান চন্দ্ৰবংশীয় বৈয়াক্ষ গোত্ৰীয় তথা ধনপতি ৰাজকুমাৰে তাঁৱ ৬৪গ ঘৱৰ দোলেইল নেম্পালে ভৱেয়া ৰাসামাটিত্ত আনেসিল ঠাৱহান। আনকা আপত্তি নেই, কিন্তুমান পুৱানা আৰ্য্যৰ ঠাৱহানে কুকীচীনৰ ঠাৱহান, বার এৱে দ্বিহৌ-আধা বছৰ আগে হোমাসি নোৱা আৰ্য্যৰ ঠাৱহানে ভাৰতীয় আৰ্য্য ঠাৱহান অইলতা কিসাদে? যুক্তিৰ দৱকাৰ নেয়সে। কটাক্ষ দাপায় সৱকাৱৰ ঘৱে যৌকৱেদিলা, মিতেইৰ ঠাৱহানে ‘মণিপুরী’ ঠাৱহান, বিষ্ণুপ্ৰিয়াৰ ঠাৱহানে ‘বিষ্ণুপ্ৰিয়া’। হনলুতা খৌ খৌ ৰূপা এতা ফৰ্দে ফৰ্দে কটাক্ষদাপাৰ আতে পড়িলহা। কটাক্ষ মহাৰাজা মহাপুৰুষ উপাধিল লেইত্ৰেং অইল্ উনি। চাৰিবেদে গিৱকৰ ফিৱালহান ফানি অকৱল। আমার মানুএ যতও হম্মা কৱলা, আকতাও পানী না ধৱল। হান্তে পুৱানা আৰ্য্যয় মণিপুরী অৰ্থাৎ মিতেই ভাৰী বার নোৱা আৰ্য্যয় বিষ্ণুপ্ৰিয়া বার বিষ্ণুপুৰিয়া অলইলা, এ বিপৰ্য্যয় এহান কিহান? মিতেই এতা আৰ্য্য? নাগয়, তানু নিজেই মাস্তাৱা, তানু মঙ্গোলিয়া। অতঃ কটাক্ষ দাপাৰ পণ্ডিত গিৱক উগ পণ্ডিতগ নাগয়। কটাক্ষয় ফাফৱে পড়িল। কিন্তুমান ধন্য কটাক্ষগিৱক? তৱ পৱাদে ১৯৬১ সনৰ লোকলেহাৱমা পুৱানা আৰ্য্যৰ (?) মিতেই ঠাৱ উহান মণিপুরী বোলিয়া ছাপাত্ কাইল, বিষ্ণুপ্ৰিয়া গিৱিগিথানীৰ অৰ্থাৎ নোৱা আৰ্য্যৰ

ঠারহানে বিষ্ণুপ্রিয়া / বিষ্ণুপুরিয়া বোলিয়া কাইল। কাদুরাগাসির মহাসভায় সুপ্ অক্‌নেই বারী দিয়া আপ্পানে সরকারর ঘরে ধাবদাধাবদি অকরেসি বোলিয়া হিমালয়র কুরুঙে থায়া ছনলু। আন্দুরগাঙর মহাসভাত্ ‘আমারতা ঠার না লাগের, অর্থনৈতিক উন্নতি লাগের’ বোলিয়া নমদে নমদে চীকারি দিলা, কটাক্ষ দাপায় ঠারেদে বুলনদিলা কারণ হান কিহান? মূলে কটাক্ষ গাসিরতা জাতর সেবাও না লাগের, অর্থনৈতিক উন্নতিও না লাগের; লাগেরতাই দলাদলি করানি, জাতহান মুং করানি। তা আর কটাক্ষগাসি এতা আমার জাত এহানর প্রকৃত সমাজসেবী। কাদুরাগাসিএ ইশাল চেমাইজলা করিয়া মাণ্ডপে মাণ্ডপে মহাসভার বান্দারা খানা অকরলা। কটাক্ষদাপায় উঠন্তি শৌসুমারারে হিকানি অকরলা কুরাংকার মহাসভা থাং, বান্দারা খানারকা পুলইতারাতা না।

পণ্ডিতর পালাহান সিল্করলা। পুরানা পণ্ডিত না লাগের, নোরা পণ্ডিত লাগের। ছচিধরা নিকুল্লা। ছনলাংতা, লঙ্গেই বার কাটাখালর থং হানি হংকরতে সরার দৌএ উনি শৌ আকেইগ মাগেসি। জাতর মা জুলুমগ পড়িল— যার যির শৌ যারাক কর। ১৯৬৩ সালহান। কটাক্ষ, সাইকেল, বাজাই, মাকারা, পিচিকা, পেলাই এতা হাবিহানে তিলয়া পত্রিকা আহান নিকাল্লা। আৰ্য্যর জিপুতে নিকাল্লা পত্রিকাহানও ‘বিচার্য’ বোলিয়া নাঙ পালইল। উহানাত্ বাজাই পণ্ডিতে ইকরেসে— মাটুয়াআলা বার পাচখাল গাঙ দ্বিয়হান কটাক্ষ গাসির ডাঙর ঘাটিগি; মাটুয়াআলাত চন্দ্রবংশীয় ক্ষত্রিয় মণিপুরী মুখ্য মুখ্য উগিএ ১ম অধিবেশন করেসি, মাতেসি আৰ্য্য ক্ষত্রিয় মণিপুরীর ঠারহান মণিপুরী অর্থাৎ মিতেই ঠারহান, বিষ্ণুপ্রিয়া ঠার এহান উদারী ঠারহান (১৯৫৭ ইং)। ২০।৪। ১৯৫৮ ইং তারিখে পাচখালে দাপা এহান বার বহিলা, মাতলা ২য় অধিবেশনহান নিশাচর সভা এহানাত আলী বার বাজাই দ্বিয় পণ্ডিতে কটাক্ষরে মাতলা “আমার পুরাণ এহানল’ বাবা যুদ্ধ অকর, কিন্তুমান আমার সেংগাউগি বুজাদেনা লাগতয়।” সেংগাউগি বুজিল। যুদ্ধ জয়ও অইল। বিষ্ণুপ্রিয়ায় মণিপুরী নাইলা। ১৯৬৩ ইংরেজীতে ‘বিচার্য’ পত্রিকারমা বাজাই পণ্ডিতে ইকরল— “মণিপুরী অর্থাৎ মিতেই ঠারহান টটরব ঔগয় মণিপুরীগ, বিষ্ণুপ্রিয়া ঠারহান টটরর ঔগয় মণিপুরী বোলিয়া স্বীকৃতি পানা নহিতয়, নৈব নৈব চ।” নিশার যারি দিনপহরে নিজে নিজে নিকুলিল। কটাক্ষ এগ লাঙইল। দিক-বিজয়তে লমইল থাং, কটাক্ষয় নিজর মরণর কুগ নিজে হংকরল। আকবেদে মিতেই অর্থাৎ খাঁটি মণিপুরীএ (?) হারপেইলা, কটাক্ষ এগ মণিপুরীগ নাগয়, আকবেদে বাজাই বার আলী পণ্ডিতর ইতিহাস উতা খাটাক্সর পুরাণহে। উহানল কাদুরাগাসির চহা কলমর মুঙে উবা অনি সম্ভব নাইল। পালা সিল্করিক্, নোরা পণ্ডিত লাগেইক্। ছচিধরার পাল নিকুল্লা ফেদুল পণ্ডিত ধরা পড়িল। ওঁ শান্তি। ওঁ শান্তিঃ। ওঁ শান্তি!!!

□

রচনাকাল ১-১-১৯৮৩, বৃন্দাবন;

নুবা এলা ৬ষ্ঠ সংখ্যা, মে, জুন; ১১ জুন, ১৯৮৩ ইংরেজি

নিভৃত নিকুঞ্জ

পরিক্রমা লম্ নাসে। বৃন্দাবনর পথঘাট, কোণ কোঁকললেহে 'রাখে রাখে' 'জয় রাখে' ধ্বনি ছনুরি। বুলতে বুলতে নিভৃত নিকুঞ্জ ফরইলুহা। কঙ্কর মাটির গজে সাদারাংগ অয়া পড়লু। ঠইমামি আকপিত্ জন্ম করিয়া একীন মনহানল' মিও 'রাখে গোবিন্দ' বোলিয়া পেলক' হমা আহান দিলু। আঠুগি থাপারেয়া ফুক্ উঠতেই কাঁকালীহানাত কেরেক্ করল' পারা। এষেগ' অয়া কোন মতে উঠলু। মনহানে হদিগর লু ডঙরে থায়া মাতের — হে মাটির দেহাগ! অন্তিম কালহান এইলে চিতাগত ডহিয়া মাটির তুল' মিহিতেইগ' তি, নাগয়তা? দ্বিদিনকার যৌবনল' চাপল কায়া তি গাত্‌টেকা না খালকরলে; অনিত্যরে নিত্য নিংকরিয়া, বেলাদিলতারে হাদাপেয়া ইচুকাল এহান জগাতা অইলে; এবাকাতে ঠুবইলেতা হনা? না ঠুবইস্। তি তেরেংহান, মি নাটুরাগ'। তি যন্ত্রগ', মি যন্ত্রীগ'; তি ঘরগ', মি গিরিগ'; তি জিনাহান, মি জিগ'; তি ফুতিহান, মি ধোবীগ'; মি বলহান, তি বলীগ'; মি কারণহান, তি কারগ'; মি হুকুমদারীগ', তি নওকরগ'। তা আর' তি সাবধান। মি প্রভুর দর্শনহান পানা মনাসু, তিও মুংবেদে কাকেইহান বেলা। হে মাটির দেহাগ! তোর তুল' মাটি, পানী, তাপ, বৌ বার হাকহান মিশ্রিত অয়া থাসি, বার মোর তুল' বুদ্ধি বার অহং ভাবহান তিলয়া আসি। পঞ্চভূতর তুল আমি তিনগিএ লগ্ন অয়া আটগ' সুবসি। এ আটগিরে জ্ঞানীজনে অপরা প্রকৃতি বুলতারা। এতা হাবির গজে ঠইমামির ক্রিয়াকলাপল' অব্যক্ত শক্তি আহানে তেং নায়া অপরা প্রকৃতি এহানরে ধারণ করেদেসে। এগই ব্রহ্মগ, এগই জীবরমা আত্মাগ' অয়া বহেদেসেগ', তা নিংস্বা লর, নিংস্বা উমকরের বার নিংস্বা বেলার। কুপক কাণ পাতিয়া ছনলে হার পেয়ার, তা মাতেরতা — 'সোহহম'। সং শব্দগল' পরমাত্মা, অহম শব্দগল জীবর আত্মাগ' হারপানি হে। জীবর আত্মাগয় নিংস্বা লয়া (পূরকল) ইদুমদুরা জগতেস্ত হাবির প্রভু পরম ব্রহ্ম পরমাত্মারে ভিতরে ভরার, মিকুপ আহান উম্করিয়া (কুস্তকল) এরেদের, এরেদিতে অহম' বুলের (রেচকল)। অহম অর্থাৎ জীবর আত্মাগয় ব্রহ্মাণ্ড বুজিয়া থাসে পরমাত্মার তুল তিলর। জীবরকা 'সোহহম' মন্ত্র এহান জপ করিল চৌরাং না লাগের; আপ্পানেই চলে থার বোলিয়া মন্ত্র এহানর নাঙ 'অজপা মন্ত্র'। আত্মাগর

এসাদে প্রকৃতি এহানর নাঙ পরা প্রকৃতি। পরা প্রকৃতি এহান হারপেইব জন ঔগয় হারপেইলগ'। তত্ত্ব বুললে আত্মাগর তত্ত্ব এহানেই মূলহান। হাতে হে মাটির দেহাগ'। মি দলানচাউবায় বিদ্যারমা সুপও হেইনা নেয়সু জনগ' বোলিয়া অনেকগয় মোরে হেলা করতারা'। কিবা মোর চন্দ্রজিনিও মোরে খানিমানি আহান হেলা করিরা পারা। কিন্তুমান তি মোরে হেলা নাকরি; মিও তোরে হেলা না কররি। কিয়াকা বুললে, তিএ মিএ যুগল অসিগ'। তি অজপার মন্দিরগ, মি তোর মন্দিরে থায়া অজপা সল কররিগ'। তা আর আখিলপাগ' হমেয়া তি হীনপেইলে হাতে মি তোর গজে জবরদস্তি না করতউ, সংকল্প করলু।

বেলিটিকর রৈদহানে যাংক' গজে পড়িল হাতে বৃন্দাবনর কদমরুক আকজারর ছেয়ারমা মি শয়নে পড়লু। গারিগর তুল' নুঙেইনা অইলুহান হারপেয়া ব্রজর ধুলিএ মোর গজে মাঠিয়াদেনা অকরল। গারিগ' রাঙইল পারা। পরাপ্রকৃতি বুঝা পারিল বস্তুহান নাগয়। আঁহিগি জিমেয়া নিজরে নিজে হারপা পারিল তত্ত্বহান এহান। দেহতত্ত্ব বুলতে অপরা বার পরা প্রকৃতি দ্বিয়হানর কথা লেইকাল করানি লাগের। হাতে হে মাটির দেহাগ'। তর সাদ-বাত, কচু-কুমেল, মরং-মাজা, রাশি-কশি, সাজেল-গুজেল, ভঙ্গী-বাঁকা, কেথক-মাথক, ডাঙর-দিঘল, আঁহি-মুহি, কাঠি-আংঠি, কেঙ-কঙালা, বলী -পাঞ্চাল বার চালাক-চতুর এতাহাবিল তি মনোহরগ অয়া মানুর মন আচুলর। তি মোর পরম সম্ভাষার বস্তুহান। তোরেল মোর আত্মাগয় যেসাদে পরমাত্মারে নিঃস্বাহান লেহে নিত্য আরতি করে, তি নিজেও উসাদে বর্তিগ অলয়া সুগন্ধিল' ঔ পরমব্রহ্মার বেদীগর মুঙে জ্বলে জ্বলে টুম' যাগা। তি ঠুরইলে না চলতয়, সাল' সাল'। দ্বিফুটা আঁহির পানী গালেদে নীজের। মোরাং জপৰ খউগ' নেই, নামর মালাডাল নেই, নামাবলী নেই, বেশরমা কৌপীন নেই, সম্মাসর চিহ্নরেখ আগ' নেই, অন্তররমা গোপীভাব নেই, রাগানুরাগ ভক্তি নেই। হে জয় রাধে! তোর ব্রজধামে হমেইল অধিকারহান মি নাপাসু। তেব তি ক্ষমা করেদিস্ তোর অনাথ শৌ আগ' নিংকরিয়া। তি বিষ্ণুর প্রিয়াগ', মিও বিষ্ণুপ্রিয়া ইমার লেইরা আতলপা অকনেই শৌগ'। তা আর' তি মোরে দুরেই না করেদিস, কাদাহানাত এইলু, তি কাদা' না করলে দলানচাউবার উপায় নেই, সহায় সম্বল নেই। মনে মনে এসাদে খালকরিয়া এলা অকরলু, লৌ আহান হাচ্চুলে দিলু 'জয় রাধে'—

নিংকরিয়া মন গোবিন্দ চরণ

সাল' তি বৃন্দাবন।

মধুর নিকুঞ্জ নিধুবন,

মধুর কৃষ্ণ কাম্যবন,

মধুর তাল তমাল বন,

মধুর যমুনা পুলীন।।

অরাহীন চিন্তা যেতারকা কররতা
 (তানো) বিভোলা দৌল তোরে নাধেসিতা
 ঔতা হাবিরে লাগেয়া বিভোলা
 নিকুল সাঙয়া চিত্ত আকখুলা
 হাচ্চুলে লৌকর—ধন্য জনম,
 নিভৃত নিকুঞ্জ বন।।

কয়ো' কয়ো' শ্রী রাসমণ্ডলী
 লক্করিং গোপীর পদরজ ধূলী
 লেপিয়া অঙ্গে ঔ ধূলিচন্দন
 অকরিং কুঞ্জে হরিসংকীর্তন।।

নঙেই রাতিত্ রহে থাইব বাঁশী,
 নিকুলে থাইবা ব্রজগোপী গাসি;
 বিজুরী কঙ্কন খংচি নুপুরে
 রহে থাইবা কতি নুংসি নারে;
 অয়া থাইব পারিজাতর বরণ,
 লিরি লিরি সেবা মলয়া পবন।।

এসাদে এলার ভজনে কৃষ্ণগোপাল! মি মোর গারীগর কপহান পাহরলু; কেজেয়া চেইলু— আখিল্পাগর ইরিংপারিং নেয়সে। বেলীহান পিঠির হাকহানাদে বুলন দিল'। হাতে হাতে নিভৃত নিকুঞ্জর আরাং থংচিলে ফরইলুগা। চেইতে সাধুগ' পারা গিরক আগয় 'জয় রাধে' বোলিয়া মোরে থেংকরল। মাতল তা— 'বাবা! তি এবাকা আল, সেক্কাহান অয়ারগা, আরাং থংচিলহাবি গাটিল সময়হান বিত্তা অইল। মি মাতলু "রাতি এহান মি নিভৃত নিকুঞ্জরমা ঠেকানি মনাসু"।

"সাবধান, না ঠেকিস" বোলিয়া গিরক উগয় যারি আহান অকরল'। মর্মহান এহান বুললে, আকদিন রাতি এসাদে করে গিরক আগয় নিভৃত নিকুঞ্জরমা ঠেকিয়া থাইল্ আর' নঙেই নংতলে ছনেরতা— নুংসিপা বাঁশীগর রৌ বার অসংখ্য নুপুরর সেরেং সেরেং ধ্বনিহান। পৃথিবীহান ইঙাল ঙালয়া যারগা, অস্থকপা নুংসি গতে চারিবারা গঙালা নেরগা। হারৌহানে গারীগ জুরী কাইতে গিরকে লেঙৌর গজেদে আঙুলী চালেয়া ইকরেসে— বাঁশীগর রৌ বার নুপুরর ধ্বনি ছনলু'। বিয়ানে চেইতে গিরক ঔগর খলগ' দেহিয়া যাত্রিক হাবিএ হমাদিলা, মৃতাগর ফুতিফালিও ছিড়ে ছিড়ে টুমা আকেই হান লইলা। যারিহান ছনিয়া ডরেইল। কাকেইহান আঞ্চিল করলু। চেয়া নুম্পাং অইলু, সেক্কাহান নামিল লগে লগে নিকুঞ্জন্ত পাহিয়া পলেই হাবি

ফর্দিয়া নিকুলানি অকরলা, কিছিম কিছিমর বান্দর হাবি লেজগি তুলিয়া ডেঙপাল নমদিয়া জুম
জুম ধাবদানি অকরলা। চেইতে চেইতে নিভৃত নিকুঞ্জগ' তুমীলগ' অইল। আচানকহান। মনে
মনে খালকরলু— এবুজও নিভৃত নিকুঞ্জর মণিমন্দিরগত শ্রীগোবিন্দর রাসলীলা অর নিকা
নিকা; দেহানিতে থাক্, হুন্লেই আত্মাগর মুক্তিসাধন অর। কিন্তুমান মৃত্যুভয়হানে জিঙে
মনুষ্যরাং। পাহিয়া-পলেই, বান্দর-কটা, হাবিরাঙও ইমে আকহান দশা। মুক্তিসাধন এহান
কারতা মনেইল্ বস্তুহান নাগয়? জিংতা অইলে সমাজসেবা, জিংতা অইলে কৃষকসেবা।

বেলীহান থাইতে নিভৃত কুঞ্জগরমা হমেইতউ লেপকরিয়া আলইতেই ফাম আহানাত
হরিসংকীর্তন গৈগ' লাগেসে, দেখলু। দুবারমা ফুতি আহানাত ইকরেসি— 'ভারতীয় সাধুসঙ্গ
সমিতি : দ্বাদশ অধিবেশন'। সাধু তিনগ' বিভূতি ধরিয়া গারী, দাড়ি, পিচুম পেয়া ধলগারা বারী
দেসি; মুঙে জ্বির ফুংকা আহান; গাঞ্জা আক্কারী জুগত করে লাগাসি। আগয় আচুল আহান
দিয়া আরাক আগরাং— এসাদে সিন্নাসিমি করে করে তানো হারউ অসি সময়হান। মন্দিরগ
লেহে দৌর আরতির মেইপুং, ঘন্টা রহের; ঘোরগ অয়া হুন্তে হুন্তে এগির কাদাহান পেইলুহা।

বুজন সাধু আগয় মাতল— “ক্যা ভাই, প্রসাদ লেঙ্গে?”

মি আতজোড় করিয়া মাতলু— “না না, মি এতা না খাউরি।”

হুনিয়া সাধুজিগয় মাতল— “ইয় শিউজিকা প্রসাদ হ্যায়, ভজন সাধনকী আসলী দরা
হ্যায়। ভজন সাধন নহী চাহতে?”

মি আধাকাচা হিন্দীল' বুঝেয়া মাতলু— “মি ভজন সাধন না জানু, চানাও ডরাউরি।
হুনিয়া বাকী সাধু দ্বিয়গিয় আহে আহে মাতলা— “বহুং আচ্ছা, বহুং আচ্ছা।”

বুজন সাধুগয় বার অকরল— “তব্ তো আপ সচে মনুষ্য হ্যায়। শুনিয়! সচে
আদমীসে কলিযুগমে কুছ কাম নহী হোতে হ্যায়। দেখিয়ে! ইহাঁ হরিসভাকা হরিসংকীর্তন হো
রহা হ্যায়। বাহার কী দীবার পর 'ভারতীয় সাধুসঙ্গ সমিতি কে দ্বাদশ অধিবেশন কা একঁ
সাইনবোর্ড ঝুল রহা হ্যায়। ইস সমিতি কা নাম তো বহুং হি সুন্দর হ্যায়, লেকিন তামাসা কী
বাত্ ইয় হ্যায় কি ইয় সব সাধু নহী হ্যায়। পহলে ইয় সমিতি কা প্রতিষ্ঠাতা কোঈ চার আনী,
কোঈ দো আনী, কোঈ এক আনী সাধু থে। অভি যো ইস্কে সদস্য হ্যায়, উনসে কোঈ ডাকু,
কোঈ খুনী, কোঈ লম্পট, কোঈ রাজনীতিবিদ, কোঈ মুনাফাবাজ মজুতদার ভি হ্যায়। পহলে
পহলে সমাজ মে সাধুসন্ত আদি আতে থে, লেকিন জব সমঝ গয়ে, তভি ছোড়কে চলে গয়ে।
অভি ২০/৩০ সদস্য কো লেকর সভা তো বৈঠতী হ্যায়, লেকিন ইয় সব সির্ফ ধোঁকে কী টটী
হ্যায়। ইসি লিয়ে ইন্ লোগ যহাঁ কীর্তনাদিকা প্রবন্ধ হোতা হ্যায়, উসি কো ইয় লোগ অধিবেশন
বোলকর প্রচার করতে হ্যায়। ইসিকে মাধ্যম সে উরে লোগ লাখ ক্রোড়ী কামাতে হ্যায়।

সচ্ বাত্ যহী হ্যায় কী, ইস্ বৃন্দাবনমে ভারতীয় সাধুসঙ্গ সমিতি এইসা এক পবিত্র সংস্থা অতী তচ্ হ্যায়, লেকিন্ উন বদমাসো কে বজহ সে ইন্ লৌগো পর পুলিশ জুলুম চলতা রহতা হ্যায়, মামলা মোকদ্দমা ভী হোতা হ্যায়, অধিবেশন বৈঠনে পর ইস্কে উপর ইন্জাংকসন ভী দিয়া যাতা হ্যায়। সমঝে? সচ্চে আদমীয়াকে আজকাল অ্যায়েসেই বড়ী মুসীবত হোতী হ্যায়। ইস লিয়ে হম্ বোল্তে হ্যায় কী, গাজা কা দম জ্যাদা লাগায়ে, আউর দিল লগাকে সাধন ভজন করে।”

না মাগতে পেইলু উপদেশ এহান কমহান নাগয়। সাধু এগিরে জুগত্ করে হমা আহান দিয়া ‘করেঙ্গা করেঙ্গা’ বোলিয়া ইরাইরি ছুটলু। আকাচু বাকাচু হিন্দী টটরানি, উতার লগে ত্রিয়ার লিঙ্গ লেপকরানি পুরা কঠিন কাম আহান অসে। মুরগ’ বুলেইল’ পারা। যিতেগা আকখুলাগয় খইতু ফুকরিয়া আঁহিলু। পথর মানু আগ’ উবা অয়া মাতের — জয় রাধে। তুম পাগল হো গয়ে?’ লাজ পেয়া বার ছুটলু। কটাক্ষগাসির কথা নিংশিং অয়া আঁহাউরিতা। তানোর দাপা উহানও এবাকা মুলুকর মুঙে সভা পাতানি নোয়ারিয়া দিবস, শ্রাদ্ধ বার কীর্তনর ফাম বিসারেয়া ধাব্দিতার। যেপেই দিবস, উপেই তানো সাহিত্য পরিষদর সভা, যেপেই শ্রাদ্ধ উপেই সংস্কৃতি পরিষদর সভা, যেপেই কীর্তন, উপেই মহাসভার অধিবেশন বহেসে বোলিয়া কৌশলে জাগা জাগাত্ প্রচার করতার। ১৫-১৬ মণ চউল, ৪-৫ হাজার রুপা জোগাড় করানি না লাগের। হুদা ২-৩ তাও চেল’ কাদাবারার ঘর আগত্ বয়া প্রস্তাব খানি ইকরলেই যথেষ্ট। পত্রিকা বার রেডিওরমা জুগত্ করে রাষ্ট্র করানি, সরকার গিরকর আতে প্রস্তাব উতা ছাপার আখরল’ দিয়া পেঠা দেনা, এতা তানোর কামহান। ঠাররকা বা দাবী আদায় করানিরকা তানোরতা শোভাযাত্রা না লাগের, আন্দোলন না লাগের, অনশনও না লাগের। এসাদে ইকরলেই উনি দাবী আদায় অর, পারলে লেউ-বোবালল’ হোভা করে ভাত আকেইচারা খবেইলে আরতাও ইরাইরি ধাবহানল দাবী উতা আপ্পানেই টরপ্ টরপ্ পড়ের। হারপেইলু, কটাক্ষগাসিএ বৃন্দাবন ধামেত্ত কৌশল এহান মাস্তাসিতা। বৃন্দাবন পবিত্র হাংতে কটাক্ষগাসির কৌশল এহানও পবিত্রহান। ধন্য কটাক্ষদাপা, ধন্য তুমার সমাজসেবার কৌশল। ওঁ শান্তি! ওঁ শান্তি!! ওঁ শান্তি!!!

□

রচনাকাল ২০ কার্তিক, ১৯০৫ শকাব্দ

নুৰা এলা ২য় বর্ষ ৫ম, সংখ্যা, মার্চ, এপ্রিল; ১১ এপ্রিল ১৯৮৪ ইংরেজি

পরিক্রমা

কিহান মাত্তু কৃষ্ণগোপাল, তি মোর পুরানা শিষ্যগ; আজিকালি তোঁর সাদানে শিষ্য আগ হংকরানি ডেরেইলু, কিয়াকা বুললে হিকেইতউ আহান, করতয় আরাক আহান। তা আর খানি তুমীল অয়া আসিলু। দলানইপু কুরাং গেলগা, বোলিয়া তোঁরাং চিঠিগ মাহি আহেসে বুলেসত। দশর বানানুংসির কাঁঠিডাল লাগাসু মানুগয় সমাজরে পাছরে পারিমতা ? না নাগয়, কিন্তুমান হুশিয়ারে কাঁকেই বেলানি।

নিকুঞ্জ বনহানাত আলইতে আসল-নকল সাধু মাহির তুল দেহা অসিল য়ারিহান আগে দেসিলু। নকল সাধুর বহুত কাম সমাজর আঁহিত ধূলু দেনার কৌশল হিকানি, পোষাকও পরল পরল থনি, মালা-নামশা-জটা-দাঁড়ি-নামাবলী-একতারা-বিভূতির কটারা সর্বোপরি আতিয়ার বার' লেইরিক আকচপ আমৎপা পাতারতা। থানে মান, থানভেদে অভিনয়, ঠিক যেমন গারনর একটিংহান। শক্তিমান আগর মুণ্ডে 'ভৃগাদপি সুনীচেন, তরোরপি সহিসুনা' অভিনয় চলানি, আসলপা আগর মুণ্ডে 'বজ্রাদপি কঠোরাগি' অনি। এতা হিকিল মত বিদ্যা, নাজানলেতে লাইন্ এগত না হোমানিয়ে ভালা। আসলে অর্থকরী বিদ্যাহান হান্তে জবর লু বিদ্যাহান এহান।

মনে মনে পিছেকার বিয়ানে নিকুঞ্জ বনহানাত হোমেইতউগা বোলিয়া জঞ্জাল এরেদিয়া রাতিকার জিরেইলু ফামে সালইলু। পথগ বিভোলা লাগলু। দ্বিডালি পথগ। কুংবেদে কাঁকেই কারতু বুলতে তিনগ মনুষ্য পেইলু, তিনগ মুর আকপেই থয়া ফিস্ফাস্ টটরতারা। আগর মুরগত কয়েং, গারিগত চকাল পেন্ট বার কোট, জাঙে মুদাগ' ডাঙর জুতা আকজোড়; আগর মুরর চুল বনসপা পারা, পিঙ্কনে শাড়ীহান বার আরাক আগর নিরাল গুরিয়া লেইসা আকসপা, পিঠি বারাদে বেণী আগ, পিঙ্কনে মেক্সি আহান পথগ ছরতয় পারা। পাগড়ি আলা এগরে দেহিয়া মনহান হারউ অইলু। আংকরলু— সর্দারজি!

মাতানি ফাং নেই সর্দারজি এগয় 'ননসেন্স' বুলে বেলল। বাকী দ্বিয়গয় লিট্কাটেয়া আঁহানি অকরলা, মাতলা 'বুড়্চা আন্ধা হ্যায়'। শিক্ষিতয় 'ননসেন্স' বুললে হারপানি উগ' শওইল্গ। কুপ্ক' চেইতে দেখরিতা, সর্দার বুললু ঔগর গালগি যেমন কঙালা ডালিমগি, দাঁড়ি সুপ নেই; করে বেলল মিল্লং উহান জেলেয়া বিধাহান, নারগও ছরার। সন্দয় লাগিল, লাগিয়া চাউরি হান্তে কোটর আভরণহান বন্ধদেশে তুঙ্গি অসে, 'কুচযুগ-ভারং' দেখরি। 'জয় রাধে' বোলিয়া দিঘল কাঁকেই বেললু, পথগও হায় পথগ অসে। ধরমশালাগ পেয়া বাই সাঙইলু। প্রসাদ দুগ লক্করিয়া দিনহানর আনাংশা হাবি নিংশিং অইলু, খালকরলু অস্থকপাহান, মুনী-জেলেইর পরিচিন্ এতা মাঙইল্ দিন আহিল, জাত কুল হাবি কুংবেদে কিহান অইল; মনুষ্যরে চেয়া এমাটিকর ধূলু লাগানি এহানতেঃ। লেখাপড়া তামকরিয়া সমাজর গজর থাকে কহিলে এসাদে অর সাং। সমাজ জাত-কুলর আটনহান আজিকার শিক্ষিত সভ্য মানুরমা নেই হারপেইলু।

আমার কাল উহান হনার কালহান। গাঙ ঘরর উঠানেদে, পথ-ঘাটেদে আমি কনাক অইতে প্রকৃতির শৌ অয়া বুললাং, মনেইলে ফুতি তুপ আহান পিখলাং, নাইলে উদালাগ। পালাহান বাধদিয়া শৌ হাবিএ লারিকটা থাপারা থাপারা ঢাকর চলন দিলাং, চেন্চেনেয়া বারেয়া চংদিলাং, খুরূপ দিলাং। কাঁকালিত কদনী আকেই গাছ, কদনী গাছর আটন খেয়া তলর পীরেইহান টান্ খেয়া চেইল্ মত হোভা অসিল। মুনী শৌরতা এহান। বাহার দিঘল আকেইতুপ আধাকল্পি করিয়া বন্দুক হংকরলাং, কলাপাতার বুকুর হিরল' ধরা হংকরিয়া বন্দুক রহেয়া পিঠির বরুসাপা, ঘাটর পার, লপুকর আলীর আউরে আউরে দল বাধিয়া 'বলমটরি' খেললাং। আরতাতে জেলেই শৌর কথাহান। তেনা আকেইহান, নাইলে হুরু আঙালুরি আকেইচিলা পিধিয়া ঘেটি খেললা, ঘিমা খেললা, কলার পাতা হুরার করে নাল বানেয়া পাচেংল ফুতি বুনলা, আমার তুল হাকরা খেললা, পানীখেঞ্জং খেললা, রাসর এলা নাছা দিলা, আমি হাদিত হোমেয়া লারিকটা চাপাড়েয়া ঢাক বারেইলাং। মিয়ৌহান ফাইতেও জেলেইশৌবে লাজহান উপনি নারেসিলা; ও মিয়ৌল আমার তুল ধরাধরি কততা। মুনীশৌ আমি এতা ফুতি পটানির কালহান এইবতাই বুজনে ধরিয়া বাধিয়া খুন্তেই পিঁধোবেইলা কীলেইলা পেয়া। বার জেলেই শৌরতা? যাবেকনীহান পিঁধোরানিরকা তানোর গজে ইমাইন্দলর জোরজুলুমর অন্ত নেয়সিল। আহির পানী বেলেয়াই নিঙলপীএ যাবেকনী লাগেইলা। ও দিনকাল আজি নেই। লেখাপড়া বুলিল বিষয় এহান মুনীশৌরতা, জেলেইশৌরকা নাগয়। জেলেই শৌএ— কুলিকাটুনী, ফুতি বুনানি, এলা নাছা জানানি, ঘরর কামে জগাতা অনি এতাই মৌলিক গুণহানি। লেইরিক লেইসু তানোরকা বজনিয়।

সমাজর পরিস্থিতি এহান কালর লগে চুনা নাইল দেহিয়া রাধাসেনা সেনাচাউবী-কৃষ্ণকুমারী-মাধবী পারা প্রগতিশীল বেয়াপা দাপা এহানে নিকুলেসিতা। মামবারীর সভাহান লমকরিয়া তানো প্রতাপগড়েস্ত হিংলাত সালইলা। হিংলারমা বেয়াপার সভা এহান চামটিলাত অনা লেপইল। চামটিলা, অরিং টিলা, বাঁশকালটিলা, কুকিটিলা ইত্যাদি টিলাগাঙর বেয়াপা লোকেই হাবিএ বার্তন পেইলা। সভাহানর টটরেইল বিষয়হান— জেলেই শৌএ লেরিক তামকরানি। বিষয়হান অতিশয় ঘোরতর অসে। কিসাদে নাটকীগি এইতায়তা চেইতাঙাই বোলিয়া শাল পাতিয়া, খাংচেং আঁটেয়া বেয়াপা দাপা সালসি। মামবারী কাটাবারীর কৌলির হাদিত মি খানি কজা খেইলু, তেবো বেয়াপার থতা নাই, গাঁঠি নেই জাতহান। হয়ো-নয়ো, কিত্তি-কুরুম, আলথক্-আঞ্চিল নিয়াম খালকরিয়া স্বরফামহান চেয়া 'জয় মাধব' বোলিয়া মি হিংলাত সালইলু। কৃষ্ণকুমারী গিথানকে সিজিল করিরীগ, টেংঠা মারামকেদেও জবর হোবা। তেঙ্গর যাথাং পেয়া 'লেখাপড়া' বুলিল ঘোরতর বিষয়হানর কুমেই চানার ভাগ্যহান মোরতা অইল।

কৃষ্ণগোপাল! তোর ইমা-গিথানক চন্দ্রজিনি পারা রত্ন আগরে ও সভারমা পৈলা দেহাদেহি অসিলতা। বিধির কলমগ অমাটিক পালসে এহান চামটিলাত গিয়া ভু-পেইলু।
ওঁ শান্তি! ওঁ শান্তি! □

রচনাকাল ১০-৪-১৯৮৪, বৃন্দাবন; নুয়া এলা

লোকসাহিত্যের য়ারি

আইডিংডিঙর মালক

হিংলার সরাহান যেপেইত্ জবর কোইঠেক অসে, ঔপেইত্ আগে আমার মানুর
গাঙ আহান আসিল। গাঙ ঔহানাত্ আইডিংডিং বোলিয়া জেলাশৌ আগ আসিলী। ঔবাকা
আইডিংডিঙর বয়স সাত কি আট অইতয়। তেঈর খুলা বেয়ক আগঔ জরম অইল। ঔগর
বয়স দ্বি কি তিন বসর। বাপকর নাঙ দেবান বারো মালকর নাঙ মালিনী। বাজারর দিনে বাজার
লয়করিয়া দেবানে শৌরকা কিতা-কিতা আনেদের। উঠানে ফরনিয়ৈ স্বারগ আকফুরুং
সেংকরলকপুরি দেবানে মাঙ্কলে কায়া লৌদের—

“আইডিংডিঙর মালক!

দোবারহান মুকা

তোরকা মিতে গুরাপানা

ছুনুতুকতা, মারৈ-মাপাং

আনেসু।”

মালিনীর নাঙহান দেবানে না ধরের। কিয়াকা বোল্ লেতে— হেয়কর নাঙ যেসাদে
মৈলক্গয় ধরানি নাকরের, ঔসাদে মৈলকর নাঙ হেয়কে ধরানিঔ আমার মানুরমা নিয়ম নেই।

আকদিনতে এসাদে করে দেবানে বাজার লয়করিয়া রাতি ডিলইতে ঘরে আলইল।
পথমেরাকে হিংলার হিঞ্চাপা ঔগয় শিনা পেয়া দেবানরে থেপ্ করল। ঔ সময়ত মানুর
ইরিং-পারিং নেই। উপায়তে নেই। দেবানও কম বলী মানুগ নাগৈ। লাকাটিত, নাঙ করেসেগ
দেবান এগ। হিঞ্চাপা’গর আতে জানহান যিতয়গা এহান দেবানে হারপেইল। খরচর বচ্চাহান
মাটিং থয়া দেবানে হিঞ্চাপাগর তুল লাকাটি ধরল। গুর-গুর-গুর লাগলা দ্বিয়গি। নীললা
হিঞ্চাপাগ অইলও কথা আহান। ইমেহে হিঞ্চাপাগর রূপহান ধরেরতা নায়;মূলেতে এগ
বুকখৌরা দ্যোগ। তার’ দেবানর বলীএ কানা নইল। তারে মারিয়া বুকখৌরা দ্যো এগয় কড়-কড়
চাবিয়া খেইল। পেলনি নইল, দেবানর ঘরগ তালকরিয়া আহিল। থকক দেবানর রূপহান
ধরে বেললতা! মাঙ্কলে কায়া লৌদিল—

“আইডিংডিঙর মালক!

দোবারহান মুকা

তোরকা মিতে গুরাপানা

ছুনুতুকতা, মারৈ-মাপাং

আনেসু।”

মালিনীএ দোবারহান মুকেয়া হেয়করে ঙককরলী। আতজাঙ সেঙনা নেই, দ্যৌ হমাদেনাও নেই! হেয়কর আজিকার চলন হান আর দিনকার সাদে নাগে। ‘দে-দে-সরক’ ভাতগি রাঁধে বেলা— ভাত ভকপাউরি’, হিষ্কাপা ঔগয় মাতল। আইডিংডিঙতে বাপকর ফামহানাত, ঘুমযাসে বারো শৌগ ঘুমযেসেতাই মালুকর ফামহানাত। মালিনী ভাতে হোমেইলীগা। হিষ্কাপা এগ বাপকগ অলয়া আইডিংডিঙর তুল হেজীত পড়িল। চিং-চিং করের ঘরগ হাবিগ। হুঙ্কা দোবাত সঙ্কু আগর চে-ড়, চে-ড়, চে-ড় রোহের কাদার হেইনো আকজারিত থায়া। হেয়কর ফামহানাত কিসাদে শব্দ আহান মালিনীর কাণরমা ফরইল। মালিনীএ হনিরী— কড়ৌ, কড়ৌ, কড়ৌ। “কিতা চাবরতা?” মালিনীএ আঙ্করিরী। হেং— বাজারেস্ত থাম্পৌখানি আনেসিলুতানা, খানিগ্গারা থাংতে ইমে আকখুলাগ... হিষ্কাপা ঔগয় মাতে যায়গা। মালিনীরতাতে সন্দেহ আহান অইল। হিষ্কাপা ঔগয় করেসেতাতে, আইডিংডিঙর থতাহান ডিফাদিয়া পেইরাক্ করে গারগত্ টিপেয়া মারেসে বারো আতহানাত অকরে চাবানি অকরেসে।

ভাত-হৌ হাজেয়া হেয়করে খরানিত্ বহেয়া মালিনীএ হাতেককরে উরর শৌ’গরে ছিমটা আহান দিল। চীকারি দিয়া শৌগ উঠিল। শৌগরে খকহানাত লয়া পানী খুচেই আহানল আরীগ বুজিংগা বোলিয়া মালিনী পিঠির থংচিল হানাদে নিকুল্লী। ধাবদিতে ধাবদিতে মালিনী কাদার ঘর আগত্, ফরয়া পাহাৎ অয়া পড়লীগা। মুরগত পানী দিতে খানি আলইলী। ঘর গর বুজন ঔগয় আঙকরল— “কিগ থাং মালিনী?” মালিনীএ মাতল— “হোবাই! হোবাই!! আজি মোর ঘরে আহেসে এগ ভূতগ-সাৎ!”

যেমন হনানি, দা, কার, জাঠাল, লেইকেইর মানু সালইলা পিঠির থংচিল হানাদে দেখতারাতা— ভূত ঔগয় বতরগ অয়া ভাত খানাত্— লাগেসে। পুলসি মানু এতারমা জ্ঞানী আগ আসে। তা গুণল হারপেইল— এগ হেবানিয়া ঔগ।

‘কৈতে-কুরাঙ গেলেগাতা? ভাত-হৌ ভরা দেয়ানে,’ ভূত ঔগয় মাতল। মস্ত্রল ঘরগর চারিবারা বাঙ্কাদিল জ্ঞানী জন ঔগয়। ভূত ঔগ গারি জানেইল। ‘হ-হারপেইলু’, বোলিয়া আসল মূর্তিগ ধরানি অকরল ভূত ঔগয়। ‘বাসা-বাসা, ভাত-হৌ ভরাদিং’ বোলিয়ায় বুজন ঔগয় ভূতগর গজে শক্তিশেল মস্ত্রহান উড়াইল। হাবি ডরহানে লাঙ পড়লাগা। “হঃ! হঃ!! হঃ!!! দেবানরেতে পথে চাবিয়া খেইলু। এফুরুং মৈলকরে বারো জিপুতরে খেইং বোলতে। হঁ, হেঁ, হেঁ খেইং বোলতে দুষ্ট কুঙ্গথাং।” এসাদে মাতে-মাতে ধর মার অলইল, ভূত ঔগ হাবিহানে দা, কার, জাঠাল ভূত ঔগরে টুগাগ করলা।

মরিল পিসে দেখতারাতা হৌ ভয়কর মূর্তি ঔগ নেই। তার ফামে করা আগ টুগাগ অয়া পড়িয়া— থাসে। ফামহানাত্ চেইতে দেখতারাতা— আইডিংডিঙর - আড় কতগ এবেদে হেবেদে পড়েসে বারো ফামহান রকতল জঞ্জালগ অসে।

□

কলার জিন্

পাথারকান্দির রাজার গাঙর এপার হৌপার; হাদিরমী খঙ্ আক্চিলা। খঙ্হান ছরু কিস্তমান নাঙতে ডাঙর। প্রতাপগড়র নবাব প্রতাপ মালীকে খঙ্ এহান খুলুসাসিল্গ। এবাকা খঙ্হান মরে যারগা, কিস্ত পারগরমা পংথা বরুবার সপাহানলেহে জিন্, খাঙ, ডাইনী— মাহি জম্ বাধে বাধে আসি। আগে ইপুগাসির হাক্তাকে তানুর প্রতাপ জবর অসিল; কিস্তমান এবাকাতে হাতে হাতে তানুর ইম্ফামেউ দুব্-গাস উঠানি অকরল। কুরাং কুং জিন্ ডাইনী মাঙইলাগা, পান্তা নাপেয়ার। অইলেরগায়ৌ, হমোগাসির ঘরগর কাদাবারাদে খঙ্হানর বুকগৎ যে উশক্ বরুবা আক্সপা আসে, ঔসপার জিন্ উগ এবাকা পেয়াউ ভাল গারিগল জিংতা অয়া আসে। সেক্কার ইরবিরগত্, কিংবা রাতি নঙেইত্ কিংবা রাতি পিন্‌পিনি বরণ দেনায় জিন্ উগ নিকুলের। ভাগাডরর বরকলেইর এমুরেস্ত ফুরুংপা লকেইর হৌমুর পেয়া কলার জিন্‌গয় খঙ্‌র পারে পারে বুলের। মানুএ মাস্তারা : কলার জিন্ এগ পারা মেইথি জিন্ আর নেই উনি আজিকার দিনে নাগৈ, ঔরে আমার আপাবপার আমলে কলা বোলিয়া গিথানক আগয় চরেদে শৌ আগ জরম দিয়া জিংতা-জিংতা খঙ্ এহানাং গাতাসিলীতা। উপেইস্ত শৌউগ জিন্-গ অয়া নিকুলের। তা'রো হাবিএ তারে কলার জিন্‌গ বোল্‌তারা।

কলার জিন্‌গরাংত আনাংসা খাসি মানুর খতান্ত ছনেসি : জিন্ ঔগ হাদিমেরাকে কনাকশৌগ অলয়া উশক বরুসাপার গুরিগত্ বয়া থার! কুস্বাকাঔ বারো নেংটি আহান পিদিয়া তা কুমগপারা আধারগৎ ফেলন্ আহানল' সরার মাছ খল্দের; কুস্বাকাঔ বারো কান্নাদারা মেকুর'গ অইল'কপুরি বরুবার আগ্‌গাগোস্ত চঙ্ক ফালদিয়া সরাহানাং পরের হাবিসময় বরুসাপান্ত সর্-সর্ শব্দ অর।

পূজার বন্ধত্ মণিপুরেস্ত শামু আহিল। শামুতে জিন্ খাঙ ডরারগ নাগয়। লপুকর শয়তান পিণ্ডিরি এতারেতে তা কেঙ্-আঙুলী দেহেয়া আটের। গাঙর বুজনে মাস্তারা— হৈঃ, শৌ-এগ নিয়াম কাহাঞ্চিল অয়া আটেরক'! হুতুমে মাস্তে হেবানিয়া ঔতায় সিনা পেইলে তারে জিংতা-জিংতা লোৎকরতে ঠিক নেই। অমাটিক্ 'ডেম্-কেয়ার' অয়া চলেরতা তা'। ঔরে

আকদিন নীলকান্ত ইবাইরে পেয়া কলার জিনগয় মেকুরগ অলয়া জাঙর হাদিয়েদে সুর-সুর ধাবদিয়া লালনিরকা তারে যে লাকনা দেসিল, ছন্লে গারিগ রম্কাটা বারী দেব। আমার শামুতে এ য়ারি এতা ছনিয়া খল্কিয়া আহের, বারো মাতের ঃ ঔসাদে জিন্তে কত-শত দেহেসু।

আকদিনতে শামু এগ হৌপারে বুলানিৎ গেসেগাতা। এগর তুল— ঔগর তুল, এ ঘর—হৌ ঘর করতে করতে রাতি নঙেই অইল্। ধনসেনায় শামুরে মাৎল,

—শামুদা, রাতিহান ডিলইল্ হাবিহান ভাতর ঘুমে পড়েসি।

—তে, কিহান্তে অসে?

—এবাকা মুঙর সরা ঔহান লালনি গমনাসে আর' মাতৌরিতা। আসে ভাতঠালি দ্বিয়গই বাটিয়া খা-বেলেইক। ফাম্হানউ যুতসে, কালি বিয়ানে যিস্গা।

—হেদা! মোর নাঙ শামু-না। মি দৌ-দুক পরোরা করৌরিগ নাগয় মি যাউরিগা। শামু উঠানহানাৎ ফরইল মাপাউগৎ ধনসেনায় বারো মাৎল।

—শামুদা, ফুতির ডেউটি আগ দিঙবেনায়? রাতিহানউ কুম্গ অলসে।

—নাহে! না লাগ্তয়।

হে-হে করে শামু আটানি অকরল। চেইতে চেইতে শামু বরুয়া-সপা জারির কাদা'গ পেইলহা। ধনসেনার ঘরে থতাহানাৎ বরাসিল্ গুবাচাবা উহান সুনু তুপ্তার গুবাচাবানায়'ক। গারিগ তপ্তা'গ অইল্ শামুরতা।

বতর'গ অয়া শামুএ এলা আহান অকরল :

—ঝন্, ঝন্, ঝন্, পদযোগে

নুপুর বাজে...

পেইরাক্ক' সরার বুক্গত মৌকা আগ রহানি অকরল; লগে লগে বৌ হাক্ চিলা-চিলা করিয়া মাক্কু আগয় চিড়া ফারে-ফারে চীকারি দেনা অকরল। তথাপি শামুনায়'ক। সুপ্পউ' উসিত্ নাকরিয়া মুঙেদে আগুবেইল।

কাকেইহান ত্বরা করতেই কুরাংত তপ্তা বৌবুলুনি আগ হুংছুঙেয়া শামুর মুরগর গজেদে গেলগা। শামুর গারিগ জানানি অকরল, মনহানর লু-খাটালগৎ থায়া কিগ আগয় তারে হুঁশিয়ারি দেনা অকরল। গারিগ হিরি-ঘাম্ সরনা অকরল শামুরতা। শামুএ খালকরল— ধনসেনারে আকফুরুং ডাহানি, না আলথক্ অনি! যানিঔ কিহান? পিঠি বুলন্ দেনায় জিনগয় কাবু কর্তৈ। মানুর লাজ্তে থাক, নিজর জান'গয় জিঙে। তারো, হাতে হাতে কাকেইহান মুঙেদে কারল শামুএ। থংহানর কাদদাৎ শামু ফরইল। আক্গো বাহার থংহান, বারাদে ধরিল বাহাউ আক্গ। জাঙহান থংহানর গজে বেলেয়া শামুএ বাংগুরিবারার আতহানল বাহাগ চেৎকরে ধরল।

মন্থানরে হেঁক দঢ়া করিয়া আক-কাকেই, দ্বি-কাকেই দেনা অকরল তান্জা ঔগৎ পেইরাক্ করে তার আঁহিগি কাদার বনসপার বেদে পড়িল। কুম্গ পারা অসে আধারগরমা নিফট্ আসাংপা বিন্দুগ পারা মেইঙাল্ আহান নিকুলিল! চেইতে চেইতে ঔ বিন্দু উগ ডাঙর অনি অকরল! ডাঙর অইতে অইতে হুৰু অইল, হুৰু অইতে অইতে বার ডাঙর অইল— মেইঙালর বিন্দু ঔগ! রঙঔ পটানি অকরল মেইঙাল বিন্দু ঔগর! আকফুরুম রাঙ বার নীলুবা— এসাদে পটা-পটি অনা অকরল। এসাদে রঙ পটা-পটা অর মাপাএগৎ থংহানর কাদার বরুসাপা আপ্পানে কেজানি অকরল। লগে লগে থংহানউ থক্ থক্ নিক্করানি অকরল। ঠইমামি চাকা-বাধিয়া ব্রহ্মতালুহানাৎ ফর যারগা। শামুরতা হিরিঘাম্— গারিগন্ত নিকুলানি অকরল তারতা। পেইরাক্' খঙ্ হানর বুকগৎ শৌ আগরে দেখল। শামুএ শৌ ঔগ হমোর ভেয়ক চরা মালসেপারা! শামুএ আঙ্করল— চরা, চরা— রাতি এহানাঙে কিতা কররতা এপেইত? শৌ ঔগয় জরাব নাদিয়া শামুরে চেইল। শৌ ঔগর আহিগিস্ত জির মেইপুল নিকুলেরপারা। শামুরতা পাহাৎ করানি অকরল। তা হারপেইল, তারে আজি হেবানিয়া জিন্ ঔগয় পেইল। গাঙর হাবি মানু ভাতর ঘুমে হেজীৎ গোগারা চেলসি। হুদা হমোর বাপক খুড়াঔগ মোটরগাড়ীর রেডিয়েটর বুলতারা প্যাঁচ ঔগ দুরুশ করাৎ গৈগ অসে। শামুরে এ নঙেইরাতি এহানাৎ কালকরানির আকগউ নেই। তত্রাচ হমোরে ডাহানিরকা শামুর মন্থান অলাং অইল। কিস্তমান কিসাদে ডাহানি? স্বারগ কুঙগ আগয় চেৎকরে টিপেয়া থসেপারা! বাহার সপাহানাৎ মাক্কু আগয় চেড়্ চেড়্ রোহানি অকরল। লগে লগে তিন মুজুরা দিয়া কেঁ কেঁ বম শব্দল কুংগ আগয় বাহাসপাহান পুলকরে মাটিৎ বেলা দিল। বার ঔরে মূর্তি ঔগ হাতে হাতে উবা অইল।

— অ হমো! হমো!! হমো!!!

শামুএ স্বারগ সেংকরিয়া আচ্চুলে মড়িং পড়িং চীকারি দেনা অকরল।

— অ হমো! চরা ঘরে আসেতা?

হাঃ! রাতি মেরাকে এহানতে কিহান!— বোলিয়া হমোয় লেন্টন'গ আনিয়া ফামহানাৎ চরারে বিসারতে দেহেরতা— চরা ফামহানাৎ কাস্থাহানল' মুরগ ঝাপিয়া গোগারা চেলয়া ঘমুজিয়া আসে শামুরে হেবানিয়া ঔগয় সিনা পেয়া লাকনা দের এহান হমোয় হারপেইল। দ্বরাকরে লেন্টন'গল হমো নিকুলিল।

এবেদেতে মূর্তিঔগ হাতে-হাতে শামুরবেদে কাকেইহান কারানি অকরল। মূর্তি ঔগর আহিগিস্ত জির-মেইপুল নিকুলেরপারা! শামুরতা হুশ নেইল, আকফালে শামু পথগৎ ডম্ম পড়িল। লেন্টন'গর মেইঙাল দেহানি ফাৎনেই, মূর্তি ঔগ বৌবুলুনি আগর তুল হুংকরে দিল চং আহান! আকচঙে বাহাসপার আগা'গ ফরইল।

হিঃ হিঃ হিঃ— কেঁ কেঁ কেঁ, এসাদে রৌ'ল চারিবারা খলকানিতে থাইল জিন্ ঔগয় কিগ! কিগ!— বোলিয়া লেন্টন'গ গজে তুলিয়া ধাবদে এয়া হমোয় দেহেরতা —শামুএ

পথগর গজে ‘ওরে! ওরে!’ বোলিয়া থতাদে কল্পুক নিকালানি অকরেসে।—‘মানু’গ লম’সে!’ বোলিয়া হমোয় আচ্চুলে চীকারিদিতেই দৌর শাংগৎ ঘমুজিয়া আসে নীলকান্ত ইবায়ে কন্মল আহানল’ গারিগ বেয়েয়া লেণ্টনগল’ ধাবদিয়া আহিল।—হমো! হমো!! কিতা অসেতা?

নীলকান্ত ইবায় শামু বার হমোর হাদিৎ মূর্তিমানগ অয়া নিকুলিল— দিগম্বর বেশহানল’। ঘুমর আনিঙ-শানিঙেস্ত আহেসে নীলকান্ত ইবায়ে খুন্তেইহান পাথরিয়া না-পিদেসে। শামুরে দেহিয়া নীলকান্ত ইবায়ে মাংল— হাঃ। এগতে শামু’না! ধর, হমো ধর! তি জাঙেদে ধর, মি মুরেদে ধরিং।

লেণ্টনগি থাইল থংহানর পটগৎ। তানু দ্বিয়গই শামুরে তুলিয়া ঘরে আন্লা। নীলকান্ত ইবায়ে হমোর মালকরে ডাহানি অকরল’ পী-অ-ননী পী। উঃ পরলেই অসেহে! হমোয় দুবারহানাৎ ভুকুরিয়া ডাহানি অকরল’।

—‘ইমা! ইমা! উঠ!’

ফিঙয়া নলী পী ‘আহৌরী, আহৌরী’ বোলিয়া মলগর তলেস্ত দিয়াশলাইগ গাদ্দিয়া দশিগ আচুলিয়া থংমেইহান ডাক্-ডাক্ করে লাগেইল। বেন্দাগ মুকেয়া দুবারহান আংকরতেই দেহিরীতা নীলকান্ত ইবাইর দিগম্বর রূপহান।

—পী-পী, থংমেইহান এব়েদে আন, হরে রাম, হরে রাম, রাম রাম, হরে হরে। নলীপী’তে অবস্থা এহান দেহিয়া খল্কা-খল্কা আহানি অকরলী। আহা-আহা নলীপী’এ পানী খুচেই আহান শামুর তালুহানাৎ ঢালানি অকরলী। পেইরাক্ হমোর আঁহিগি নীলকান্ত ইবাইর বেদে পড়িল, বারাদে মেইথংহান লুকেয়া হমোও খল্কেয়া আহানি অকরল। নীলকান্ত ইবায়ে শৌরয়া মাংল— হাঃ মালক পুতক্তে কিতা অসতা?

শামুরতা হুশ্ আহিল; হাতে-হাতে আহিগি মেলিয়া চেইল।

□

পঞ্চমী শারদ ঋতু মারল ১৯৯৩

হরালী প্রেত্নী

সরাহানর এপার হৌপার, দ্বিয়পারেও মানুর গাঙ্— গাটর পারে পারে গল্‌লার সপা কতিতে গন বুল্‌লে উপায় নেই! আকয়া বেলির মিঙাল না হমার। গল্‌লা সপারমী হাবিস্ত যে সপাহান্‌ গন্, ঔহানর কাদাৎ চেপইলে গারি রম্‌কাটাবারী দেৱ রকৎ ইঙ'গ অর। সেঙ্কাহান অনার আগেই মানু গল্‌লাসপা এহানর কাদান্ত মরিক্-পড়িক্ ধাবদিয়া দূরেইৎ যিতারাগা। হাবিস্ত গন্ গল্‌লা সপা ঔহানরমী প্রেত্নী আগ থাইরী এগয় মানুরে জবর লাক্‌না দিৱী। দিনে হরালীগ অইরী, রাতিহান অইবতায় প্রেত্নী'গর রূপহান দরিয়া মানুরে জবর লাক্‌চা করিৱী। উতারকা তেইর নাঙ হরালী প্রেত্নী।

আক্‌দিনতে দুধপুরর গোলাপ এগ সরার পারে পারে যারগাতা। হাক্‌হানউ মেগালা করেসে। গোলাপ চালাক্‌ করে আটানি অকরল। চেইতে চেইতে সেঙ্কাহান অইল। সেঙ্কাহানর লগে লগে পিন্-পিনি বরণ আক্‌জুরি দেনা অকরল। 'অহঃ আইন্তে কি দশাৎ পড়লুতা!' গোলাপ ঠুনিংখা বেলা-বেলা বরণে তিঙে-তিঙে, হৈ-হৈ করে আটানি অকরল। নাইল্‌হান দেহিয়া তিঙেসে আঙিহান কারিয়া মুরগৎ কয়ত্‌ বাদল।

চারিওবারা কুম্‌গর সাদে আঁধার অসে। চারিওবারা চিক্‌সে কোন ঈরিং-পারিং নেই। হেরৌ গল্‌লা ঔসপার কাদাৎ ফরইল। গোলাপর গারি'গ রম্‌কাটা বারী দেনা অকরল। গঙ্‌গারার রৌ, পাতাৎ পরের বরনর পানী'র টরপ্‌টরপ্‌ শব্দ এতা গোলাপর কানহানাত না হমার। পথরমী জীব পক্‌ আক্‌গউ নেয়সি।

'কৌক্-কৌক্-কুক্‌কু-কু....'

পেইরাক্‌ক পাহিয়া আগয় পাখ্‌ থাপারিয়া রহানি অকরল। কুম্‌ গ পারা আঁধারহান গল্‌লা সপার ভিতরগৎ কিগ আগয় খল্‌পি-খলক্‌ করানি অকরল। ডরহানে গোলাপর ঠইগ তালুবেদে কইল। হিরিগাম শোৱনি অকরল তারতা।

ঝিল্লিক্‌ক' রকত্‌গ পারা ডাঙর আঁহিদুগ গল্‌লা সপার হাদিগন্ত নিকলিল। ডরপেইল্‌ মাসাক্‌ আহি দ্বিয়গি দেহিয়া গোলাপরতা হুশ-বুদ্ধি হাবিতা মাঙইল। তারতা আটানির পাঙকাল নেয়ইল।

পেইরাক্ক গল্লা সপার হাদি ফেরিয়া ভয়ঙ্কর মূর্তি আগ নিকুলিল। আত-আহান্ তুলিয়া ডাহানি অকরল।

—“অ-গোলাপ-অঁ হনার ধন...।”

প্রেত্নী ঔগর আতর আঙুলি ঔতাত মাউ নেই— হুদা আড়; আড়র সপান্ত পচা মাউ লামসে। প্রেত্নী’গর থতান্ত নিজর নাঙ্হান হনিয়া গোলাপর গারিগ পাহাৎ পাহাৎ করানি অকরল’।

—“হাঁঃ-হাঁঃ-হাঁঃ- হিঃ-হিঃ-হিঃ-.....।”

হাক্-বৌ চিলা চিলা করিয়া হরালী প্রেত্নী খল্কেয়া আঁহানি অকরল।

গোলাপ ঠইগ তালুৎ দিয়া ধাব্দানি অকরল। মুঙে গোলাপ, পিঠিৎ হরালী প্রেত্নী।

—“অঁ- গোঁলাপ-অঁ গোঁলাপ্-নাযিগা-নাযিগা।” রাঙা জুহান আত্ আহানর চুবা লাম্‌করিয়া গোলাপর পিঠি-পিঠি দাবদিরী প্রেত্নী এগয়। ঠুবনিহানে নিংস্বা থেপয়া আহের গোলাপরতা। দাব্‌দিতে দাব্‌দিতে গাঙর জাঙ্গালগ’ পেইলহা গোলাপএ। জাঙ্গালগ পানার লগে লগে গোলাপএ জান-প্রাণল’ ডরপেইল্ মাসাক্ চীকারি আগ দিল—“মোরে কালকর-অ-অ-অ-। মইলুএ এ-এ-এ....।”

হবে সেক্কার বর্তি, ধূপ-থমেই দিতারা সময়হান। গোলাপর চীকারিগ গাঙর কোণে-কান্‌চেলে ফরইল। —“হাঃ! কুঙগ! কিতা অসেতা! লৌদে লৌদে গাঙর গাবুরাপুরা, বুজন শৌ লাঠি-জাঠি, দা হাকেইল ওরাক’ নিকুল্লা। এবেদেতে গোলাপ জাঙ্গালগর গজে পাহাৎ অয়া দিগলগ অয়া থাইল।

জাঙ্গালগর কাদাৎ আয়া গাঙর মানুএ দেখতারাতা মুঙে ভয়ঙ্কর মূর্তি আগ!

‘হাঃ! এগতে কিগ!’ গাঙর মানু লাঙয়া মূর্তি ঔগরে চেয়া থাইলা “হোবাই! এগতে হেবানী ঔগ না!” আক্‌তায় মাংলা। দাপা আহানে গোলাপরে তুলিয়া নিয়া সেবা-সেবিৎ লাগ্‌লা।

আরাক দাপাহানে প্রেত্নী এগরে তাল্‌করানি অকরলা। প্রেত্নী ঔগ মরিং-পড়িং দাব্দানী অকরলী। তাল্‌করতে তাল্‌করতে গাঙর মানু সরাহানর পটগৎ ফরইলাহা। হরালী প্রেত্নীঔ সরাহানর পট্‌গত ভয়ঙ্কর মূর্তিগল উবা অয়া ‘কি উপায়’ বোলিয়া খালকরাত্‌ থেঙইলী।

দা, বানুক, ঝাঠা, বন্মম গজেদে তুল্‌লা প্রেত্নীগরে মারানিরকা। উপায় নাদেহিয়া প্রেত্নী ঔগ পানীহানাত্‌ জব্‌ভংক ফালদিয়া পড়লী। পুলসি মানুহাবিএ তাক্‌ লাগিয়া চেয়া থাইলা। সরাহানর পানী তাপ্প তাপ্প আগের সাদে লোক্‌গ পারা অইল।

□

পঞ্চমী ১৮ তম বর্ষ, ২য় সংখ্যা, মার্চ, এপ্রিল, ১৯৯৩ ইংরেজি

শয়তান বাবাই

পেইরাক্'ক ঘরদোরার পড়ক্-পড়ক্ করে লরানি অকরল। গাঙর মানু ঠে তালুত দিয়া ধাব্দে ধাব্দে উঠানে নিকুলানি অকরল। আক্‌তায় মইবঙ রোহেইতে, আরাক আক্‌তায় ঘণ্টা বাজানিত লাগল। কলানুগিদেই শৌ দ্বিয়গিরে আহা-তুলিরমী চিপেয়া “হোবাই! ভৈচাল-হান্না!” বোলিয়া উঠানে নিকুললী। গাছ বিরকর পাহিয়া-পলেই হাক্‌হানাত ফরদে ফরদে রোহানি অকরল। মাপা এগরমী কলামু-গিদেই গাসির মাঙকলর আঁধার কোণ আগন্ত কুঙ্গ আগই “খুক্-খুক্-খিন-খিক্” করে আহেইতে আহেইতে নিংস্বা মাঙ যারগা পারা।

ভৈচালহান মড়ে যিতেগাই কলানুগিদেই লৌদিয়া মাতলী— “ইনে-ইনে, থঙমেইহান নিকালা ত্বরা করে। মাঙকলর কোণে খাঙ নিকুল্লা সাং!”

বহকর চীকারিগ হনিয়া তাম্‌ফানু-ইন্দল থঙমেইহান্‌ল মাঙকলে নিকুললী। মাঙকলর পটগত বাবাইরে দেহানি ফাং নেই ইন্দলে ঠারানি অকরলী— “হোবাই! শয়তান জেলেইর হেয়ক্ ওগ না! ওজে! দুর্-দুর্!” ওজুরে ওজুরে বাবাই ওপেস্তই উঠিয়া গেলগা। সময় আহানাত্ বাবাই এগ আমার সাদে বালা মানুগ আসিল্‌গ। আকখুরুম তারে শয়তান জেলা আগই পাসিলী, ওতার পিসেস্তপুরি বাবাই, আজিপেয়া পাগলগ অয়া আটেরতা।

আজিস্ত অকরে দ্বি-কুড়ি বসর আগেকার য়ারিহান। ওবাকা রুস্বিনী সরাহানর বেকিগর এপার হৌপার তীরার গাছ, বরুবা সপাল বুজেসিল্‌। এপারে মানুর গাঙ্‌ বার হৌপারে শয়তানে জম্‌ বাধেসিলা। সেক্‌কারমী গাঙে বর্তি ডক্‌ ডক্‌ করতে হৌপারে শয়তানর জ্বি বক্‌ বক্‌ করেসিল।

আকদিন্তে সেক্‌কার ইরবিরগরমী টুকর বাবাই গুরু বিসারাত নিকুলিল্‌। বিসারতে বিসারতে বেকিগর এপারে ফরইল, কিন্তুমান গুরুগ বিসারেয়া নাপেইল। সিনাপেয়া শয়তান জেলা আগ তিরা আকজারিস্ত সর্ক্‌ লামলী।

পেইরাক্‌ক বেকিগর হৌপারে বৌ আহান দেনা অকরল। গাছবিরকর পাতা ফর ফর করে নাচানি অকরল। বেকিগর এপারে বৌর ফোটা আক্‌গও নেই। এহান দেহিয়া বাবাই আচানক্‌ অইল।— “অ টুকর গিরক।”

বেকিগর হৌপারেত্ত কালসিয়া আগই বাবাইরে ডাহানী অকরলী। আঁধার এগরমা নিঙল আগর থতাস্ত নিজর নাঙহান ছনিয়া বাবাই খাঙ লাগিল। কালসিয়া ঔগ সরাহানর পানির গজেদে আটিয়া এপারে ফরইলী। বাবাইর মুঙহানাত শয়তান জেলাঔগ উবা অইলী। শয়তান জেলাঔগ কতিতে হবা অসে বুল্লে উপায় নেই। তেইরে দেহিয়া বাবাই মোহিত অইল। মুন্নি দিয়া শয়তান জেলা ঔগই বাবাইরে মাতলী— “মোরে পাঁছরলেতা! মোরে বেলেয়া কিসাদে আসততা?”

এবেদে বাবাই গুরুগল নাহেরহান দেহিয়া বাপক তারে বিসারাত নিকুলিল। বিসারতে বিসারতে বাবাইর বাপক ঠুঁবল, কিন্তুমান বাবাইর দেহা নেই। হিন্হানে তেঙগ অয়া বাবাইর বাপক ঘরে আল্খক অইল। ঘরে কাঁদা-রোহাঁ পড়িল, ঘরর মানু ভাত-পানি বেলেয়া রাতিহান না ঘুমজিয়া থাইলা।

বিয়ান ফুরইল, গাঙর গাবুরা-পুবেই বাবাইরে বিসারাত নিকুল্লা। বেকিগর হৌপারে তীরার গাছ বরুবা সপার হাদি এতা খল্পি-খলক্ করিয়া বিসারলা, কিন্তুমান বাবাইরে নাপেইলা। চেইতে চেইতে তিনদিন লালইল।

এবেদে শয়তান জেলা ঔগই বাবাইরে হবাক’ পোক-জকর ভাজি, বরা রাখে রাখে পেট বুজুবেয়া খোবেইতে থাইলী। শয়তান জেলা ঔগই শৌ আগও জরম দিল।

চারিদিনকার ঔদিন গাঙর গাবুরাপুবেই বার বাবাইরে বিসারাত নিকুল্লা। ঢাক, করতাল, ঝাল রোহা বেকিগর এপারে ফরইলা। এপারর বরুবা সপা, তীরার গাছ খল্পি-খলক্ করিয়া বিসারাত লাগলা।

সেদ্ধাহান্ অইল, বুন্দা জুলিয়া গাবুরাপুবেই ঢাক, ঝাল, করতাল রোহা রোহা বেকিগর হৌপারে ফরইলা।— অ-বাবাই-বাবাই-কুরাঙ আসততা? খুম্করনে” লৌদে লৌদে হাবিহানে বাবাইরে ডাহানি অকরলা। মানুর লৌ, ঢাক-করতালর রৌ ছনিয়া শয়তান জেলাগৈ খাঙ লাগিয়া তীরাজারির আগাগত কইলী। কায়া দেহিরীতা মানু পালআহান বুন্দা জুলিয়া, ঢাক-করতাল রোহা রোহা আইতারা। তেইরতা গারিগ জানেইল। তেই ত্বরাকরে বাবাইরে তীরাজারির আগাগত কাকরলী। পোক বাসানির সাদে তীরারগাছ-বরুবাসপা এতা বিসারলা। কিন্তুমান হাবির চেষ্টা বিফলে গেলগা। এবেদে শয়তান জেলা ঔগই বাবাইরে তীরাজারিত্ত সেচেয়া মুঙর বরুবা সপার আগাগত কাকরলীগা। ঠুবয়া গাবুরাপুবেই হাবি মাটিত বয়া জিরানি অকরলা।

“সর্-সর্-সর্— বরুবাসপার আগান্ত নিকুলের শব্দ এহান ছনিয়াও হাবিহানে হেলামি করলা।

মুঙবারা রাঙিরা বারিদিল। গাবুরাপুবেই হাবি আল্খক্ অনা অকরলা। পেইরাক্ক গাবুরাপুবা আগই বরুবাসপা আহানর গজেদে আঙুলী দেহবেয়া মাতল’

“—ওরে চেই! চেই! বাবাই নাগইতা!”

হাবিহানে বরুয়াসপা উহানর আগাগদে চেয়া দেখতারা বাবাই বরুয়া বাহা আগ ধরিয়া লাময়া আসে। হারৌ-হানে তানু ঢাক, ঝাল করতাল রোহা রোহা লৌদানি অকরলা,

“—মানুগ পেইলাঙে। মানুগ পেইলাঙে।”

তানুর লৌ ছনিয়া গাঙর মানু মড়িক্-পড়িক্ ধাবদিয়া বেকিগর এপারে ফবইলাগা।

কিন্তুমান বাবাইরে কুঙ্গই লামেইতইগ? ডরিয়া আক্গৌ নাকরলা। কিন্তুমান বলানন্দর য়ারি তঙাল্। গাঙর গাবুরাপুবেইরমা তা হাবিস্ত বলী-পাঙকালগ। “জয়রাম” বোলিয়া বলানন্দ বরুয়াসপাত কইলগা। মিকুপ আহানাত বাবাইর জাঙহান পপ্ক ধরিয়া লেম্পালে কাকরিয়া তারেল লামিল। হারৌহানে হাবিহানে বলানন্দরে থাকাত দিলা। সরার পানিল হিনাদিয়া পুরপারিয়া ঘরে আন্লা। বাবাইরে ঘরে আয়া বাবাই পাগল অইল, হাবিসময় তায় তায় টটরেয়া থার। কত মেইপা, কত মুম্বাই তারে চেইলা সুপ্পউ কানা নইল। আকখুলাগ বহিলক’ পুরি কিতা-কিতি টটরার, কাঁদের, আহের! কারে ওজুরের— “এ-রা! শৌগরে আরাকৌ পোকর ভাজি দেনে।

□

পঞ্চমী ১৮তম বর্ষ, ৩য় সংখ্যা, মে, জুন, ১৯৯৩ ইংরেজি

ছাগি লামচিক

চেংকুড়ি সড়কগর য়েপেই এবাকা রুকের থংহান আসে ঔপেই আগে লামচিকর জবর উপদ্রব আসিল। লামচিক এতায় তানুর পথ আগ্দেরে আটলা— ঔপথে কিতাপারা মানু পড়লে তানুরে ঔতায় জবর লাকলা দিলা।

যেবাকার য়ারিহান দেউরি, উবাকা লপুকগ লোকতাকগোর সাদে বহলা আসিল। এমুরেস্ত হৌমুর চেইলে গাঙ-দেশ-ঘর এতা দুরেইএ আকয়া পিংতাং-পিংতাং দেহিসিলাঙ্। খংহানর কাদাত্ এবাকা ভকতপুরর জাংগালগর সাদে পথ আগ ইজ্জু সালয়া খাটলর সড়কগো য়োওসেতাহে। পথগর পিঠির দুলাল গাসির গাঙহান, মুঙে ওস্মান আলির গাঙহান। থঙহানর তলে লামচিকর আড্ডাগ আসিল— রাতি নঙেইত্ খংহানর পটগ পানায় গারি জিড়িং জিড়িং করেসিল।

আকদিনতে ভকতপুরর ক্ষেমসিং ঈপু এগ চেংকুড়ি সড়কগল আহেরতা, বিদেশেস্ত। জারর রাতিহান— লপুকর ধানহাবি বারোনে হমেইল্। ক্ষেমসিং ঈপু থঙহানর গজে কইল। থঙহান লালয়া সড়কগর তলে ধল্গারা পথগত জাঙহান বেল্। লপুকগর গজে ধলা ধলা খুবা বাহেসে— রাতিহানও ডিলইল।

জোনাকহান ডক-ডক করে— ঈপুএ নারগ সেঙকরিয়া এলা আহান অকরল। পেইরাক্ক ছাগিশৌ আগয় রোহানি অকরল। ক্ষেমসিং ঈপুএ দেহের দুরেইত ধলা ছাগিশৌ আগ জারহানে নিকরের— “হোবায়! কার ছাগিশৌগ? হিঃ ছাগিশৌ এগরে কামহান করে লপুকে এরাদিয়া! আচ্চা— ঈপুএ ছাগিশৌগরে ডাহানি অকরল— “আয়-আয়, রাতি নঙেইত্ অন্খক্পাহান্! হিয়ালেহে আজি লমকরতাইসাদ! ছাগিশৌ এগর দুঃখহানে ঈপুর বুকগ থুক-থুক করানি অকরল।

এবাকাতে ছাগিশৌ এগ আরাকৌ দুরেইত গেলগা। কতহান পিসেদে ছাগিশৌ এগ বার ঈপুর কাদাত আহিল। ক্ষেমসিং ঈপুএ ছাগিশৌ এগরে দেহিয়া চিনে বেল্— “হোবায়,

এগতে দুলাল গাসির ছাগিশৌগ-না! দুলাল এগরতাতে দয়া-মায়া বুলিল বার এহান সুপ্তও নেয়সে'ক! আয় আয়' ঈপুএ ধরিঙ্ বুলতেই ছাগিশৌগ ধাবদিয়া গেলগা।

“আচ্ছা! ছাগিশৌ এগতে!” কতসময় ঈপুএ ছাগিশৌ এগরে ধরানিরকা বোলিয়া হুমা করতে-করতে পেইরাক্ক ধরে বেহ্ন। “কিমে আরাকৌ ধাবদিতেইতা?” বোলিয়া ঈপুএ ছাগিশৌগরে চেৎকরে তার ডাঙর পেটঙগত আতহানিল জাতেয়া থইল। হৈ-হৈ করে ক্ষেমঈপুএ দুলালর ঘরগ ফরইল।

—“অ-দুলাল! দুলাল!!” চীকারি দিয়া তা দুলালরে ডাহানি অকরল। ভাতর ঘুমে কতিতে ঘোরগ অসি বোললেতে উপায় নেই। দারিগত বহিল ঈপু। তার লৌদানিয়ে আকয়া দুলাল-খুড়া বার মইলক ইন্দল ঔগর ঘুম ভাঁগিল। দোরারহান আংকরানি ফাৎ নেই খেম ঈপুএ শোরনায় জিগ অয়া মাতল, তোরতাতে দয়া-মায়া সুপ্ নেই সাদ? এতাপারা রাতি নঙেই ছাগিশৌগরে লপুকে বেলেয়া হেজিৎ গোগারা চেলনি পারর জন এগও মনুষ্যগ'ক!

দুলাল খুড়ার ইন্দল ঔগ তেহ্নাম ছাগির শাংগত ধাবদিয়া দেখলী ছাগিশৌগ আসে। “খুড়া! আমার ছাগিশৌগ ঔরে কোলগত মালকর কাদাত ঘুমজিয়া আসে। মি নিজে মালকরে-শৌগরে সেদ্ধাত বাঁধদেসুগ।”— তেঈ মাতলী।

“হা! স্বয়ং মোর নয়ন দিয়গিল দেখলুতা তোমার ছাগিশৌগরে, বিশ্বাস নাকরলে এরে চেই”—বোলিয়া আচালাহান ভা করে আংকরিয়া চবেইতেই ক্ষেম ঈপুএ নিজে বার দুলাল খুড়া গাসিএ দেখতারাতা— গোবর আক্চানা!— “হাঃ অস্থক্‌পাহানক’! মি মিছাগত্‌হে পড়লু! নঙেই রাতি এহানাত তেত্তগ অয়া ধরিয়া আনলু ছাগিশৌগ কুংবেদে মাঙইলতা?”

ক্ষেমঈপুএ এতা বোলে বোলে ঠক্-ঠক্ নিককরানি অকরল। দুলাল খুড়ায় সিচ্চিল ঘটনাহান হারপেইলতা নাগে, ক্ষেমঈপু স্বয়ং হারপেইল— তারে থংহানর হেবানিয়া লামটিক ঔগয় ধরেসেহান অসে! ক্ষেমঈপু হরিনাঙ সলকরে সলকরে পাহাৎ অয়া ডম্ম মাটিত পড়িয়া থতাদে কলপুক্ নিকালানি অকরল। দুলাল খুড়া গাসির হেইমাক্‌হানে মুরগত পানি ঢালানিয়ে কিতায় সেবাসেবিত লাগ্‌লা।

□

পঞ্চশ্রী ১৭তম বর্ষ ১লা সংখ্যা, অক্টোবর, ১৯৯২ ইংরেজি

য়ারি

ভিসা পাশপোর্ট

বরষার বরোণে তিঙে তিঙে চেমারাবারী দেছে পৃথিবীর বুকগত আশ্বিনর নুংসিপা বেলির মেইঙালে পাখ সালকরিয়া যেদিন দিকদিগন্ত, ইঙাল ঙালকরিয়া লামিল, ঔদিনকার কথা মাতৌরিতা। ঔদিন টেঙারশিংচৌ, বনসরা, গাছবিরুকের মিহলগি হাবিগি পানিখেঞ্জং নাছা খেলাছিল। কওরাগন্তঃ চিংকরে দুনিয়ার হুরু ডাঙর পাহিয়া পলেইএ নিজর নিজর ঠারল কিহান মাতিয়া আগরে আগয় সম্ভাষা করেছিল। হার না পাছু। ভেব স্থাবর জঙ্গমর হৃদয়স্থগি ঔদিন শরতর তাল্খল্লিকে সেতারর সাদে রহেছিল, ঔহান মি অন্তরগ যৌকরে দরিয়াপ করেছিল। পহরীপারগর মালতী, কামিনী, সিঙ্গারেই, কাপকলেই গাছিয়ে যারযিহী নুংসি গঁধহানি মলয়া বৌরাং কাৎকরিয়া ডালেত্তঃ হয়কো কেলয়া দুগ্গাসর গজে কিসাদে নুঙেইনানিল উফুরিগ দিয়া পরিয়া আছিল। আজি তানুর দেহগি কুং ধুলির তুলো মিহিয়া থাইলগা, কিগয় জানে। বনচারী জীবজন্তুর কথাতে থাক্, ঔদিন কলোর গোরু মইষ পেয়া হারৌহানে রহে রহে আকেই ফুরুং হুমাং ক্ষৎকরলা। বিল সরা পহরীর বুকগিত এ বসরকার বরষার কান্দালাশৌ, পুঠি, মকা, ইচাবৈচা হাবিএ তাম্মা দিয়া খেলাছিল। গরবারার উড়িপালর গজেতলে, বেইনং গাছর গুরিত ডালে চেঞ্চরায়, পিটপিটেইএ চিরিক্চারিক্ পিটপিট নার্ল এলাদে এলাদে ফালদানি অকরেছিল। লপুকে আসাংপা ধানর ফারাংচি ফিটার গজেদে টৌ খেলেয়া মলয়া বৌহানে এমুরেত্তঃ হৌমুর ধাবদেছিল। এতাপারা নুঙেইপা বিয়ান এহান আরাকও নুঙেই লাগের কারণ আহান আছে। ঔরে হিমালয়র পর্বতর উশক ফামে ফামে কৈলাসধামেত্তঃ নুংসিপা নিঙল আগ নংসাং পথ লালয়া ফামে ফামে জিরেয়া কতি অওয়া হিনল হেইহে করিয়া মালক বাপক বেয়াপার গর যওনিরকা আহিরী। তেইরে ঙ্করানিরকা কনাক বুজন, রাজা প্রজা, দীনদুঃখী হাবিহানে পথগ চেয়া উবা অয়া আছি। মিও আছু। থাং, ঔসাদে আনন্দ পানা নুওয়ারল। শরতর মহিমার বিয়ান এহানে মোরে ঔসাদে হারৌপা দেনা নুওয়ারল।

আজি কতিদিন অইল, মোর গাঙহানর বুকগত আশ্রম পাতিয়া সাধু আগ বহিল। মি আজিকার কথা মাতৌরিতা নাগৈ, দিন ঔহানর 'আজিকার' কথা মাতৌরিতা। কৃষ্ণ কৃপাল ধন্য অয়া ঔ সাধু গিরকে মানুওয়ে নুওয়ারিল কাম করে পারের, ভূত-ভবিষ্যত বর্তমান হাবি মাতেদে পারের, কাণে বীজমন্ত্র দিয়া মানুর পাপদন্ধ অন্তরগিত গঙ্গার নিংশিং পানির পবিত্রতা আনে দেনা পারের, ইমেও কি, দীক্ষা দিয়া এ পাপর সংসারেত্তঃ স্বর্গধাম যানার ভিসা পাশপোর্ট মঞ্জুর করে দেনা পারের। ঔহানল করুণার অবতারগ আছে সাধু গিরকর চরণে রতি ভক্তিল

কতি ভক্তবৃন্দর আশ্রয় লয়তারা। আশ্রমহান বহিতয়তা হুঙ্কা পক্ষ আহান। চারিবেদে গৈ আগ পরেছে। কারতাও নিংখা বেলানির সময় নেই। দুনিয়ার পাপীতাপী নারকী হাবিরাং সাধু গিরকর আশ্রমহান কল্পবৃক্ষর সাদে আছে। যেপেইতও কৃষ্ণপীতি, সাধন ভজনর তত্ত্বকথা, আশ্রমহান কৃষ্ণরসে অষ্টপ্রহর গং ধরেছে। ঔ আনন্দর কথা মাতিয়া লয়করে নুওয়ারতৌ। লিশিং লিশিং ভক্তয় আলানওয়াং করিয়া মহং গিরকরাংতঃ পরলোকর সদগতির চেংচেলহানি আদায় করানিত মন্ত অছি, মিও এ কামে মন্ত অনি মনাছু। এ মহেন্দ্র ফেল এহান আতে পেয়া যে মানুগয় নিকর্মগ অয়া বয়া থার, ঔগর সাদে কপালখিপাগ আর আছিতা? নেই। তুমিল অয়া মিও খালকরলু, মোরতাও স্বর্গর পাশপোর্ট আদায় করানি লাগতয়। নংসাং অইল, মোর পাপী অন্তর এগত্তও প্রশ্ন আহান জাগেছে, মি যেপেইতঃ আহেছু কিসাদে করে মি ঔপেইত বারো যানা পারিমতা। তেব আজিপেয়া মোরে পথগ দেহাদিয়া নিবগা সাধুসন্ত আগর দেহা না পাছু। মোর ভাগ্যহান সাক্তি। আজি এ আশ্রমেত্তঃ নিকুলতারা ভক্তবৃন্দর মেইথংহানি দেহিয়া মোর অন্তরগত আনন্দচুটি আহান পকর, কিন্তুমান কিয়রকা নাজানু আশ্রমর থংচিলহান পানাই মোর পাপী যাংদ্বিয়হান মুংহান বেলেয়া পিঠিয়েদে দ্বিকাকেই আলর? শয়নায়া অন্তরএগর কুং আরুপী কোণ আগত সঙ্কোচখানি জট বাঁধিয়া আছে। ঔহান মাতে যেইংগা। আশ্রম এহানাত যতিগি ভক্ত দেহৌরি ঔতার মাজে মোর গাঙর বা পরগণার চরিত্রহীন জেলেইমুনিএ মিয়াম; তানুর নিয়মহান অছেতাই, কৃষ্ণকথাল মানুর আঁহিত ধূলি দিয়া তীলয়া পরস্পরর কামভাবহান চরিতার্থ করানি। ভক্ত ঔতার মাজে গাঙঠকারা, সুদখৌরা, কৌলিরাতাও আছি। মোরাং মহলেত্তঃ এ প্রশ্ন এহান জাগের হিংসানিন্দা, পাপ, আনিকা স্বার্থবুদ্ধিহাবি হৃদিগত্তঃ না ককইলে কিসাদে করে বীজমন্ত্রর পাঙ্কালে মানু আগয় স্বর্গর ভিসা-পাশপোর্ট পানা পারতয়তা! সন্দেহর এসাদে কালা কালা বরোণ আকচাকায় মোর মনহাকহান আচ্ছন্ন অইল থাংতে শরতর এতাপারা নুংসিপা বিয়ান এহানে মোরে অমাটিক আনন্দ দেনা নুওয়ারল।

নিকা বিয়ানে মলয়া বৌ খাউরি। মুঙর পথগত নিকুলিয়া যে বেদে গাঙর সড়কগয়, উলুবুরাগর সাদানে জুম মারিয়া বটিয়া আছে, ঔবেদে কাকেইহান কারলু। মুরগ নঙেয়া খালকরানি অকরতেই মুঙে দেহৌরিতা, বেড় আহানর গজে বয়া কওয়া জেলা আগয় কওয়া মুনি আগর মুরগর চুল খুটা খুটা বাছেদিরী। যে কওয়ারে জিঙিল আনিকা জন্তু সংসার এহানাত দুর্লভ অছি, ঔ কওয়ার মাজেও প্রেম বানানুংসি আছে, সেবার খৌরাং আহান আছে। খালকরলে না ঙাকয়া নুওয়ারিয়ার। পেইরাক করে ফেকুনার হেইমাক আহান মুরর গজেদে টেঁটুস বোলিয়া ফরদিয়া গেলাগা। ইস্তিতে তানু মোরে মাতলা পারা— “হাবিএ যে পথগত ছুটেছি তিও ঔ পথগত যাগানে আপাংপা।” কুপ্‌করে তানুরে কতোহান চেয়া মাতলু, দুনিয়া এহানায় আকবেদে, মি আরাববেদে থাইং সুপ্‌ ক্ষতি নেই যদিচয় মি যম না ঠকেয়া ন্যায় পথগত থাউরি। আগরে আগয় বানাপানির নাঙ প্রেম। এ প্রেম এচুটি যৌন খৌরাঙর আকারে আদ্যিকার মানুখাকুরা

কন্দরবাসী ভয়ঙ্কর মানুরাওও আছিল, হিংসার অবতার বাঘবাঘিনীরাওও আজি পেয়া আছে। প্রেম এচুটি না থাইলে সংসার এহান সংসারহান নায়া মরুভূমিহান অলইলঅইছ। প্রেমল সংসার পাতিয়া হেইমাকে শৌ জরম দিতারা। কিমে করে শৌ ঔতায় নুঙেই অয়া জিংতা অইবা, এ চিন্তা এহানল মালকে সের আহান, বাপকে আধাসের ঔসাদে স্নেহল সেবাযত্ন করিয়া ডাঙর করতারা। শৌর গারি খানিগ্গারা নুওয়ারলে মালকবাপকর হৃদিগি অলাংসালাং অর, পরকার খানাপিনা, রাতিকার ঘুম পাখরিয়া তানু নুওয়ারা জিপুতর হেজীত বয়া গারি মাঠিয়েয়া থাইতারা, উরে করিয়া কতি সেমটেইতারা। এসাদে সেবাযত্নল শৌ জিংতা করে পারলে মালক বাপকর আনন্দর সীমা নেয়র, নুওয়ারলে শ্মশানর মাটিত বুক চাপাড়েয়া কাঁদিয়াও শৌর জ্বালা না ককর। আঃ, করুণাময় হরিএ কতি নিংকরিয়া তাঁর হঙ্করা জীবজন্তুর মাজে প্রেম বারো সেবা বোলিল মহৎ ভাব দুহান দিয়া দেহেতা। তাঁর আদেশহান— “হে মনুষ্য, মোর সৃষ্টি এহানর মা তোরে হাবির গজরগ করে হঙ্করেছু; তোর মাজে প্রেম বারো সেবা বোলিল ধর্ম দুহান দেছু এহানিল তি যদিচয় মোর সৃষ্টির জীবজন্তু হাবিরে বানাপানি পারর, ঔহান অইলে তি মোর কাদাহান পানা পারতেই।” ভগবানর এ য়াথাং এহান যেগয় পালেছে, ঔগয় শয়নায়া পরমার্থ পেয়া জনমহান সার্থক করেছে, যেগয় পালে নুওয়ারেছে, ঔগয় হাতচারা এলকরিয়া নানান সামগ্রীল দ্যৌর সেবাপূজা করিয়াও পরমার্থ পানা নুওয়ারেছে। আশীলক্ষ যোনীত ভ্রমণ করিয়াও তার পথগ লয় নার যদিপি তা পরমকারুণিক গুরুদেবরাংতঃ স্বর্গর ভিসা পাশপোর্ট আদায় করেছে। মি মোর জনমসঙ্গিনীগরে যৌকরে বানাপাউরি; শৌজিপুতরে স্নেহ করৌরি মোর মালক বাপকরে ভক্তি করৌরি, ভেইবুনি বেয়াপারে নুংসিপাউরি; নুওয়ারাপানি দুঃখ বিপদে তানু হাবির সেবা পরিচর্যা করাগি ঔহান প্রেমর আনুষঙ্গিক কামহান। তানুরাং দেছু নিংশিঙ প্রেম বারো সেবা ঔহানিঙঃ হোভাকরে হারপেইলুতাই— জগতর জীবহাবিরে বানাপানি বারো তানুর সেবাত নিজরে উৎসর্গ করানির পৈলাকার হিকিল ফামহান মোর গরগত আছে, মোর হুক সংসারহানাত আছে, ভুগেছু দুঃখ আনাংশার মাজে আছে।

মি আকফুরুং মরণর তুলো মুঙামুঙি অছিলু, মরণর তুলো সংগ্রাম করাগিতে পারাগি য়াকরের, কিন্তুমান মরণরে জিঙানির শক্তি কারতাও নেই মহাবলী দশরথ, বালী, রাবণ, ভীষ্ম, কর্ণ, অর্জুন, শ্রীকৃষ্ণ, আলেকজাণ্ডার, চেঙ্গিস খাঁ, নেপোলিয়ন পারা গিরক আকেইগও যে মরণর আইংপা বজ্রমুষ্টিত দুনিয়াঙঃ সেচিয়া গেছিগা, ঔ মরণর তুলো সাল পাতানি মি পারা ধুলিরাংতও তুচ্ছগয় কিহান শক্তি আছে! ঔ মরণ আচুল-পিচুলে প্রেম বারো সেবাল যেগয় যেগয় মোরে জিংতা করানিত উবা অছিলো ঔগিরে মি আজি পেয়াও অন্তরর বানানুংসি হাবি তেঙ্করিয়া বানাপাউরি, তানুরে নিংশিঙ অইলে মোর দুঃখদশা ককর পারা। কি নিজর, কি পরর সুপ থাক নেই, কি মারুপ, কি মিকুপ-পরিচয়র বানাপাকুরীগ থাক নেই, তানু হাবিয়ে মোরে

যেসাদে প্রেমর গাঁঠিল বাঁধিয়া থছি, ঔসাদে প্রেমল জগদীশ্বর ভগবানরে মি গাঁঠিত বাঁধিয়া থনি নুওয়ারিমতা? প্রেম সেবার হুতুমে পরিচয় পেয়ারতা মরণর হেজীত, ঔদিন ঔহানাত সংসারর আসল নকলর পরীক্ষা অর, ঔদিন ঔহানাং মানুর প্রকৃত জ্ঞান অর। ভগবানরে বাঁধিয়া থনার যে কৌশলহান মি আবিষ্কার করলু, বিশ্বব্রহ্মাণ্ডর জীবজন্তুরে বানাপানি বারো সেবা করাণির বিতরেই ঔহানর পানীগ আছে। বানাপাছু জনগরাং যে বানাহান কাৎকরেছু নিজর জিপুত জিয়েইরে যেসাদে স্নেহ কাৎকরেছু, ঔসাদে প্রেম যদিচয় মি জগতর হাবিরাং মাম্মা করে বিলাদেনা পারৌরি, ঔহান অইলেই ভগবানরে আতে আতে পেইতৌ বোলিয়া মোর দৃঢ় বিশ্বাস অর। কিন্তুমান আজিকার দুনিয়া এহানাং লঘুগুরুর ভেদ নেই, লঘুর স্নেহ, গুরুর ভক্তি দুরেই অইল; হেয়ক-মৈলকর মাঝে যৌন প্রেম থা-থাইলেও সেবার সম্বন্ধ নেই, সত্যধর্মরে কালাপানিত নির্বাসন দিয়া পরহিংসা, পরনিন্দা, পরচর্চা মিছা আচরণ হাবিয়ে সাধু বৈষ্ণবর বেশল ধর্মরাজ্য বহাছে; হাবির গজে মালক-বাপকর কুটনীতিএ জিপুতর সংসারে জিগ লাগাদেছে, বারো জিপুতর অন্তরগয় মালক-বাপকর যাংহানি সুপ্ কাপট্য না থ্যা সেবাপূজা করাণি নুওয়ারেছে। এসাদে প্রেম সেবার দুর্ভিক্ষ আছে সংসার এহানাং যে সদগুরুগয় হুদা কানে বীজমন্ত্র ঢালেদিয়া স্বর্গর ভিসা-পাশপোর্ট দেনা পারের, ঔ সদগুরু ঔগর ক্রিয়াকাণ্ডত মোর সন্দয় আছে। আজিকালি ধর্মর মেইখুম পিঁধিয়া মহাজনে দুকান পাতিয়া বহেছি। এ ব্যবসা এহানাং মহাজনগর লাভ, কিন্তু লকুরাগরতে ক্ষতি। তথাপি আশ্রম এহানাং পুলছি জনসমুদ্র এগ লাভ না দেহিয়া আপ্পানে পুলছিতা? শয়নায়া লাভ থা থাইব। কিন্তু মি মোর অজ্ঞান মন এহানলো ঔহানি হার নাপাউরি। নিজর দোষাদোষ হারপেয়াও মি আজি কিয়াকা নিজরে হাবির তুলো তীলকরাণি নুওয়ারলুতা, কিয়াকা ভক্ত সমুদ্রর উলফালি টৌগয় মোরে আজি বুলাদেনা নুওয়ারলতা? হাবির মান্য গুরুদেবর সুতীক্ষ্ম খেন্দারেই আঁহিগিয়ে কিয়াকা মোরে মন্ত্রমুগ্ধ হরপগর সাদে আশ্রমহানর ভিতরে আচুলে নুওয়ারলতা? শয়নায়া মোর হৃদিগত ভক্তির দুর্ভিক্ষ লাগেছে, ঔহানল পাপর মলচাকালো সারুকাবারী দিয়া সাধুসন্তর কাদাহান পানা নুওরারৌরিতা, ঔহানলো এতাপারা আশ্রম এহানর প্রেমগঙ্গার জোয়ার এহানাং মি নিজরে সমর্পণ করিয়া পাপমুক্ত অনি নুওরারৌরিতা, ঔহানলো এতাপারা অনায়াসলক্ক স্বর্গর ভিসা পাশপোর্টহানি মুঙে দেহিয়াও করযোড়ে চিস্তগ যৌকরে গ্রহণ না করৌরিতা। এসাদে মহেন্দ্র স্কেল জনমে আর আহিতয় বোলিয়া নিংনেই। করুণার অবতার পুকচেল ডাঙরিয়া গুরুদেবর এসাদে দেহাহান জনমে আর পানা পারতৌ বোলিয়াও মোর নিংনেই। নিজর এ আতল্‌পা মন এহানরে মি 'ধিক্' না বোলিয়া নুওরারৌরি। ঔহানলো আজিকার পূর্ণিমাহান পারা শারদ বিয়ান এহানায় মোরে আনন্দ দেনা নুওয়ারলো।

বিয়ানকার কওয়াগর তুলো গরেক্তঃ নিকুলিয়া কতি খালকরানির জটগত পরেছুতা! আশ্রমহান ইল আগে লালয়া গেলুগা। কিন্তুমান খালকরে খালকরে আটলে পথ বাড়ি অর।

ঔহানল খঙ্কুল খুচানায়া কাকেইহান আরাকও দীঘল করলু। আজি এ পূজার সময় এহানাত বুজন গিরিগিথানীরাংতঃ শৌর হারৌতিয়ামে জবর। পূজার ফুতি ফালিতে তানুরকাহে লদিয়ার নাই। আজিকার এ শারদ বিয়ান এহানাত লেইকেইর শৌ সুমারায় যারযির ফুতিফালির মচা আকেইহানল নিকুলেছি। মোরতাতে কতি হোভা, তোরতাতে শাক্তি, হুঙ্কা এচুটি আগরে আগয় মাতানিরকা যে শৌসুমারায় মুঙর বাহাজারির বেঙ আহান গজে বেলিহান কাইলেও কালীবারী খেওয়া পেয়া ঘুমেত্তঃ উঠানি না মনেয়া গারি কেজেইতার, ঔ শৌসুমারায় বিয়ানত্তঃ আঁহি মুজুরে মুজুরে যারযির মচাল নিকুলেছি। দেহিয়া মিও নিজর কনাককালর স্মৃতিখানি মনহানাত আনিয়া হারৌ অইলু। আরাকও কতো কাকেই দিতে দেখলু, জরাজীর্ণ সাংশৌ আগর দারিগত আতুর শৌ আগ সেচারা সেচারা নিকুলিল। উঠানে বয়া লেইরায় খম্থেঙছে বাপকে কুকালার করের। বাপকরে চেয়া আতুর শৌ কঙালা হেইচার সুরগল মাতল, “বাবা হাবিরতাতে ফুতিফালি লছি, মোরতাও আঙেই আহান লদেনে”। ছনিয়া ঠাইগ থুক করল। বরাভালায় শৌ জিপুতরকা হোভা হোভা ফুতিফালি জুতামুজা, ঝমকাচমেই লদিতারাতা লেইরাপার শৌ জিপুতরে কাঁদুওয়ানিরকা। অচল দীনহীন শৌ এগর করুণ হেইচা এহানে হদিগর পরল হাবিহান সেদিয়া হো কমুংগ পেয়া খুটোনাটো করে বেলল। আকবেদে লেইরা বাপকর রূপানেই জ্বালাহান, আরাকবেদে এ বিকৃতঙ্গ আতুর শৌ এগর উরণ পিঙ্কনর আগ্রহহান খালকরিয়া জবর দুঃখ লাগিল। ভগবতী দুর্গার আহিরী উম্হান আতুর শৌ এগর অন্তরগতও লাগেছে, আনন্দর জোয়ার কাকরেছে, নিজরে হাজানিরকা তারতাও নিষ্ঠা আহান লাগেছে। কিন্তু কিহান কানা? আতুর বেতুর গারিগত ফুতিফালি লাগেয়া কিহান কানা? আঃ ভগবানে কারে কিসাদে করে সংসার এহানাত দিয়া পেঠার, কিগয়জানে, কিন্তু আমি জানিতাই আঁহির পানি বেলানি। এতা এতা চিন্তাল আজিকার নুঙেইপা শারদ বিয়ান এহানাত নুঙেইপার রেঞ্জ আগ না পেইলু।

গরে আলয়া ফেইচম আহান লনারকা যে ধনহানি বাঁপির মাজে ইতু করিয়া থছিলু, ঔহানি নিকাললু আতুর শৌ ঔগর আঙেই আহানায়, পাতলুম শৌ আহানায় লদেনারকা। পূজার সময়হান— রাতি শিংনা না ঘুমজিয়া রাঙা আঁহির পটেদে ধলা পেচুটি নিকালেয়াও দর্জি মহাশয় গাছির আত সাং নার সময়হান। ঔহানল ফুতি ঔহানি সিলাই দিতে হাপ্তা আহান সময় লাগিল। এবেদে শৌ এগ পেইরাক করে তাপল হেজীত আটয়া পরেছে। হজক-আতরমা হুদা খুলেই দেছি, ঔতাও খলর জিরে নুন ভরেয়া। হাতে হাতে শৌগর নুওয়ারাহান পাঞ্জিফাম যওছে। ফুতিফালিল যেবাকা তানুর গরগ ফওইলু, পেইরাক উঠানর পটে মালক বাপকর হওয়ার বহালা নারর কাঁদানি ছনলু। বদাগত উবা অয়া ভিতরে যে দৃশ্যহান দেখলু, ঔহানাত মোর গারি আতজাং হাবি ঠুকরল। শৌগর গারিগত আতহান দিয়া চেইলু, ধানগ দিলে কাপকগ

ফুটতয় পাৰা, ঔসাদে তাপহান উঠে। মাঠিয়েয়া মাঠিয়েয়া মাতলু, ‘বাবা, তেল্লাম ভালা অ, তোরকা চাহ— কতি হোভা ফুতিফালি আনেদেছুতা; এহানি পিঁধিয়া দৌ চানাত যেইবেগাতা হেৰু।’ মৱাৰ তাৰৌহান পাৰা আতহানিল ফুতিওহান আকফুরুং আতেয়া দীঘল নিংস্থা আহান কৱল শৌ এগয়। মালকে-বাপকে তাৰে ডাকতারা, কিন্তু টটৱানি নুওয়ারেৰ তা। হজক আতৰ কথা আকৱিয়া হাৰপেইলুতায়, গাঙৰ ছনাশৌ মেইপায় উসিল সিলকৱেদেছে, ঠাইমামি ডাহেদেছে। আকৱিয়া আৱাকও হাৰপেইলু, তানুৰ ঘৰে ঠেকিল মানু নেই; সাধুসন্তৰ আশ্রমহানাত ভক্তবৃন্দৰ প্ৰেমতৰঙ্গত ভাহেছি। সময় কৱতাও নেই; বিশেষ, আজি অষ্টপ্ৰহৰ নামসংকীৰ্তন উনি? ওহানল থংমেইল বিছাৰেয়াও মানু আগৰে পেইলহান নাগৈ। দণ্ড আহান কাদাত বহিতে নুওয়ারাহান আৱাকও জবৰ অইল। আথারে পাথারে গুজুৱানি অকৱল। নিৰুপায় মালক বাপকৰ বিদক্ষ বুকগি ছেং কৱল। পেইৱাক কৱে ঘৰৰ টুল্লীৰ হাৰাংবেদে আতহান দেহেয়া চীকাৰি দিল শৌগয় “ওঁৱে ওঁৱে আহিলা, ওঁৱে মোৰে আতহানি টিংদিয়া আয় বোলিয়া ডাকতারা, মি যাউরিগা, মোৰে না খামকৱিয়ো; না— মি না থাইতৌ, না-না-না” পাহাং পাহাং কৱেৰ গাৰিওগ মাঠিয়েয়া মাতলু— “কুৱাং যেইতেইগাতা বাবা, পূজা না চেইতেইতা?” কিন্তু তাৰ গাৰিগৰ জ্বালায় সমুদ্ৰত মোৰ কথা এচুটি কুংবেদে হ তলহান পেইলোগা। তাৰ হিনওগ হাবিগ দেহিয়া মনে মনে সিদ্ধান্ত কৱলু, মৱানিতে নুঙেই, কিন্তু মৱানিৰ লাকনায়ন্ত্ৰণা এহান পাৰা হিন দুনিয়াত নেই। ও যন্ত্ৰণা অইলতাই আড় মাউল হক্কা দেহপিঞ্জৰাগন্তঃ ঠাইগ লালনিৰ সমস্যা এহান। কুৱাংকাৰ হক আগ এয়া খৌনাউগ চিপেয়া ধৱল। তপ্তা পানিৰ ধাৱা আগ বাঁধ ভাঁগিয়া আঁহিৰ কোণগি চিৱেয়া নিকুলিল। ফেইচমৰ চুটিগল লুকেয়া আঁহিগি পুছিয়া সালইলু ডাক্তাৰ আগ ডাহানিত। সহৰেস্তঃ ডাক্তাৰ ডাহিয়া আনানি গাঙগৱৰ পক্ষেতে ডাঙৰ কাম আহান। মানু আগ পেইলেতে দিয়া পেঠেয়া নিজে নুওয়ারাগৰ কাদাত ঠেকানি মনাছু। চেইতে চেইতে আশ্রমহান পেইলু। আজি আশ্রমে অষ্টপ্ৰহৰ কীৰ্তন লাগেছে। দীক্ষাধন্য ভক্তসমুদ্ৰৰ বুকগত ‘ষোলনাঙ ৩২ অক্ষৰ’ৰ ইথেই আকেইগ এৱা মোৰ কানে নুংশি কৰে ফওৰ। ঘোৰ কলিৰ দুস্তৰ ভবসমুদ্ৰহান লালনিৰ নৌগ অছেতাই “হৰেনীমৈব কেবলম্”। ৱাধাক্ষৰ বিগ্ৰহৰ মুণ্ডে আৰ্তি ভোগ লাগাছি, হৰিনাঙ সলকৱতে সলকৱতে দুগ আগয় পাহাং অছি, প্ৰসাদ লক্কাৱিয়া ভক্ত হাবিৰে আনন্দৰ আতিশয্যল এলা নাছাত গং ধৰেছি, মেৱাক ভক্তয় বাৰো মণ্ডলীগত পৱেছে বৈষ্ণৱৰ যাঙৰ ধূলিল গাৰিগ লেপানিৱকা গড়াগড়ি দিয়া দিয়া ধৰো-মাৰো অলনিত লাগেছি। বাহুল অয়া আগৰে আগয় কোলকৱে কোলকৱে গুৰুদেৱৰ যাঙৰ ধূলি মূৰে লয়া মেৱাক ভক্তয় তাঁৰ চৰণামৃত পিয়া ইহজন্মৰ পাপতাপ কক্কাৱি লাগেছি। এসাদে ক্ষেল এহানাত কাৰে ডাকদিতু। দুগ আগৰে পেয়া বিষয়হান জানেইলু আৰো নানান কাম দেহেয়া আশ্রমে হোমেইলাগা, আৱাক ভক্ত আগয় ইজ্জু কৱে মাতল— “কৃষ্ণকৃপা,

চৌলগ থাইলে আপ্পানেও জিংতা অইতয়।” ভবনদীর খেওয়ানীগর কাদাহান বেলিয়া আকগও নুওয়ারা শৌ ঔগর সেবাপরিচর্যাত যানা না মনেইতার। সহরেঙঃ ডাঙারগ আনিয়া দেহুয়েইতে সেক্কাহান এলইল। হোভা করে চেয়া ডাঙারগয় লুকেয়া মোরাং মাতল— সময়হান লিতছে, এবাকা হজক আত দিয়া লাভ নেই; নুওয়ারাহান অইলতাই ডবল নিমুনিয়া। মালক-বাপকর মুঙে কিহানও মাততু! তানুর দুঃখ সমুদ্র এহানাত মর করে পারিল উপায় আহান আর না দেখলু। বেড়র হারাঙেদে দেখলু পঞ্চমীর চিলাহান পারা জোনাকহান হাতে হাতে পিঠিরঙরে বাঁহা ঔসপার আউরে বুরে যারগা। অস্তিমর ইঙ্গিতহান এহান? ইমং মতছে হেজীর পচা কাস্তাহানি সেচেয়া হোভা ফাম আহান হক্কে দিলু বারো আনেছু আঙেইহানে পাতলুমহানে জনমকারকা তারে পিধাঁদিতে পিধাঁদিতে ডাঙর হক আগ এয়া মালকবাপকর মুঙে কাঁদে বেললু। “বাবা কালিতে পূজা, দ্যৌ চানারকা ফুতিফালি এতাল হাজিয়া না যেইতেইগাতা; তি না মাতেসিলে আঙেই আহান লদে বোলিয়া” এতা বোলিয়া বাপক ঔগয় বুকগত চাপাড়া চাপাড়া কাঁদানি অকরল; মালকে মাটিত গড়াগড়ি দিয়া রৌমেলিয়া কাঁদিয়াও পেলো নুওয়ারলী। রাতিহান লমইল মুঙেদে সাচাকগ নিকুলিল। ঝলকেয়া ঝলকেয়া তা মাতলপারা “আয় তি, দুঃখর গরগ বেলিয়া আয়।” কণ্ঠবিরহ আহিল মহাযাত্রার বাট্টি নিংস্কাহান কারিয়া আতুর শৌ এগর আত্মাগ পৃথিবী লালয়া কোন মহাশূন্যর বুকগত লুকেইলোগা।

খলগো কোলকরিয়া মালক বাপকে যেসাদে জুরে জুরে কাঁদলা, বিশ্ববন্দ্যাত এগত ঔসাদে কান্দনর তুলনা বিছারেয়া না পাউরি। নুংসিপা যত্নর ময়নাগয় পিঞ্জরাগ বেলিয়া গেলগা যেসাদে করে গিরিগর বুকগ উদালা অর, ঔসাদে করে আতুর শৌ এগর মালক বাপকর বুকগিও উদালা অইল। মানুরাং আতুর কানা, খরা, অইলেও মালক-বাপকরাংতে ঔসাদে শৌ ঔতাও যক্কা ময়নাগরাংতঃ জিঙে নুংসি। মরাণির সময়ত আকফুরুং আঁহিগি বিধেয়া তা মোরে কুপকরে চাছিল। ঔ দৃষ্টি ঔহানর নিগুত তত্ত্বহান মি পিছে হারপেইলু। ঔ দৃষ্টি ঔহানাত মোরে দীক্ষা-দিল বীজমস্ত্র আগ মুর্ত্তিমানগ অয়া নিকুলেছিল। মরণর সময়ত তা মোরে দীক্ষা দিয়া গেলগা। আজিপেয়াও তা কালাচিংখেইর সাচাকগত থায়া মাতের— “প্রেম বারো সেবারে জিঙিল ধর্ম পৃথিবী এহানাৎ নেই; ভগবানরে সেক্কাৎ করে পেইং বোললে ধর্ম এহানিরে চেৎকরে ধর, হে মর্ত্ত্যবাসী! এহানিই তোরা স্বর্গ পানার ভিসা পাশপোটহানি হারপেইছ— আরতা হাবি অছেতাই যম ঠকানির সামগ্রী।” ঔহানলো মনাছু, এ নুংসিপা পৃথিবী এহানাত জনম জনমে এয়া প্রেম বারো সেবার ব্রতল আতুর-কাস্তালর হাদিত থাইং বারো তানুর মাজে ভগবানর দেহা পেইং।

□

বিষ্ণুপ্রিয়া ২য় বর্ষ ১ম সংখ্যা; কার্তিক ১৩৬৪ সন (১৯৫৭)

নির্বন্ধ

পিঠির হাকহানাত দিনমনি বেলিরাজা রাং রাং দিল। মোর ভবভোলা জনম এহানও আজি ইমে এসাদে লমনির স্কেল হান বাসেয়া রাংমুবারী দেসে। লেইরীগর পাষান হিল আগত বেতরগ দিয়া আহাতুলীরমা বক্চা আহানল বহেসু বার ইহজনমর বেলেয়া আহেসু আহানি কাদানির অধ্যায় আকেইহান নিংশিঙে আনেসু। পটে পটে অসে বেলিহানরে আহির পট নামারিয়া জিৎদরে ইমে চাউরি। কনাক কালে বানা নুংসিল চন্ম অসে ইমার যাহানাত বদনহান লুকেইলুকো পুরি নিজরে কতিচুরা দুনিয়ার হাবিস্ত বরা বালাগ নিংকরেসিলু। আজি ঔ মোর ইমা নেই। গাঙ লেইকেইর লেংকার তুল চাতলে উঠানে লপুকে সরার পারে কতিও বিহার করলু, ফাগিস্ত কৌলি নিকালেয়া আহৌ প্রলয় করলু। বুজন লোকেইএ আমারাংত হুতুমে কৌলি বাধেয়া হোমা হোমি নাঃ বুললা, টটরা টটরী— বন অইলা। আমি কনাক লেংকায়তে মনহানি ইদুমদোরা করলাংকো পুরি তেল্লাম আগরে আগয় ডাকলাং— “অ নিদেবী— নিকুলনে। লগে লগে পুলয়া হাকরা, বন্দী, চিঞ্চিকী— মিঞ্চিকী খেলেয়া হাবিহানে চীকারি বিকারী দিলাং। হান্তে? হান্তে— যৌবনর মলয়া বৌহানায় য়েবাকা— লিরি লিরি বারী দেনা অকরল, ঔমাপাত ইচু দিনর ইমার উম উরহান এরে দিয়া, ইচু দিনর লেংকার ধুমেল সঙ্গহান বেলেয়া অলাং সালাং অনা অকরলু। ঔবাকার মনহানায় হোভা নাপেইব আগ নেই, বাহানা নাপেইব আগ নেই। যৌবনর আনকহানল বেগরে দেহৌরি, হোভা পাউরি।

যৌবনর লালসাতে মাতিং বুললে, বনাল আন্তিগয় কদলীবন মুজুরানিহে পারা। আজি ঔ কাল ঔহান নেই, ঔ লেংকাও নেই, বার যে রূপবতীর সালে ইচুহান অসিলু, তেঈও, আজি নেই। ঔদিনকার যৌবন তরঙ্গর এক্ষা-এক্সি আচুলঠেলা খেয়া কুংগয় কুংবেদে সেচরন খেইলা, উসুটন খেইলা, ছিকদন খেয়া কুংবেদে পড়লাতা, পাত্তা না পাসু। ঔতার হাদিত নিদেবীও আগ। যৌবন ঘোরগর হপনতে অরতে হপন নাই। কতিরে পানার হপন, কতির চুরা ডাঙর অনির হপন, হায়তা নাগয়তার হপন ইকরিয়া লমনার। যৌবন জোয়ারহানে ভাটিয়ল দিয়া দিয়া তেঙর তাঞ্জারমা মনুষ্য বুলতারা জীব এগয় কিমেতে করের বুললে ছনো। নোরা কেথকর গজে থংহান, বাধ দিয়া তা হাবিরাংত খানি খানি স্কুলনি মনার। দশগয় স্কনিয়া আহিল টুকা টুকি করলও তা ‘হাস্য’ হান বুলিয়া ভৌ নাপার। কিস্তমান মনহান ইতু করানি মনেইলেও গারিগ ইতু করানিতে পারিল হান নাগই নাই। এসাদে কনাক সানার পরল আহান কেলনিয় জীব এগর দুরবস্থাতে কিতা মাততু গারিগরে মনহানরে আরতে ইতু করানির সম্বলহান নেয়র।

ঔবাকা হাবিত্ত জেটনির নোবারা আহানায় তারে হোভার ফাগিরাম আগ হংকরের। “বাবা, তিতে মোরে না হমাদিয়রতা? কনাক দেকলে এসাদেতা টটরার। হাশ্তে, কপাল হোভা জনে ইমেও হমা পার, কপাল থি জনে দাবী করলও হমা না পার। চিখা বয়সর ভেঙ্কি এগ আহিগিল দেকতে, না কানল ছনতে? চেইতে চেইতে মোর ছনার গারি এগ চিখা অনা অকরল। জরাজীর্ণ অঙ্গ উপাঙ্গ হাবিত্তা ইমে ভরী অনা অকরল। ঙাহাক মনহানে চেতনি মনেইলে দেহগ চেতনি নাকরের। এসাদে স্কেলএহানাত নিদেবীরে চেইতে মাতে পারিল উপায় নেই যে আকদিন যৌবন রসমাধুরীল গারিগরে চম্ব বুজেয়া তেঈ বিশ্ব সংসার এগর নয়ন মণিগ অসিলী। হা কৃষ্ণ!

“জেলেইর যৌবন ধন

যেপি কৃষ্ণয় দেসে মন

ঔ ধনতে দ্বি চারিদিন”

আজিকার রাং রাং দেসে বেলিহানর বেদে আহি এগ নিবদ্ধ থয়া মোর মন এহানাত এগ হাবিগ কথা বরিষার সরার হতগত কৌহাঙর সাদে বোলে বোলে নিকুলের পারা। আহির কোণগিত আহির পানি নিকুলিয়া আহের তাঙ্গ মোরে না বাগেয়া নিজিল। আকবেদে বেলেয়া আহেসু নংসাং দিনর পথগয় আকেইতুপ মহিমাল মন আহিগির মুঙে সাদ্রাংগ অয়া নিকুলের, বার, আরাকবেদে অন্তাচল টেঙারাগর কুণ্ডগরমাঁ হোমা যারগা দিনমণি বেলিহানর অপরূপ হপনহান মাথ্ রাংমু মায়াজাল এহান দেহানিরতাও কতি দিন বা বাকী থাইলতা— এ ভাব এহানায় মোরে অস্থকপা তাপ আহানল ঔলি জৌলি ডহের।

কিষ্টমান নিদেবীর অকরেসিলু নির্বন্ধ চুটি লমনাসে। কনাক কালর নিদেবী বানানুংসির গটাগ। লেংকার হাদিত ডিক্ ডিক্ করে আঁহিরী, খুমগর সাদে নাছিরী, চেলাচকীগর সাদে ফদিরী পারা। এসাদে হারৌ পিয়ামল মূর্তিমতীগ অয়া জরম অসিলী নিদেবী। যেসাদে লিক লিক গারিগ ঔসাদে ফুলগ পারা কঙালা, সরস্বতী ইমাও তেঈর কণ্ঠগত বহেসে। তুল্ তুলেয়া যৌবনে পারাহান বেলেয়া নিদেবী লাজপানি হিকলী; মুরগ নঙেয়া আটানি অকরলী; লেইরিক চপহানল আকফুরুং নঙলী বুললে দ্বিবারা দিশাং না চেয়া ইস্কুলে গেলীগা, আলথক্ আহিলী। বিদ্যার ঘটগ তেঈরে দ্যৌএ আতাং না করেদেসি। হাবির আশা, নিদেবী এ জাত এহানাত আগতে অয়া নিকুলতয়। তেঈরে দেক্লাকো পুরি বেয়ক নন্দবাপু বার ব্রজবাপু দ্বিয়গয় ঈশাহানে থাইল পথ না পেইতার। নাঙর তুল বাপু থাইলে বামুনগ হারপানি লাগের। তা আর নিদেবী বামুনী শৌগ। মালক বাপক নেই থাঙও তেঈ বেয়ক দ্বিয়গরাংত কম বানানুংসি পাসেগ নাগই। ব্রজবাপুর জ্যেঠা বেয়কে দশকর্ম সুকরানি মনেয়া বহকশৌ আগ বিসারাত নিকুলিল। নিকুলতে স্বরফামহান বাঙ্গেদে বুলন দিল, আ-র চুমকরানি নাইল। কথা বেলানিতে ইতিপূর্বন্ত অসে, তা-আর ‘জয় মাধব’। নিঙল শৌগ চেয়া নন্দবাপু ঈশা ঈশা অয়া তাছা পাঁচহানও আতে

দিয়া আহিল। हास्ते किसादे निङ्गल बुलले उल्लेख आग एपित थना लागेर। ये जातर तुल सामईले जात माङ्गनि नेई, इमेते तङ्गल जात, ँसादे जातर निङ्गल। लङ्ग चेया ब्रजबापु संसार बन्धनरमां हमेईल। नन्दबापुए बहकग पेया हारौ अईल, निदेवीए बईजकग पेया हारौ अईली। बईजक ननदक कतिते राशि तिलसि बुलले इमे भात मङ्ग कला मङ्ग। बईजक एगर ज्येठा वेयकर नाङ्ग आतम्बापु, तेईर नाङ्ग लेईनु। लेईनु पारा माईनु आग पेया ब्रजबापुए गातटेका पाहरल, वनक निदेवीर वेदे पां आं डां नेई।

आतम्बाय निदेवीरां आहिग विधासे; निदेवीरता ँवेदे पां हसहान नेई। द्विदिन सु नार, ता निरिखहान करे वनक उना अनिरका आहर। नन्दबापुए बार तार माईनु गिथानके थानि अलां अईतारा, किञ्चमान फुकारा नोबारतारा। सरईहान पेया आतम्बाय अभिसार घनचाल वारी दिल किहानारकां ये लेईनुए आतम्बाय एमाटिक टु-टा करतारा-भौ पेईल् उपाय नेई। बहकग बुलिया वनक हौरक गुरङ्गन देकले लेईनुए पां मूरग गुरानि नेई। लाजे डरे मेईथं जेनाक ँहान नङ्गनि नेई, पिदिरी आङ्गलुरीहान जाङ्ग पता शकनि नेई, कांकेई बेलते लङ्गीर चलन नेई। तत्राच ब्रजबापुआंते तेई आम्बागांठिग। लेईनुए तेईर ठारल केथकहानल येवाका नुवा तेनुरार नारल टटरे आनिरी, ब्रजबापुए ँवाका गलितं मलितं अया थाईव पथग विसारेया ना पार।

आतम्बाय लेईनुए चेकचिल कथा टटरा टटरा किहान लेपकरिया किगय जाने, पेईराक करे निदेवीरे लेईसिखाना सटन दिया तेईरे आतम्बाय कादाहानात बेलादिया लेईनु एगय सेचे येईरीगा। निदेवीए लाजहाने राङ्ग अईरी। तेईर तुल फागि करे करे आतम्बाय इमे इमे मुंवेदे कांकेई कारानि अकरल। निदेवीरतां पैंलाकार लाजहान ककईल। बईजकर वेयकग, लाजपानिरं कारण नेई, टटरते बाधदा बाधदिं चूम नेई।

एसाने काल एहानात निदेवी परीक्षात होभा करे उक्तीर्ण अईली। चाकुरी आहान निकुलेसे बुलिया लगे लगे पौ आहानं तेईरां फरईल। सात्ताहान पेया आतम्बाय पाना, अईल। इस्कुल आगत चाकुरीहान निकुलेसे, ता येसादें गजरतारे धरिया चाकुरीहान आनेदेना पारतय— संकल्प साकार अस्तहान नेई। दुनियार यत डाङ्ग डाङ्गिया एता हाकि तर जेवगत। एसाने मित्रां दिया निदेवीरेल आतम्बाय घरभितरगत दोराहानात निकुलिल। चाकुरी लेपकरानि बुलिया निदेवीरे हाते हाते सिनेमाघरे भरेईल। नन्दबापु माईनु ँगय हावितां हारपेईरी, किञ्च थताहान केगालान्णिये संसारहान द्विकरं अरहान देहिया तेई तूमिल् अया थाईरी। नन्दबापु एईगाय मुनिर स्कुल मनहानल आदा हारपार, आदा हार नापार। सङ्गेहं मनहान आनिका अर। नन्दबापुए मनहान आनिका करानि ना मनेईल।

एवेदेते निदेवी एग संसारर नाल पथगत कांकेईहान होभाकरे कारानि ना हिकेसेग; ता आर पेईराक उछुटन थेईतें तेईरता विचित्र नासे। आतम्बाय लेईनुए

হোভার ময়ূরগি; রকতর গুণে পেখম ধরানি নিয়াম জানি তানু। যেবাকা এ দ্বিয় বেইবুনিএ পেখম সালকরিয়া নিদেবীর মুণ্ডে ভঙ্গী বাকাল বিহার করতারা, ঔবাকা তেঙ্গর মনহান ছত্ৰমে পৃথিবীহান এরেদিয়া আট্টিঙ্গারমা ফরদানি অকরের। হাতে হাতে নিজেরে নিজে এরেদিয়া নিদেবী মাইনুএ তেঙ্গর কঙালা কপরসগন্ধ হাবিহানিল অপথগ পারা আতম্বার পেখম হানির তলে হোমেইলীগা। লেইনুতে হারৌ হানে হাকাং, ঔহান চেয়া হেয়ক ব্রজবাপুও হারৌহানে হাকাং অসে। অবশ্য মনহান হারপেয়াতে নাগই। কিয়াকা বুললে, হেয়ক মইলক সংক্ষেপে হেইমাক্ বুলিল যুগল এহান আত্মা আগর দ্বিটুমা। নন্দবাপুর থারানী গিথানকে হারপেয়া গুজুরিী। তেঙ্গর ভাছরা হেয়ক মনি এগয় ধমক হানল পটক মাতেদের, ঘরভাঁগানি, খেইকরেদেনা এহানাই জেলেইর স্বভাবহান। গিথানক এগয় কনাকতঃ মালকবাপক নেই শৌএগরে মালকগর সাদে বানানুংসিল পালেসেগ, ডক ডক পুরী জেলাগ অইলী পিছে নিদেবীর রাঙা রাঙা মেইথংহানর বেদে আহিগি বিধেয়া থারানী গিথানকর হুদিগ হারৌহানে চম্ব বুজেসিল; থাং, কিসাদে জালক আগরে ঘরগত ভরেয়া রাঙগ হোমেইল। ঔ রাঙগয় নিদেবী পারা পূর্ণিমার জোনাক হানরে গিলে বেল্ল। থারানীর ঠইগ ডহের, ঘরর কোণ্ধেলে আহির পানি বেলেয়া তপ্তা নিংশা কারিী। তেঙ্গর বুকগত লাগেসে চুষর জ্বি এগ ভগবানে ইজ্জু দেহেরতা। নাইলকো— হারপেয়া থারানী গিথানকে নিদেবীরে কাদাত বহেয়া কতিও বুঝেইলী থাং কানাহান না দেহিী। নিশ্চকে নাইল, দাবেয়া চেইলী থাঙও পানি না ধরল হারপেইরী। বিধির কলমগ আতম্বাপুর বাপক এইগা ঔগয় নিদেবীরকা নন্দবাপুরাং কথা বেলল। বিনক গরে হালাকগ হংকরানিতে কিহানে। ঔতার গজে মনাসি সমন্ধ এহান সুপ নিজর নিজর মাঁ পটাপটি হানও পারা। নন্দবাপুএ ঠাং নাদল।

এফুরং লেইনুর জুরাগ মুকিল। ব্রজবাপুরে মাতিরী “মোর বেয়করাং নিদেবীরে না দিয়া হে চেইনে।” লেইনুর চাঙহানহে হাবিতা এগয় হোভা করে জানে। না বুললে হায় বুলিলহান নেই, হায় বুললে না বুলিলহান নেই। ব্রজবাপুরতা পানীত কুস্তীরগ, থলে বাঘগ, বুঝেয়া চেইল “নিদেবী মোর ক্ষুলি বনকগ, যে বিনকগরে মি হমা দিউরি, ঔ বিনকে সেংকরে মি হলাক এগরে বিনকগ বুলিয়া হমাদেনা এহান চুমরতাকো লেইনু?” “গম্, গম্‌নেই, চুম চুম নেই আমি নাজানি, আমার তাতে যাকরানি বার তোমার তাতে নাকরানি ছঃ” কক্ লেইনু এগয় কথাহান লক্করলী। ব্রজবাপুর নেম্পালে লেইনুএ হোভাকরে কাইলী। তারতাও এ প্রস্তাব এহানাত মত নেই। নিদেবীরতা মতহান কিহান হারপানী মনেয়া ব্রজবাপুএ নিদেবীরে চেকচিল করে আঙ্করিয়া চেইল— তেঙ্গরতা আপত্তি নেই। তেঙ্গরে তা বুঝেয়া চেইল, সমন্ধ এহান শাস্ত্র ইলইলে গম্‌নেই, সমাজরমাঁ দশে তাথি করতায় নিদেবী নিচুপগ। জ্যেঠা বেয়ক নন্দবাপুরে হাংটেয়া চেইতে তা বার জিগ। বইজক অনুরাধা থারাণীতে সুপ ঠাং নাদিী। দিন যারগা মাছি লেইনুএ হেয়করে চুষর জি আগত পুড়ে নিরীগা। আকদিনতে ইজ্জুকরে তেঙ্গ হেয়করে

ছনুবাদিলী “মোর বেয়করাং নিদেবীরে ঠাচা নাকরলে মি ঘর এগত না থইতৌ। জনে পানে কথা এহান জালক অনুরাধার কানে পড়িলগা। তেঈ লেইনুরে ডহিয়া মাতল— “চা লেইনু, আমি পাঙাল নাগৈ, আমি বামুন, ঔতার গজে বিষ্ণুপ্রিয়া বুলিল এহান নিয়াম আরুপী জাতহান। এ জাত এহানাত আমি জরম অয়া আমি বা বামুনে এসাদে বেভার আচরণ করানিহান অইলেতে কালির গাই পতিত বেলতে হাটন নেই।” কোস জুরাগ টিকগত বাধ দিয়া লেইনুএ রাঙমু মেইথঙহানরে আরাকও রাঙাগ হকুরিয়া মাতলী— “বেলা বেলা তোর জাত বার বেভার আচরণ”। “কিতা বুললে বেভার নেই জেলাগ?”— অনুরাধা থারানীর থতাহানাত জির মেইরিক আগ নিকুলিল পারা। কয়দিনও নাসে আনেসি বহকগর প্রগলভ আচরণ এহান থারানীরাং শেলগর সাদে বিধের। বইজক জ্যেষ্ঠী এগরে পাং আং ডাং নেই। অনুরাধা তেঈরাং হু কালগ অইলী।

সংসার এহানাত যেবাকা এসাদে অশান্তির জি আগ লাগিল, ঔবাকা আকদিন ছতুমে করে লেইনুএ ঘরগ বেলেয়া বাপকর ঘরে গেলীগা। ব্রজবাপুর মনহান অলাংসালাং অইল। নিদেবীএ লাজহানে থাইব পথ নাপেইরী। নন্দবাপু বার অনুরাধার ঘুমতুম নেই। আতম্বা এগ বার বনক নেই হারপেয়াও নিদেবীর সান্তাহান বিসারেয়া ছুরিগর সাদে আহের যারগা। ‘এসাদে নাহিস’ বুলিল কথা আহান তারে মাতিল হিম্বৎ হান কারতাও নেই। নন্দবাপুএ কুপকরে ভূত, ভবিষ্যৎ খাল করলকো পুরি সংসারর মুংহানাত কুমগ পারা দিন আহান দেহের; নিজে নিজে টটরার ব্রজবাপু এগয় বহক এগরে গজে কাকরতে কাকরতে হাবিগ লমকরল; দ্বিয় বেইবুনির হাদিত তাম্ফাগকরে পাসু নিদেবীরে পিস্তিরীএ ধরলা, অস্থকপা পাপর গ্রহ আগয় পেইলতা নাই এ হৈঃ।’ অনুরাধার হেয়ক এইগা এগর অবস্থা এহান দেহিয়া মাতিরী— “এইগা, তি জবর খাল করর তাহে। হোভা পাত্র নেইতা নাগৈ। সুপ নার কাফামে পারাহান বেলেয়া কুল ধর্ম মাংকরানির কি হেতু আসেতা—?” নন্দবাপুএ দিঘল নিংশা বেলেয়া মাতের “হু”। এ ‘হু’ শব্দ এগর অর্থহান অনুরাধার ভৌপানি নুয়ারলী।

ব্রজবাপুএ লেইনুরে আনানিরকা হৌরকর ঘরে গেলগা। “পারৌর হেইমাক ঔহানতে মি এইলুতা পেয়া তুমীল নাসিতা—?” ব্রজবাপুরে দেহানিয়ে লেইনুএ এহান মাতে বেলল। ইচুদিন যে জ্যেষ্ঠা বেয়করে বাপকগ বার যে বইজকরে মালকগর সাদে নিংকরেসে, ঔ গুরুজনর বেদে বাক্যবান বিধা বিধা মইলকে এসাদে গুজুরানি এহান ব্রজবাপুরাং ছেৎ ছেৎ করে। তত্রাচ লেইনুর অপরূপ লেইত্রোং মাজা মহিমা টটরানির ভঙ্গিমা এগ হাবিগ দেহিয়া ব্রজবাপু মেনাগ অলইল। কেথকল থমকহান দিয়া হেয়করে থাম্পাল বিকাশ দেসে পাম্পলগিল চেৎকরে বাধিয়া মাতল “মোর সংকল্প আহান থইতেইতা?” “থইতৌ— থুর থুরি নিকরের রকতগ পারা অধম পল্লবগিরমী পেলকরে চুমা হান লাকুরিয়া ব্রজবাপুএ মাতল “আহৌ খুরুম থইতৌ।” কৌশলর সরালুগরমী দুরন্ত বোঝালগ হোমেইল। কিসাদে সংকল্পহান? টেঙারার জুরুংগন্ত

নিকুলিয়া আহিরী কেথকী সরা হানর নুংসি নারল লেইনুএ মাতলী— “নিদেবীরে মোর দাদা আতম্বারাং দেনা। তেঙ্গিয়ে নিদেবীরে আতম্বারে তিলকরিয়া ঠই আকগ হংকরেসে এহানও আকারে ইঙ্গিতে হেয়করে বুঝাদিলী। ব্রজবাপুর আহির মুঙে জিঞ্জিনীগ ফরদিয়া গেলগা পারা। “লেইনু! দাদারাং বইজিরাং মত নেই। তানুর যাথাং নেই কাপামে কদমহান বেলানি থক নাইব। লেইনু। অন্য সংকল্প থা থাইলে মাত্”— পীনার নিশাল মাতালার হুস্ নেই, হুসিয়ারীগর সাদে ব্রজবাপুএ জুবারা দিয়া মাতল পারা। জুরাগ সেংকরে বাধিয়া, পাম্পলে নেম্পালে ঝাকরণ দিয়া, গার থাম্পৌগ নিক্করুয়া লেইনুএ বিধা বিধা কথায় কার গাধদানি অকরলী।

ব্রজবাপু বিশ্বাসঘাতকগ? আহৌ খুরুম থইতৌ বুলিয়া সংকল্প সাকালম করিয়া ব্রজবাপুএ কিয়াকা কথা না থইতয়তা? কৈকেয়ীর চকুরিত বিভোলা লাগিয়া ত্রেতারমা দশরথ মহারাজায় যেসাদে অসিল, লেইনুর চকুরিত কলিকালে ব্রজবাপুও ঔসাদে অইল। জয় জেলেইর মহিমা হাবিহানে জেলেইর (বরঞ্চ লাজ পেইলে) ইমাইন্দলর মহিমার জয়ধ্বনি লৌকরো। ব্রজবাপুও ‘তথাস্ত’ বুলিয়া লেইনু ঠইগর জয়ধ্বনি লৌকরল। ঘটনার পরল এহানাত কুঙ্গর অমঙ্গল, কুঙ্গর সুমঙ্গল অইতয় ঔহানী হরিএ জানে।

আকদিন জাঙাক জিলকর তুল লেইনুর বাপক গৌরমণি এইগা গিরক ঔগ নন্দবাপুর ঘরে জাঙর ধূলি বেলল। প্রাথমিক সম্ভাষা লমইল আর বামন দ্বিতীয় সংসারর নুঙেই নুংসি, অরাহীন, অসারত্ব বিষয়ল যারিপরির দিঘল অধ্যায় আহানও লমকরলা। সাম্ পথগ যেপিরমাঁ বিঘ্ন সঙ্কুল, কৈ পথগ লনায় ঔপিরমাঁ সিঙর কর্মহান। সময় লাগক, পরিশ্রম অক, ক্ষতি নেই। গৌরমণি এইগা ধীরে ধীরে মূল কথাত পড়িলগা। কতি হজক কারেইও মূলতা ফরইতে যে ডহিল ঔহানর লেহা অনুরাধায় থসে, কিন্তু লেইনুএ না থসে। যেগয় থসে ঔগরতা গারিগ বাইচিল অনা অকরল বা যেগয় না থসে, ঔগর গারিগ হারৌহানে রোমকাটা বারী দেনা অকরল। হাবি হুনিয়া নন্দবাপু এইগায় মাতল “এহানতে হুজাখুজিহান পারা অসে এইগা। তা আর এ সমন্ধ এহান নাক বুলৌরিতা।”

লেইনুর এক্সা আহান খেয়া ব্রজবাপুএ মাতল— “দাদা গিরকে আজ্ঞাহান দিয়া বেলা, এপিত বাধা বিঘ্ন না করি।”

বইজক অনুরাধায় হৌকুটানি বেলেয়া বদাগত আতহান দিয়া হাতেক করে মাতলী— “গিরি— তি নাগৈ কাফামে না য়রইস। তোর দাদায়তে কিমে লালহান মাতের থাং?” “বইজি এতে কিয়াকা বার হাদি ফেরিয়া হমেইলেতাতে?”— ব্রজবাপুএ কঙ্ক এহান মাতে বেলল।

থতায় থতায় বইজকর তুল এসাদে কৌলি করানি ব্রজবাপুরতা এহানায় অকরাগ। মাহুংগর অঙ্কুশর বিধা খেয়া গজরাজ ব্রজবাপুএ সংকল্পর রুকজার আচুলের। পরিশেষমাঁ মাহুংগও পাক্করানি অকরল। আজিকার অমঙ্গলী সেক্কার তপ্তা ইরাং এহানায় ঘরর লক্ষ্মীগ উঠান লালইলী। তুলসীপুঙর বর্তিগ হাদি মেরাকে নিভিল। তত্রাচ নন্দবাপুএ অভ্যাগত

অতিথিগর সেবা সম্ভাষা না ভাঁগেসে। গৌরমণি এইগায় জাঙাকর ছনর চুটি সাক্ষাৎ দেহিয়া
যৎপরোনাস্তি নুঙেই অয়া ঘরে আলইল।

গৌরমণি বাপুএ প্রস্তাব এহান বেলানি থক নাসিল। যেপিরমাঁ মনহানি তীল নার,
ওপিরমাঁ এসাদে কর্মত ক-হাঞ্চিল অনা অকনেইর কামহান। আহির মুঙে মানুর সংসার আহান
ভাঁগানি চুমতাকো? বাপুগিরক এগয় ওঁসাদে কাফামে পারাহান বেলল। নন্দ এইগায় ঘটিল
বিষয় এহানি মনহানাত বার সেইকুপ চাবিয়া অনুরাধারে রাতির হেজীরমাঁ থায়া হজকারী
আচুলে আচুলে মাতল— “রাধা, তি মনহানাত অলাং অসত, মিও হারপাসু, মিও অলাং অসু।
কমতা নাগে। জনে পানে ছনলু, বিনকর তুল নিদেবীর বিয়াহান নাইলে ব্রজবাপু এগ মোরাংত
খেয়ইতয় উনি। কতি যরইলাগাতা চা! তা-আর সংসার এহান না ভাঁগক, নিদেবীরে আতম্বারাং
আত বাধদে দিক; মি আপত্তি না করতৌ, তিও আপত্তি না করি।

“অ খেয়নির ডরে? ওঁহান অইলেতে খেয়নির ডরে নিদেবীরে জিংতা
ভাছয়েইকবেনাই!” থারানী গিথানকে মাতলী। তেই সমাজহান যেসাদে বানা পেইরী, সমাজর
নীতিচার হাবিতাও ওঁসাদে বানা পেইরী। ওঁ সমাজর কথা, বার আতম্বায় যেবাকা চলন বেভারর
পরাদে নিদেবীর ঘটতয় ভবিতব্য হাবিতা অনুরাধায় সোয়ামীদৌ গরাং আকসাটে পরিবেশন
করলী।

মালক আকগর পেটেস্ত নিকুলেসি বেইবুনিএ খেয়নি পারা দুঃখতে অরতে দুঃখ
নাই। বার এ দুঃখ এহান নন্দবাপুরাংতে বিলাপেস্ত জিঙে; খালকরলে বুকগ চিলেই চিলেই
অর। গিরক এগয় বুকেইব কথা হেক্ক না পার। সমাজ বুলতে, নীতিচার বুলতে, অনুরাধারাংত
নন্দবাপুএ নিয়াম হারপাসে। তা হারপাসে বুললে বিষ্ণুপ্রিয়া-ক্ষত্রি গিরিগিথানীএ নিজর নিজরমাঁ
আচার, বিচার, শাস্ত্র, নীতিচার, ফিটা, গদী, আনী এতাহাবিল দলাদলি; কৌলি গালি, কামড়া
কামড়ি দিলও বামুন জাত এহানরে তানু হাবি সময় মূরর গজে থসি; আমি বামুনে কিহান
করয়ার, ক্ষত্রিএ সুপ না বিসারতারা, তা-আর সমাজ, নীতিচার বুলিয়া অনুরাধায় যেহান,
ডরাসে, নন্দবাপুরাং ওঁহান গণ্যতারমাঁ নেই। বার আতম্বার আচরণ-এতাল শঙ্কা করিল কারণও
নেই; কiyাকা বুললে, গাবুরাপুয়া কালে দ্বিবারা দিশাং খানি অথাইলও বিয়ার পিছেদে মানু
আপ্পানেও ইজ্জু অইতারা। তা-আর নিদেবীরে জিংতা ভাছ্যানিরতা এপিত কথা না উঠের।
এইগা গিরকে এসাদে যুক্তিল অনুরাধার দীলগ মজা পারলতা? পারল কি নোৱারল ভগবানে
জানে। পিছেকার দিনে হিংলার দলিবিলর ক্ষীরোদশায়ী এইগায় পুতক পরমানন্দর প্রস্তাব
আহানল নন্দবাপুর ঘরে আঁহিল। পরমানন্দ বাপুশৌ বি. এ. পাশগ হোভা চাকুরী বিসারার।
আমারকা দেশর সরকার গিরকে দয়াবস্ত নাগে। তা-আর জুগতর চাকুরী আহান না পানি-পেয়া
তা দুম্বভছড়ার ডাঙর ইস্কুল ওঁগত বাগাদের। সাদে বাদে, চরিত বেভারে, বিদ্যায় নন্দায়
হাবিবারাদে পরমানন্দ যেমন পুস্তমর কাঠীসুরী। হারৌহানে অনুরাধা থারানী থাইল পথ না

পেইরী। সান্তাহান হারপেয়া ব্রজবাপু নিকুলিল, লেইনুর অঙ্গুর বিধা খেয়া কাণ্ডজ্ঞান, বেভার হাবি সূক্ষ্ম করিয়া ব্রজবাপুএ 'নিদেবীর বিয়া লেপসে' বুলিয়া ক্ষীরোদশায়ী এইগা বার জ্যেষ্ঠা বেয়কর মুঙে টটরা বেলল। টটরতে টটরতে ক্ষীরোদশায়ী এইগা বার নন্দবাপুর বার অনুরাধার রকতগি পারা মেইথংহানি চেয়া দীঘল কথা হানী তুপ করিয়া সালইল। ঔদিনকার কৌলির জিগয় নন্দ বাপুর ঘরগ ডহিল বামুনর ঘরগ বুলতে, না লোবেইর ঘরগ বুলতে? জালকে জালকে বইজকে দেহরকে লমইতেগা বেয়কে বেয়কে খেক্ খেক্ করে কৌলি গালি করলা। এবেদে উদ্ভিন্ন যৌবনা নিদেবীএ তেঈর অপরূপ সাজেল বার রূপাহানল উঠানহান ইঙাল ঙাল করিয়া কিসাদে অহভাগ্য গিরক আগর অভিসারে নিকুললী। তেঈর জুরাগত ফুল বার আতে গরিমার কৌটা আগ তুল তুল করের। উছুটন খেয়া খেয়া নিদেবীএ এসাদে হনার পথগ এরে দিয়া অপথে কাকেই বেলেইরী। পাগলা বৌবরণে উজুরে মুজুরে থাপারেয়া থংদিয়া গাঙঘর ছিতু বিতু করানির পিসে যেসাদে মানু-জীবজন্তু-পাহিয়া-পলেই হাবি আতুর মনহানিল পানিকাটা অলইতারা, ঔসাদে নন্দবাপু বার অনুরাধার দশাহান অসে। কিন্তুমান, ঘরগর আরতা হাবিএ জয়ধ্বনিত পাহাং অসি। পিছমুঙ হাবি খালকরিয়া লাজর পেইলী আগ মুরগত্ দিয়াও ভাল নন্দবাপু এইগায় নিজরে সম্বরণ করল; থারানী গিথানকও তথৈবচ। পিছেদে শুভদিন, শুভলগ্ন চেয়া আতম্বার তুল নিদেবীর বিয়াহান অইল। নন্দবাগ অইলেও নিদেবীতে অনুরাধাং জিলকগ পারা। তেঈর ফিয়ম্ রুক্ হাবিতাও অনুরাধায় লাঙ্করিয়া থসে; হনার নেকলেস্ কাঁঠিসুরী খারৌ, ঝমকা হাবিতা সুরসে। ফিয়মর তুল রুকর পালং, ড্রেসিং টেবিল, কুটমেন, তাপু, ঝাঁপি না-সু বস্তু নেই। নিদেবীরে হাজেইতে অনুরাধার গারগ উদালা অইল। বিয়া লমকরিয়া বরকন্যা যাত্রা করলা ঔবাকা, জনমকারকা নিদেবীরে এরেদিয়া অনুরাধায় নন্দবাপুএ রৌ মেলা মেলা কাঁদলা, আহির পানিএ তানুর পিদেসি ফুতি তিঙিল। নিদেবীও জ্যেষ্ঠা বেয়কগর জাঙে আকফুরুং, জ্যেষ্ঠী বইজকগর জাঙে আরাক আকফুরুং চেংক ধরিয়া “ও বাবা ও ইমা” বুলিয়া রৌ মেলিয়া কাঁদে কাঁদে ঘরগন্ত নিকুললী নুরা জিনা হঙ্করাণিত্। ভবিষ্যৎ কিহান, বিধিএ জানে।

নিয়ামদিন সু নাইল, দ্বিয়ভেইবুনি অর্থাৎ ব্রজবাপু বার নন্দবাপু খেয়ইলা। সংসার হানতে আগন্তও ডহেসে সংসার; দ্বিচিলাগ অইল। আজিও কৌলি, কালিও কৌলি, লেইনুর হিং ধারানি, ব্রজবাপুর সালপাতানি এগয় আকয়া নিঃসম্বল গারিগিল নন্দবাপুএ অনুরাধায় খেয়ইলা। ছত্ৰুমে মাততে খেয়ইলাতা নাইগে, লেইনুএ ব্রজবাপুএ তানুরে খেয়করে দিলাতা। শৌ দুগল দুর দুর্বাণি খেয়া সংসারে কপাল থিয়য়া নন্দবাপু দিন রাতি চপ্পা ঠুনিংশা ভাঁগের, অনুরাধায় সংসারর অভাব দুঃখ এগ হাবিগ খাল করিয়া আহির পানি বেলেইরী। গারগ উদালা অসে, বন্ধকে দিয়া শৌগিরকা আহার আগ আনিল উপায় অনুরাধারতা সুপ্ নেই। অনুরাধার সংসার হান যেবাকা রাহ-এ গিলে নেরগা, ঔবাকা দুঃখর উরহান এরে দিয়া জ্যেষ্ঠী জিলকশৌ

কমলা ঔগণ্ড মরলী। যেবাকা এ দুঃখর পৌ এতায় নিদেবীর ঠাইগ ডহের, ঔবাকা হেয়ক আতম্বার বেভার আচরণ তেঈ ধুলির চেঙগর সাদে ফরফর অলইরী। তেঈ ইচুমান দোবার আতম্বাল অসিলী, এবাকা ভিতরর আতম্বারে চিনানি অকরলী। ছন্তুমে করে আতম্বায় যেদিন জেলা আগ ধাবদুরেয়া তেঈর মুঙে তেঈর ঘরে আনল, ঔবাকা জ্যেঠা বেয়ক নন্দবাপুরে পৌ দিউবেরা আনিয়া বইজক অনুরাধার উরহানাত সালইলী। যাহান পাতিয়া অনুরাধায় নিদেবীরে কোলকরলী। আলইতে হেয়কর উঠানে তেঈ যে সেপচারী বেলাসিলী, ঔ চারীর তুল বজ্রপারা সংকল্প আহানও তিলসে— “বেললু কাকেই এহান আরতে আলয়া না-না-না।” দুনিয়া হানে নিদেবীরকা হায় হায় করলা, আহির পানি বেললা।

কিস্তুমান লেইনুএ তেঈরে হেটকপীগ বুলিয়া টিক মিটেইরী। দানর পানি পিয়া নিদেবীর যৌবন মঞ্জরী ফুলে নালে কতদিনকারকা ঝরক্ ঝরক্ করেসিল। হেয়কর আতে আনাংশার ভুকুর খেইতে খেইতে ঔ ফুল-নাল হাবি ছকিল। মূলে কুংগ? এরে লেইনু এগ বার তেঈর বনাল ব্রজবাপু আস্তি এগ। তানুরে চেইলে নিদেবীরতা আহির রোম কাড়িয়া বেলাদেনা আহের। আরাক বেদে মরলী কমলাশৌ এগর সাদ বাদ, আলাং নোরাং নিংশিং অয়া যেবাকা তেঈ নন্দবাপু বার অনুরাধার কালাদারা অবয়ব বার শ্রীহীন সংসারহানর বেদে চেইরী, ঔবাকা বুকগত জাঠিকাঁড় হমার, আহির কোনগন্ত ধারা অয়া গালগি ভাছয়েয়া আহির পানি নীকুলের। অনুরাধায় হিসল ফারাংচির ফিটা হুকুরিয়া পয়সা খানি নিকালেয়া নিদেবীর চুলর খৌ, আঙি, ফুতি ফালি লদিরী; মাতিরী “মামৌ (নিদেবীর ঘরর নাঙহান) ! মি থাইতে তোরতা কিস্তাও অভাব নেই। জরম অসি বিষ্ণুপ্রিয়া ইমার নাঙহান নিক্কা সলকরিস, তোর জনমে পরাজয় নেয়ইতয়”।

বুদ্ধিমতী নিদেবীএ হোভাকরে হার পেইরী তেঈরে বইজকে আসলপা গারিগলো কতিরচুবাও আচুলে পারতয়তা। থাঙ, তেঈরে চেইলে কমলাশৌর বিরহর তাপিত্ত জিগ তানুরতা খানি ইঙর। কিয়াকা বুললে, কমলার সাদ বাদ কচুকুমেল পিহনক নিদেবীর তুল আকতা। তা আর; নিদেবীএ বইজক-বেয়করে মালক বাপকর সাদে নিঙকুরিয়া ঠেটু ভাঁগেসে, সংসারহানরে হংকরাত লেপইলী; তানুর কালাদারা সংসারহানরে জোনাকর মেইঙালে ঙালকরানি মনেইলী। বিদ্যা বার বুদ্ধির গুণে, রতি-ভক্তির গুণে নিদেবীএ হাবিরে পরীক্ষাত জিঙিয়া ইস্কুল আগর অজাগ অইলী, রূপাপয়সা আতেয়া পাজালেয়া অনুরাধার সংসারহানরে হারৌতিয়ামল বুজাদিলী। কিস্তুমান নিজর বেদে চেইতেতে নিদেবীএ শয়নেই হারপা থাইব— ‘নিষ্ঠুর’ কোকিল, কিয়াকাও অমাটিক রোহরতাকো?

আজি ঔ কনাকর হমাজক নিদেবী গিথানক নেই। রাং রাং বেলিহানর বেদে চেয়া অন্তিম কাল এহানাত সেংকরে মাতানি আহের “অ নিদেবী! নিকুলনে; হাবিএ তিলয়া, বন্দী, চিঞ্চিকী খেলেয়া চীকারি বিকারী দিক।”

□ পাণ্ডজন্ম অজ্জুনি, ৫ম সংকলন, ১৩৮১ সন (১৯৭৪)

না-মি-না

মালক মোহিনী। আট বছর ওমরর জিলক মাতের মালকে আছলা পিচুলা করিরী, মাতিরী ‘হাত, রাধাসেনার ঘরেস্ত বুলিয়া আহিকগা।”

না; মি নাঃ- হকগল তাংখুন। দিয়া দিয়া মাতেয় মাতিরী। মালকে যত ধরানিকা লাগিরী, মাতেয় তত ধাবদিরী। মুরুক খৌরাগয় নাপয়া মুরুকগ ধরিং ধরিং বুলতে দুর্ভাগ্য জনমে জরম আসে মুরুকগর নাতাহান আসে।

কামর অওয়াহীন করুরিং বুলিয়া ঘরে আলসু ঘরর গিরিএগর আনাংশাহান কিতা বুলতু। ‘না;মি না’ একরুণ নার বার চীকারি এগর চহা দাঁতগিএ মোর হুদিগরে বিধা বিধা লয়করে নেরগা।

‘কিহানে, এহান কিহান’ এ কথা এহানি হুদির কমু গিস্ত: নিকুলিয়া আম্মানে মোর থতাহানাত পালইল। ঘর গিথানকে হাতেকো মোরে ডাহিয়া মাতিরী ‘ওরে বিষ্ণুপুরর রাধাসেনার ঘরে জেলা সৌ এগরে থদিয়া আহানিরকা।

কিয়াকা ?

“কিয়াকাতে অইতঃ ! হেয়ক হাসপাতালে বেইবুনি দেহরক লকেইএ থাইল ভিটাগ পেয়া কাড়লইলা। মোহিনী ইচে এগ উনি বেভার চুম নেই ; আহি চই বুলতারা। তা আর বইজ করে চুলগত ধরিয়া আচুলে আচুলে ঘরস্তঃ নিকালাদেসি।”

অ হারপেইলু; ওহানল উপায় নেয়া বইজি এগর জিলক শৌ এগরে রাধাসেনাগাসিরাং চাকরে দিয়া নিশ্চিস্ত অনি মনাসেতা না।

“হো বাইয়ো, চাকরেতে কিয়াকা বুলরতা?” ঘর গিথানীএ মোরে গুজুরিরী।”

থতাহানল হে মাতলুতানাই, কিন্তু অন্তরগয় না মাতের, লেইরা কপাল নরম অসি জনরতা নিক্কা নিক্কা হুদিস্ত নয়ন দ্বিয়গি পেয়া দুঃখর আহির পানি নিজিয়া নিজিয়া। নিকুলের। এসাদে লেইরা দুঃখর দাবানল জির মা আমার জাতর প্রায়ই ইমাইন্দল, বাই বেয়াপা ডহে ডহে আসি।

ঘর গিথানীরে মি মাতলু , “হেই, জেলা শৌএগ মোর ঘরে থাক, মিতে অরে খুড়তাকগ নাই।”

সাকেইর খুড়তাকগ । সুতরাং মোরাং থাইলে লাজর বার চাকর-দুর্গামর ডরভয় নেই। এহান যুক্তিহান ঋকিস্তমান মালক মোহিনীতে ? তেইতে কুরাং পারাহান থ্যা জিরেইতয় ? মোহিনীরতা অবশ্য পেটগর চিন্তা নেই। কাদার হাসপাতালে তেই চাকুরী চিলা আহান জোগার করেসে তবুও।

তবু এহানর অর্থহান লুওসে। ইমাইন্দলর ইজ্জৎ এহান এহান কচুর পাতাহানাত ডলডলেয়া থার পানির ফুটাগ পারাতাহে। ঘরে হোমেয়া জিরানি পারলুতা ? এসাদে করে পলে পলে কপাল থি জাত এহানর বর্তমান দুঃখদশা, ভবিষ্যতর কিহান কিতা খালকরলে জিরানি থাইলতা ? মোহিনী বাইজি পারা হাজার বিজার অবলা জেলেই আমার জাতে আসি বার থাইতায় !

প্রতিকার কিহান ?

প্রতিকারর কারণ বিসারানি লাগের। আমার জাতরতা জিংতা অনার হিরাম নেই। ঘরজিনা পাতিয়া বীকুটি নেই, পয়সা রোজগারর পথি নেই। রুপা আলা - গাঙর মানু কতগরাং বী গচ্ছিং থাইল। আগেদে বী বেছিয়া জঙ্গলেদে জিরির মা; লেইসাবী থলরমা, দামছড়া বালি পিপালারমা হোমেইলাগা। এবাকা ও জঙ্গলও ছন। অলইল কুরাং আরতে হোমানি। বেপার সিংপাল নেই, চাকুরীবাকুরীও নেই। লতা দুগ বাজারে নিয়া বেছলে, মুড়ির গটা হংকরিয়া লেইকেইরমা বেছলে ইজ্জৎ যায়গা। খেতি করিয়া ধান মন কতহান বারগত ভবেয়া বাকী সময় এহান মুনিঋষি হাবিএ গাঙ বুলতারা, দলাদলির মা মুরখুলী দিয়া লাগতারা, দিবস করতারা আপাবপারে সাত নরকেস্ত উদ্ধার না করলে পাপগ মাহি গারীগত মজের; তা আর কীঙ্কন করতারা। ইমাইন্দলে রাসধারী গরাং রাসর বায়না দিতারা, নাইলে হওপনে নিয়াম হোভনেইতা দেখতারা। কীর্তন রাস লেইলেক অইলে বার আলকরানি লাগের, নাইলে বংশহান পেয়া টুমইতে ঠিক নেই। এসাদে অইতে অইতে কীর্তন রাস লমকরিয়া উজাড় অ পড়তেগা আমারতা সময় না লাগের।

ঘর গিথানীএ মাতিরী; “ঘরর বার শৌসুমারার দুঃখদশা ককরানিরকাহে আমি রাসর মানস করিয়ার নাই। উরে বিধুমুখী গিদেই ঔগ শৌ নাপেয়া থাইতে থাইতে রাখালরাস আহান মানস করেসিলী; রাসহান লমকরিয়া ঔরে রত্ন শৌ আগ উহানাত পেইলী।”

চুমসে, রাস কর, কীর্তন কর, উদুগল কর, লংকাকাণ্ড কর, কিস্তমান ঘরর ধানগি বেছিয়া নাগয়; বেপার সিংপাল করিয়া মুনাফা বা ঐজা ঔহানিল এতাহাবি করতে কারতাও আপত্তি নেই।

□

টেজরা চিংখেই, ১৯৮১ ইংরেজি

চন্দ্রিকা! পানির টাটি আহান আহেরতা লমইলু সেদ্ধার ধূপবর্ষি দেনা ফাং নেই পানির টাটিহানে রঘুর খৌনিগ হুকিং হুকিং বুলের। বাপকে গুরগুরিগত তিন আচুল দেনা ফাং নেই ত্রিসেন্দারমা পানির টাটি হুনিয়াই মাতল— রঘু! এপেইত আয়।

রঘু বাপক স্বরূপার কাদাত বহিলগা। কিয়া বাবা? রঘু বাপকরে সম্ভাষা করল।

স্বরূপা গিরিএ উপারীর গজেদে হজকর পেংবলা ধূমা নিকালা নিকালা মাতল— সেন্দাহান এলক, এবাকা পানি না পী কাহানি লগতয়; দিনহান জ্বর অলাং করেসে, কাচা পানি পিনাই নাক্ পানিয়েদে বুলন দিতয়, তা আর এবাকা খানি দম ধর।

রঘু দম ধরল, আংকরল— চন্দ্রিকায় যেপরে হেপরে পানি পীরীথাং তেঙ্গরতাতে কিস্তাও নার বাবা।

—আঃ তর্ক না করি, সেন্দাত পানি পীনা গম নেই; লমইল। ইচুহান মাতিয়া স্বরূপাগিরিএ পুতক জিলকরে পানির মাহাওয়া-হুনারানি অকরল।

বরণেস্ত পানি আহের, পানি এ পহরী, খঙ, সরা বুজের। লপুক, থল, টেঙারা, বনজঙ্গল তিঙের। পানিস্ত ক্ষেতি অর, লপুকে ফল ফসল উপজের। বরণ নেয়নির নাঙ খরা। এবাকাতে বরণর পানি কুরাংত আহের মাতিং।

পিরথিবীর হাকহানাত ঔরে বরণ চাকা— আকতা কালারা, আকতা ধলগারা; ঔতাস্ত বরণর পানি নিকুলেরতা।

রঘু এ হাদিত্ কথা থেইকরিয়া মাতল— ইমে পানির টাটিহানহে। স্বরূপা গিরিএ খইতুগ যৌকরে আচুল আহান নাকেদে থতাদে ধূমা নিকালেয়া বার অকরল— জুম মার, মাতলুতাহে বরণর চাকাস্ত বরণর পানি আহের। বরণর চাকারে ‘মেঘ’ বুলতারা।

পিরথিবীর মোটামোট তিনবাটর আকবাট স্থল বার বাকী দ্বিবাট পানি। এহানর নাঙ দেশ মহাদেশ, এ পানির নাঙ সাগর মহাসাগর। ঘেটি আগত পানি ফুটি থইং আকদিন দ্বিদিন গেলেগা ঘেটিগত পানি থারতা?

চন্দ্রিকায় থক্ মাতলো— নেয়ইল বাবা।

হুঃ— ঘেটিগ হুকের। এবাকাতে পানি হাতে হাতে ফর্দিয়া গেলগা, এসাদে করে বিল, হাওর, সরা, পহরী সাগর মহাসাগরর পানি এতা নিকা হাকহানাত ফর্দিয়া যারগা। যেসাদে করে গারিগর চামহান পৃথিবীরতাও ঔসাদে করে বৌহান থার। বৌহানর ফর্দুরা পানি আচুলের। চেহানর গজে কালি বা মুক পড়লে ব্লটিংল আচুলিয়ার ঔসাদে বৌমগুল এহানায় পানি এতা আচুলেরতাহে। এসাদে ফর্দুরা পানি এতায় গজেদে কইতে কইতে ইং লাগিয়া বার পের্কাং পের্কাং পানির ফুটা অলর। হাকর উঠানে তানু হাবিয়ে পুলইলকপুরি হাহাদুবি খেলতারা পারা।

কোটি কোটি এরে পানির ফুটা এতায় পলুয়া বরণর চাকা বা মেঘ হংকরতারা। বৌএন্ত যাঙ
বুলিয়া বরণচাকায় বৌর গজে ফর্দের হাকহানর এমুরেস্ত হৌমুর পেয়া। পথে উচ্ টেঙারা
পেইলে ফর্দুরা বরণে টেঙারার গারিগত জীবন লর। তা আর টেঙারার গজে বরণ দেহিয়ার।
বরণ চাকার গজে বরণ চাকা পড়লে তীলয়া বরণর রাজ্য আকেইহান নিকুলের।

টেঙারার গজে বরণ সিজা
নাঙহান মেঘালা
বরণর মা আকখুলীগয়
থাইরী আলাসালা।
নামসা কনক কাঠী চমেই
হাবি বরণরতা,
বরণ সিজায় সাদে বাদে
কতিও হোভাতা।

বরণ রাজার এরে বরণসিজা এগ হাকহানাতও দেহিয়ার।

হুতুম্বে বাবা, বরণসিজা বুলিয়া সিজা অগ আসেতা? রঘু, এ আংকরের।

স্বরূপা গিরিএ মুস্তি দেব, মাতের নাথায় মাতুরিতাহে আপাং! পানির টাটিহানতে
নেয়ইলতা ?

নেয়ইল, বাবা!— রঘু, এ খুমকরল।

বাপকে অকরল— এবাকাতে বরণ এতা আকতা কালা আকতা ধলা এহান কিয়া
হারপেইলে? মাতিং ছন্। পের্কাং পের্কাং বরণর ফুটা এতায় আগরে আগয় কোন্না কোন্নি দিয়া
ডাঙর ফুটা অলইতারা। ডাঙর ফুটা এতা ভরীহানে তলেদে লামের। তা আর ডাঙর ফুটার
বরণর চাকা পের্কাং ফুটার বরণর চাকার ইল তলে থার। বেলির পহরহানে তলর ডাঙর
বরণচাকার হাদিগ ফেরানি নোবারের আর তারে কালারা বা কুমগপারা দেহিয়ার। গজর
পের্কাং ফুটার বরণ চাকার হাদিগ ফেরানি বেলির মিঙালে লেইকরে পারের; তা আর এসাদে
বরণচাকা ধলাতাহে। কালা বরণচাকার বরণ ফুটা আরাকও ডাঙর অইলে জঙে জঙে তলে
পড়ের। এহানর নাঙ বরণদেনা বরণর পানি খঙে, বিলে, সরা সমুদ্ররমা এসাদে করে আলয়া
আহের। সামকরে মাতলে, বেলির তাপে পৃথিবীর পানি বাষ্প অইলকপুরি হাকে ফর্দিয়া যারগা,
গজে ইং পেয়া বাষ্প হাবি বরণর ফুটা অলর, মেঘ অর্থাৎ বরণ চাকা হংকরের, বরণচাকাও
জঙে জঙে পৃথিবীরমা বার বরণর পানি অলয়া পড়ের। এহানর নাঙ বরণচক্র। বেলির
তাপহানাই বরণচক্র মূল কারণহান। পৃথিবীর সাদে আমারতা আরাকও গ্রহ আটগ বেলির
রাজ্য হানাত আসি; তবো পৃথিবীর সাদেও তারতা বরণচক্র নেই বুলিয়া আমি নিংকরিয়ার।

চন্দ্রিকায় বরণর যারি ছনিয়া হারৌহানে মাতিরি— বাবা, আককারী লাগাদিংনে।

স্বরূপাগিরিএ জিলকর সম্ভাষা এহান ছনিয়া— অ- ইমার ঠইগ বুলিয়া আলথক
সম্ভাষা জানেইল। গিরির গিথানক অনু গিদেই এ ফুকারমা জিকাতা লাগেয়া মাতিরি— দেই
হজক লাগেই, যারিলিপায় যারি দেক, লেরিকতে বেলেই।

বিদ্যারমা অনুরতা জগাতা নেই হারপেয়া স্বরূপা গিরিএ ‘অ হরি!’ বুলিয়া টিকিগ ফুদে ফুদে বার অকরল— হাংতে এরে পানি এতার আরাক রহস্য আহান মাতিং। পানির ইংহানে আমার গারিগর ইংহানে মাম্মা নেই। গারিগর উমহান ৯৭-৯৮ পারা। আহা- তুলীরমা থার্মিটারগ চিপেয়া গারিগর উমহান মবেয়ার। তাপ উঠলে নোবারাগর তাপহান ডাক্তরগয় মবার। ডাক্তরী থার্মিটার উগর গজে স্কেলহানর সাদে হুকাং খাচ থার; খাচ দুহানর হাদিগত্ বার আরাকও হুকাং খাচ পাচগ করে থার। দাগ এতা পাকরিয়া গারিগর উমহান নিকালেয়ার। স্কেলহানর নাঙহান ফারেনহাইট। স্কেল পানির উমহান ৩৯দাগর খানিপারা গজে অর। দাগ এতারে ডিগ্রি বুলতারা। সাধারণ পানির তাপহান ৩৯.২ ডিগ্রি। সেন্টিগ্রেড বুলিয়া উম মবানির স্কেল আহানও আসে। ঔহানর থার্মিটারগর নাঙ সেন্টিগ্রেট থার্মিটার। ঔগল মবেইলে সাধারণ পানির এরে তাপ এহান ৪ ডিগ্রি অর। সংসারর হাবি বস্তুরমা তাপ জুগেইলে তাপ বলের, তাপ নিকালাদিলে তাপ কমের। জিল তাপ জাগেয়ার, বরফর তুল নুন তিলকরিয়া যে মিশল হংকরিয়ার, ঔতাল তাপ নিকালেয়ার। মাতলু, পিয়ার পানি এতারে না— রঘু, তাপ নিকালেয়া ইংকরতে ইংকরতে ৩২ ডিগ্রি ফারেনহাইট বা ০ ডিগ্রি সেন্টিগ্রেড ফরনাই কঠিন চাকাগ অলর। ঔতারে কিতা বুলতারা?

চন্দ্রিকায় আগে মাতে বেলল— বরফ না বাবা।

তেস্— বুলিয়া স্বরূপা গিরিএ থাকাংহান দিয়া বার অকরল ঠিক এসাদে তাপ জুগেইলে ২১২ ডিগ্রি ফারেনহাইট বা ১০০ ডিগ্রি সেন্টিগ্রেড ফরনাই পানি ভরক ভরক সবার। তাপ এহান পানিস্ত পানির কণা হাবি ফর্দে ফর্দে চংদে চংদে বৌহানত একাকার অর। এবাকাতে যে তাপ হানাত পানি বরফ অলর, ঔ তাপর নাঙ হিমাঙ্ক বার যে তাপহানাত পানি ভরক ভরক সবার, ঔ তাপর নাঙ স্ফুটনাঙ্ক। তা আর পানির হিমাঙ্ক অসেতাই ৩২ ডিগ্রি ফারেনহাইট বা ০ ডিগ্রি সেন্টিগ্রেড বার স্ফুটনাঙ্ক অসেতাই ২১২ ডিগ্রি ফারেনহাইট বা ১০০ ডিগ্রি সেন্টিগ্রেড। পানিএ ঔহানল অবস্থা পটার। কঠিন, তরল, বায়বীয় এরে তিন অবস্থারমা পানি থার। অবস্থাবেদে নাঙও তঙাল অর। কঠিন পানির নাঙ হিম বা বরফ, তরল পানির নাঙ জল বা পানি, বায়বীয় পানির নাঙ বাষ্প। স্নেট হানাত ইকরেদিং—

পানি (কঠিন) = বরফ।

পানি (তরল) = পানি।

পানি (বায়বীয়) = বাষ্প।

তাপ জুগেইলে— বরফে অলর পানি, পানিয়ে অলর বাষ্প; তাপ নিকাললে বাষ্পয় অলর পানি, পানিএ অলর বরফ। রঘু এ মাতের— বাবা, বাজারে দেক্লুতা বরফ মাহি দুহে দুহে মাছুবায় পেইলীর মাছর গজে ডালতারা।

চন্দ্রিকায়— বাবা, মলাই বরফ বুলিয়া আকতা বেছানিরকা আনতারা; কতি ছ্বাদতা।

বেশ বেশ-বুলিয়া স্বরুপায় হিলবরণর কথা অকরল। হিলবরণ ইমে নার; বৌবরণ জবর দিলে লগে হিল বরণ দেৱ। কালাবরণ চাকান্ত যেবাকা ডাঙর বরণফুটা জঙের, ঔবাকা গজর ইংহানে বরফ অলর; বৌবুলুনিএ উতারে বাৱেয়া থক বেলাদের বুলিয়া গলিল সময়হান নাপেয়া বরফ ইমে বরফ অয়া মাটিত পড়েৱ। এতার নাঙহান হিলবরণ। এবাকাতে কথা আহান না মাতিয়া নাইল। কঠিন বস্তু জবর ঘন, তরল বস্তু কম ঘন, বায়বীয় বস্তুতে সুপ ঘন নেই। ঘন হানর নাঙ ফিজা। ফুতিহান ঘনইলে ফিজাহান হোভা অসে বুলিয়ার। ঘন বস্তুএ ভরী না পাতলা বস্তুএ ভরী মাততা রঘু।

অনু গিধানকে লেইরাঙ হানাত জিকাতা ঠেলেরা মাতিরি— ফিজা হোভা ফুতিএ ফিজানেই ফুতিও ভরীনাই।

হাস্তে বরফে পানিএ কুংহানাই জিঙে ভরী?

রঘু এ মাতের— বরফতে কঠিন হাস্তে বরফে জিঙে ভরী অইতয় বাবা।

স্বরুপায় হ-বুলিয়া হজকারী খইতুগ যৌকরে আচুলদিয়া কানেদে নাকেদে থতাদে ধুমা নিকাল্ল। মাতল— ছন, ঔতাতে সংসারর হাবি বস্তুও পানির চরিতৈ তঙাল। হায়হান না নাগয়হান, কালি মলাই বরফ আগ লয়া গেলাস আগত পানি বুজেয়া উতাত বেলাদিস, ভাহের না বুৱের চেইস। বরফ পানির গজে ভাহের। কিয়াকা ভাহের বুললে ওজন হান অইতয়তাই নৌগুণ, অর্থাৎ পানি এ ১০ গ্রাম অইলে চপ্পামান্না আয়তনর বরফে ৯ গ্রাম অর। আৱাকৌ মাতলে যে পানি ছিটার ওজন ১ গ্রাম, ঔতার মান্না আয়তনর বরফর ওজন অরতাই ৯ গ্রাম। বরফর ঘনহান কতি বুললে ৯ বুলানি। সাধারণ্যে পেয়ার বিশুদ্ধ পানির ঘনহান পুৱা ১। এবাকাতে তার উম্হান ৪ ডিগ্রি সেন্টিগ্রেড এহান ইতি মাতিয়া হদেইলু। এসাদে পানিরমা তাপ জুগেইল্ মাহি ঘনহান যেসাদে কমে যায়গা, ঔসাদে তাপ নিকালা নিকালা ইংকরিল মাহিও ঘনহান কমে যারগা। আচানক চরিত এহানর সালে পানির গজে বরফে যময়া ভাহেরতা। ইমে পানির চেংহান নিয়াম, বরফ চেংহান কম, ইমে হপাৱাগ আৱকি। যতিহান বরফ, গলিয়া হদেইলে ততিও কম পানি পেয়ার। তা আৱ গেলাস আগ টিপ টিপ করে পানিএ বরফ টুমা আহানাই আকসাটে বুৱেয়া থইলে তি নিংকরতেইতাই— বরফটুমাহান গলতই উপিরমা গেলাসগন্ত পানি পাহিয়া নিকুলতয়। না - না পাহিতয়; কিয়াকা বুললে বরফটুমায় যতহান ফাম কালকরেসে গলিয়া হদেইলে উতাও কম ফাম কালকরতয়। তা আৱ গেলাসগন্ত পানি না পাহিয়া অরোহে তলেদে লামতয়গা। আজি এহানাত লমক। যেইগা— লেরিক খানি চেইগা এবাকাতে।

□

নুমিউস, ১৯৮৭

এলা

১.

বিষ্ণুপ্রিয়া উঠ নে অসময়ে ঘুমজিয়া থাইলে,
জাগরণর শাচাকগতে উদয় অইল মুঙর পটে,
এবাকা পেয়া ঘুমে মস্ত অইলে,
বিষ্ণুপ্রিয়া উঠ নে... ॥

বিদ্যা নেইলে, বুদ্ধি নেইলে, হিংসা-নিন্দায় দলাদলি।
তমোণ্ডে কিয়াকা মস্ত অইলে,
বিষ্ণুপ্রিয়া উঠ নে... ॥

নুঙেইপার মাটি চেয়া, করতেগা পথ নাপেয়া,
ডাল দুগ অয়া পরিয়া থাইলে,
বাগা ঘরগত নিদান খালকরেয়া,
বিষ্ণুপ্রিয়া উঠ নে... ॥

নিজর বেয়কগরে আতলপাগ নিংকরলে,
আতলপা অয়া আতলপার সাজেত বইলে
বাগা ঘরগত নিদান খালকরেয়া,
বিষ্ণুপ্রিয়া উঠ নে... ॥

দলাদলিয়ে ঘরগ টুমকরলে,
ঔতার পাপে তলে পরিয়া থাইলে।
হজাক অনে, হজাক অনে,
কাঁদের দীন জগৎমোহনে।
হজাক অ ডিল নায়া,
জয় বিষ্ণু গোবিন্দ বুলিয়া..

২.

ইমা তোর সালে আমি, অসিতা ডেই ডেই হারা।
ঘুমে গঙ অয়া, আজি দিন পেয়া, উঠানি নারলে কিয়া ॥

চুমতা তি থায়া, (আমি) যতন নাপেয়া,
ধূলি-ছালিত অসি পরাদরা ।

মুঙ পটরমা, নিকুলিয়া ইমা, শাচাকে ডাহের পারা ।
মলয়া পবনে, বুলে বুলে বনে,
নিকা লাহলে কাঁদেরআ ।

নুংসিল আমারে তাকরে তাকরে,
হিনাদেনে ইমা সিজা ।
তোর উমে উমী, অয়া মানু আমি,
তোর জাঙে দিক পুজা, তোর নাঙে মাতোওয়ারা ।।

৩.

জনমে জনমে মোরে,
দিয়া পেঠেইস হনার মণিপূরে,
জনম না লইলু, মানুর উরে,
ধূলিগ করেদিস মোরে,
তি লকতাকর পারে,
হনার মণিপূরে ।
জনম জনমে মোরে...

নুংসিপা পাম্পালে বুকুত করে,
কতৌ বানাহানল শৌ জিপুতরে,
য়করিরি ইমা তীর্থ ভূমিরে,
হমাদেউরি বারে বারে,
হনার মণিপূরে ।
জনম জনমে মোরে...

ইমার উরে, ঔরে দ্বাপরে,
মেইল পুতকে লালফামে বাপকরে,
নরনারায়ণর তাসেং রকতল,
হরির রাতুল জাঙর রেগুল,
পুণ্যভূমি, মাণ্ডউরী জনমর,
জনম জনমে মোরে...

8.

লকতাকে কাঁদের,
কাঁদের কাঁদের কাঁদের আকখুলা
আহির পানি বেলা বেলা,
লকতাকে কাঁদের...

মোর মাঙসিগা শৌ, বসর তিন-চারি হৌ,
এবুজ উদালা চেই
টিংদিয়া আতহানি, থলটেকাহানি
ইরিং-পারিঙৌ নেই

জিপুতর মায়ায় বুকু থাপারেয়া
লকতাকে এসাদে ডাহের
লকতাকে কাঁদের
কাঁদের কাঁদের কাঁদের আকখুলা

মলয়া বৌহানে, কুনারেইর দলে,
থাম্পালগ সকয়া রহের
ভ্রমরাগ এয়া, খৌরাঙে জুকিয়া...
এলা দিয়া দিয়া ফরদের

এগ হাবি চানার,
কুংগৌ নেই বারার
কতিঙ লকতাকে জুরের
লকতাকে কাঁদের...

লোকর দলে থায়া, মিহ্লগ তুলিয়া,
ডাউকগয় নিক্কা ডাহের
থায়া দুরেইর লামে পুতকে নিংশিঙে
লোকর ধুলিগ মাগের
লকতাকে কাঁদের...

৫.

কিহান কানায় জরম অইলু,
মানুগ অয়া হনার জাতে,
মানুর হাদিত দুনিয়াতে,
আজি পেয়াউ থানা নুবারলু।

পানি আইতে সরার বুক, পাতিয়া সরালু,
মনাসিলু বুঝতই মাছে,
বৈরী সানামপায় বাগিয়া খাসে
পিসে মাগানির চামফুত খেইলু।।

আড়গো বাগিয়া ক্ষেতিহান করলু
বেইবুনির কৌলিত লংকা-পুরায়
মাঙকরে দিল মাড়ায় মুড়ায়
উঠিয়া ধানর ভাতগ নাহেইলু।।

জুনাকহানে ঝিকঝিকেইতে, পথগ আঁধার দেখলু।
পিত্তী সাদ হান হোভা পেয়া
হোভা পথগরে আলি পেয়া
থল মনেয়া খঙে পরলু।।

৬.

কিহান মাততু অ আঠইপা,
হারনাপেইলে নিজর আজবতা।।
টটরানিত অইলে খাইতাপা,
চালচলনে মিয়াংতাপা,
খাইগৌ নাইলে, মিয়াংগৌ নাইলে,
মেরাক সেরাক অংথকপা।।

খাইমাল বুন্নে— হারৌ অইলে,
মিয়াংমাল বুন্নে— হাকাত কইলে
বিষ্ণুপ্রিয়া মাল বুন্নে—
মোরাং কতিয়ৌ আচপপা।।

খাইমাটি অইল খুমলপুরী,
বিষ্ণুপ্রিয়ায় নাইলা মণিপুরী।
টেঙারাতাই অইলা আসল,
বিপরীতহান অনথকপা।

বিষ্ণুপ্রিয়া মি বুলিয়া
নিকুল আজি বুক ফুলেইয়া।
টটরানে নিজর ঠারহান,
মানহান থয়া জাতরতা।।

৭.

জরম নাইল তোর উরে ইমা,
আজি পেয়াও মণি আগ।
সেবার ব্রত লইয়া কুংগই
ঙালকরতই তোর আঁধার ঘরগ।।

জিপুত বুন্নে নেইতা নাগই,
আসি জিপুত কংকেই আগ।
ও জিপুততে অসি পারা,
কওয়ার উরে কোকিল শৌগ।।

মানুর সরল সর পটেয়া,
জম ঠকেয়া বুলতারাগ।
ঠকেইল দিনও আরতা নেইল
চেলইল ফামহান না থইলাগ।।

তার নাঙহানর নৌগত কায়া
সালইতউ হন বিষ্ণুর ঠইগ।
ঘাটহান লেহে এলা দিয়া,
বুলতউ ইমা দুনিয়া এগ।।

৮.

হে গুরু! অনুপম ভুবনেশ্বর।

ভক্ত শিরোমণি, (প্রভু) করুণা সাগর।।

অজ্ঞান আধারে, আমি জগতবাসী।

মিঙালেয়া আচুলিয়া, নিয়া দেগা আজি।।

তোর কৃপাল কৃপা পেয়া অকা ভব পার।

মরণরে জিঙিয়া অ দেকা অমর।।

তিতে প্রভু প্রেমময়, শুদ্ধ জ্ঞান দাতা।

দেহা দিলে বৃন্দাময় জীবমান হাবিতা।।

তোর নাঙে পাপী-তাপী অইতারা উদ্ধার।

অমঙ্গলে মঙ্গল অর হে শুভঙ্কর।।

অস্তরে পাংকাল দেনে ভক্তি দিয়াদে।

জ্ঞানর বর্তিগ দিয়া, হৃদিগ লাগাদে।।

তোর প্রেমরসে তিঙক জগত সংসার।

ফুটক থাম্পাল প্রভু, জনমে আমার।।

৯.

অ ভারত ইমা উড়াবেলা

চিন্তা চানক হীনপানি।

উড়াবেলা চিন্তা চানক

কোটি কোটি জিলক পুতক

মনাছি তোর জাঙ ধনি।

বারা বারা সেলপুং

রহা রহা মেইপুং

উচকরে তোর ফিরাল ধরে

বুকফুলেয়া মুণ্ড চিংকরে
অকরতাঙাই জয় ধ্বনি।

শাস্ত জিপুত আমি
কৌলি গালি নাজানি
তত্রাপি তোর শত্রু অইলে
ঐরাবতর পাঞ্চারে
জানে মুষন করাণি।

তোর বারাদে অসুর আজি
হিংসার আহি মেলাছি
ইমা গিথানক ডরনেই ইমা।
তোর জিপুত আছি।
অসুর বংশ মাঙরর তাঙাই
ঔ রকতল খদিতাঙাই
তোর চরণ দিয়হানি।

□

কবিতা

মেঘদূত

আঁধার সেক্কার আজি, মা' হান আষাঢ়
লাগিল হাগর বৃকে মহারণ ঘোর
লেখাটি বাঁধেয়া হাবি বরোণে বরোণে
লৌ ভরেইতারা সাদে মাল মহাবলী
পিঠি পিঠি থায়া যতি আকাশর দৌ
হারৌ অছিতা, হারৌহানে শৌয়র পালে
যেসাদে লপুকে সাল পাতুয়েয়া বলী
লাবা মইষ দুগ আতর সপা দিয়া
ঔসাদে হারৌ অছি দাঁত লিট কাটেয়া
দৌ হাবিং মেইরিক সন্তর কোণে কোণে।
কিস্ত চিত্তার ঘোরগ আষাঢ় সেক্কাত
নিকুলেল বলে বলে মনর কোঞ্চলে
বলে বলে যারগা ডেকি আষাঢ় সেক্কাত
বর্ষা সরার হুতগ কৌফাঙে কৌফাঙে।
নিংশিঙে আহিলী মোর বিরহিনী প্রিয়া
লাগেয়া মনর বনে দাবানল জ্বীগ।
অহো কিরো জ্বালা এ দূরেই দেশে
জ্বলের অরিংগ সাদে দাবানল জ্বীয়ে
মোর প্রিয়া! কতিকরে ভানাপাছু প্রিয়া,
প্রিয়া মোরে কতি ভানাপাছে হয় হয়!
বানাপানা দড়িগাছে জনম জনমে
পরিচয় অর নিক্কা হৃদি দ্বিয়গর
হয় প্রিয়া! মোরে নায়লে অইরী তেই
মীন সাদে পহরীর পানি এরে দিয়া;
কিংবা এরেদিয়া খনাংঝাড় লতাঝাড়ে
লুটরী ভূমির গজে থেরো মারো অয়া।
কিতা বোলতু তেইর রূপ; রূপবতী
তিলোত্তমা সাদে তিল তিল রাশি মাহি
গারিগর পাব লেহে যেসাদে সাতর

থাম্পাল চাকিরিক অয়া থাম্পাল ঝাড়ে
 আহিগি দীঘল লাজে রাশির ভরেয়ে
 নঙা নঙা তলবেদে ডালিম যেসাদে।
 নিরালে কুমকুম ফোটা তেরাগ পারা
 আকগ যেসাদে গোখুলী হাগহানাত।
 পিচুম দ্বিয়গি সাদে ইন্দ্রর ধনুক
 রাশি চাকা গালে নাকে ওঠ দ্বিয়গিত
 কিহান উপমা দিতু; এড়েদিয়া হেক
 চুলর জোড়াগ গঙ্গা হিনেয়া তেই
 বারেইরী বেরুণীর মস্থর বারীল
 আহাহা, কিতা বোলতু ঠেক ঠেক অয়া
 লামর ছিতারা চুলে নেম্পাল গজেদে
 নুংসিল থাম্পৌগ পারা কাঁকালী সকায়া।

কাস্তা

(বিঃ দ্রঃ আগে “মেঘদূত” বোলিয়া হরু অমিত্রাক্ষর ছন্দর যে কাব্যহান অকরেছিলু,
 ঔহানর সেক্ষরে নাঙ দিলুতাই “কাস্তা” বোলিয়া। আগে নিকুলেছিল উহানর পিসে)

আহাহা! কিতা বোলতু ঔরে কাঁকালীর!
 পশুর মাদৈরে জিঙে লেইত্রেং কাস্তার;
 তুলতুলেয়া সাটুম সাটুমে হোমার
 বেরীত আতর। টিকপা’ থাইবা দৌয়ে
 অমরা অঙ্গরারু। পেয়া থক নাছে
 কুম্বাকাও এবুজ বোলিয়া অমরাপুরে।
 মাথাঙে দ্বিয়গি উরু ভরী গুরুভারে,
 যেসাদে কদলী ভরী বরিষা বরোণে।
 কব্রাঙর তলফুতি পীরেই নাভির
 ভাগিয়া দেমাকচুটি লামলাম তলে
 কঙালা থাম্পাল জিঙে মুদাগি গুরিয়া।
 কাস্তার কাস্ত মি খালকরতু কতি,
 নিম্বল খৌরাং পানার পরবাসী অয়া।
 বুয়ের যেবাকা বেলি পিঠির পটেদে,

হপোন না টেইপাং হয় ! কিতা বোলতু !
বাহিরী বরোণে কান্তা অন্তাচল গজে
ছনার ঔলী চুল বৌয়ে ফরদুয়েয়া ।
কান্তা প্রেম কিতা বোলতু ও প্রেমচুটি
সাদে নয়নধারা, প্রেমর ভাবক
মিতে প্রেমর মাণ্ডেপে; হৃদিগয় অছে
প্রেমবস্ত্র গারে দিল মোরতা কান্তার ।

□

পাতিয়ালার এলা

(নিখিল বিষ্ণুপ্রিয়া মণিপুরী মহাসভা ৩২তম অধিবেশন পাতিয়ালা, হিংলা ১২/১১/৭৯ইং)

হিংগালার পাতিয়ালা
হাবিহান পুলইলা

দশ মুলুকর গুরু পরিজন ।

কতিরও ব্রহ্ম ঋষি
কতিরও রাজ ঋষি

তিলদেসি চেই ইমাইন্দল ॥

স্বর্গর পটে বহেসিহা
চানারকা বিরাট সভা

আমার আপাবপা হাবিগয় ।

পারিজাতর বরণ দিয়া
হারৌহানে মন্ত অয়া

লৌদিতারা মহাসভার জয় ॥

পাতিয়ালা অসে আজি
অমরাপুর, গয়া কাশী

আহ মাতিক সাধুবাবার জয় ।

শ্রী গোবিন্দ আহেদেসে
সুদর্শনগ বহাদেসে

ডর নেই নেই হাবিহান সালয় ॥

□

গোধূলী

বুরিল বেলিহান টেঙারার পিঠিত
বাহা বিরুকর ছেয়া
পাং টিং বারী দিয়া
তিলইলগা লৌতলর হৌ হৌপিত
পাহিয়া পলেইর চিরিবিরি
জমহান লেহে ইরাইরি
হাতে হাতে আইল ইং পানিকাটা,
হোমেইলা কলে হাবি
ধাবল ধেনু শৌ মাপী
গোষ্ঠর মাঁ ধূলি লুম উল্টা উল্টা।
তুলসী পুঙ লেহে বর্তি
দৌপুঙে ঝুম আতি
রাম কাহাই আলইলা বুলিয়া,
জুরাগত সেক্ষাতেরা
নিকুললী অঙ্গরী পারা
গোধূলী ধ্বনি আজি মইবং রোহেয়া।

□

প্রবন্ধ

সত্যং ক্রিয়াং ১

“বিষ্ণুপ্রিয়া” পত্রিকাত রাগন্ত মোর নাংহান চেলইল এহান কম্ ভাগ্যর কথাহান? পুচ্চেল ডাঙরিয়া সম্পাদক গিরকরে ঔহানরকা থাকাৎ না করিয়া নুওয়ারৌরি। মোর ‘দলানচাউবা’ নাংহান আজিকালি না হুনেছি আগ যৌ নাছি। মৈতৈ ভেইবুনিয়ৈ মোরে বানাপেয়া ‘কমুংজাউ’ বোলিয়া ডাকতারা। কিন্তুমান্ মোর ঘরর হেবানেই জেলা ঔগয়তে মোরে ‘ঘরপুড়ে খৌরা’ বোলিয়া ডাহিরি। দুঃখর কথা মাতিয়া কিতা করতু?— ‘স্বীবুদ্ধি প্রলয়ঙ্করী।’

• • •

গেলগামারী আন্দুরগাঙে আমার বিষ্ণুপ্রিয়ার মহাসভাহান বহেছিল। হমাদেউরি তোরে আন্দুরগাঙ, ধন্য তোরা হাক— মাটি, ধন্য তোরা জি পানি; তোরা নুংসিপা মাটিত্ গড়াগড়ি দিয়া জনমহান সার্থক করিং বোলিয়া বার্তন নাপেয়াও মহাসভাত্ গেছিলুগা। মহাসভাত্ ঔনি বার্তনর দরকার না পড়ের।

• • •

বি-এ, এম-এ পাশ করিয়া থৎমেই পালয়া মহাসভাত্ বহেছিল। ঔতার হাদিত্ মি দলানচাউবাতে কিন্তু আগ। তেব আঙুলি বিঁধেয়া মাতেদিলু, “বাবুগাছি, ঠারহানল জাতর উন্নতি অরতা? জাতর উন্নতি করিক বোললেতে মিয়াঙর চা পিনা এরেদেই, কাঠি, নুকুন, নামছা পিদো” ঔপেইত্ আমার গুণিন গিরিগিথানী হাবিয়ে মাত্লা ‘তেস্! আরাকও খানি হুয়াদে দলান চাউবা!’ পেলনিয়ৈ আকয়া হাবিগি যেমন গলিত্গি।

• • •

সত্যযুগহান বিস্তা অইল এহান দলান চাউবায় দিব্যচক্ষুগল দেহের। কিয়াকা বোললে— আমার মানু এতা আজি কালি ধর্মর বেদে জবর মন দিলা। গৌরধর্ময় পেল নায়া ‘অনুকুল’ ‘স্বরূপানন্দ’ আহানি-কাঁদানি’ বোলিয়া অস্থক অস্থকপা য়ারি বারো ধর্মর কথা টটরতারাতা, শুপ উপো পারিলহান নাছে। ধর্মরকা এমাটিক জান দিলা এহান আমার বিষ্ণুপ্রিয়ার তা ইমে জয় অনির দিন আহিল এহান হারপেইলু। গাঙ্কারীয়ে মাতেছে পারা— “যথা ধর্ম তথা জয়।”

• • •

মহাসভাত হুনিয়া অইলু আমার বিষ্ণুপ্রিয়া জাত এহান উনি কীর্তন করে করে রসাতলে গেছিগাতা। কীর্তন করিয়া পথর ভিক্ষারীগ অইং ক্ষতি নেই— এতা পারা মোর

চৌদ্দচিরি আপাবপা হাবিরে স্বর্গত কাকরানি ঔহানতে কিতা? মোর মতহানতে, ... কীর্তন
করো, রাস করো, উদুখল করো, তাল... দ্বিতিন ফুরুঙও আলকরো; লেইরায় আকয়া ভীম
পিঙিরি অয়াও মাঙো যেইগা; কিন্তুমান স্বর্গর দখল হানতে আমার আতে থাইল এহান চপ্প
লেপয়া হারপেই।

পেরুর পুতক ফেদুল আমার জাতর ডাঙর নেতা আগ। মোর পুতক বলদেবরকা
হাকিমর চাকুরী আহানর শালে ফেদুলরে মাতলু, ‘বাবু, হাকিমী চাকুরী এহানাত বাবুওয়ে মন্ত্রী
কিতার লগে খানি টটরা দিলেতে।’ মাতানি ফাং নেই, ফেদুলে আহিগি রাঙা করিয়া মাতল—
“মি শিচ্চিল তোমারগ নাগয়, মি হাবি জাতরগ।” হা কপাল। বিশ্ব প্রেমিক ফেদুলরে হাবিজাতে
বাটিয়া খা বেলনা, বিষ্ণুপ্রিয়ায়তে তার নখর মলহানিয়ও না পেইলা।

কিমাশ্চর্যমতঃপরম্?

□

নুৰা বেলি (বিষ্ণুপ্রিয়া), ১ম বর্ষ ১ম সংখ্যা; ১৯৫৬

প্রবন্ধ ২

সত্যং ব্রয়াৎ ২

জারর প’রহান। ক্ষেরর জি হেদানিয়ে আকয়া গারি আত যাঙ কর কইল। বুয়া
কালর খজছে চামহান খাজুওয়ানি লাগিয়া করং করং অইল। ফুঙ্কহানাত মুঙবারা হেদতে
পিঠিবারা ইংগ অইল, পিঠিবারা হেদতে মুঙবারা পানির কাঁটাগ অইল। এ অবস্থা এহান অছে
আমার সুমে খৌরা জাতহানরতাও কুংগ আক্গদে যুরা না লাগের। এবারা হক্করতে হৌবারা
ভাঁগের, হৌবারা হক্করতে এবারা ভাঁগের। থুর থুরি কাপা আতহান টিংদিয়া আপাবপার
টাকহানাত ঘানুয়ায় খাছে করপেকহান আচুলিয়া মোর ভদালা কলমগ ধরলু। এবারায় হৌবারায়
আকতা না করেছু পেয়াতে খাংগ অলয়াও অক্, নাতিনাতলর কীলবারী খেয়াও অক, জিংতা
অয়া থানিতে মনেইলু।

আঃ! কলিকাল! জাত না মূতক, ঠার না মরক এতা বোলের ঔগয় অধমগ, অজ্ঞানগ,
সাম্প্রদায়িকতার ডাঙর জরগ; বারো নিজর জাত ঠার মুৎকরিয়া ময়ূরর হাদিত কওয়াগ
হাজের ঔগয় উত্তমগ, জ্ঞানীগ, পাটাদারগ, বিশ্বপ্রেমিকগ—

“জাগে নব ভারতের জনতা
এক জাতি, এক প্রাণ, একতা।”

বাঙ্গালী কবির বীজমন্ত্র এগ রক্ষাকবচগ করে আমার মিহি পারা পাটাদার এতায়
কাঁকালিত পিদলা। ফলহানতে আমি “বিষ্ণুপ্রিয়া জাতহান না মৃতক” বোলিয়ার এতায় অজ্ঞান,
দেশদ্রোহী, বারো অধম অনিত পরলাং। আঃ ধন্য কলি। স্বার্থর লোভীর কলহানাত মৌ চিপানির
সাদে মনুষ্যত্ব বোলিল বস্তুওহান তেঙ্করে চিপিয়া ছাবাগ অলছি এরে বিশ্বপ্রেমিক (?) এতার
মতহানতে— “দুলিপক শিকদানির ডেকি বিষ্ণুপ্রিয়া ঠার এহানরও শিকদিয়া বেলেই, মিয়াং
বারো মৈতেই ঠারর যতন লই; ওহান অইলেই চিৎ আহানাত চৌদ্দচিরিরে গোলোকধাম
যৌকরানি পারতরাই।” মিহি এতার কান্দন দেহিয়া মিয়াঙে মৈতেয়ে পেটে পেটে মাত্তরা—

“আমি কান্দি ছন্দে বন্দে,
যোগী বেটায় কান্দে কোন সম্বন্ধে?”



পেংবার পুতক কৈচুংপা পেন্ড্রঙে পাম্পলগি টিংদিয়া মাতল “বাছেই হে, বিষ্ণুপ্রিয়া
বিষ্ণুপ্রিয়া বোলিয়া গৈ লাগেইলাই এহান কিহান? বিষ্ণুপ্রিয়ারতাও জরগ আছে থাঙে?
বুরাকালে আঁহিগিও জাল জাল করেৱতাই পেন্ড্রঙরে কাদাত আনিয়া কুপকরে চেইলু।
দলানচাউবার আঁহিগত ধূলি দিল আগ আজি পেয়া পিরথিবীত জরম অছিতা? মাতলু— বাবা
চিনলু হোভাকরে। তিতে মূলেতে বক্রবাহনর বংশ বিষ্ণুপ্রিয়াগ নাগৈ। তোরতা শিচ্চিল নাগৈ,
তোর বাপকবপাক চৌদ্দচিরির মিছলগ পেয়া মি হারপাছুগ। বিষ্ণুপ্রিয়া অলনি পারেছ,
এহানরগাইও তুমার ভাগ্যহান হারপেইছ; কিন্তুমান ওঁতা বোলিয়া হুরু থতাহানাত নাচলের
কথা না নিকালেইছ; ঠেকতাও বাবা, এতাপারা ছনার জাত আহানরে তোর শ্রেণীত ভরেয়া
‘এঃ, চাপ্রাহইল এতাতে কালানাহে’ বোলানি ওঁহান পারা আছে তোর কথা জাত এতা।



ডাঙরিয়া আগ আহানি ফাৎ নেই গাঙঘরর দুগতিনগ পুরীজেলেই খমকরিয়া তানুরেল
মণিপুরী নাছা দেহুওয়েয়া পেটগ আচুলানির বুদ্ধি বারো হিম্মৎ আহান আজিকালিকার পাটাদার
এতারাং নাপয়া লাগছে। আগে আমার নাছা এতা বৃন্দাবনর ভাবরসর হাদিত ভক্তি মার্গল
নাছেছিলা; আজিকালিতে লেইকরতে লেইকরতে, সবিশেষ, পাটাদারর পাটাদারীত
হোমেইলতাই মণিপুরী নাছা এতাও ‘টেইজর’ নাছা অলইল। মুক্তাহরণ আহান ডাকবাংলাত

দীলা এফুরতে রাস, উদুখল, লক্ষাকাণ্ড হাবিতাও পাটাদারর গুণে বাংলাগ লেহে আকেইতা
করে অনাত পরেছে। পাটাদার এতার গুণ মি অশিক্ষিত এগয় কিহানও গেইতু!

নমস্তভ্যং পাটাদার নমস্তভ্যং নমোঃ নমঃ।

রাসহান অকরলা। কৃষ্ণর বন্দনা আহান না যৌওইলেই নার। সূত্রধারীগয় অকরলী
“প্রণাম তোমার ঘন শ্যাম...।” সিনেমার মধুর এলাহান। নারে! আঃ! ভাবকর মন গলানি
অকরল। থাংনাত ললিতায় রাধারে চেয়া এলাদিল— “মশোন চলো— চলো নারে...”
অর্থহানতে কৃষ্ণর মন চরকরিং বোললেতে হে রাধে! মশোন অর্থাৎ কায়দা করিয়া আট।
ভাবক ফুক ফুক উঠানি অকরলা। কৃষ্ণরে না পেয়া পাংমরা দিয়া নৈরাশার হাদিত গোপী
হাবিয়ে এলাদিলা—

(১) “মাঝি, বাইয়া যাওরে—

অকুল দরিয়ার মাঝে আমার ভাঙ্গা নাও

... ..।”

আধুনিক যুগর রাসধারীয়ে ভাবকর মন চরকরানিরকা যেসাদে চেষ্টা করতারা, মাতিং
বোললেতে—

আগেকার রাসধারী ঔতায়তে ঠকেয়া শিচ্ছিল রূপা লুটেছিহান থকছে। আজিকালি
মারৈমাপাঙর অন্তনেই। সিনেমার এলার তুলো তাঞ্জা খওয়া খওয়া কায়দার গজে থং বাঁধিয়া
কথক, কথাকলি বোলিল নাছা আকেইজাত ভরেইতারা ঔহানতে মিহিগি হেঃ। গোপী এতারে
গোপী বোলবাং না বায়ালী বোলবাং! লয়ইতেগা কৃষ্ণরে না দেহিয়া জনমহান মাঙইল
বোলিয়া এক্সা এক্সা রাধিকায় এলাদিল—

“জিন্দেগী উসিকী হ্যায়,

যো খুসিকা হো গয়া—”

আঃ! কিছাদে এলা, কিসাদে খল্লিক! নিজর আবিষ্কারর মুনিগিরি দেহেয়া অজা
গিরকে মুরগ তুলিয়া ফালুর বেদে অব্যর্থ আঁহিগি ক্ষেৎ করিয়া ঢাক গত তাংখিৎ করানি
ফাৎনেই নিরুপায় ভাবক জলে নালে অয়া গুঞ্জা বেলা বেলা তাম্বং আচালা কন্মলল টরপ টরপ
পড়লাগা। কান্দনে কান্দনে মাগেপগ গং ধরল। মৈবং রহিল; রাস করিরী রসবতীয়ে হক্গ
খামকরতে খামকরে নুয়ারিয়া ডম্ব মাটিত আছারখেয়া কাঁদানি অকরলী— “অ বাবা! কুরাং
থায়া দেহরতা।”

□ বিষ্ণুপ্রিয়া, ১ম বর্ষ ৩য়-৪র্থ সংখ্যা; আগ্র, পৌষ, ১৩৬৩ বাংলা (১৯৫৬)

পরম ভাগবত শ্রীশ্রীভুবনেশ্বর সাধুবাবা

তস্য কীর্তন মাত্রেণ কল্যাণমুপপদ্যতে

মহাপুরুষ গিরক আগর সদগুণ চিত্তগ যৌকরে কীর্তন করানিয়ে “কল্যাণমুপপদ্যতে”— কল্যাণ অর, মঙ্গল অর। সংসার এরেরিয়া ভগবানর চিত্তাল বনে জঙ্গলে উহি আহি খেয়া আছি সাধুবন্ত, মুনি ঋষির কথাহান নাগৈ, সংসার পারা ঘোরতর সমুদ্র এহানাত ক্ষণে ক্ষণে বুরতারা, ভাহিতারা কপালখিপা মানুর কথাহান মাতৌরিতা। হে বসন্ত! ষড়রিপুর তাড়ান্না খেয়া পাপর মলচাকাল কল্লিংকায় আছি আমি পারাতার কথাহান মাতৌরিতা। সৎ পথগত পারাহান দিৎ বোলতে ছেচরণ খেয়ার, অসৎ পথগত বোললেতে হেইনিং অয়ার, কুমি পারা অয়া সংসারর নরকগত বিরবিরেয়া আছি আমি এতার কথাহান মাতৌরিতা, হে সন্ত! নিংকরতে — না—পেয়ার— না—পেয়ার মনুষ্য জন্ম এহানাত মঙ্গলহান, হোভাহানতে কিহান থাইল? সাধু সজ্জন আগর গুণচুটি আহান কীর্তন করনি পারলে, ও গিরক ওগর তারুতাসেং রূপ ওহান মনহানাত আচুলিয়া আনিয়া মিকুপহানর কা ইম্পানিগ অয়া বহে পারলে শয়নায়া হুদিগ চিকর, মনহান সংসারর আনিকা জঞ্জাল এগ হাবিগর গজে ক্কায়া আনন্দময় ভাব আহানাত বিভোর অর। হে সন্ত! ও মহাপুরুষর সঙ্গহান পেইলেতে কিহান অর? ‘যথা কাচঃসুবর্ণতাং যাতি’ ও গিরক ওগর কাদাহান পা পারলেতে লিক্লিগয় যেসাদে ‘সুবর্ণতাং যাতি’ হুনাগ অলর, ওঁসাদে আমিপারা সংসার নরক এগত মজিয়া আছি নারকী এতাও সজ্জন অলনি পারিয়ার, ভব সমুদ্র এহান লালনিরকা নিচ্চকে নাইলেরগাইও আসলপা নৌ আগ পানার সিজিলহান করে পারিয়ার।

আজি পরম ভাগবত মহাপুরুষ আগর কথা দ্বি আকচুটি মাতিং বোলিয়া দুরাশা করলু। এগতে কিসাদে মহাপুরুষগ? হে সন্ত! এ মহাপুরুষ এগতে কনাকেস্তু অকরে জিতেদ্রিয় ধীরস্থির, গভীর কান্তিমান পুরুষগ অঁছে। যৌবনর কুরিগ না সাতইতে শাস্ত্র হাবিত মহাপণ্ডিতগ অঁছিলগ, ধর্মধর্মর জ্ঞানল গারিগ ইঙাল ঙালছিল পুরুষগ। কনাকেস্তু পুরি আগর তুলো কদাপি হাছম অয়া মুরগ তুলিয়া না টটরাছে মহাপুরুষগ এঁগ। নম্র অয়া কনাকেস্তু পুরি মানুর মন

চরকরে পারেছে ভক্তির কল্লতরুগ হে সন্ত! এ বীর্যবান মহাপুরুষ এগর দেহ ঔগতে ডাঙর
 খৌনাংজার পারা, কঙালাত ননীগ পারা, বর্ণহানে নুওয়া নিকুলেছে দুব গাছর পুলেই কচুহান
 পারা। এ কীর্তিবান মহাপুরুষ এগর কপালহান দীঘল, নাক, কাণ, গাল, আহি হাবিতা বিধিয়ে
 নিষ্করিয়া রাশিল হঙ্করেছে; মৈবঙর সাদে তাঁর গারগ পাপ পাপ অয়া গারি আত যাঙ তুপা
 তুপা অয়া তুল তুলেয়া থার। তাঁর বুকগ দোওয়াদে চেইতে ডাঙরিয়া টেঙারার লুম্পাকহান
 পারা। ঔ মনোহর বুক ঔগর ভিতরে প্রেম ভক্তির সমুদ্র আহান টৌ খেলেয়া আছে। হে সন্ত!
 তাঁরে দেহানিয়ে জীবর অন্তরগত আনন্দর জোয়ার কার। পাপর কল্মিং হাবি শুওয়াই করে
 কেলয়া পরের। হাবি গুণল গুণাঘিত আছে এ লক্ষ্মীবান গিরক এগতে জরম অছেতাও উপযুক্ত
 চেয়া খ্যাতিমান বক্রবাহনর বংশত, গাভীর্যত সমুদ্রর তুলো মাম্মা, ধৈর্য্য বোলিল গুণহানাত
 হিমালয়র তুলো মাম্মা। তাঁর নাঙ শ্রীশ্রীভুবনেশ্বর সাধুবাবা এতাপারা গুণবন্ত, শ্রীমন্ত গিরক
 এগর গুণচুটি আহান পেয়াও কীর্তন করে পারিল কিহান শক্তি মোর অছে সন্ত! মি পারা পরম
 অধর্ম এগয় এ সাহস এচুটি করেছু এহানরগাইও ধৃষ্টতাহান দুরাশাহান বোলিয়া নিংকরৌরি।
 ঔহানল নিংখুমপাগরে মাংহান দেনা পারের আতমাং ঠেটু ভাঁগেছেগরে টেংরাগ লালকরে
 দেনা পারের, মোর শক্তির অতীত অছে কাম এহানর চুটি আগও করে পারিমনেই বোলিয়া, ঔ
 জগতর গিরক করুণাময় শ্রীহরির কৃপাচুটি আহান মাগৌরি।

মুকং কেরোতি বাচালাং পঙ্গুং লঙ্ঘয়তে গিরিম্

যং কৃপা তুমহং বন্দে পরমানন্দ মাধবম্।।

ভব সমুদ্র এহানাত নৌগ অলয়া আছে তাঁর রাতুল চরণ দ্বিয়হানি মি বারে বারে
 হমা দেউরী।

□

বিষ্ণুপ্রিয়া, ১ম বর্ষ ৩য়-৪র্থ সংখ্যা; আগ্র, পৌষ, ১৩৬৩ বাংলা (১৯৫৬)

অধ্য

মাটিরা ঘুমর কাল সমুদ্রত বুরেছি জাত এহানরে হজাগ করাণিরকা, তমসার ঘোরগত পথভ্রষ্ট অছি জাত এহানরে দিশাগ দেহাদেনারকা যে ঋষিকল্প গিরক আগ বিষ্ণুপ্রিয়ার হাদিত জরম অছিল, ঔ গোকুলানন্দ গীতিস্বামী ইহজগত বেলেয়া পরলোকে হোমেইলগা। গোকুল কওয়ার 'কা' 'কা' রৌহান জনমকারকা আর হনানি নাইল। চেলেইতে চেলা নোয়ারিল বিষ্ণুপ্রিয়ারে হজাগ করাণির কা সমাজর মাণ্ডেপে মাণ্ডেপে, খাটাঙে খাটাঙে গোকুল কওয়ায় অপূর্ব কাব্য রসর এলাল আহির পানি বেলা বেলা এলাদিল—

“কতি ঘুমিতাই তুমি ক্ষত্রিয় সন্তান,

কাল সাগরে ঘুম ঘোরে আয়ু সূর্য অবসান।”

কপালখি জাত এহানাত জরম অছি ঋষি কল্প গিরক আকেইগির আয়ু সূর্য পিঠির পটেদে অস্তাচলে বুরে গেলগা, কতগি বারো বুরাণির পূর্ব লগ্নগত অনাহকে মাঙইল পিঠিবারা চেয়া ঘরর কোণে কিংবা তীর্থর মন্দিরে নৈরাশাল নিৰ্বাক অয়া আছি। হুঙ্কা তানুর কথা নাগৈ, জাতর কনাক বুজন ভেইবুনি বেয়াপা ইমাইন্দল হাবিরতাও ‘আয়ু সূর্য অবসান’ আকদিন না আকদিন অইতয়। কিন্তুমান পিঠিয়েদে বেলেয়া আহিলাং দিন এহানিত জাতরকা কতিহান করলাং, এহানর হিসাব পত্র, কতিতে গনাত নেয়ছে বোললে, থনি বা না থনি দ্বিয়হানও মাম্মা। নৈরাশার জম হানাত বিষ্ণুপ্রিয়ার আত্মা পাহিয়াগ ঠইগ লালইং বোলিয়া ডুক ডুক করিয়া আছে। এ সময় এহানাত কর্মযোগী গোকুল কওয়ার মহান আত্মাগ নৈরাশার জমএহান বেলেয়া শান্তি পানারকা পরলোকে হোমেইল। জিংতা অয়া থাইতে দুরন্ত মাটিরা নোয়ারাথুংপা বিষ্ণুপ্রিয়ারকা কাছাড়েস্তঃ তাখন পেয়া গাঙলেহে ইমাঠারল জাগরণর কাব্য গীতি এলাদে এলাদে বুলিয়াও যেবাকা দেখল, তাঁর লৌহানে বিষ্ণুপ্রিয়ার কর্ণপটগ ভেদ করে নোয়েইল, ঔবাকা আহির পানি বেলেয়া এলাদিল—

“কার কাজে কাঁদৌরিতা আকগয়ও হারনাপেইলা।” হার না পেইতারা বোলিয়া জাত এহানরে বেলা পারিল হানও নাগৈ; মান ইজ্জতল অন্ততঃ দিঠেং পালপা মনুষ্যর সাদে

জিৎতা অনি মনেয়ার যতদিন দেহ এগত নিংস্বাহান আছে। কর্মযোগী গীতিস্বামী গিরকে এহান হারপেয়া জনম এহান কাম করে গেলাগা, ইমৌ কি, মরানির আগে বিকলাঙ্গ দেহগল সভাসমিতিত উপস্থিত অয়া বিষ্ণুপ্রিয়ার মঙ্গলরকা বঙ্কতা দিল। গেলগা হিংলার মহাসভাত ঋষিকল্প গীতিস্বামী গিরকে মোরে নিভুতে মাতেছিল— “জগৎবাবু, হিঃ! মরানির আগেতে বিষ্ণুপ্রিয়ারতা খানি আহানাতে চেয়া যানা মনাউরিকো”। খানি আহানতে থাক, আমি বিষ্ণুপ্রিয়ারকা কিত্তা আহানও করে নোয়ারেছি, অমাটিক অক নাছিতা আমি। দৌলোকে ফওইলগা মহেন্দ্রবাবুওয়ে মরাণির আগে হেজীহানাত থায়া মাতেছিল— “জগৎ, মি না মরতৌ, ভালা অইলে তিয়ে মিয়ে বহিয়া মোর ইতিহাস এহান সংকলন করতাঙাই; জাত এহানর আহান না আহান না দেহিয়া মরানিতে না মনাউরি।” খালকরতে হুঃ বোলিল আর্ন্তনাদ আহানায় দেহমন ছুণুগ হংকরের। কিয়াকা বোললে, এ মহর্ষি আকেইগিয়ে যে জাতরকা খালকরলা, কাঁদলা, ঠুনিংস্বা বেললা, এ বিষ্ণুপ্রিয়ার হাদিত শিক্ষিত, শতকরা ৯৮গরাংতে ঐক্য নেই, তীন্না নেই, আছেতাই খেইপা চয়চয়নাং ভাব আহান। কুচক্রী শিক্ষিত বিষ্ণুপ্রিয়া কতগিয়ে রাজনৈতিক স্বার্থর সালে আজিকালি গুণাগুণি করতারা বোললে— খাইঠার এহান উনি আমার ঠারহান; বিষ্ণুপ্রিয়া ঠারহান হাদি মেরাকে আহেছেতা। ছনিয়া মোর নিংস্বাহান বন্ধ অর, বুকগত আতহান দিয়া মাতৌরি “হব্বাই! এহানতে কিহান! এসাদে জাত সংসারে না দেহেছু, বুকগ! তি পুড়িয়া ছালিগ অ যাগাহেঃ! এ পাপী এতারেল আমি মহাসভাও করিয়ার, জাতর উন্নতির কথাও খালকরিয়ার। কতি বিশ্বাসঘাতক জাতহান অছিতাঃ!” সুতরাং আমার আর্ন্তনাদে লয় নাইতয় জনম এহান। লয়ইতেগা ধরে দিলতা নেয়া জাত এহানর কঙ্কেই আগ মিয়াং অইতায়, কঙ্কেই আগ খাই অইতায়, কঙ্কেই আগ তেইহৌ অইতায়, খাসিয়া অইতায়। ইমাঠারও নেই মানুও বারো মানু আকতা? আন্দোলন আহান পড়লে ঠাই না পেয়া পানিত ভাহিয়া যেইতায়গা জাতহান বিষ্ণুপ্রিয়া এতা। আজি এ দুর্দিন এহানাত আমার হাদিত গোকুল কওয়া নেই। কোংগ আরতা হজাক করেদিতয়তা? জাতর হাদিগ উজ্জাড় করে ছরিয়া গোকুলবাবু দৌলোক ফওইলগা। তাঁর চিন্তাধারার রেণু আকেইগিও যদি আমার হাদিত জিৎতা করে থনি পারিয়ার, ঔহানাই তাঁরাং ভক্তি কাংকরানির তুল মাম্মা অইতয়। জবর হীনপেয়া মরিল গিরকগ এ গীতিস্বামী গিরক এগ। তাঁর দেহ পিঞ্জুরাগন্তঃ মুক্তি পেইলো মহান আত্মা ঔগ দয়ালহরির চরণ দ্বিয়হানিত আশ্রয় পেয়া চিরশান্তি পাক্ তাঁর জাঙে মি আহির পানিল অর্ঘ্য কাংকরৌরি।

□

ফাও, ২য় বর্ষ ৭ম সংখ্যা; জুলাই, ১৯৬২

রাহুর দশা

ঘররমা খানা নেই। দোয়ারমা চলনার ফাম নেই। বেপার শিংপাল নেই। লপুকে বীকুটি নেই। গাঙঘরে ঝাল, করতান, ঢোল, ঢোলপ, মাংকাং, সেলপুং, মেইপুঙর কুমেই নেই। হরি-উথানে, মহাপ্রভু জন্ম, কৃষ্ণজন্ম, রাধাজন্ম, বিষ্ণুরমা পুরিজেলেই, মৌনাহার নাপু-বসন্ত-কব্রাঙর ফুতিফালি বুনানির শিংনা নেই; মন্দির-মাণ্ডপরমা আর্তি-চরকরাগি, পালাচলন হিকানি, উদুখল-রাখোয়াল-লঙ্কাকাণ্ড শারদ-বসন্তরাসর ইরাং নেই। পণ্ডিত অজারেলর মুঙর শাং-টঙ্গি-মাংকলর মাঁ ব্যাকরণ, কাব্য, এলা, ঢাক, নাছা, দোহার চলন, লেরিক থিকরাগির পড়ুয়াপারেং নেই, ইমেও কি মানুগ উঠানে উহকতলে লামেইতে নামহান এলাদেকুরাগ নেই। জাত এহানর শিক্ষাসংস্কৃতি হাবিতা আজি নিস্তরক অসে, ব্রহ্মগ কুঁচসে, অন্তরর চুহিং-রসহানি ছেকেসে, মান-ইজ্জত জ্ঞানহানি সুন্য অসে, হিন্মৎ-ইমানহানি কেলসে। থাসেতাই আনি, দলাদলি, আগরে আগয় বেজানি, হিংসানিন্দা, বার আত্মঘাতী কাণ্ডমাহি। যদিচ গিরক আগয় হাংটানি মনেইল— ‘হুন্তমেও আমার জাতরতা ইচুহান দশা অসেতা?’, মি খুমকরতো— ‘হ! অনা অকরেসে’, ‘জাতহান মরাণিত লেপসে।’

কিয়াকা দশা এহান অইলতা?

মাতিং ছন। দশার বানিহান লাগেসেতা মণিপুর মাটিহান বেলেয়া আহিতেত্তঃ। আপাবপার হাকতাকে মণিপুর মাটির রাষ্ট্র-বিপ্লব, সমাজ বিপ্লব, ধর্ম বিপ্লব হাবিগয় হিঞ্চাপী মূর্তিগ পালয়া আমার গিরিগিথানীরে লণ্ডভণ্ড করেদেসিলা। বেদ-নেই গোষ্ঠির তুল বেদচারী গোষ্ঠির কৌলি ভারতরমা ইল্ আদ্যন্তঃ লাগেসেগ। মণিপুররমাও ঔহানর ব্যতিক্রম নাসে। নিজর নিজরমা কৌলি করাণিল, লালফাম করাণিল গং ধরিয়া হীনবল অইতেগাহে টেঙারার মানু-এ তানুরে মেৎকরেদে পারেসিনাই। আজিন্তঃ অকরে চারি পাঁচ হৌ বসর আগে হাতে হাতে এসাদে মণিপুর্ লয়লাট অনা অকরেসিল। ঔতার গজে অওয়ার তাল আরাকবেদে জাত এহানরে ছিতুবিতু করে বেলল। কতির চুয়া বিরুদ্ধ শক্তির তুল কতিতে যুঝানি! তত্রাচ ইমার মাটির নুংসিপা উরহান এরেদেনাতে থক নাসিল পারা। বামন থিংকরাগি, বেগার খাটুয়ানি, কীর্তন-শরাদ্বত ধরে ধরে চাকুম নিকুয়ানি, কন্মুঙর ঘরার ঘাস কাপুয়ানি এসাদে কতি কিতা অত্যাচার অনাচারমাহি চলিল কারণেহে আমার আপাবপায় রৌমেলেয়া ভিটা-বুস্কা এরেদেসিতানাই।

পুরাণ, বেদশাস্ত্রর অমূল্য সম্পদ হাবিতা মণিপুরর কোণগ লেহে তুকা তুকা নিকালেয়া শত্রু এ জির মাঁ আত্মতি দেসি, মণিপুর মাটিন্তঃ ইমাঠার হানরে তানু তৎকরে মুৎকরাণির হাবি হিরাম লমকরেসি। এপার-হৌপার লাককরে নোয়ারিয়া, সহায় সম্বল নেয়া, আনাংশাগ খেইলমাহি খেয়া আমার আপাবপায় কাছাড়, শ্রীহট্ট, তাখেন মাটি পেয়া ধাবদিয়া আহেসি, জঙ্গলে-মঙ্গলে কুকি-পেইতুর আতে কঙ্কেই আকেইগয় জান কাং-করেসি— লেহা পারিল

উপায় নেই। ঠাং ঠাং অয়া উশক টেঙারা বন সরা লালয়া তাঁনু এপারে আহেসিতা। অর্থনৈতিক বুনিয়াদ বুলতারা বস্তুহান ঔমাপাত গুড়ানাশাগ অসিলতা। তত্রাচ এপারর বন-জঙ্গল, লপুক-সরায় তাঁনুরে বাহানানুংসিল য়াহান পাতিয়া ঙ্করেসিলা, কোলকরেসিলা। ঔ নুংসিপার মী তাঁনু এপারে গাঙ-ঘর পাতেসি, সাকেই পরগণা লয়া লেংকরেসি। কাদাবারাদে তঙাল জাতর গাঙ পারেং পারেং অয়া লেঙসি। লেইরা দুঃখর মী মেরাক গিরিগিথানী-এ এ লয়াস্তঃ আরাক লয়াত ধাবদেসি। আক্-আকপিত চারাপহান করে গাঙ পরগণা পাতে পারলা অইস্‌তে চিরদিন আমার আপাবপায় হিম্মৎল পালয়া থানি পারলা অইস্‌, আমিও পারলাং অইস্‌, মিয়াং মাটির মী আমিও সংহতি ভাবল হাবি কামে দশগর গণ্যাত থানা পারলাং অইস্‌। গণতন্ত্রর যুগহানাত অন্ততঃ নিজর হ্নরল, হিম্মৎল আমার অওয়া হিন, দুঃখদশা ভখটাটি হাবিগ ফুকারাণি পারব চেং প্রতিনিধি আকেইগ লয়াগ লেহে দিয়াপেঠানি পারলাং অইস্‌। কিন্তুমান ঔহান নইল। বাংলাদেশর কথাহান অরেয়া লাভ নেই; এবুজো পেয়া কাছাড় বা ত্রিপুরা মাটিত এসাদে লয়া নেই যে লয়াস্ত আমার মানুএ তাঁনুর একক শক্তিল জাতহানর জন-প্রতিনিধি আকেইগ নেই রাজ্য বিধান সভাত দিয়াপেঠানি পারবা। ফলতঃ হাবি কামে হাবি ফামে অন্য জাতর লেজগত লাময়া জিংতা অনার প্রযত্ন নায়া আমারতা আর কিহান থাইল। হুতুমে মাততে আমার জিংতা অনা এহান মানুর নেম্পালে সেংকা দিয়া নিংশা কারাণিহান পারা অসে।

গণতান্ত্রিক রাষ্ট্র আহানাত হাবি জাতও নিজর নিজর তঙাল পরিচয় আকেইহানল জিংতা অনা মনেইতারা। আমিও মনাসি। থংমেই-মুতনি কুংগয়তে মনার? দীল চুমইলে নিজর ভাবমূর্ত্তি আকেইগল এসাদে মনানি এহান প্রশংসার বস্তুহান, ন্যায়সঙ্গত বিষয়হান। কিন্তু-মান হুতুমেতে এহান নাসে। দেশপ্রেম, বার বিশ্বপ্রেমর লিশিং য়ারি এলাও দেকা, সংখ্যা-নিয়াম জাতিএ ইচুমান হুদ্বা নিজর স্বার্থহানরে চেংকরে ধরেসি, সংখ্যা-খুতি জাতি এ নিজর ন্যায় দাবী আকচুটি তুলানিয়ে আঁহিপিচুম সুপকরেসি, ফিকিরফারাং করেসি, হেঙ্ নোয়ারলে দুগরমাঁ কৌলি লাগুয়াসি। সংখ্যা-নিয়াম জাতির আচরণ হোভা নানিয়ে ভারতর মী অশান্তির জি আগ আজি ডক্ ডক্ করে জলেরতা। জীবমান এহানাত দশগর মী আমিও জিংতা অয়া থানা পারবাংতা বুলিয়া কতির চুয়া নম্‌করিয়ারথাং সংখ্যা নিয়াম জাত এতায় দীলগ লাগেয়া না মাতেসি—‘বিষ্ণুপ্রিয়া মণিপুরীর দাবী এতা দেনা লাগতয়।’ তাঁনুর নেতিবাচক লিচেতে আমি নিয়াম দুহাসি, আমার দুঃখং দেহিয়া তাঁনু দাঁত-লিট কাটেয়া মুঙে পিঠিত আহেসি, আজিও আহিতারা, আহের দিনেও আহিতায়। ত্রাচ তঙালপা মানুর কথা মাতিয়া লাভ নেই। অন্য জাতর আঁহির পটেদে মোর জাতিরকা আঁহিরপানি বেলুয়ানি মুখর চিন্তাহান। তা-আর মোর জাত হানর খুতি-দুঃখদশা মোরগরেল মাতুয়ানি থক্, পররেল মাতুয়ানি না-থক্। এ নীতি এহান হুদ্বা মোর জাতরাং সিচ্চিল প্রযোজ্যহান নাগৈ, হাবি জাতরাং প্রযোজ্যহান। এহানাত নিপাতনও আকচুটি থার।

□ গোধূলী, পূজা সংখ্যা; আশ্বিন, ১৩৮০ বাংলা (১৯৭৩)

সাহিত্য-তীর্থরমাঁ খুঁচিধরা

সাহিত্যর সুলক্ষণ, কুলক্ষণ দ্বিধা বিধা আসে। যে সাহিত্যর সুললিত অলঙ্কারল নিকুলিয়া হাবিরকা মাঙ্গলিক পাঞ্চজন্যগ রোহা পারিরী, ঔসাদে সাহিত্যরে ‘সুলক্ষণা’ বারহ যে সাহিত্যর পিচুম-ঠিপ করিয়া, কুরুং-টেকা, লঘুগুরু হয়ে-নাগয়ে নির্বিচারল ‘সত্যম্ শিবম্ সুন্দরম্’ ভাব-মুর্ত্তিগরে সুস্মৎ করেদিরী, ঔসাদে সাহিত্যরে, কুলক্ষণা সাহিত্য মাতানি পারুরি।

কিঙ্কমান আজিকালি হাদিগ ফেরিয়া অন্থকপা লক্ষণ আহান তাল্প তাল্প আমার পবিত্র সাহিত্যরমাঁ অনুপ্রবেশ করানি অকরল। উঠন্তি সাহিত্য সেবারীএ এবুজ এ বিষয় এহান ধরে নোঝারেসি। ডিল নাইতে সৎকার করানি লাগতয়; ডিলইলেতে হাংকা কৌলি কোন্দলে জট ধরতয়, সাহিত্যর ইতিহাস লেংকরতেগা প্রবাদমাহি নিকুলতয়।

লক্ষণহানতে এহান— কিতাপারা সাহিত্য-আলোচনী সভা আহান বহিবতাই, নিজর কিংবা সামকুটুম্বর কিংবা হংকরা দলর কীর্তন অকরাগ দেব; গবেষণা মূলক তত্ত্ব থার আকবেদে। ক্ষতি অসে জাত এহানর সেবাত কিংবা লাঞ্ছিত ইমাঠারর সেবাত যে যে সজ্জনে কর্ম করে গেসিগা, অতীতর কিংবা বর্তমানর ঔ গিরি-গিথানী ঔতারে কিমে করে এবাকার উঠন্তি শৌ সুমারায় পাছরবাতা— ঔসাদে কৌশল আকচুটি এ তলকাপা দেনা অকরেসে। কুলক্ষণা সাহিত্যর রূপহান অসেতাই, মুংহান চেইতে মোহনদাস, পিঠিহান চেইতে সর্বনাশ। নিজর ফাম চলকরতে মানুর ফাম কাড়েলসি এহান মাটিক থকর কথাহান ক ? সাহিত্য লেংকরিল সটন দিয়া ইমাঠার সেবারীর নাঙও পানা, তাছা-লিকল সহায়ও দেনা, হাবি কামেও আত দিঘল করানি, কিঙ্কমান লমইতেগা জরগ কাপেদেনা— এচুটি আসেতাই কৌশলী মানুর আচরণ হান।

দলাদলি-লাঞ্ছিত সমাজ এহানরে দ্বি-করংগ করানির প্রচেষ্টা হাবি যেবাকা বিফল অইল, ঔবাকা সাহিত্যর হাদিবেদে সাহিত্যরসিক গিরি-গিথানীরে দ্বি-করংগ করানিত কৌশলী মানুএ কৌশল অকরেসি। এহান অভিনব কৌশলহান। বিপদতে এহান বোললে— লেইরিক জানি মানুএ দলাদলি করানি এহান আকুপী আত্মঘাতী কামহান। সমাজরে বর্তিগ দেহেইতায় মানুএ নিজরমাঁ আচুলঠেলা দিলে বর্তিগ মাটিত পরিলকোপুরি গুড়ামশা অইতয়, বর্তিগ নিভতয়।

কৌশলী মানুৰে খুঁচিধৱাৰ তুল উপমা দেনা মনাসু। ডিল্ ডিল্ কমলাগ দেহিয়া খুঁচিধৱাগয় যেসাদে অবুঝ কনাকশৌৰে ভোলেয়া আচুলিয়া নেরগা, ঔসাদে সাহিত্যৰ ৰাঙা আসাংপা ফুলগ দেহিয়া সাহিত্য খুঁচিধৱাৰ উঠন্তি সাহিত্যপ্ৰেমিক শৌ-সুমাৱাৰে অপথেদে আজি আচুলিয়া নেনা অকৱেসি। জনপদ আকেইহানৰ সিৰাপ-শাকা মূৰগত লাগিয়া যেবাকা পাংকটে হোমানি নাইল, ঔবাকা কৌশলী মানুএ নিজৰ ফাম চেল কৱানিৱকা সাহিত্য খুঁচিধৱা অলসিতা; তানো বাৱহ ৰামায়ণৰ হুনাৰ অৱিংগ পাৱা অসি। মাৱীচ হিৰাপায় ৰামচন্দ্ৰ প্ৰভুৰ নাৱগ মালকৱিয়া 'সীতে' বোলিয়া লৌদিতেনা সীতাহৰণ অইল; ঠিক ঔসাদে সাহিত্য-খুঁচিধৱায় সজ্জনৰ নাৱগ মালকৱিয়া 'ইমাঠাৰ' বোলিয়া চীকাৱিগ দিতেনা ইমাঠাৰ-হৰণ অনাত লেপসে। তাৱহ হে সাহিত্য সেবাৱী সময়হান থাইতে 'সাধু সাবধান'।

সুলক্ষণা সাহিত্যৰ ভাবমূৰ্ত্তি সুনীতি বাৱহ সূৰুচি। কুলক্ষণা সাহিত্যৰ ভাবমূৰ্ত্তিগ অসেতাই কুবজি বাৱহ কৈকেয়ী। সুলক্ষণায় হাবিৰে কোলকৱিৱী, কুলক্ষণায় দুৱেই কৱিৱী। হাবিৱকা নিজে ঙালনি বাৱহ নিজৱেল হাবিৰে ঙালকৱানি সুলক্ষণাৰ ঈশাহান; হাবিৰে নিভেয়া নিজে ঙালনি অসেতাই সুলক্ষণাৰ ঈশাহান। সুলক্ষণাৰ ৰূপ আহান তলে বৰ্ণাদিলু—

“আজি কতদিন ইল, আমাৰ বিষ্ণুপ্ৰিয়া জাত এখান ঘুমহান ভাগিয়া উঠে আহিতাৱা। আমাৰ জাত এখানৰ ডাঙৱিয়া গিৱি-গিথানি হাবিয়ে জাত এখাৱকে উন্নত কৱানিৰ নানা উপায় খালকৱানি অকৱলা। গিৱি-গিথানি অতায় সভাসমিতি কৱিয়া লেপকৱতাৱা কথা অখান কাখান কৱিয়া দেখানিৰ কাজে চেষ্টাও কৱতাৱা, কিন্তু আমাৰ গাং দেশৰ সৰ্দাৰ মুক্তিযাৱ বামন বুজনে, তানোৱ বাপক বপাকে চলেছি চলন ওখান বেলিয়া আৱাক নোওয়া চলন কিতা আখান চালানি না কৱতাৱা। ওখানৰ কাজে আমাৰ জাত এখান এবাকা পেয়া উন্নত ইয়া নোওয়ারতাৱা তাহে। ঠাৱখান সমাজৰ মালকগ। ঠাৱখান থাইলে সমাজ ওখান স্বতন্ত্ৰ জাত আখান বুলিয়া স্থায়ী ইয়া থাৱ, উন্নতও অৱ। ধৰ্মখান, ঠাৱখান নেইলেতে আমাৰ জাত এখান আছে বুলিয়া পৱিচয় দিয়া নোওয়ারতাঙাই। অতয়া বিষ্ণুপ্ৰিয়া ঠাৱখানৰ উন্নতি কৱনি থকছে। আমাৰ ৰাজাৱগাং মাদয়গাং শাখা দ্বিখানৰ ঠাৱখানি খানি তঙাল। দ্বিঠাৱ তিল কৱলেতে আমাৰ ঠাৱখানৰ শব্দ ৱাশিও মিয়াম ঐতৈ।”

শ্ৰীদয়াময় সিংহ, তিলকপুৰ

(মণিপুৰী পত্ৰিকা' ১ম বৰ্ষ, ১ম সংখ্যা ১৯৩৩ইং)

গজৰ উক্তিৱমা 'মোৱ গুণগান, মোৱ কুটুম্বৰ গুণগান, মোৱ হংকৱিল দলৰ গুণগান কৱিং'— এসাদে ভাবৱস নেই। অখীতৰ গৰ্ভগৱমা সাৰ্বিক মঙ্গলৰ চিন্তা কৱেকুৱা সাহিত্যিকৱ আশা-ঈশা মাৱাগ এসাদে পালসিল। এবাকা ঔ মাৱা ঔগ উল্লানিৰ জবৰ প্ৰয়াস চলেসে। সাহিত্য সেবাৱ নামাবলীহান গাৱিগত লাগেয়া 'কাৱে বধিক কাৱে মুৎকৱিক' এসাদে ধ্যানলই

খুঁচিধরা বহেসি। বিষ্ণুপ্রিয়া মণিপুরী সাহিত্যর ইতিহাসর আকেইচুটি ইকরতেহা সাহিত্য খুঁচিধরায় ওহানলতে হারপেয়া, ভৌপেয়াই দিগদর্শী সাহিত্যিকর নাঙ না চলকরতারা। অঙ্গ-ভঙ্গ সাহিত্য-ইতিহাস লেংকরানি থক্‌নেই, কiyাকা বোললে, বংশ হাবি ওতা পাকরলে বিপথগামী অইতায়।

সাহিত্য-উপলক্ষ্য সভা কতহানাত উপস্থিত অয়া উঠন্তির থতাত নানান বিকারর বাতুলতাও ছেনেসু। হতবাক অসু এহানতে কিহান বোলিয়া। সাহিত্য আলোচনীত ঋষি প্রতিম সমাজসেবীর কথা তানোর বদনেস্ত না নিকুলের। মেরাকগয় প্রগল্ভল টটরতে ছেনেসু তাঁনু কিহান করেসিলাথাং? মনে মনে মাতৌরি— তাঁনু ঠই মামি লালসে ইমার প্রতিমাগত ঠইগ ভরা দেসিগী; আজি জাতহানর পরিচয় আহান টাংখেই সেংকরে মানুর সমকক্ষরমাঁ দেহা পারিয়ারতা ও গিরক ওগির পরাদে; জাতি এহানাত গবেষণামূলক যতি যতি কাম করে পারিয়ারতাও, ও গিরক ওগিয়ে অমূল্য ইতিহাস খানি থ' দিয়া গেসিগা আর। জাতর আধাঁর ইমামর দিনে সভার মুঙে তাঁনু এলা দেসিলা—

“অস্থকপাহান ঐলাংতা, কিসাদে সিরাপ পেইলাংতা;

বিষ্ণুপ্রিয়ার হাকহান আজি

আঁধার ঐয়া থাইলনায়ে।

হা কৃষ্ণ! হা জগতকর্তা, কোরাং থাইয়াও দেখরতা;

জিৎতা কর অর্জুনর নালারে,

আমারতা উপায় নৈয়েলনায়ে।।

(১৯৩৩ইং মণিপুরী পত্রিকা)

সাহিত্য-খুঁচিধরার প্রতারণাত হোমেয়া এমাটিকর অজ্ঞানতাতে কিহান! আজি সাহিত্য হাবি মাং নাক, সাহিত্যর ইতিহাসহান সুমে নাখাক্, কালনাগর হু-বঙানাল সাহিত্য যমুনা অপবিত্র নাক? কুলক্ষণার অমঙ্গলী আতর মাঠিয়ানি হোমেয়া, সুলক্ষণা সাহিত্যর বসুধাৱাগ মলচাকাগ নাক; আমার সাহিত্যর তীর্থহান প্রেমর বৃন্দাবনহান অক্।

□

পাঞ্চজন্য অঙ্কুনি, ৫ম সংস্কল, ১৩৮১ বাংলা (১৯৭৪)

বানান-সমস্যা

হাবি ঠারেও বানান-সমস্যা থার। তেব বানান বাসেয়া ঠারে না জীরার; ঠারে নিজর কাকেইল' আগ বাঢ়তে কারেও না হাংটার। তা আর বিশেষ ঠার আহানল' সাহিত্য ভাণ্ডারগ চাংখল অ থাইলেও আজি পেয়া বানানর সমস্যা বোলিয়া ঔ ঠারর সাহিত্যিক বার সমালোচকে সমাধানর দিক্‌দিশা আলোচনা করতারা। এসাদে আলোচনা চলের, চলতয়, কিন্তুমান আমার সাহিত্যরমা বানানর জঞ্জালগ নিয়াম অসে হাশ্তে এসাদে আলোচনা আমার মা জবর অনা থক্। লাল-চুম এতা মোরাং বিচার্য বিষয় নাসে। উসাদে ধুষ্টতা থনাও মি না জানু। কিহানে হোভা অইব, হুঙ্কা এ নিঙ এহান থয়া বানান পারিচেং করানিই আমার ইশাহান। সাহিত্য ক্ষেত্ররমা যদি কোনগয় মাতের, মি করেসু এহানেই চুম, আরতার তা লাল ঔগয় সাহিত্যর ইষ্ট আহান করানি পারব বোলিয়া নিঙ নেই। হাবিএ মিচ্চাং মান্না অয়া যেহান করে যিতাঙাইগা, উহানিই সারহানি। সমঝোতা থয়া চলে পারলে সেবাহান হোভা অইব বোলিয়া আহৌ খুরুং আমি বিশ্বাস করিয়ার। ইমাঠারর মূর্তিগ পালকরতে হাবিহানে সমবায় পুকচেল্ল আগ বাঢ়ে যিক্‌গা, এহান মোর নিছরা হান।

ঠারহান লেহে ধ্বনি এতা তঙাল, ইমেও কি আঞ্চলিক প্রভাবে আকঠাররমা ধ্বনিও তঙাল তঙাল অর, বানানও তঙাল তঙাল অর। আমার ঠারে উপভাষা মূলতঃ দুহান— যথা, রাজার গাঙ, মাদৈ গাঙ। রাজার গাঙে ঠারহান হুন্‌তে দঢ়া, কিন্তুমান মাদৈগাঙে হুন্‌তে নিয়াম কঙালা। কারণহান এহান— রাজার গাঙে আৰ্য্য ধ্বনি ঋজু (ইজু) অয়া থা পড়েসেগা, কিন্তুমান মাদৈ গাঙে মিতেই ঠারর প্রভাবল' মাতলু আৰ্য্যধ্বনি উতা ঋজু নায়া তির্যকত্ব পাসে। তিব্বতবর্মী ঠার এতা হুন্‌তে কঙালা, তা আর এতার হাচুরাহান কতিহান গভীর অইতয়, ততই ঠার আহান কঙালাবারী দিতয়। এতান্ত আমার ধারণাহান অর বুললে, মিতেই ভাষী বার মাদৈভাষী দ্বিয় গোষ্ঠির মা অতীতে রাজার গাঙেও নিয়াম সামলাক্ আসিল। দ্বিতীয় কথা আহান, মাদৈভাষীও রাজারগাঙ ভাষীর সংখ্যা হান নিয়াম। এ কারণে দ্বিয় উপভাষারমা রাজারগাঙ ঠারর চলহান নিয়াম, সাহিত্যর ভাষাহান হিসাবেও এবাকা রাজারগাঙে ঠারর প্রাধান্যহান অসে। তৃতীয়তঃ

একক ভাবে রাজার গাঙ ঠারহানে চলে পারের, কিন্তুমান মাদৈ গাঙ ঠারহানর বিকাশ সাধনহান ঔসাদে সম্ভব নাইতয়। চতুর্থতঃ প্রায়ও দেহিয়ার তিব্বত বর্মীর হাচুরা থাইলেও রাজার গাঙর বিকাশ করতেগা সংস্কৃত শব্দ উদারী আনতেগা সুপ আপত্তি নেয়র, এ ঠারর সাহিত্যিকর মাহৌসা পুষ্কেলহান এহান। কিন্তু মাদৈ ঠারে ইকরতারা গিরিগিথানীএ মিটেই ঠারেও উদারী বাদারী করানি এহানেই জবর মনেইতারা পারা। এ কারণে মাদৈ-সাহিত্যিকর বানান প্রণালী বিজ্ঞান সম্মত নাইতয়। এবেদেতে বিষ্ণুপ্রিয়া মণিপুরী ঠার এহান গুরিগত ভারতীয় আৰ্য ভাষার গোষ্ঠিরমা লেপসে, বার এহানর প্রায়োগিক বিধি বিধানর নিংচেল এতা তিব্বতবর্মীরমা থনা থকতা? মোর মতে সুপও চুম নেই। তির্যক ধ্বনির তির্যক বানান সাহিত্যর মা থনাই থক্ নেই। ইন্দল বুলতে ইণ্ডল, মস্ত্রী বুলতে মনতিরী এসাদে তির্যক বানান, বার নিজর ঠারর ঠাক্হান না থয়া দিগালী পাথারী অন্য ঠারর শব্দ উদারী আনানি এহান সাহিত্যিকর যারাক ডাঙি নেই আচরণহান। এ সাদে আচরণ ইমাঠারর মঙ্গলরকা বেলাদেনা থক্।

আমার এব্বাকার উচিত কর্মহান, রাজা-মাদৈ দ্বিয় উপভাষারে আকফামে মুঙামুঙি থয়া সাহিত্যিকে সাহিত্য ইকরানিত্ উৎসাহ জুগানি। উহান অইলে আমার সাহিত্যর লেইত্রেংহান আরাকও হোভা অইতয়। ধাতু-প্রত্যয়, পদ, কারক-বিভক্তি, সন্ধি সমাসর জ্ঞানচুটি থাইলে লেইত্রেঙর সিল্হান আরাকও বপইব বোলিয়া মোর আসুটা বিশ্বাসহান। এব্বাকাতে বানান সম্বন্ধে নিখিল বিষ্ণুপ্রিয়া মণিপুরী সাহিত্য পরিষদে যে মিল্লেংহান থদেসিল, ঔহানর বেদে হাবির দৃষ্টিহান আচুলানি মনেইলু। ১৯৭৬ শিক্ষাবর্ষন্ত আমার ইমাঠার প্রাথমিক স্তরে চলানি বোলিয়া সরকাররাংত নিশান আহান পানার কারণে ১৯৭৫ ইংরেজীর ২৮ সেপ্টেম্বর, (১১ আশ্বিন, ১৩৮২ সন) তারিখে পরিষদে তার কার্যকরী কমিটি বার সমাজর শিক্ষাবিদ মুরব্বী গিরিগিথানীরে আকসাটে ডাহিয়া শিলচর-মাছুঘাট গাঙে বিশেষ অধিবেশন আহান বহাসিল। ঔ অধিবেশনহানাত যে যে বানানর কাঠাম আহান লেপসিল, ঔহানরে এপেই বার সাংকরে দিল।

বানান সংস্কার (৬ষ্ঠ প্রস্তাব)

- (ক) ক্রিয়া বিভক্তিত্ ‘স’, যেসাদে অসে, অসি, ইসি (to be)।
- (খ) ওয়া বিভক্তিত্ ‘ল’, যেসাদে কলমগল (with the pen)।
- (গ) ৭মী বিভক্তিত্ ‘মা’, ‘মা’ ‘ম্মা’, যেসাদে বনরমা (in the woods)।
- (ঘ) Definite article এ ‘গ’, যেসাদে ঘরগ, (to house)।
- (ঙ) অব্যয়র প্রয়োগ ‘ও’, যেসাদে এহান অইলেও (inspite of)।
- (চ) ভবিষ্যৎ কালরমা ‘তউ’, ‘তেই’, ‘তয়’, যেসাদে করতউ, করতেই, করতয় (shall / will do)।
- (ছ) স্ত্রী লিঙ্গ নামপদে বার ইমে পদে ‘ঈ’,-কার, পুংলিঙ্গে ‘ই’-কার, যেসাদে কররী (স্ত্রী)-কররি (পুং) (do/doing)।

(জ) সম্ভাষা বুঝেইলে তাঁ, তেঁই, তাঁনোর;	(ঞ) অইল্ (এইল নাগয়) (is)।
(ঝ) গুরু (Superior), গোরু (Cow)।	(ঠ) ঘর /গর (house)।
(ঞ) ঘরা (Horse)।	(ঢ) জি (fire), জ্বলকার (shining)।
(ট) দেহিয়া (seeing)।	(ত) বানা/বাহনা (affection)।
(ঠ) বার (and)।	(দ) বিহান/বিয়ান (morning), ব্যান (litter)।
(ড) 'ব' যেসাদে করা (Crow)।	(ন) শৌ (child), সৌ (son)।
(ঢ) সাবধান, ভবন এসাদে ইকরানি।	(ফ) হোপন (dream)।
(ণ) হবা/হোভা (good, nice)।	(ত) হমাজী (female friend)।

স্বাক্ষর— শ্রীজগৎ মোহন সিংহ, বি-এ, বি-এসসি, বি, বি-টি।

সভাপতি—নিখিল বিষ্ণুপ্রিয়া মণিপুরী সাহিত্য পরিষদ।

শ্রী বরুণ কুমার সিংহ এম-এ, সাধারণ সম্পাদক।

শ্রী হেমকান্তি সিংহ, এম.-এ বি-টি, যুগ্ম সম্পাদক।

আমার ধ্বনিরমা লঘু (য়াং) ভাব আহান নাপসে যেমন ধন বলুতে দন, ভাত বুলতে বাত, ভইজী বুলতে বইজী, ভেয়ক ভেইবুনি বুলতে, বেয়ক বেইবুনি বোলিয়ার। ধনসেনা ইকরতে দনসেনা ইকরলে যেসাদে ডুল অর, ঔসাদে আমার ঠারর শব্দ ইকরতে হুদা উচ্চারণে অঙ্ক অয়া ইলনি চুম নেই, শব্দর ব্যুৎপত্তির বেদে খিয়ালও থনা লাগতয়। উচ্চারণ যেতাও অক্ সংস্কৃত শব্দ (বা তৎসম) বার তদ্ভব শব্দ ঔতা ইকরতে সংস্কৃত শব্দর ডেকিই ইকরানি থক্। পরিবেশর প্রভাবেস্ত মুকিয়া যানা নোৱারেসি বোলিয়ায় আমারতা ধ্বনিরমা লেইলেক্ অনেকতা অ গেসেগাতা। অসমীয়া, বাঙ্গালীর মা আঞ্চলিক প্রভাব বপয়া থাইলেও ইকরানি-টটরানিরমা খেইপাতে জবর অয়া থাসে, আমারতাও ইমে উহান। সিদ্ধান্ত আহানাত লেপনি সাহিত্যরকা জরুরী কামহান।

□

নুৰা এলা ১লা বর্ষ ৬ষ্ঠ সংখ্যা; মে, জুন; ১১ জুন, ১৯৮৩

সংসার ধর্ম বার গীতাসঙ্গ

সরার পার আগত শ্মশানর ধূমা দেহিয়া মন এহান মিকুপে মুজুরাগ' দেৱ। সারা জনম এহানর কামেই, বী— শয়, ধন ফুতি কুরাঙ থাইল, ঠাইগ' দিয়া বানাপাসি জিয়া-জিপুত মোওয়েই কুরাঙ থাইলা চিন্তা করানিয়ে দেহাগ' পাংকালহীন অর, মনহানও ইঙ্গবাবী দেৱ। অসার সংসারহান, অনিত্য দেহাগ'— মনহানে মাতের। এহানে অসেতাই জ্ঞান বার ত্যাগর বারাহান মায়ার সংসার এহান এৱেদিয়া বনেদে সালই— সংসারিকর মানুৱাং আশ্রমিক সম্যাসীর এহান আসল পৌহান।

সংসারর দশগ' পুলসি ফামে তাংখা-রূপা বপু'করে অথবা মওং মাজা সাদ্ হোভা জেলা আগর মনোহর রাশিহান দেহিয়া মন এহান অলাঙ সালঙ বারী দেৱ। জুগৎ কর, ভোগ কর, সংসারর মাচ্চাংগ' পাৱা বস্তু এহানি বুকগত চেৎক' ধর— মনহানে মাতের। এহানে অসেতাই ভোগ বার কস্মর বারাহান; ভোগর সংসারে থায়া পাৱিল মাহি তাঙকর, খেই পীঅ, পাৱলে ঋণ করিয়াও ঘি খেই— গৃহস্থির মানুৱাং ভোগীর হৃদয়ৌপা পৌহান এহান।

ভোগ করিং বুললে মনহানাত আহৌ আশা নিকুলের। দৌর নাঙে যাগযজ্ঞ, বার বিধিবিধান বার প্রকরণ মাহি দেহা দেৱ। নিঙ থুঙনিরকা কিসাদে দৌগ' পূজা করানি থকর, উহানরতাও তত্ত্বমন্ত্র বার বিধিবিধান নিকুলিল। ভোগর নিশা এহানে মনুষ্যে কস্মজস্মর বেদে বলী অয়া আচুলের। বেদর কস্মকাণ্ডহানরে এসাদে নিয়মল' লেংকরেসিহান। কিন্তুমান ত্যাগ করিং বুললেতে পেইল্ খেইল্ আশা-নিশা হাবি মনহানান্ত কেলয়া যানা লাগতয়, কস্মকাণ্ড বেলাদিয়া হৃদিগ'র নিষ্ঠাহানরে ঈশ্বরর নিঙে বুলন দিউয়ানি লাগতয়। বেদর জ্ঞানকাণ্ড বা বেদান্ত বা উপনিষদ্ হাবি এতারকা ফঙসেতা।

ভোগর বার ত্যাগর নিষ্ঠা দ্বিয়হানর কেৱেদাল' আমারতা সত্যযুগ, ত্রেতাযুগ লালইল্, দ্বাপরর অন্তকাল ফওইল্হা। ভোগ বার লালসাল' মন্ত অইলা মানুএ সংসারহান বুজলা। এতারে মাত্লাতাই পাপাচারী দৈত্য তানোর কীল্ ভুকুর, অত্যাচার-অনাচারে সাধুসন্ত লেইরা

কাঙ্গাল হাবিএ রৌমেলা' কাঁদানি অকরলা। মাতল— “হে প্রভো! লামিআ নে পৃথিবীত্
আকখুরুং আমারে জিংতা কর।” হাক্‌হানাদে চেয়া মানুর এ হৃদিয়েঁ পা চীকারিএ পরমেশ্বর
পরমব্রহ্ময় আসুটাগ অয়া মর্ত্যরমা জরম অইল্‌হা, হনুয়েইল— হে অজ্জুন।

পরিত্রানায় সাধুনাং বিনাশায় চ দুষ্কৃতাম।

ধর্মসংস্থাপনার্থায় সন্তুভামি যুগে যুগে॥

ভাবহানতে— সাধুসন্তরে উদ্ধাররকা বার পাপীপাষণ্ডীরে টুমকরিয়া সংসার এহানাত ধর্মর
সিজিল করানিরকা মি এগ যুগ যুগ লেহে অবতার অউরি।

জগতর ঈশ্বর ভগবান শ্রীকৃষ্ণ গোবিন্দ মনোহর মূর্তিগ'ল মনুষ্যরমা নিকুলিল—
ভারহরণ করিং বুলিয়া।

পাপর ভরীহানে আক'য়া পৃথিবী ইমা এগ' নিকরানি অকরলী। কনাককালেও প্রভুএ
দৈত্য-দানব এতারে টুমকরানি অকরল' পাপর ভার হরণ করিং বোলিয়া। শেষান্তত্ পাপ-পুণ্যর
মহাযুদ্ধ আহান কুরুক্ষেত্ররমা লাগিল। ভগবান গোবিন্দয় তার লীলাহান প্রকট করানিরকা
ধর্মরাজ যুধিষ্ঠিরর পক্ষ লইল', কিন্তুমান সংকল্প করল'— যুদ্ধ এহানাত অস্ত্র না ধরতয়।
কুরুক্ষেত্রর ডেকি মহাযুদ্ধ আহান ভারত-ভূম এহানাত আজি পেয়া নাসে। অসুর-দৈত্য মালপা
বলীল্‌ রাজা-রাজারেল, রথী-মহারথী মাহি ফুক'য়া পাপাচারী দুর্যোধনর পক্ষ ল'য়া কুরুক্ষেত্রত্
পুলসিহা। শ্রীভগবানে কুরুক্ষেত্রত্ যুদ্ধর যে জিগো হৌকরল', পোক-জক-জিঞ্জিণীর সাদে
এগ' হাবি পাপী আকসাটে এ জি এগ'ত্ পুড়িয়া মরতায়তা।

কিন্তুমান ঈশ্বরর মহামায়া কুঙ্গয় হারপার? লগে স্বয়ং প্রিয় উদাক গাণ্ডীবধারী তৃতীয়
পাণ্ডব অজ্জুন, যোগ'য় তার কপিধ্বজ রথহানাত ঔ ঈশ্বররে সারথীগ' করে পেয়াও কৃষ্ণকৃপা
হার নাপার। কৃষ্ণকৃপা নাপেইলে অজ্জুনর শক্তি আসেতা এতারে জিঙানি? রথহান থৌকরিয়া
কুরুক্ষেত্রত্ সালইতেই অজ্জুনে নিজর থাকাং নিজে করানি অকরল', শ্রীকৃষ্ণয়-হুনে যারগা।
'মি করতউ' 'মি লমকরতউ' এসাদে অহংভাবল পরিপূর্ণ অসেহান দেহিয়া প্রিয়সখা অজ্জুনরে
বানাপেয়া শ্রীকৃষ্ণয় যোগমায়ারে আকর্ষণ করে দিয়া অপূর্ব লীলা আহান সৃষ্টি করে দিল'।
গীতার দিব্যজ্ঞান নাপেইলেতে অজ্জুনে এতাপারা কুরুক্ষেত্র মহাযুদ্ধহান জিঙানি নুবারতয়
হারপেয়া গোবিন্দয় যোগমায়ারে নিংশিং অইল। ফলহানতে কিহান?

অজ্জুনে মাতের— “হে সখা! তি যুদ্ধরকা লেঙসি দ্বিয় পাঙ্কটর হাদিত্ রথ এহান
আকফুরুং উবা কর, মি হোভাকরে মিল্লং করিং দুষ্টবুদ্ধি দুর্যোধনর পক্ষ লয়া পুলসি হাবিগিরে।”
শত্রুপক্ষরমা যমসি সাকেই-সিঙেই, গুরুজন-পরিজন হাবিগি দেহিয়া তৎক্ষণাৎ অজ্জুনে
মাতের— হে কৃষ্ণ!

বেপথুশ্চ শরীরে মে রোমহর্ষশ্চ জায়তে।

গাণ্ডীবং সংসতে হস্তাৎ ত্বক্ চৈব পরিদহ্যতে॥

“মোর গারিগ’ নিকরের, রম্কাটাও বারী দেৱ, গাণ্ডীবহান আতেন্ত শংক’ পড়িল, চামহানও পুড়িলপাৱা।” ত্ৰিভুবন-বিজয়ী গাণ্ডীবধাৰী অৰ্জুনৰ এসাদে মিমুং অবস্থা এহান আচানক যাৱিহান।

সাকেই-বেইবুনি মাৱিয়া নিৰ্বংশ অনা, যাৱী অইতায় বেয়াপাৱ শিৱাপ-শাকা পানা, গুৰুজনৰ ৰকতল মাটিহান তিঙেয়া জিংতা অনা মহাপাতকী কৰ্মহান। তা আৱ, যুদ্ধ না লাগেৱ, ৰাজ্যও না লাগেৱ। অৰ্জুনৰ মনহান সলইল, দেহাগ’ আতুৱ অইল্ ক্ষত্ৰিয়ত্ব যোগ’ৰ ধৰ্মহান, গাণ্ডীব অক্ষয়তুণ যোগ’ৰ আতিয়াৱহানি কপিধ্বজ যোগ’ৰ ৰথহান, শ্ৰীকৃষ্ণ যোগ’ৰ সাৱথিগ’, উগয় এসাদে অনা এহান চুমতা? মহাযুদ্ধহান মুংহানাত্ থ’য়া অৰ্জুনে নিজৰ ধৰ্মনীতি পাছল’ আজি। অৰ্জুন মহাযুদ্ধহান মুংহানাত্ পাতিয়া নিষ্কৰ্মাগ অলইল, ত্যাগীগ অলইল, সন্ন্যাসীগ’ অলইল।

অৰ্জুনৰে এসাদে বেমুখ দেহিয়া ভগবান শ্ৰীগোবিন্দয় উদাকৰে ক্লীবগ’, অনাৰ্য্যগ’, বিধৰ্মীগ’ এসাদে কটু বাক্যখানি ছনুৱেয়া দিব্যজ্ঞান দেনাৱকা গীতাহান অকৰল’। বিষম সংকট এহানৰমা শ্ৰীকৃষ্ণ অৰ্জুনৰে হিকা দিল’ জ্ঞান এতা পৃথিবীৰ মানুএ কহণ-কহণগ’ কৰে হিকানি লাগেৱ। এপেইত্ কালৰ বিচাৰ নেই, যুগৰ বিচাৰ নেই, জাত-দেশ-মহাদেশৰ বা সমাজনীতি ধৰ্মনীতি-ৰাজনীতিৰ বাছ-বিচাৰ নেই। তা আৱ, শ্ৰীকৃষ্ণ অসেতাই আকবেদে লোক শিক্ষাৰ মাপুগ’, জগত্গুৰু হাবিৰ পৰম গুৰুগ’, আৱাকবেদে বেদৰ কৰ্ম-জ্ঞানৰ কেৱেমা হাবি সুমৰে দিয়া সনাতন ধৰ্ম এহানৰে হিলৰ সাদে মজবুত কৰেদেসেগ’। সনাতন ধৰ্মৰ মাপুগ’ স্বয়ং শ্ৰীকৃষ্ণগোবিন্দ। পৰমব্ৰহ্ম, পুৰুষোত্তম, পৰমাত্মা, ব্যক্ত-অব্যক্ত, সাকাৱ-নিৱাকাৱ এগ’ হাবি ভাব-জগতৰ মুংহানাত্ ইঙাল-ঙাল্কে ধৰে দিয়া প্ৰভুএ বুঝা দেসে— পৃথিবীৰমা নিকুলতয় মত, পথ, ধৰ্ম হাবিৰ মহাসমুদ্ৰহান সনাতন ধৰ্ম এহান। তা আৱ, শ্ৰীকৃষ্ণ হাবি ধৰ্মৰ সম্বয় কৰেকুৱা গিৱকগ’। তাঁ সন্ন্যাস নালসিল্ কাৱেও সংসাৱিক বেলেয়া সন্ন্যাস লনাৱকা উপদেশ নাদেসিল, তাঁ ধৰ্মপ্ৰচাৰ নাকৰেসিল— বৰঞ্চ কৰ্মৰ হাদিয়েদে প্ৰকৃত ধৰ্মহান কিহান উহান বুঝাদেসিল। গীতাৰ ধৰ্ম এহান সংসাৱী ধৰ্মহান, অৰ্থাৎ মানব-ধৰ্মহান, ত্যাগ-ভোগ দ্বয়হানৰে আক্ৰপেইত্ যমকৰিয়া চলিল্ ধৰ্মহান, বেদৰ জ্ঞানকাও বাৱ কৰ্মকাওৱে ছতাৱ নাল আগাসল্’ গিঠেসি ধৰ্মহান।

□

নুৱা এলা ১লা বৰ্ষ ৩য় সংখ্যা; নভেম্বৰ, ডিসেম্বৰ, ১১ ডিসেম্বৰ ১৯৮২

নাম-ভ্রংশ

মিয়াঙে ইংরেজর আমলে নাম-ভ্রংশরমা কাকেই জবর কারেসিলা। ‘দস্ত’রে ‘ডট্’, ‘রায়’রে ‘রে’, ‘বসু’রে ‘বোস’, ‘মিত্র’রে ‘মিটার’ ইত্যাদি বানেয়া তানু আধুনিক অলসিলা। তানুর মাতৃজাতির ‘দেবী’ উপাধি নেয়ইল, বদলা অলইলতাই ‘ভবতারিণী ডট্’, ‘মালবিকা রে’ ইত্যাদি ইত্যাদি। ইংরেজর হাঁচুরা খানা মনেয়া মিয়াঙে ইচুবিধ চেষ্টাচরিত্র করে গেসিগা। অনেকগয় বার হিন্দুধর্ম এরাদিয়া শাসকগোষ্ঠীর ত্রাণকর্তা যীশুর খৃষ্টধর্মও ল গেসিগা; ললিত নাঙহানরে ‘ল্যাড়লী’, মহিম নাঙহানরে ‘মাইকেল’, বিজয় নাঙহানরে ‘বেঞ্জামিন’ এসাদে নাঙ থলকরিয়া তানু জবর আত্মপ্রসাদ পা গেসিগা। আমার জাত এহানও ঔসাদে নাম-ভ্রংশর লয়লাটে না হোমাসিতা নাগয়। জরুর হোমাসি।

আমার ইমা-ইন্দলর বিধুমুখী, মালিনী, কমলিনী, মলয়া, মাইজেলা নাঙ এতা মণিপুর মাটিত খাইর হাঁচুরা খেয়া লেইনু, খইমু, মাবেম, নুমিল্লেই, নুমিৎসেনা বারো আমার আপাবপার যাদবসিং, ভাগ্যসিং, দ্রোণাচার্য, ব্রজমোহন নাঙ এতা ঔ কারণেই চাউবা, মেরা, খাবাল, যাইমা ইত্যাদি অলইল। কালস্য কুটিলা গতি! জাত আহানর খলকা-খলকিরমা নিয়ম নীতির ডেকি এসাদে নাও পটাপটি অসে। এপিরমা কথা ইতি নাসে।

মণিপুরে আদিযুগে আমার জেলেই জাতর পোষাকহান অসিলতাই— ঘাঘরা কাঁকালিত, নুপুর জাঙে, য়ারমা মখমল খেলমাচির আঙেই, নিবিবন্ধ (য়াবেরুণী), গারিগরমা পাতলা ইনাফি, আতে রূপার খারৌ, নিরালে সিরিসেই চন্দন, মুরগত্ নিফট্ কালা জুরাগ। পোষাক হাজানির মারৈমাপাং অসিলতাই বিজুরী বার চমকি। গারগত্ হনার কাঁঠিসুরী, পুষ্টম, লিকসই। আমার জাতর কইনা বার মউ জেলেইর কাকেইর ধ্বনিহান হনলে বার রূপহান চেইলে আহিগির পট পড়ানি নাকরল। আমার মুনিজাতর পোষাকহান অসিলতাই— মালকোঁচা কাঁকালিত্, আক্ পরল আঙেই গারিত, নামছা- কনক নিরালে, ধলা কয়েৎ মুরে বার জমজমা চুল বাধলে জটা বা জুরা অসিল, লাঠি আতে। তানুরে চেইলে বীৰ্যবান না বুলিয়া নুয়ারলাং। যুগহান কেলনির পিছে মণিপুরে আমার ইমা-ইন্দলে হরপর চিন্ থলকরা তলফুতি পিদলা, বিশেষ মাতলে আমার পুরীজেলেই এ কঙালা গালে লেইসা লামকরলা।

বিষ্ণু উপাসক আমার গিরিগিথানীয়ে গৌরধর্ম লইলা পিছে মাছ-মাংস এরাদিয়া নিরামিষে বা আমিষরমা মৎস্যকূলে বুলন দিলা। মণিপুর বেলেয়া কালর হুতগত কৌহাঙর সাদে ভাহে ভাহে কুংগয় কুংবেদে মাঙইলা, ঠিকানা নেয়ইল। বাঙাল মুলুক বা মিয়াং মাটিত এয়া তানু বাঙালি অলয়া মিয়াঙর অংতালাকতা তামকরানির হম্মাত্ লাগলা। খাই-আধা, মিয়াঙ-আধা সাজেৎল তানু বিকার-বাকার অইলা। হাতে হাতে মুনির মুরেস্ত কয়েৎ জঙানি অকরল, যত্নল যকরা জপুল্ চুলখম ঢাকায়া বারী দিল। থানারমা থাইলতাই সাধুগুরু বৈষ্ণবর

টিকগত চিকাগাছ। ফুতিফালি হচরং বারী দিয়া মকতকযুক্ত ফেইচম বার লাম্লামা পাঞ্জাবী আঙি। পুরীজেলেইর অপূর্বশোভিতা যাবেকনী বারো খেলমাচি-আঙির পুরাণা গদিগ কালকরলতাই চিতারামাকারা ব্লাউজ। লেইশা কাপানি দুরেই অইল। আকসাটে মুরর গজে চুল আচুরেয়া পুরীজেলেই বার মউ আকতা অইলা। মেরাক-মেরাকে আঙালুরি-তলফুতি, খেদিয়া শাড়ী-সেমিজ হোমেইল, হনার বা রুপার খারৌর নেম্পালে শাখার আকনাল, দ্বিনাল হোভাকরে বহিল। মেরাক-মেরাকে আমার সিঙ্গা-লেইমাগ এইলী না মিয়াং জেলাগ হোমেইলী মাতানি হিনইল।

কালর হুতগ থিংকরানি সহজ নইল। দ্রোণাচার্য, যোগীন্দ্র, গিরিধারী, বাবুধন, যাইমা নাং এতা রবীন্দ্র, বারীন্দ্র, নবেন্দু, সুখেন্দু, বাচ্চু, খোকা অইল বার ললিতা, কৃত্তিকা, তারাবতী, লেইনু, মাবেম নাঙ এতা বন্দনা, কল্পনা, রেখা, তাপসী, রীতা, রুমা, রুবি অলইল। হাবিত্ত ডাঙর কাকেইহান অসেতাই সিংহর (Singha) ফামে সিন্হা (Sinha) বার ইমা জাতর 'দেবী' ক্ষেত্রিয়ানীর ফামেও সিন্হা দেনা এহান— যেমন রবীন্দ্র সিন্হা, রেণু সিন্হা ইত্যাদি। সিন্হা উপাধি এহান উভলিঙ্গ (Common Gender) রূপল নিকুলিল। কিন্তু সর পটেইতে পটেইতে সিংহ (Singha) উপাধি এহানাত্ লিটিংগ বহেইলা। নমুনা সমুনা এতা দেহিয়া অন্য জাতে লেপকরলা বুললে, সিন্হা ইকরতারা ঔতা নকল মণিপুরী বার সিংহ ইকরতারা ঔতা আসল মণিপুরী। হুদুমে মাস্তে বাঙ্গালী, বিহারী, কোঁচ ইত্যাদিরমাও সিন্হা উপাধি চলেসে। তা আর— আসল নকলর দ্বন্দ্ব কেগালানির সুযোগহান আমিএ আমিএ সৃষ্টি করেদিলাং। চুমত্রিক খালকরলে লয়লাটে পড়লাং পারা।

আকদিন মহাসভার কথার কথাস্ত মোরে গিরক আগয় মাতের—

“জগৎ, তি এগ নিয়াম কনজারভেটিভগ অসত্।”

“কিয়া দাদা?”— মি আংকরলু।

“চাতা, হাবিহানে Sinha ইকরতে তি আকখুলাগয় Singha ইকরর এহান। তি আদ্যিকার মানুগ না আধুনিক যুগর মানুগ?”

—“মি আধুনিক যুগর মানুগ।”

—“হাস্তে?”

—“হাস্তে মি নিজর গুড়িগ উছলা বেলেয়া মানুর ডেং পাতাল ফাগিরাম হাজানি না মনাউরি।”

এহানও খুমকরলু— “দাদাগাসিএ সমাজর মা আদর্শ অয়া যে হুতগ বহাদিলাই, ভবিষ্যতে আমারতা লয়লাট অবশ্যস্তাবী।”

—“কিসাদে?”

—“আনাংশার দিনে নিজর ঠার, নিজর পোষাক, নিজর নীতিচারে মানুরে যেসাদে কালকরের, অন্যর সাজেলল ঔসাদে নাইতয়, বরঞ্চ লয়লাট আহিতয়। পরধর্মো ভয়াবহঃ।” □

মুঙামুঙি

প্রাক্তন অধ্যক্ষ শ্রীজগৎ মোহন সিংহ, বিএস সি, বি এ, বি টি গিরকর লগে
নুয়া এলা পত্রিকার সম্পাদক

- সম্পাদক ১ :** গিরকর জরমর ফামহান কুরাং বারো শিক্ষা দীক্ষা কুরাং করেছি ?
- জগৎমোহন :** মি জরম অসু গাঙহানর নাঙ ভকতপুর। শিলচর মেহেরপুর পরগণার প্রাচীন গাঙ আহান।
- সম্পাদক ২ :** ছনলাং গিরকে উচ্চতর মাধ্যমিক স্কুলর অধ্যক্ষর পদফামেস্ত জিরেইলাং। পদফাম উহানাত থাইতে গিরকরে কিহানে জবর হারৌ দিল বারো কোন বিষয়ে হিন দিল, কিসাদে বিষয়ে হিন দিল ?
- জগৎমোহন :** শিলচর সরকারী উচ্চতর মাধ্যমিক বিদ্যালয়র অধ্যক্ষ পদফামে এগার বছরর গজে আসীন আসিলু (১লা জানুয়ারী ১৯৭২ - ২৮শে ফেব্রুয়ারী ১৯৮৩ ইং)। ভরী দায়িত্বর অওয়াহীনেস্তও নুঙেই নুংসি জিঙে পেয়া ইচুবছর কাম করে গেলুগা; সময়সময় শত্রুর চক্রান্তত নিয়ান হীনপেইলু, কিস্তমান মারূপ নিয়াম থানায় জিংতাও অইলু। মোর সহায় ভগবান নিজে-এ বিশ্বাসল' অনেক ফারা কাপিয়া গেলুগা। ১৯৭৪-৭৬ ইং বছর দ্বিয়হানাত কাছাড় ডিস্ট্রিক্ট একাডেমিক কাউন্সিলর সভাপতি পদফামে নির্বাচিত অইলু। ১৯৭৪-১৯৮০ ইং এ ছয় বছর আসাম মাধ্যমিক শিক্ষা পর্ষদর সদস্য পদফামে থায়া সারা আসামর সেবা করে গেলুগা, কাছাড়রকা জবর হমা করলু। ১৯৮০ ইংরেজীত এ অবদান হাবির স্বীকৃতি স্বরূপে আসাম সরকারে মোরে রাজ্যিক পুরস্কার দিল। লমইতেগা শত্রুর গভীর চক্রান্তর সালে পেইম জাতীয় পুরস্কার (National Award) উহান না পেইলু এ দুঃখ এহানতে থাইল।
- সম্পাদক ৩ :** গিরকে শিক্ষাদানর কামে নংসাং অয়া আছিল্যাং যার ফলে বিভিন্ন জাতর শৌশুমারার বৈশিষ্ট্য শ্বে নেয়া হারপা থাইবাং। আমার শৌশুমারায় পরীক্ষাত নিয়াম হোভা ফল দেখ্যা নারতারা, এহানর কারণহান গিরকর মতে কিহান ?
- জগৎমোহন :** প্রতিকূল পরিবেশ থানিয়ে বার আদর্শবোধ, একাগ্রতার অভাবর কারণে বুদ্ধিচহা আমার শৌশুমারায় পরীক্ষারমা জুগৎ ফল করে নারতারা।
- সম্পাদক ৪ :** এ বিষয়ে আমার অর্থনৈতিক বারো সামাজিক পরিবেশ কতিহান দায়ী বুলিয়া গিরকে নিংকরিয়ার।
- জগৎমোহন :** শৌশুমারার এ দশারকা সামাজিক কারণেস্ত অর্থনৈতিক বার আদর্শবোধর অভাবে জিঙে দায়ী।

সম্পাদক ৫ : আমার শৌশুমারায় স্কুল কলেজের পরীক্ষাত হোভা ফল দেখ্যানি অইলে
কিহান করানি থক বুলিয়া গিরকে মনেয়ার ?

জগৎমোহন : উন্নতি করিক্ বুললে কঠোর পরিশ্রম, একাগ্রতা বার আদর্শবোধ তানোরতা
থানা লাগতয় ।

সম্পাদক ৬ : গিরকে সমাজের কামে অনেকদিন আগেস্ত জড়িত আছিল্যাং । এ সমাজের
কামরমা কোন কোন গিরিগিথানীর লগে গিরকে কাম করেছিল্যাং হারপা
পারবাংতা ?

জগৎমোহন : আমার জাতের পুরানা সমাজসেবী *মহেন্দ্রবাবু, *গীতিস্বামী গোকুলানন্দ,
*রাজেন্দ্র ডাক্তার, *সমরজিৎদা, *নিশিকান্ত খুড়া, বাবুচান্দ উকিল, কামিনী
উকিল, কৃষ্ণকুমার খুড়া, *কালোধন খুড়া, মানিক বাবু, *গৌরনিতাইবাবু,
*চন্দ্রকান্তদা ইত্যাদির তুল কাম করেসিলু ।

সম্পাদক ৭ : আগেকার সমাজসেবী গিরিগিথানীয়ে কিহানরে প্রধান উদ্দেশ্যহান মুঙে থয়া,
কামে লাগেছিল্যা বারো উহানাত কতিহান কৃতকার্য অছিল্যা বুলিয়া গিরকে
মনেয়ার ?

জগৎমোহন : পুরানা সমাজসেবীর মুখ্য কামহান অসিলতাই সমাজরে ঐক্যবদ্ধ করানি ।
সমাজ, বিশেষ করে ইমাইন্দলর জাগরণ করানি, সমাজ সংস্কার করানি ।
তাঁনোর দান পাছরিলতা নাগয় ।

সম্পাদক ৮ : গিরকে আমার বিষ্ণুপ্রিয়া মণিপুরী কোনো পত্রিকার লগে জড়িত অছিল্যাংতা ?
থাইলে কিসাদে পত্রিকার লগে অছিল্যাং বারো পত্রিকা উহান সম্বন্ধে দুহান
আহান কথা হারপা পারবাংতা ?

জগৎমোহন : “নুৰা বেলি” “বিষ্ণুপ্রিয়া” বার “ফাগু” পত্রিকারমা মি সক্রিয় অংশ
নেসিলুগা । আধুনিক কালর “আমার পৌ”, “পাঞ্চজন্য অজুনি”, “মলয়া”
“নুয়া এলা” ইত্যাদির তুলও মিঃ সামলাক থসু ।

সম্পাদক ৯ : গিরকে মহাসভার সাহিত্য পরিষদের লগে যুক্ত আছিল্যাং । বারো সভাপতির
পদফামেও বহেছিল্যাং । সাহিত্য সম্বন্ধে পরিষদের কৃতকার্যতা বারো ব্যর্থতা
সম্বন্ধে গিরকে কিহান মাতানি মনেয়ার ?

জগৎমোহন : ১৯৫৫ ইংরাজীস্তু (?) আজি পেয়া নিখিল বিষ্ণুপ্রিয়া মণিপুরী সাহিত্য
পরিষদের সভাপতিগ’ হিসাবে আমার জাতের বার সমাজের মূর্তিপালপা
পারম্পর্য্য বার ঠারহানর ভাবমূর্তিগ’ কালকরানির হন্নাত লাগেসু । শিক্ষার

প্রাথমিক স্তরে বার আকাশবাণীরমা ইমাঠারহানরে অভিষেক করানির কামে মহাসভার নেতা বার ছাত্র ইউনিয়নের নেতা হাবির পিঠিত থায়া তেৎনেই পাংলাক করুরি। সফলতান্ত জিঙিয়া ব্যর্থতার মুঙামুঙিই নিয়াম অসু, টটরেয়া কানা নেই।

সম্পাদক ১০ : সাহিত্য পরিষদে আমার সাহিত্যর বিকাশর পথে কার্যকরী ভূমিকা পালন করানি অইলে কিহান করানি থক্ বুলিয়া গিরকে নিংকরিয়ার।

জগৎমোহন : সাহিত্যর বিকাশর কামহানাত ইমাঠারহানর প্রতি নিষ্ঠাহান বপকরে থনি লাগের। হিকানি লাগের, জ্ঞানর ভাণ্ডারগ চাংখল করে থনি লাগের ; এসাদে কর্মত উগ্র মনোভাব হাবি সময় এরেন্দেনা লাগের।

সম্পাদক ১১ : এবাকা পেয়া গিরকে কি কি লেরিক প্রকাশ করেছি বারো মুঙে কি কি লেরিক প্রকাশ করানি মনাছি ?

জগৎমোহন : বহু নাটক যারি, উপন্যাস, রম্যরচনা, এলা, কবিতা, ‘করপেখ’ বার প্রাথমিক স্তরের উপযুক্ত আমার লেরিক ইকরেসু থাঙও রূপার অভাবে ছাপেইল উপায় না পাসু। মহাসভার লেইশিদারগ অয়া সজ্জন গিরিগিথানীর পাংলাকে The Mahasabha Review ইংরেজী লেরিকহান ১৯৭০-৭১ ইংরেজীত ফঙকরলু। সাহিত্য পরিষদর দায়িত্বহান এহান। এহানর পিছে সরকাররাং আমার দাবী বার আমার ন্যায্য অধিকার হাবি তুললাং দুহান ইংরেজী স্মারক গ্রন্থশৌল’। অধ্যাপক শ্রীমান বীরেন্দ্র কুমারর সহযোগল’ সাহিত্য পরিষদর পক্ষত The Bishnupriya Manipuris and their Culture গ্রন্থহান নিকালেয়া ডঃ সুনীতি চাটার্জী বার ডঃ মহেশ্বর নেওগর বাংলা অসমীয়া ঠারর সাম্রাজ্যবাদর যোগ্যতম মোকাবিলা করলু। বিষ্ণুপ্রিয়া মণিপুরী ঠার এহান বাংলা- অসমীয়া ঠার গোষ্ঠীর বহির্ভূত ঠার আহান, শৌরসেনী-মহারাষ্ট্রী ঠার গোষ্ঠীর আহান অইলেও আমার ঠার এহানে ফাম কালর প্রভাবে প্রাচীন কুকী, তেইইউ, মেইতেই বার মিয়াং ঠারর হাঁচুরা খেয়া খেয়া সাদহান খানি পটাসে এহানলই মোর তেৎনেই সংগ্রাম চলেসে। মোর লেরিকর এহানেই ধ্যানহান।

সম্পাদক ১২ : আমার পত্র পত্রিকা নিয়াম দিন জিংতা অয়া থানা নুয়ারের। এহানর কারণহানি কিহানি বুলিয়া গিরকে নিংকরিয়ার ?

জগৎমোহন : গ্রাহকে পত্রিকার ধন দেনা না মনেইতার কারণে পত্রিকা বন্ধ অর ; নিজর ইকরা মারৈ মাপাংল’ গ্রাহক হাবিএ পাংলাক না. করানিও পত্রিকা বন্ধর ডাঙর কারণ আহান।

সম্পাদক ১৩ : সাহিত্য পত্রিকা চলেইতে গেলেগা বিশেষ কোন বিষয় হান মুঙে থয়া কাম করানি প্রয়োজন বুলিয়া গিরকে মনেয়ার ?

জগৎমোহন : সাহিত্য বুলিল বিষয় এহানর বহুমুখী অর্থ, উদ্দেশ্য বার আদর্শহাৰি সাহিত্য পত্রিকার পরিচালক মণ্ডলীএ হারপানি থক্।

সম্পাদক ১৪ : পত্রিকাহান জিৎতা করিয়া থইতে গেলেগা তামকরেকুরার কতিহান দায়িত্ব থানা থক্ বারো আমার তামকরেকুরা গিরিগিথানীয়ে ঔ দায়িত্ব উহান কতিহান পালন করতারা বুলিয়া গিরকে মনেয়ার ?

জগৎমোহন : অজাগয় এলাদের, ভাবকগয় ছনের, রস পীয়ের। ঔসাদে সাহিত্য ইকরেকুরাগয় ইকরের, পাকরেকুরাগয় পাকরের, রস গিলের। আমার সাহিত্যরতা অসেতাই পাকরেকুরা, সমঝেকুরা কম, ইমা- ঠারর বেদে ইশাও কম। অবশ্য বিষয় চিন্তাকৰ্ক নাইলেতে পাকরেকুরায় উৎসাহ না পেইতারা, তামকরানি না মনেইতারা।

সম্পাদক ১৫ : আমার শিক্ষিত গিরিগিথানীয়ে কি তানুর দায়িত্ব যথাযথ পালন করেছি? নাকরলে কারণহান কিহান বুলিয়া মনেয়ার ?

জগৎমোহন : আমার ঠার, আমার সাহিত্য, আমার কৃষ্টি এতাহাবির বেদে আমার প্রায় শিক্ষিত মানুএ খিয়ালহান কম থইতারা; নিজর এতাল কিহান কানাপা অইতয়তা এসাদে মনোভাবল'দুসরা জাতরাং তাঙনি মনেইতারা। সুতরাং তানো নিজর দায়িত্ব পালন না করেসি। এসাদে দশাত পড়লাক'পুরি তানো শৌশুমারারে আদর্শভ্রষ্ট করেদিতারা।

সম্পাদক ১৬ : এ যাবৎ যত বিষ্ণুপ্রিয়া মণিপুরী পত্রিকা নিকুলেছে এতারমা সাহিত্য বিকাশর কামে কুঙ পত্রিকাহানে নিয়ান কাম করেছে বুলিয়া গিরকে নিংকরয়ার বারো উহানর কারণহানো বা কিহান ?

জগৎমোহন : 'বিষ্ণুপ্রিয়া' পত্রিকায় নিয়াম কাম করেসিল। সাহিত্যর ধারাগ পত্রিকা এহানে বহাদেসিল। বাকী নিকুলে যারগা পত্রিকা এতার আয়ু কম অনায় সাহিত্যিকে স্থায়ী ফল দেনা নোয়ারেসি।

সম্পাদক ১৭ : নুয়া ইকরেকুরারে আমার সমাজে নিয়াম নাদেহিয়ার এহানর কারণহানি কিহানি ?

জগৎমোহন : নিষ্ঠা বার আদর্শর অভাবে আজিকালি সাহিত্যিকর মিশিংহান কমে যারগাতা। তেবও চেষ্টা চলাসি দেহিয়া হারউ অয়ার। অর্থনৈতিক কারণও এ বিষয়ে থাইল বুলিয়া নিংকররি।

সম্পাদক ১৮ : নুয়া ইকরেকুরার যে এরে তাঙনি এহান, এহানাত কি আমার প্রবীণ গোষ্ঠীর কোন ব্যর্থতা নেই বুলিয়া গিরকে নিংকরিয়ার ?

জগৎমোহন : প্রবীন সাহিত্যিকে নবীন সাহিত্যিকের পথগ' দেখ্যাদেনা লাগের। নানান বঞ্চনার হাদিত আমার সাহিত্যিকে প্রৌঢ় পানা নোয়ারলা হান্তে তানোরোও দায়ী করানি থক্ নেই। ব্যর্থতারকা সরকার দায়ী, বার অপথরে পথগ' বুলিয়া নিংকরেসি আমার কতগ দায়ী। প্রবীন গোষ্ঠীরমা 'সর্বমঙ্গলায় সর্বহিতায় চ' এ মনোভব এহান কমসে। আমার ঠার এহানর মূল জর-ঠইমামি মাংকরানিরকা আমার হাদির কতগিয়ে লুক্ক অসিহান দেহিয়া মি মনহানাত নিয়াম দুঃখ অলাং পাসু।

সম্পাদক ১৯ : এবাকা পেয়া আমারতা যত কাব্য নিকুলেছে উতারমা কুঙহানে গিরকরে জবর হারৌ দেছে?

জগৎমোহন : কুং কাব্যহানে শ্রেষ্ঠ এহান মাতানির সময়হান এবাকাও নাসে।

সম্পাদক ২০ : এযাবৎ বিষ্ণুপ্রিয়া মণিপুরীত যত কবিতা নিকুলেছে উতারমা কোন কবিতাগ' গিরকরাং হোভা লাগেছে বারো কারণহান কিহান ?

জগৎমোহন : শৌরকা গোপীনাথ গিরকে ইকরেসে ছড়া কবিতা উহানিয়ে মোরে নিয়াম হারউপা দেসে।

সম্পাদক ২১ : গিরকর প্রকাশিত বারো অপ্রকাশিত কবিতারমা কুঙগরে জবর হোভা পেয়ার বারো হোভা পানার কারণহান কিহান ?

জগৎমোহন : মেংশেলহানাত নিজর মেইথংহানরে যেগয়ও হোভা পেইতার। কুংদিন আমার ইমাঠারহান শিক্ষা সংস্কৃতির বিষয়ে উপযুক্ত আসনে বহে পারতয়তা—এ ইশাল' সংগ্রাম করতে করতে আজি পেয়া মি ইমাঠারহানর জুগৎ সেবা আহান করানি নোয়ারেসু। এতার গজে সেবামূলক 'সাধুঠাকর সেবাশ্রম আগর হুন্সাল' দিন যারগা হান্তে চিক্করে ইমার সেবাহানাদে মনহান দেনা নোয়ারেসু। তেবও সময় পানাই ইকরুরি। আকহানতে মাতে পারুরি বুললে, গদ্য সাহিত্যর রূপকার হাবির হাদিত মিও হাবির নিংশিং যোগ্যগ' অ থাইম। যেতাও অক, মোর ওজনহান মি নিজে করানি নাজানু।

সম্পাদক ২২ : আমার সমাজর গিরিগিথানীরাং গিরকরতা কোনো কিছু মাতিলতা থাইলে মাতিক।

জগৎমোহন : আমার জনমে ইমা তিনগ' যথা জরম দেসে ইমা, মাতৃভূমি বার ইমাঠার। পুতকগর উচিত ইমা এগির সেবা করানি, না করেও ওগর জনমহান বৃথা। সমাজর সেবাই কৃষ্ণ সেবা। সমাজরে ডরপানি লাগের। সমাজে বানাপেইলে

মোরে উরে করতায়, আলি পেইলে পিষিয়া বেলা দিতায়— প্রত্যেকগয়
এহান নিংশিং অনা লাগতয়। সমাজর হোভাহান করলে পুণ্য অর,
হোভানেইতা করলে মুক্তি নেই। নিঙ এহান থইলে ব্রহ্মাগ জাগতয়। এহানিই
মোর সমাচার বুলিয়া হারপেইবাং।

সম্পাদক ২৩ : আমার নুয়া এলা পত্রিকা গিরকরাং নিয়মিত দিয়া পেঠেয়ার। পত্রিকা এহান
সম্পর্কে গিরকর মতামত সংক্ষেপে বাগেইক বারো কিহান করলে আরাকৌ
হোভা অইব বুলিয়া গিরকে নিকরিয়ান উহান বাগেইক।

জগৎমোহন : জরম অনার লগে লগে ‘নুয়া এলা’ এহানে আমার সাহিত্যর মধ্যমণিগ’ অনা
পারেসে এহান দেহিয়া হারউ অসু।

সম্পাদক ২৪ : গিরকে আমার প্রশ্ন এহানির উত্তর দেনারকা। আমার পত্রিকার তরফেস্ত ধন্যবাদ
জানৈয়ার বারো আমার বিষ্ণুপ্রিয়া মণিপুরী সাহিত্যর আরাকৌ উন্নতি করিক
এহান মনেয়া বিদায় লয়ার। নমস্কার।

জগৎমোহন : আংকরেসি সওয়ালহানি হোভা পেইলু। জোওয়াপহানি জুগৎ অইল কি
নাইল দশে বিচার করেদেকা বুলিয়া মি সম্পাদক গিরকরে হমা, কৃতজ্ঞতা
বার ধন্যবাদ জানেয়া এপেইত ক্ষান্ত অইলু।

□

নুয়া এলা, ২য় বর্ষ ২য় সংখ্যা; সেপ্টেম্বর, অক্টোবর, ১৯৮৩

যমপুরী

চরিত্র

মুনি

ধর্মরাজ □ মহাদ্রুণী □ চিত্রগুপ্ত
রাজবাবু □ ফাল্গুনী □ অক্লাবা □ লেইখমসেনা □ কোইরেঙ
নারদ □ নারায়ণ □ বৃষভানু
কুঞ্জরাজ □ গোকুল □ মহেন্দ্র □ গিরিবর □ তনু □ কৃষ্ণকুমার
যমদূত □ প্রহরী

জেলেই

বিমলা □ বিষ্ণুপ্রিয়া

রচনাকাল ১৯৬৫

১ম দৃশ্যহান

(যবনিকার পিঠিত নর্তক-নর্তকীহাবি ভঙ্গীল উবা)

বাদ্যযন্ত্রর ধ্বনি— ধ্রাং-ধ্রাং-ধ্রাং (যবনিকা হাতে-হাতে সেচিল)

ধ্রাং (মূর্তির সাদে উবা নর্তক-নর্তকী হজাক অইলা)

ধ্রাং-ধ্রাং— (নাসানি অকরলা)

(মুণ্ডে— পিঠিস্ত যমপ্রহরী, হাদিৎ যমরাজা, চিত্রগুপ্ত বারো মহাদ্রুণী হমেইলা)

জয়ধ্বনি— জয় যমরাজার জয় (দ্বি-খুরুম) জয় ধর্মরাজ মহারাজা-কি জয় (দ্বি-খুরুম) যমরাজ সিংহাসনহানাৎ বহিল— নর্তক-নর্তকীএ হমাদিলা বারো নাসে-নাসে প্রস্থান করলা)

যমরাজা ॥ মহাদ্রুণী!

মহাদ্রুণী ॥ ধর্মরাজ!

যমরাজা ॥ মর্ত্যৎ পাপীর সংখ্যাহান ইচ্ছান বোলে নুবারলু। বরিষার তিঙারা মাটিৎ গোট্-গোট্ পেপুড়া নিকুলতারা যেসাদে, উসাদে সীমা-সংখ্যা নেয়া নিকুলতারা পাপীর গোট্হান। তানুরে মোর দূতে আচুলিয়া আন্তায় গোট্-গোট্ করে। তারো—

মহাদ্রুণী ॥ আরাকৌ ধর্মরাজ— নিবেদন আহান, তোর শ্রীচরণে। মর্ত্যৎ জবর অসে খানাপিনার সমস্যাহান। না-খেয়া না-পিয়া মরতায় কঙ্কেই আকেইগ। তানুরেউ যমদূতে আচুলিয়া আন্তায় যমপুরীৎ।

যমরাজা ॥ ঔহানল মহাদ্রুণী, মাতৌরিতা ত্বরাকরে পুরাণা কয়েদীর বিচার করানি লাগতয়। মোর পুরী এগৎ ফামর জবর অভাব পড়তয় দেহৌরি। হাজংগত আসি কয়েদীহাবিরে আকেইগী করে নিকালানি বারো তানুর বিচার করানি লাগতয়। যে কামে যেগ থানা- ঔপেই ঔগরে তেল্লাম্ দিয়াপেঠাদেনা মনেইলু। (মেইথঙহান বোলেয়া) হে চিত্রগুপ্ত! তি তোর করপেখহান প্রস্তুত থ’— পাপপুণ্যর হিসাব হাবি লয়করিয়া থ’।

চিত্রগুপ্ত ॥ ধর্মরাজ, করপেখহান প্রস্তুত থসু মি। বাকীটাকি আক্তাউ নাথসু— হিসাবর খাতাহানাৎ।

যমরাজা ॥ উত্তম, মহাদ্রুণী।

মহাদ্রুণী ॥ মহারাজ!

যমরাজা ॥ পৈলাকার দলহান ঠিক করগা আগে।

মহাদ্রুণী ॥ এইগা মহারাজ! (আসন এরেদিয়া যমপুরী হাজতেস্ত বোলিয়া আহিল্‌গা)
ঠিক্‌করলুগা ধর্মরাজা, বিষ্ণুপ্রিয়া বোলিল্‌ জাৎ আহান মর্ত্যৎ আসে। ঔতার
আদিনিবাস মণিপুর বোলতারা ফামে। দৈব-দুৰ্বিপাকে রাজ্য এরেদিয়া
ডেই-ডেইহারা অসি ফামে-ফামে। পাপর কারণে তানুরতা শাস্তি নেই
কুনোপেইতো। ঔ জাতর মানু কতগি যমপুরীর হাজৎ পড়িয়া আসি এবাকাউ।
তানুরে আগে বিদায় দিক্‌ মহারাজ।

যমরাজা ॥ হোভা অসে, মহাদ্রুণী! চিত্রগুপ্ত! (তার বেদে চেয়া) করপেখহান প্রস্তুত অসেনাই?

চিত্রগুপ্ত ॥ করপেখহান প্রস্তুত মহারাজ! পৈলাকার কয়েদীগ অসেতাই— রাজবাবু—
বিষ্ণুপ্রিয়ার ডাঙর পাপী আগ। তারে আগে আনিক্‌।

মহাদ্রুণী ॥ প্রহরী! হাজৎগস্ত রাজবাবুরে আনো।

প্রহরী ॥ এইগা গিরক! (হমাদিয়া প্রস্থান। যমদূত দুগৈ রাজবাবুরে পেটিনাটি আচুলিয়া
আন্তারা)

আট্টিঙ্গাৎ এলাহান—

সমাজর মঙ্গল করানির কাজে

আহেসিল্‌ রাজবাবু এ ভবে।

লেইরাপার শৌগ, সঙ্কল্পে বজ্রগ,

ইমার সেবাৎ দেহ কাৎকরেসিল্‌।

ঘরে-ঘরে বুলে পরলে-পরলে

আতুরর থতাৎ অন্ন দেসিল্‌।

বিদ্যাগুণ-নেয়া আঁধারে বুরিয়া

দিগ্‌ দিশা নেয়া বুল্‌তারা চেই,

ঔসাদেতার মুণ্ডে ভগবানর নাঙে

লাগাসিল্‌ কতি জ্ঞানর থংমেই।

হিষ্কাপায় তিক্‌পেয়া রাহ্‌কেতু অয়া

গিল্‌লা এসাদে পুৰ্ণিমাহান্‌

আঁধার অইল্‌ ঘর— লেইরাপা-সমাজর

কুরাং থায়া দেহর-হে ভগবান।

(যমদূতে আচুলে-আচুলে রাজবাবুরে বরেইলা)

যমরাজা ॥ চিত্রগুপ্ত!

চিত্রগুপ্ত ॥ ধর্মরাজ!

যমরাজা ॥ তোর করপেখানাৎ এগর পাপপুণ্যর হিসাবহান কতিহান অসে পাকর।

চিত্রগুপ্ত ॥ ধর্মরাজ! (করপেখ চেয়া) রাজবাবু এগ কনাক্ বয়সে মারেসিল্গ। ঔহানলতে হিসাবর পাতাৎ তারতা পাপপুণ্যর ভারহান কমসে। তথাপি ধর্মরাজ, এগর দেহ এগৎ জনমত ডাঙর পাপ্ আহান লাগিয়া আসিল্।

যমরাজা ॥ উঁ! কিসাদে পাপ্হান মাত্তা।

চিত্রগুপ্ত ॥ নিজর জাতর মঙ্গলহান হামেশা তা খালকরল। অতি লেইরাপার ঘরে জরম অয়াউ গাঙগরর দশগয় কিসাদে লেইরিকর কালা মেয়েক্গ দেখবাতা এহানর চেষ্টাহান নিলগা। বিষ্ণুপ্রিয়ার সেবারকা গাঙঘরে সভা-সমিতি করল।

যমরাজা ॥ মহাদ্রনী! রাজবাবু এগতে কম ডাঙর পাপীগ নাসে।

মহাদ্রনী ॥ (আতজোড় করে) টটরানিরতা থাইলতা ধর্মরাজ? পথে শিনা পেয়া ঔহানল মানুবে তারে মারেদেসিতা।

রাজবাবু ॥ ধর্মরাজ মি জরম অসু জাত্ ঔহান আচাম্পা জাত্হান নাগই, কিন্তুমান কার শাপাস্তয় তলনিৎ খম্-থেঙয়া আসি তানু। ঔ দশা ঔহান দেহিয়া কার ঠইগৎ না শেল্গ বিধতয়তা? সেবা এহান কি পাপ কর্মহান ধর্মরাজ?

মহাদ্রনী ॥ বাবা, তোরতা দশাহান জবর অসেক।

রাজবাবু ॥ কিহর দশা? মোর ইমার সেবা করতে কিহর দশা?

মহাদ্রনী ॥ নিয়াম চেংদর আরহে হোভা-ভালা মানুবে শিনা পেয়া পাল্‌টয়গ হংকরেদেসিলা নাই।

রাজবাবু ॥ কুংগ হোভা-ভালা মানুগ? মোরে মারেসি উতা? ঔতাতে নরজন্মৎ দানব অয়া জরম অসিতা। ধর্মা-ধর্ম রঞ্জ আগ নেই ঔতার; ঔতায় হোভা-ভালা অনি, বারো ধর্মর পথগৎ আটিয়ার মানুবে পাপী অনি, এহানতে কিসাদে বিচারর কথাহান ধর্মরাজ?

যমরাজা ॥ রাজবাবু! এহান তর্কর ফামহান নাগয়। মূল কথাহান— তি যে জাতহানাৎ জরম অসত্, ঔ জাত ঔহানর সেবা করেসত্; ঔহান ডাঙর পাপহান।

রাজবাবু ॥ ঔহান অইলেতে ধর্মরাজ! আরাঙ্ জাত আহানাত্ জরম অয়া ঔহানর সেবা করলুইস্তে?

মহাদ্রনী ॥ এহে, শৌ এগতে জবর হেঙ্কাৎ দেরক'! ধর্মরাজ; এগর হুকুমহান করেদিক্। আমার উকিলর মতেতে এগ সমাজদ্রোহীৎ পড়ের। ২২৩নং আইনর ধারা মতে তারতা নিয়াম দিন কারাদণ্ড আসে।

যমরাজা ॥ মোর হুকুম, রাজবাবুর মুক্তি নেই। এ পাপী এগর শাস্তিহান অইলতায় তপ্তা লুবার চকী আহানাৎ নিক্কা জবরদস্তী করে ঘমুযোবানি বারো গারিগৎ লুবার

পেরেক হাদি-হাদিৎ মারানি। (যমদূতর বেদে চেয়া) দূত। তুমি তারে যমপুরীগর
দক্ষিণ কুঞ্চেলগৎ নেইগা।

রাজবাবু ॥ হায় ইমা বিষ্ণুপ্রিয়া। হায় হরি। কুরাংঙ থায়া দেহরায়তা, আমার দুঃখ এতা—
জয় ইমা বিষ্ণুপ্রিয়ার জয়। ২ (যমদূতে আচুলতারা বারো রাজবাবু আত্নাদ
করের)

যমদূত ॥ হেই বেরাচেরা নাকরি, বারেইতে বারেইতে চেলাগ মাহি নিকাল দিতাঙায়।

রাজবাবু ॥ জয় ইমা বিষ্ণুপ্রিয়ার জয়। জয় ইমা বিষ্ণুপ্রিয়ার জয়। জয় ক্ষত্রিয় জিপুতর জয়!!
জয় দীনবন্ধু পতিতপাবন হরির জয়!!!

—প্রস্থান—

(প্রহরীয়ে ফাল্গুনীরেল হোমেইলা)

মহাদ্রুণী ॥ এগতে কুংগ প্রহরী ?

প্রহরী ॥ এইগা কর্তাগিরক, এগর নাং ফাল্গুনী।

যমরাজ ॥ চিত্রগুপ্ত। এগয় কি কি পাপ করেসেতা চাতা তোর করপেখহানাং।

চিত্রগুপ্ত ॥ ফাল্গুনী এগ জাতরকা জবর খালকরল। কাছাড় লালয়া মণিপুৰে গিয়া ঔপেইর
বিষ্ণুপ্রিয়ারকা পাঠশালা বহুরেইল, কাছাড়ের অজারেল নোবেয়া মণিপুৰে শিক্ষার
সুবন্দোবস্ত করেদিল। ছক্কা বিষ্ণুপ্রিয়া নাগয়, মণিপুৰর মৈতেইও তারাং ঋণী
অসি। কাছাড়ে বাজার কাইতারা ইমাইন্দলরে বাজার যানা থিংকরল।

মহাদ্রুণী ॥ তিতে জবর পাপ করেসত ফাল্গুনী। তোরতা রক্ষা নেই। এ পাপর বক্চা এহানল
তি মর্ত্যত আসিলেগা থাংতে তি এবাকা নরকযন্ত্রণা ভোগ করতেই শয়নায়া।

ফাল্গুনী ॥ এহানতে কিহান (আটিঙ্গাদে চেয়া)। এহানতে কিহান প্রভো! কপাল থির মাঝে
চিয়রসি জাত আহানর সেবা করানি এহান কি পাপর কামহান ? হায় হায়-হরি—

(এলাহান)

এহানতে কিহান হরি

কি মর্ত্য কি যমপুরী

হাবিতাত বিপরীত রীতি,

জীবর সেবা হরির সেবা

শাস্ত্রয় লৌদের কতি হোভা

ঘোর কলিয়ে ঔতা হাবি শাক্তি ।

বিষ্ণুপ্রিয়ার সেবারী

অসি হাবি পাপাচারী

ঔহানলকো পরমায়ু কম,
 ঠক্ঠকামি করতারাতা
 ঔতাই অইলা পুণ্যবানতা
 ঔতারে ডরার স্বয়ং যম ।
 বিষ্ণুপ্রিয়া নিকুঞ্জবন
 ভারতভূমহান শ্রীবৃন্দাবন
 পাছরানির সাধ্য মোরতা নেই,
 প্রলয়ে মাঙক থল
 ছকক সমুদ্রজল

তবো বিষ্ণুপ্রেম মাঙনিতো নেই।

যমরাজা ॥ তুমিল অ ফাস্তুনী, তি তোর জাতহান বানা পাউরি বোলিয়া মাতর ঔহান কিসাদে ?
 তিতে তোর জাতর ইমাইন্দলর গজেও অত্যাচার করেসত উনি ? (চিত্রগুপ্তর
 করপেখহান চেয়া) দূত, বিষ্ণুপ্রিয়া কয়েদীর মা 'অক্লাবা' বোলিয়া কয়েদী আগ
 আসে, ঔগরে আনগা ।

দূত ॥ এইগা ধর্মরাজ, 'অক্লাবা' বোলিল ঔগ এগ, জবর পুণ্যবান ।

যমরাজা ॥ মাততা অক্লাবা, এগ কুংগ ?

অক্লাবা (তোৎলাগ) ॥ অ, নিংশিং অ-অইল । শ্ম মহারাজ, ধ-ধর্মরাজ, এগনাই আ-আকফুরুং
 শ্ম শ্মরে শিনা পেয়া তা-তা-তাল করতে তালকরতে লয়করেসিলগ ।

যমরাজা ॥ কিয়াকা ?

অক্লাবা ॥ ধ-ধর্মরাজ, গা-গাঙ ঘরেস্ত ইমাইন্দল বা-বাজারে কা-কাইলা মাপা ঔহানাত মি
 তা-তানুর খুটিগ অ-অলসিলু বাজারর দি-দিনহান বাদেও কু-কুআটে পেয়া যেগরে
 পেইলু, ল-লগ না এ-এরে দিলু । হাদিহাদিৎ ই-ইমা ইন্দলরাংতঃ পানা
 আ-আকেইশবা মাগিয়া খে-খেইলু । সে-সেঙগাউগতঃ কঙালা আতর, ক-কঙালা
 আঙুলীগিল গুবাশবা তাপকরে দি-দিবা উপেইততে কি-কিতা বোলতু, ধ-ধর্মরাজ
 গিরক, গারি এগ আ-আকেইখুরুম র-র-র-রমকাটা দিয়া উঠের পা-পারা । ঔ
 নুঙেই উহানাত এরে ফাস্তুনী দু-দুষ্ট এগ দা-দানবগ অ-অলয়া নিকুলিল পারা ।

যমরাজা ॥ আরতাও এগয় তোরে হিন দিলতা ?

অক্লাবা ॥ ধ-ধর্মরাজ, গাঙর গা-বুরাপুরেই কতগি নি-নিকালেয়া গোট বাদদিয়া ফাস্তুনী
 দু-দুষ্ট এগয় ইমাইন্দলরে "বাজার কানা থিঙই" বোলে বোলে অ অ-অর উরা-উরা
 কম লাকনা দিলগ থাং বারো উতাই পেল নায়া এগয় হেই, জেলেইর লাঠি
 বু-বুড়া চু-চুটাগ, তিতে কুরাং ধা-ধা-ধাবদিতেইতা বো-বোলিয়া হেকক মোর
 গ-গজে পড়িল অ-ঔহানতে আঃ ।

- যমরাজা ॥ উতার পিসেদেতে ?
- অক্লাবা ॥ লা-লাজহানে ই-ইমাইন্দলর বারাদেস্তে আ-আকেইফুরুং-তেরাদে চাউরি,
আরাকবেদেস্ত নিজর জা-জানহানল ধা-ধাবদুরি। ঔ লাকনা উহান নিংশিং অইলে
এবাকাও এ চু-চুটা এগরে খা-খানি আ-আতেইংহে বো-বোলিয়া আত খাজুরার।
- ফাল্গুনী ॥ সাবধান অক্লাবা খুড়া। যমপুরীত এয়াও তোর কুঅভ্যাস ঔহান না যারগাতা।
- অক্লাবা ॥ দেখলাংতা ধর্মরাজ, এগর তেজ এচুটি।
- যমরাজা ॥ সাবধান ফাল্গুনী, তোর কপালে এবাকাও অরাহীন আসে। থতাহান মোর মুণ্ডে
দিঘল না করিস।
- অক্লাবা ॥ ধ-ধর্মরাজ, উপায় নেয়া লাজ বেলেয়া ধাবদিলু ঔহানাত তালকরে এয়া মোর
আঙেইহানে বারো বাঘমার্ক ফে-ফেইচম উহান করতগ ক-করে ফা-ফারে দিলতা।
- যমরাজা ॥ ফাল্গুনী, এমাটিক করে এগর গজে কিয়াকা অত্যাচার করলেতা ?
- ফাল্গুনী ॥ ধর্মরাজ, ইমা ইন্দলরে বাজার কানা বন্ করিক বোলতে খুড়া গিরক এগয় ঘরে
ঘরে গিয়া আমার বিরুদ্ধে টটরার বোললে, “শিক্ষিত এতায় সমাজহান মাঙকরলা,
বিশেষ এরে ফাল্গুনী এগ”।
- যমরাজা ॥ উতার পিসে আরতাতে কিতা করল ?
- ফাল্গুনী ॥ “বাজার বন্ধ অনি নাকরের” বোলে বোলে প্রচার করল আরো আমি হেইচা
করলাং। না হনতে না হনতে আমিও পারিল আহান করলাংতা ধর্মরাজ। আরাক
আকফুরুং বারো বুড়া বর আগরাংত রুপা অকলৌকরে লয়া আকগ জিলক
মালতীরে ঔগরাং লুহং দিল।
- অক্লাবা ॥ নি-নি-নিংশিং অইলু ধর্মরাজ, মোর জিলকর লুহঙর দিন ঔহান এ-এগয় নাই
বিয়াহান ভাগানিরকা কম লাকনা দিল থাং।
- মহাদ্রুণী ॥ ছিঃ ছিঃ ছিঃ— ফাল্গুনী এগতে কম পাপীগ নাসে ধর্মরাজ ! এগর শাস্তিহানতে—
- যমরাজা ॥ হে! এগর শাস্তিহানতে লোরা তপ্তা করে করে তিন বসর গারিগং বিধানি।
চিত্রগুপ্ত, এহান ইকর করপেখহানাত। নেইগা দূত, ফাল্গুনীরে জেলগত থইগা
বারো। বারো এরে অক্লাবারে যতন করে থইগা। তারে পুষ্পরথ আহানল
বৈকুণ্ঠত দিয়া পেঠানি লাগতয়।
- অক্লাবা ॥ উড়-উড় -উড়ক সালইক, বলিহারী-জয়-য- যমরাজার জয়।
- ফাল্গুনী ॥ বিপরীত লীলা! লীলাময় হরি! (কাঁদে-কাঁদে) ইমা বিষ্ণুপ্রিয়া, না দেখরিতা আমার
অরাহীন এতা।

(দূতে ফাল্গুনী বারো অক্লাবারেল প্রস্থান করলা)

যমরাজা ॥ হে চিত্রগুপ্ত! এবাকা বিষ্ণুপ্রিয়াসুতায় কবে কবে ডাহরতা মাত্।

চিত্রগুপ্ত ॥ (করপেখহান চেয়া) ধর্মরাজ, এবাকা ডাহানি থকসেতাই লেইখমসেনা, কুঞ্জলাল
বারো কোইরেং পণ্ডিতরে। (খানি উঠিয়া) দূত, তুমি এবাকা লেইখমসেনা, কুঞ্জলাল
বারো কোইরেং পণ্ডিতরে আনো। (দূতে লেইখমসেনা, কুঞ্জলাল বারো
কোইরেং-তিনগিরেল হোমেইতে)

এলাহান (আট্টিনাত)

কাল চিংখৈই কালহানাত

পূজা করতে দৌ

টেঙারা শিংটো লালয়া আজি।

আছিল মলয়া বৌ।

উষা গিথানকর মুক্‌সি দিয়া

মাঠিয়েইরী শৌ

পাহিয়ার জমহান খলকেয়াতে

আছিল বেলির পৌ।

মৌ জেলেয়ে পুরীজেলেয়ে

কেথক হানল মাঠিয়েইলা চুল,

অজাগ পেয়াও নাছতারা আজি

হাবি বনর ফুল।

মালতী— অ মালতী

এহান কিহান অইলে।

হাবি ফুলে নাছতে তিতে

তলে পড়িয়া থাইলে।

এসাদে লীলা করর

প্রভোও হে ভগবান,

মানুর তুল মান্না করিস্

আমারেও হাবিহান।

লেইখমসেনা ॥ (হোমেইতে) কতিদিন অইল, ঘোর কারাগর এগত
মেইঙাল না দেহিয়া আসুতা। আজিকার অমৃত পারা এলা এহানে গারিগ শীতল
করল পারা। মণিপুর ইম্ফাম বেলেয়া ডেইডেইহারা দিতারা বিষ্ণুপ্রিয়াসুতাক অস্তুরগ
জ্বি আগয় পুড়ের। আজি কতি বর্ষ গেলগা অতীতর আঁধার উরহানাত, তেব
পাছরে নোরারুরি এ জ্বালা এহান। এবাকাও দেখরি, মর্ত্যত আসি মোর কুলাঙ্গার

জিপুতে নিজর গৌরব পাথরিয়া মানুর গৌরবল ডাঙর অনি মনাসি। মর্ত্যর আর আর জাতে টেঙারারতায় পেয়া নিজর আকচুটিল জগতর মাঁ মানু অয়া উবা অইক বোলতে এবাকাও মোর জাতর আসি গিরিগিথানীরমা একতা নেই। সংকামে বুদ্ধি নেই, অসৎ কর্মত্ বুদ্ধির টেঙারা আকেইগি ধরতারা। লাক্চা করতারা অন্য জাতে, মানু বোলিয়া গণ্য না করানি অকরলা। কোনদ্দিন এতার আঁহিগি মেলতয়তা হরি।

কোইরেং ॥ হরি হইবীণু নু স্না ইবুঙো। কারী কারী লোল্ হইরীব যমপূরীদসু! নুঙাইতে হেং।
লেইখমসেনা ॥ তুমিল্ অ কুলাঙ্গার পণ্ডিতগ। ইচুমান আসত্ যমপূরীগত্, এবাকা পেয়া ভণ্ডামি
এরাদেনা নোরারলেতা ছিঃ।

কোইরেং ॥ য়েংবিরউ ধর্মরাজ, নিপা অসিনা ওঙলিব অংদা আসি।

যমরাজা ॥ তুমিল্ অই তুমি, এপেইন্তে কিতার কৌলি কররাইতা মোর মুঙে। হার না পারাই—
মি যে যমরাজা? (কয়েদী তিনগি জোর আতে উবা অইলা)

যমরাজা ॥ থাই ওঁসাদে; টটরলেই বেরা লাগতয় হারপেয়ো। (চিত্রগুপ্তর বেদে) মাস্তা
চিত্রগুপ্ত— এগির নাং কিহান?

চিত্রগুপ্ত ॥ পণ্ডিত এগর নাং কোইরেং, এগ লেইখমসেনা বারো এগ কুঞ্জলাল।

যমরাজা ॥ কার কিহান পাপপুণ্য মাতে যাগাতা।

চিত্রগুপ্ত ॥ পণ্ডিত কোইরেং এগয় সংস্কৃতত্ পারঙ্গদগ। পাপে পুণ্যর ওজন করলে এগরতা
পুণ্যর ফাল্লাহানায় নিয়াম ভরী অসে। কিয়াকা বোললে— জনম এহান বিষ্ণুপ্রিয়া
ঠার বেলেয়া খাইঠার এহান জবর টটরল। টটরানিও চুমকারতা নাগয়— জবর
মেংকরে দিল মানুগ। গীতা, ভাগবত, লীলা, মহাভারত, রামায়ণ আকতাও বাকী
নেই খাইঠারল না অড়াসেতা। শিষ্য শাখারেও কলাপ, মুক্তবোধ হাবিতা ওঁ ঠারল
বাগাদিল। দিবসহান লেহে পুণ্যবান মানু এগরে লেইরিক দেনারকা ডাকলা।
বিষ্ণুপ্রিয়া ঠারহান তাঁর ইমা ঠারহান অ থাইলেও ওঁহানরে ঠইগ য়ৌকরে আলী
পেইল—।

কোইরেং ॥ মধুরং মধুরং রাচি— ধর্মরাজগী স্না চরণদ নানাই ঐহানকনা হইজাগে।

যমরাজা ॥ মাত্ মাত্ পণ্ডিত গিরক।

কোইরেং ॥ হোই— নংমা দিবস অমদা লীলাগী আর্থ হইবদা নিপা অসিনা বিষ্ণুপ্রিয়া লোলনা
আর্থ হাল্লে। নানাই ঐহাকনা আপত্তি তৌজরে— “স্না য়াস্বুং, মিতেই লোলনা
আর্থ হাসবিরউ, বিষ্ণুপ্রিয়া লোল আসি য়ামনা কাল্‌লি।” নুপা অসিনা কক্‌তৌনা
সভা অদুদ। হাইয়ে— “ভাতেন্ততে হেবানিয়া ওঁতায় কঙালানাই।” অসি পাপী
নেস্তে হাইবিরউ?

মহাক্রমী ॥ হে লেইখমসেনা, হায়হান না নাগয়হান?

লেইখমসেনা ॥ হায়হান উকিল গিরক; নিজর জাতহান বানাপানা এহান বিচার লালইলেতে মোর আর টটরানিরতা কিস্তাও নেই।

মহাক্রমী ॥ বেশ! চিত্রগুপ্ত! আরতা কিহান কিহান পুণ্য আসে পণ্ডিত এগরতা মাতে যাগা।

চিত্রগুপ্ত ॥ মাতে যিংগা ছনেদিক— যত ইতি উৎসব, পালি সমাজে অ গেলগা, এরে লেইখমসেনা এগর দেহাদেহি বিষ্ণুপ্রিয়া ঠারল গীতা, ভাগবতর অর্থ তালকরতে পণ্ডিত গিরক এগয় সভান্ত উঠে গেলগা। এতার গজে সমাজর দলাদলিত গিরক এগ জবর বলী অয়া লাগেসিল। লেইরাপা গিরিগিথানীর কর্মকাসা অইলে ঔহান ভাগেদেনারকা ভাতপানী বেলেয়া গাঙে লেইকেয়ে বুলল।

মহাক্রমী ॥ ধন্য পণ্ডিত গিরক। (যমরাজার বেদে চেয়া) ধর্মরাজ, আর বিচার পাতিয়া কানা নেই। এগরে গোলোকে নেই, বৈকুণ্ঠত নেই দিয়া পেটাদিয়ারতা খালকরিক।

যমরাজা ॥ এবাকাতে লেইখমসেনার কীর্ষিকলাপ ছনিক্, চিত্রগুপ্ত!

চিত্রগুপ্ত ॥ খানিগ্গারা আগে ছনলাং, লেইখমসেনা এগয় বিষ্ণুপ্রিয়া ঠারহানরকা জানগ দেসিল। বিষ্ণুপ্রিয়া ঠারে নাটক-গারন লেংকরল— মণিপুর পতন, খুমেইল-মৈরাং।

মহাক্রমী ॥ না, না আর ছনানি না করল; এগরে হোভা ফামে থনা নাকরেসে। ধর্মরাজ— এবাকাতে রায়হান দিক।

যমরাজা ॥ বাসা, বাসা- আরাক আগরতা বাকী আসে চিত্রগুপ্ত। বাকী আসে শৌ এগর নাংহান কিহান? এগর করপেখহান ছনাতা চিত্রগুপ্ত।

চিত্রগুপ্ত ॥ এগর নাং কুঞ্জলাল। শৌ এগ জ্বি আগ আসিলগ প্রভু। তার মধুর ঝারগল ছদ্ধা আমার সমাজে নাগৈ, দুবার সমাজেও এলা দিয়া যাম নাং করেসিলগ। কনাকেস্তু পুরি মহাসভা বারো আর আর সভা অইবতায় তার লেম্পালে হারমোনিয়াম— এহানেই তার কামহান আসিলহান।

যমরাজা ॥ উতার পিসেদেতে!

চিত্রগুপ্ত ॥ ঔরে মানুএ পালটেগ করেসিলা রাজবাবুরেনা, ঔরে জবর চেংদেসিল ঔগ হৌদিনকার বিচারে। ঔগরে মানুএ মারলা ঔপেইত এগয় আগবাড়িয়া জঙ্গলর কোণ-কাঞ্চলেদে ঝাল-করতাল বারা বারা বিসারলগ। বারো এরে লেইখমসেনা গিরক এগর যত লেংকরা এলার পালা-‘মণিপুর পতন’ বারো খুমল-মইরাঙর এলা ঔতা দিলগ। মাতানিতে নাকরের প্রভু, এগতে লেইখমসেনার খউপাগ। বারো বিষ্ণুপ্রিয়া মণিপুরী জাত এহানর পরিচয় দেনারকা বোলিয়া বিষ্ণুপ্রিয়া মণিপুরী ঠারল রেকর্ড করল বারো রেডিয়তৌ এলা দিলগ।

যমরাজা ॥ বাসাতা চিত্রগুপ্ত, শৌ এচিলায় মহাসভা-মহাসভা বোলিয়া মাতের এহান।

এখুরুমকার মহাসভা লিংখাত করেসি এহানাত কুঙ্গ কুঙ্গ জবর চেংদেসিতা?

মহাদ্রুণী ॥ ঔগিরতাউ দিনহান বিস্তা অইল সাং ধর্মরাজ।

যমরাজা ॥ আঃ! ডিক্লেয়ার না করি।

(নারদর প্রবেশ)

নারদ ॥ নারায়ণ! নারায়ণ!! নারায়ণ!!!

(যমরাজা, মহাদ্রুণী, চিত্রগুপ্ত আসন এরেদিয়া উবা অইলা)

যমরাজা ॥ আহিক্ মুনিদেব, আসনহান পরিগ্রহ করেদিক।

নারদ ॥ নারায়ণ! নারায়ণ!! নারায়ণ!!! না ধর্মরাজ, মোর তিল্ আগ অবসর নেই।
চৌদ্দ ভূবন বুলানির কাম মোরতা। হে ধর্মরাজ, গিরকে বিচারে বহেসি মাহিতে
কাল আহান শুরয়া আরাক কাল আহান হোমেইতয় শয় নেই। তারো গিরকর
পুরী এগ আকফুরুং দেহিং বোলিয়া আহেসুতা। ধর্মরাজ, উবা অসি কয়েদী এগিরমা
কুংগ পুণ্যবানগ? কুংগ পাপীগ?

যমরাজা ॥ রায়হান দিয়া হদেইলু মুনিদেব। এগর নাং লেইখমসেনা, বারো এগর নাং
কুঞ্জলাল। বিষ্ণুপ্রিয়াবকা দ্ব্য'গিয়ে জান দেসিলা আরো এ দ্বিয়গী মহাপাপীগি।
বারো জাত হানর গজে জ্ঞানে অজ্ঞানে অত্যাচার করেসিল গিরক এগর নাং
কোইরেং পণ্ডিত; ডাঙর পণ্ডিতগ, মহাপুণ্যবানগ।

নারদ ॥ নারায়ণ! নারায়ণ!! নারায়ণ!!! অপূর্ব হোবা অসে ধর্মরাজর বিচারর রীতি
এহান। ঘোর কলির বিচার— এতারেহে সুবিচার বোলতারো নাই। যিংগা ধর্মরাজ,
ডিলনি থক নেই। নারায়ণ! নারায়ণ!! নারায়ণ!!! (প্রস্থান)

লেইখমসেনা ॥ ধর্মরাজ, নংসাং অইল, মর্ত্যত মোর বিষ্ণুপ্রিয়াবে বেলেয়া আহেসুগ। ইমা
বিষ্ণুপ্রিয়াবকা রৌরবতে কিয়াকা, মহারৌরব ভোগ করতও মি রাজী আসু। আমি
বভ্রবাহনর বংশ, পাণ্ডবসখা শ্রীকৃষ্ণর দাস আমি। ধর্মরাজ; মিঃ (কাঁদানির হকগল)
মিঃ, অতি সামান্য গঃ। ইমার পূজা লয় নাইল।

কোইরেং ॥ স্নায়াম্বুং, কাপ্পায়াদে। অসি পাপকর্মগী ফলনেদঃ।

(যবনিকা পতন)

২য় দৃশ্যহান বৈকুণ্ঠধাম

(লক্ষ্মী, নারায়ণ বহিয়া আসি। সেবারীয়ে শঙ্খ রহেইতারা, চামর দোলেইতারা, ধূপ
হেইকরতারা)

(পূজারীর এলা-ভজন)

নমো নারায়ণ নমো নারায়ণ
নমো নমো নমো দীনতারণ হে—
তি বিনে জগত ধনহীন
তি বিনে জগত প্রাণহীন
তি মালক, বাপক, উদাক, বেয়ক,
(প্রভু) তি হাবিগরৌও ধনজন ॥

জগত-পালক পরম ব্রহ্ম তি,
ধরেসত ব্রহ্মাণ্ড কোটি কোটি
অনাদি অনন্ত ক্ষীরোদ শয়ন
ভব ভয় ভঞ্জন কারণ হে ॥

(নারদর প্রবেশ)

নারায়ণ ॥ কিয়াকা আহিলেতা তি দেবর্ষি নারদ?

নারদ ॥ কিয়াকা আহিলুতা আংকরিয়ারতা প্রভো! জগত ব্রহ্মাণ্ড বুলানির কামহান দেসি
মোর গজে। ধর্ময় অধর্ময় কৌলি, প্রভুর জগত এহানাত্। ধর্মন্তঃ জিঙে অধর্মর
রাজ্যহান অইল জগত এহান। কোণে কাঞ্চলে অধর্ময় হিষ্ণাপার রূপহান ধরিয়া
আহৌ কোটি পাম্পল টিংদিয়া ব্রহ্মাণ্ডরে ছারখার করে নেরগা। আনন্দর সমুদ্রত
ভাহিয়া প্রভুরে আংকরিয়ার' কিয়াকা আহিলেতা তি দেবর্ষি নারদ!' কপালথি
নারদর জনমে শান্তিহান নেই।

নারায়ণ ॥ কিহান অসেতা মাত দেবর্ষি নারদ, ত্বরা করে। মি সুপ শান্তিহান না পেইলু। যেহান
অসে, থক্ক মাতিয়া অন্তরগ নুঙেই কর।

নারদ ॥ যমপুরীত বিচার অকরল যমরাজায়। মর্ত্যত কলিয়ুগ পড়েসে, কিন্তু যমপুরীত
পড়েসেতাই ঔতান্তঃ জিঙে ঘোর মহাকলি। পাপীর পুরস্কার, কিন্তুমান পুণ্যবানর
শাস্তি, নরকভোগ, এহান অসেতাই যমরাজার বিচার। ত্বরা করে এহানর
সিজিলহান না করেদিলে শয়নেই মহাপ্রলয় অইতয়।

নারায়ণ ॥ দেবর্ষি নারদ, তোরাংতঃ পৌএহান ছনিয়া মোর অন্তরগত নুঙেইপাহান নেয়ইল।

যেতাউ অক দেবর্ষি, এহানর যথাবিহিত তেন্মাম করতও।

নারদ ॥ এতা হাবি তোর লীলা প্রভো। দীন-তারণ, পতিত পাবন তোর নাংহান লেমেদে
মাঙনিত্ পড়িল।। যেহান করিলতা তেন্মাম কর, মি যাউরিগা। নারায়ণ। নারায়ণ
!! নারায়ণ!!!

(প্রস্থান)

লক্ষ্মী ॥ প্রভো। তোর তুল স্মোরতা বারো দেহা নহিতয় সাং।

নারায়ণ ॥ হিন নাপেই প্রিয়ে, মি তেন্মাম আহিতও। কামহানতে জবর লুবসে। যমরাজার
তুল' শয়নেই মোর কৌলী লাগতয়। বিচারর আসনহানাত্ বয়া অন্যায় অধর্ম
আচরণ করানি যমরাজার অধিকার নেই।

লক্ষ্মী ॥ হারপাউরী হাবিতা প্রভো। বিশ্বব্রহ্মাণ্ডর গিরকগ তি। জগতর হোভা হোভানেই
হাবি হারপারগ তি। তোর সৃষ্টিত মি লক্ষ্মীতে কিন্তু সামান্য আগ।

নারায়ণ ॥ না না প্রিয়ে। তি সামান্যগ নাগৈ। তি নাইলে মোর নারায়ণ নাঙ এহানর মূল্য
কিতাউ নাথার। তারো প্রিয়ে, তি নেই ফামে নারায়ণ মিও নেই হারপেইস্।

(যবনিকা পতন)

(যমদূতে গোকুল কীর্তনী, কুঞ্জরাজ, বিমলা, বৃষভানুরে আনলা; কুঞ্জরাজ নেতাগ,
বিমলা মিয়াণ্ডর বেশল', বৃষভানু জাতীয় প্রতীকগ)

(যমদূতে গোকুল কীর্তনীরে কীলবারি দিতারা)

বৃষভানু ॥ ভগবান! এমাটিকর অত্যাচার এহানতে। কুমপেইত থায়া দেহরতা।

যমদূত ॥ চীকারি নাদি, ভগবানতে বারো কুংগ? এরে সিংহাসনহানাত্ বহেদেসে ধর্মরাজ
গিরকেহে ভগবান নাই। তুমিল অয়া আতজোড় অয়া উবা অ এপেইত্।

বৃষভানু ॥ কিয়াকা তুমিল অইতওতা মি; ধর্মরাজ। তোর পুরী এগতে পাপর রাজ্যহান অসে
না! মি পারা জেলাশৌ আগর গজে যমপুরীগত্ আহেসু দিনেসু করে দিয়রাইগা
অত্যাচার এহান মর্ত্তত্ কোন দেশ আহানাত্ পেয়া না-নাঙসি। কিহরকা ধর্মরাজ?
মি কিসাদে পাপহান দুনিয়াত্ করেসিলু থাংতে? জরম অসু দিনেসু মোর জাতহানর
দুর্দশা দেহিয়া জুলিয়া পুড়িয়া আসিলুগ। পাপর রঞ্জ আগ পেয়া গারি এগত্ হোমা
নুৱারেসিল। ওহান অইলেতে কিয়াকা মোর গজে অর শাস্তি এহান? থিক তোমার
বিচারর গজে।

মহাদ্রুণী ॥ সাবধান! (সবয়া) পাষণ্ডী জেলাগ। কার মুঙে এসাদে টটরাউরীতা? এহান
মর্ত্ত্যদেশহান নাগৈ। পানিকাটাগ অয়া উবা অয়া থাক্।

যমরাজা ॥ মাস্তা চিত্রগুপ্ত ! এ জেলা শৌ এগয় কি কি পাপপুণ্য করেসিলীতা মর্ত্যত থাইতে ?
 চিত্রগুপ্ত ॥ প্রভো ! বিষ্ণুপ্রিয়ারমা এগ অসিলীতাই জ্বি আগ । কনাকেন্ত তেই মাতিরী— হনার
 জাত বিষ্ণুপ্রিয়াত জরম অসি আমি; বিষ্ণুপ্রিয়ার সভা এতা দেব সভা; বিষ্ণুপ্রিয়ার
 ঠার দৌর ঠার; বিষ্ণুপ্রিয়ার রকত আৰ্য্যর রকত; বিষ্ণুপ্রিয়ার ফিজেং আৰ্য্যর
 ফিজেং; বিষ্ণুপ্রিয়ার সামাজিক রীতি নীতি হাবিতা আৰ্য্যরতা । লেইরিক তামকরে
 তামকরে তেই এতা প্রচার করল । শিক্ষিত জেলাগ অয়া শাড়ী না পিখল । দশগরে
 বুঝেইল বোললে— “বিষ্ণুপ্রিয়া ইমা-ইন্দলর ফিজেং তলফুতি নাগৈ; আদত্
 পোষাকহান অসিলতাই— ঘাঘরা, খেলমাচির আঙেই বারো গারিগত্ ইনাফি;
 মণিপুৰে হমেয়া কুকী, নাগা আদি টেঙারার মানুর তুল সাময়া নিজর পোষাক
 বেললা । কর্মর বিপাকে হৌতার পোষাক অনুকরণ করিয়া নুৰা পোষাক লাগেইলা ।
 তেবো ঔহান পিসে জাতীয় পোষাকহান অইল থাংতে ঔহান বেলানি থক নেই ।”
 এতা বোলে বোলে তেই সমাজে প্রচার করল ।

যমরাজা ॥ আরতাও আসেতা ?

চিত্রগুপ্ত ॥ হাই প্রভো । বিষ্ণুপ্রিয়া ঠারে চিঠি, নিমন্ত্রণ হাবিতা ইকরল । মাতল বোললে,
 “পরর নকল করতারা ঔতা মানু নাগৈ, মনুষ্যরূপী বাঁদর ।

যমরাজা ॥ চিত্রগুপ্তয় মাতের এহান হাইহান, না নাগৈহান মাস্তা বৃষভানু !

বিমলা ॥ এহানর সাক্ষী আসু মি ধর্মরাজ ।

বৃষভানু ॥ তুমিল অ পাসণ্ডী, নারকী জেলাগ । কিসাদে মেইথং হানল সাক্ষী দেনাত্ উবা
 অসত্তা ? নিজর হনার জাতহানরে জাঙল পারা দিয়া মিয়াং জেলাগ অলয়া
 ঔগর বারো দেমাক চুটিহানতে ?

কুঞ্জরাজ ॥ সাবধান জেলা শৌগ; মর জিলকর গজে তি মর্ত্যত থাইতেও লাকনা
 দিলেগোনা ?

বৃষভানু ॥ লাকনা নাদিয়াতে ? খুড়া গিরকে সমাজর নিমক খেয়া সমাজরাং নিমকহারামগ
 হাজেসিলে ঔহানতে নিংশিং অরতা ? আর আর জাতরাং গিয়া বিষ্ণুপ্রিয়ার কিহান
 কিহান নিন্দা করেসিলে মনে নেই ?

কুঞ্জরাজ ॥ ঔহানতে আমি মণিপুৰে নেই আরো হে করলুতানাই । মণিপুৰর দোবাদে নানান্
 জাত— তানুর সমর্থন না পেইলেতে মিতে কিসাদে দেশর নেতাগ অনি
 পারতৌতা ?

বৃষভানু ॥ ছিঃ ছিঃ খুড়া গিরক, তুচ্ছ পারা নিজর সার্থরকা জাতহানরে রসাতলে দিলে; ঠার
 পোষাক হাবিতা বেললে । নিজর জিলক এরে বিমলা এগরে মিয়াঙ ঠারেও
 চিংকরে শাড়ি পিধুবেইলে । পরর থতাল আশ্বল খেয়া ছ্যাদ অরকো খুড়া গিরক ।

বিমলা ॥ না-গুজুরি বৃষভানু। মর্ত্যতও বারার বিরুদ্ধে আটেসিলে, এবাকাও যমলোকে
করৌরীতা?

বৃষভানু ॥ না করতু বিমলা! তিতে কিহানতে হারপাসত? বাপকর কুমন্ত্রণাল নিজর জাতহান
আলীপানা হিকলে। নিজর ঠার না জানলু বোলিয়া মানুর মুঙে কেথক করলে।
তিও বারো মানুগ? নেতাগ অলনিরকা বাপকে যে চালচলন করল, জিলক তিও
ঔসাদে চললেগ। নিজর জাতহান বোলানিয়ে আলীহানে দুরেই অইলাই মানু না
তুমি? পাহিয়াগওতে নিজর ঠার চাল-চলন না বেলতারা, জন্তুওতে নিজর ঠার,
স্বভাব না বেলতারা। তুমিতে ঔ জন্তু-পাহিয়ারাংত তলসো মানু না।

মহাদ্রুণী ॥ তুমিল অ জেলাশৌগ। (যমরে চেয়া) ধর্মরাজ! হারপেইলাং, কুঞ্জরাজ গিরক
এগ সমাজহান দ্বিকরত্ করিয়া সমাজর ঐজা হাবিতা বেলেয়া নিজর স্বার্থ
সিদ্ধিরকা অন্য জাতরাং বিষ্ণুপ্রিয়ার মান-ইজ্জত হাবিতা উৎসর্গ করেসিলগ।
জিলক বিমলাও বাপকর পরাদে নিজর জাতহান আলীপানা পারেসিলী। এ দ্বিয়গ
মিয়াম পুণ্য করেসি। তারো—

যমরাজা ॥ তারো মি হুকুম দিউরি, কুঞ্জরাজ নেতা গিরক এগয় জিলক বিমলায় লিশিং বসর
বৈকুণ্ঠবাস করতায়। দূত! তুমি তানুরে পুষ্পরথে তুলিয়া বৈকুণ্ঠ দিয়া পেঠানির
সিজিল করে দিয়ো। আরাক কথা আহান, কুঞ্জরাজ গিরক এগ মিয়াম পুণ্যবান্গ
অসে থাংতে মি পেলনিয়ে আকয়া 'পদ্মশ্রী' উপাধি এহান দিলু, বারো (কুঞ্জরাজর
বেদে চেয়া) আয় কুঞ্জরাজ, তোরে ফুলর মালা এডাল পিধা দিৎ। যাগা, তি হারৌ
হারৌ অয়া তোর জিলকর তুল বৈকুণ্ঠত যাগা।

(যমদূতে কুঞ্জরাজ বিমলারে নিলাগা)

□

[যমপুরি নাটকহান গিরকর বহুল চর্চিত নাটক আহান। পয়লা মঞ্চস্থ অসিল ১৯৬৫ ইংরেজিৎ মেহেরপুর লয়ার
মহাসভার হিঙ্গারী অধিবেশনে। ছাপিয়া নিকুলানি অকরলতা পঞ্চশ্রী ১৯ বসর পয়লা মারল জানুবারি ফেব্রুয়ারি
১৯৯৪এস্ত অকরিয়া পিসেকার সংখ্যা উতা]

चिं

অভিনন্দন উৎসর্গর উত্তরে

অতীতর আঁধার কুগল মাঙছে দিনর কথা নিংশিঙে আনলে বিষ্ণুপ্রিয়ারকা জবর দুঃখ আহান আহের। সর্বস্ব অস্ত বোলিয়া হারপেইতয় বোলতেও বিষ্ণুপ্রিয়ায় আজি পেয়া নিজরে হারপা' নুয়েইল। নিজর মেইথংহান নিজে নাদেহিয়ার বোলিয়া মেংশেলর প্রয়োজন আছে। ঔসাদে করে নিজর পরিচয়, গরিমা হাবিতা হারপেইক বোললে জ্ঞানর মেংশেল আকেইহান লাগের। আমারতা ঔসাদে মেংশেলর অভাব আছে। কিহানলো আমি দশগোর মুঙে পরিচয় দিতাং ? হুদা বক্রবাহনর নাতি নাতোল বোলিয়া দেমাক আকচুটিলো সাস্ত্রনার শেপ্ আকেই ছিটা গিললে চলতয়হান নাগৈ। যে গৌরবহানরে মনর নিভৃত নিকুঞ্জগোৎ ইতু করিয়া থছি, ঔহানর ঔনাপা ক্রিয়াকর্ম করিয়া আত্মশক্তি প্রকটিত করে পারলেহে আমার নরজন্ম সার্থক অইতো নাই। কিন্তুমান আমি নুওয়ারেছি; ক্রিয়াকর্ম না করেছি বোলিয়াই আমি নুওয়ারেছি।

আজিস্তঃ অকরে শতাব্দী ছহান আগে ক্ষমুল রাজত্ব থাইতে মণিপুরে শান্তদাস বোলিয়া সাধু আগো 'রামাউৎ' ধর্ম প্রচাররকা আঁহেছিল। ঔবাকা মেইতেই রাজত্বয় হেজিৎ উঙা বোলের সময়হান। ক্ষমুল রাজায় সাধুঔগোরে মাতল, “প্রভো! আমিতে বিষ্ণুপূজা করিয়ার মানু; তা'রো আমারে তি বিষ্ণুধর্ম দীক্ষা দিয়া যাগা।” সাধু ঔগোয় মাতলো, “ঔতাতে-হে মহারাজা, বিষ্ণুপূজা করে আহরাই গিরিগিথানী তুমি হাবি বিষ্ণুপ্রিয়া বোলিয়া বিখ্যাত অই।” “বিষ্ণুপ্রিয়া” উপাধির জন্মহান অইলতাই এসাদে। এতার আগে খুমল, মৈরাং, আঙম, লোয়াং এসাদে নাঙলো আমার বপাবপি ঔতা পরিচিত আঁছিল। এ কপাল থিপা বিষ্ণুপ্রিয়ার সেবারকা যে প্রচেষ্টাও অক, মি ঔহানরে অন্তরগলো সশ্রদ্ধ অয়া গ্রহণ করুরি। বারো সর্বস্ব অস্ত বিষ্ণুপ্রিয়ার সেবক ঔতারে মর আন্তরিক ধন্যবাদ জানাউরি। জয়তু শ্রীহরিঃ। ইতি—

১২।৪।৬০ইং

সেবকাধম— শ্রীজগৎ মোহন সিংহ
অধ্যাপক, নর্মালস্কুল, শিলচর।

(বানান পটানি নাসে)

সমাজরাং নিবেদন আকুচি

ছনারুপার ভেইবুনি বেয়াপা। আমি জগতর অন্যান্য জাতর তুলোও মান্না নায়া আছি, ইমেও কি-টেঙারার উলঙ্গ বর্ষর উতার তুলোও নাগৈ। জাতর শিক্ষিত অশিক্ষিত, গাবুরাপুয়েই, মৌ, পুরিজলেই হাবিয়ে ঠই আকগ অয়া সঙ্কল্প করিক— আমি ভারতর দশগর মুঙে বঙ্গবাহনর জিপুঞ্জিয়েই বোলিয়া ঔসাদে দেমাকল পরিচয় দিক। আমি রাজ্য না চেয়ার, চেয়ারতাই হুঙ্কা কিসাদে করে দশগর মুঙে নিজর পরিচয় আহানল উবা অনি পারবাংতা বোলিয়া আকফুরুম এবারার টে আরাক আকফুরুম ঔবারার টে এতা হাবির বারী খেয়া খেয়া আমি মরণ ফাঙেইলাং। আমার জিংতা দেহ এগরে মরাগ বোলিয়াও হাদি হাদিৎ ধারণা অর। মানুর তুলো মান্না অনি এবাকা পেয়াও নুওয়ারেছি আমি। আমার জাত হানরে মৈতৈ ভেইবুনিয়ৈ ইতিহাস লেক্করয়ার বোলিয়া সম্পূর্ণ মিয়াঙ ঠারাছি— এবাকাও হাদি হাদিৎ ঔসাদে ঘাই আকেইগিও দিতারা। রাজনৈতিক কুচক্রান্তল জাতহানরে মৈতৈর জাঙে বিকানিরকা আমার জাতর মাঝেই জ্ঞানীণ্ডী বিশ্বপ্রেমিক নিকুলেছি। তানুর স্বাথসিদ্ধি আর কতিমান থাইতয় থাং? তানুর আখুম্পা কথাং সমাজর দশ গিরিগিথানীয়ে বিভ্রান্ত অনি নিশ্চয় থকনেই কথাহান। জগতর হাবির তুলো মারূপ পাতেইক, আমার মৈতৈ ভেইবুনির তুলো জিঙে ঠইগ যৌকরিয়া বিপদ আপদে আকতা অয়া উবা অইক। কিন্তু ঔসাদে করানি ঔহান নিজর আত্মাগ পরার জাঙে বিকেয়া নাগৈ। সাধারণ কথা এচুটিরে যেগয় উপলব্ধির মাঝে আনানি না মনার, ঔগরে জিংতা মরাগ বোলিয়া মি মনাউরি। ঔসাদে জিংতা মরার দেহৎ জাগরণর এলা দিয়া, শ্রীকৃষ্ণ অর্জুনর জয়গীতি এলাদিয়া ঠই ভরা দিক, হোভা পথগ বেলিয়া রাঙা ফলগর লোভহানল কাঁটার বনেদে পথ লছি ঔতারে আতে ধরিয়া আল করিয়া আনিক।

(১) বিষ্ণুপ্রিয়া ঠারহানরে সরকারে স্বীকার করাণি ১৯৬১ ইংরেজী বসর এহানর হাদিৎ; (২) বিষ্ণুপ্রিয়া ঠারর প্রাইমারী লেইরিক জোগার করাণি; (৩) ছাপানিরকা রূপা জোগার করাণি; (৪) ফামে ফামে মাহ হান লেহে সভা করে করে সরকাররাং দাবী জানানি (৫)


বিষ্ণুপ্রিয়া সাহিত্য সভায় সক্রিয় অংশ লয়৷ সরকারৰ দৃষ্টি বাৰে বাৰে আকৰ্ষণ কৰাণি (৬) অসম সাহিত্য সভাৰ তুলো সংযোগ থনি এগ হাবিগ এবাকা আমাৰ মুণ্ডে পৰেছে কাম। হাবিগ দরকারী কথাহান অইলতাই গাঙগরর দশগিরিগিথানীৰে আন্দোলন এহানাং মরিক বোলিয়া লাওয়ানি। হাবি বিষ্ণুপ্রিয়ায় (কাছাঁড়ৈস্ত : ত্রিপুরা পেয়া) আকশাটে দাবী জানেইলে সরকারে আমাৰ ঠাৰ এহান নিশ্চয় গ্রহণ করতয়; ঔহান অইলে জাতহান জিংতা অইতই মান মর্যাদাল' থানা পারতাঙাই। চরর সাদানে সঙ্কোচল এ ঠাৰ ঔ ঠাৰ দিয়া দিয়া নকল মর্যাদা পানার অপমানজনক আচরণও যিতয়গা, আমাৰ মিয়াং ঠারেইতারা দল ঔহানও লাজে মুর নঙেইতায়। ত্রিপুরা রাজ্যত আমাৰ বিষ্ণুপ্রিয়া ঠাৰ চালানিরকা তাখেনর আন্দোলন, আসামে চালানির এপেইর আন্দোলন যোগ্যমং কৰাণি লাগতয়। আমাৰ উদ্দেশ্য দশগরে বুঝানি— আমি হুদা জিংতা অয়া নিংস্থা কৰিয়া আছি, এচুটির প্রমাণ দেহওয়ানিরকা আমাৰ আন্দোলন, আমাৰ কলাকৃষ্টি, প্রতিভা বুদ্ধি বিকাশরকা আমাৰ আন্দোলন— এতার গজে আর উদ্দেশ্য আকচুটিও নেই আমাৰতা। এ পথএগং শত বাধাবিঘ্নি আহক, ঔতারে লালয়া গুড়ানাশা কৰিয়া মুণ্ডেদে কাকেইহান কারতাঙাই। হে হনারুপার ভেইবুনি বেয়াপা, তুমি হাবিহান উঠ— লৌদেই হাবিহানে— জয় বক্রবাহনর জয় বোলিয়া, জয় ভারতর জয় বোলিয়া, জয় মণিপুরর জয় বোলিয়া, জয় বিষ্ণুপ্রিয়ায় জয় বোলিয়া। তুমি হাবিহানোরে এপেইং থায়া হমাদিউরি। জয়হিন্দ।

ইতি—

তুমার নুংসি ভেয়কগ
শ্রীজগৎ মোহন সিংহ
যোরহাট

৩/৪ /৬১ ইং

(বানান পটানি নাসে)



ভারতৰ তৎকালীন প্রধানমন্ত্রী শ্রী মুরারজী দেসাই ডাঙরিয়া গিরকরাং দিল্লীত
স্মারকলিপি দেনাং গেসিলাগা মহাসভাৰ প্ৰতিনিধিৱমা

বাঙেদেস্ত উবা অয়া : ১. শ্রীচন্দ্ৰকান্ত সিংহ (দিল্লী) ২. শ্রীমনোরঞ্জন সিংহ (সাধাৰণ সম্পাদক, মহাসভা)
৩. শ্রীযোগেন্দ্ৰ সিংহ (সাধাৰণ সম্পাদক, সাহিত্য পৰিষদ)
বাঙেদেস্ত বয়া : ১. শ্রী চন্দ্ৰমোহন পাটবায়ী (এম. পি) ২. শ্রী নন্দকিশোর সিংহ (সভাপতি, মহাসভা)
৩. শ্রী জগৎমোহন সিংহ (সভাপতি, সাহিত্য পৰিষদ)

জগৎমোহন সিংহ
জন্ম ১৩ ডিসেম্বর ১৯২০ ইংরেজিৎ কাছাড়
জিলাৰ মেহেৰপুৰ পৰগনাত ভকতপুৰ গাঙে
মৰণ ৭ জুন ১৯৮৫ ইংরেজিৎ
বাপক পণ্ডিত বাবু সিংহ
মালক শ্ৰীমতী তিলোত্তমা দেবী

কৰ্মজীবন :
অধ্যক্ষ,
শিলচৰ সরকারী বালক উচ্চতৰ মাধ্যমিক বিদ্যালয়
(১৯৭২-৮৩)

স্বীকৃতি :
১৯৮০ ইংরেজিৎ আসাম ৰাজ্যিক শিক্ষক পুৰস্কাৰ

সাহিত্য সংগঠন :
সাধাৰণ সম্পাদক (১৯৫৬-৫৮)
বিষ্ণুপ্ৰিয়া মণিপুৰী সাহিত্য পৰিষদ

সভাপতি (১৯৫৮-৮৫)
নিখিল বিষ্ণুপ্ৰিয়া মণিপুৰী সাহিত্য পৰিষদ

লেখকৰ আৰ আৰ লেৱিক :
The Bishnupriya Manipuris and
their Language 1976

ৱসমঞ্জসী ২০০৩
জুনাক পৰীৱ দেশে ২০০৫
দলান ইপুৰ কৰপেখ ২০০৯

কবি-সাহিত্যিক, নাট্যকার জগৎমোহন সিংহ (১৯২০-৮৫) স্বাধীনোত্তর বিষ্ণুপ্রিয়া মণিপুরীৰমা অমৃতর সৌ আগ। বিষ্ণুপ্রিয়া মণিপুরী গদ্য সাহিত্যর রূপকার আগ। নিখিল বিষ্ণুপ্রিয়া মণিপুরী সাহিত্য পরিষদর স্থপতিগ। গিরক বরাক উপত্যকা তথা অসমর নাংপালপা শিক্ষাবিদ আগ, গীতিকার আগ, সমাজসেবী আগ, ব্যক্তিত্বসম্পন্ন প্রতিভাধর মানু আগ। গিরক আজীবন নিখিল বিষ্ণুপ্রিয়া মণিপুরী সাহিত্য পরিষদর সভাপতিগ অয়া আসিল। গিরক বিষ্ণুপ্রিয়া মণিপুরী সাহিত্যর অন্যতম চালিকাশক্তিহান অয়া আসিল গেলগা শতিকার দ্বিতীয়ার্ধহান হাপদিয়া। কবিতা, সৌর কবিতা, ছড়া, য়ারি, লৌকিক য়ারি, প্রবন্ধ, রম্যরচনা, এলা, নাটক... হাবিতাং বিষ্ণুপ্রিয়া মণিপুরী সাহিত্যহানরে বুজ্জিল বরা করে দেসিল। গিরকর রচনা ফংকরানির টেংঠা বার তুলনাহীন গদ্যশৈলী বিষ্ণুপ্রিয়া মণিপুরী সাহিত্যরে নুৰা দিশা দেখুৱাসিল। আধুনিকতার যাত্রাপথেদে কত কাকেই আঙুৱা দেসিল। বর্তমান সংকলিত লেরিক এহানাং গিরকর রচনাশৈলীর নানান আঙ্গিক ফঙসে।

এ গ্রন্থ এহানর সংকলক তথা সম্পাদক কাঞ্চনবরণ সিংহ গেলগা দুহান দশক দরিয়া কবিতা চৰ্চা বার গবেষণামূলক কামর তুল জড়িত অয়া আসে। জন্ম ২১ ডিসেম্বর ১৯৮৪ আসামর করিমগঞ্জ জিলাৰ দুল্লভছড়ার পাতিয়ালা গাঙে। ২০০৮ ইংরেজিৎ গৌহাটি বিশ্ববিদ্যালয়েভ স্নাতকোত্তর। পেশাহান শিক্ষকতা। গিরকর প্রকাশিত লেরিক : নুৰা শতাব্দীর পৃথিবীৰে (২০০১), মেরাকে রইদ মেরাকে মেঘালা (২০১২), নরকে আকখুলাগই (২০১৩), ৩০০ কি.মি. (২০১৮)।



₹ 200/-

